



BIBLIOTECA NAZ.

Vittorio Emanuele III

XXV


B

65


NAPOLI















XXV.

B.

65.



PHILOSOPHIÆ, 2

A C

MATHEMATICÆ

TOTIVS

INSTITVTIO,

Cum Assertionibus disputatis, &  
vario genere Problematum.

*Ad usum Studioſæ Iuuentutis.*

Authore

P. PETRO GALTRVCHIO,

AVRELIANO, Societ. IESV.

PHYSICA VNIVERSALIS.



VIENNÆ AVSTRIÆ,

In Bibliopolio IOANNIS BLAEV,

M D C L X I,



3  
A V G V S T Æ

C O E L I

R E G I N Æ

M A R I Æ

V I R G I N I

D E I P A R Æ.



**N**ATURAM in votum  
afferimus, MARIA, sed  
quam ubique aut despicias,  
aut relinquis. Etenim ma-  
gna es miraculorum effe-  
ctrix, ipsaque maximum facta in naturæ  
miraculum, jam in ipso etiam conceptu  
prodidisti, quam nihil Tibi cum vulgari  
naturâ commune foret. Cessit & in natali  
naturæ vis, & sese victam confessa, infan-  
tem licet, adoravit ut Reginam. Mitto re-  
liquos vitæ gradus, quibus tam altè sub-  
ducta es, ut ne suspiciendo quidem natura  
quidquam viderit, præter evanescentem im-  
becillitatis suæ similitudinem. Quid loquar  
A 2 magnos

magnos partus? quid conceptum pronubâ  
 virginitate Filium? quid salvâ integritate  
 natum? Ipse adcò totus orbis, quid non in  
 Te semper vidit ac veneratus est supra natu-  
 ram? Abest à cæcis lumen, à claudis ingres-  
 sus, vox à mutis, color & succus à tabidis,  
 salus à morboſis; qui si tamen ad Te acces-  
 serint, sic Te duce atque auspice naturam  
 vincunt, ut quot trunca manus ac pedes,  
 quot membra è tholo Tuo consecrata pendent,  
 tot victæ naturæ trophæa sint atque insignia.  
 Et tamen Naturam in votum afferimus? Ita  
 ô Diva, & si clientes audis, meritò. Natu-  
 ram vincis ac superas, supplex ergo adit,  
 Tibique se submittit, quod non faceret, nisi &  
 majorem agnosceret, & victricem: honor &  
 potestas Principis, inferiorum obsequio coro-  
 natur. Naturam offerimus, sed ut quæ in-  
 choata sunt perficias, vitiosa emendes, im-  
 becilla corroboreſ, ſeneſcentia interpoles, om-  
 nia denique ſana præſtes atque integra.  
 Quid enim aliud vel uſquam Orbis ſolus  
 efficere, quæ in perditæ naturæ data es ſo-  
 latium, & in hoc unum creata, ut cùm na-  
 turam excepiffes & in antiquam aſſeruiſſes  
 nobilitatem, ea Tibi perpetuò addita, Tuo-  
 que cultui mancipata eſſet?



5

P R Æ F A T I O  
DE NATVRA PHYSICÆ.

**P**HYSIKA nomen trahit à Græco φύσις, quod naturam significat. Est enim scientia de rebus naturalibus; seu de corpore naturali ut sic; quia disputat de naturâ, causis, & proprietatibus corporis naturalis, sive in communi, quæ est Physica universalis; sive in particulari, quæ est Physica particularis; ut Physica De Mundo, De Generatione, & Corruptione rerum naturalium, tum De Animâ.

Ac corpus hoc loco sumitur pro substantiâ corporeâ; diciturque corpus naturale, quatenus est compositum ex *naturis*: quod naturæ nomen, ut statim explicabimus, tribuitur materiæ & formæ, quæ sunt partes, seu principia intrinseca corporis naturalis.

Notandumque est, in hoc genere Philosophiæ maximè esse obscurum Aristotelem; ideoque suos Physicorum libros vocat Acroamaticos seu Auscultatorios, &c. Physici auditus; quod propter abstrusam, & reconditam doctrinam quam continent, sola lectione, aut privato studio comprehendi non possint, sed periti

interpretis operam exigant , attentissimosque, & studiosissimos auditores.

Hanc autem Physicam universalem divido duas in partes ; quarum prima est , De Naturâ, seu Essentiâ, & De Principiis tum intrinsecis , tum extrinsecis corporis naturalis. Secunda est, De Proprietatibus ejusdem corporis naturalis.

Porro , quod nonnulli objiciunt, facultatem hanc complecti multa saltem , quæ in opinione solum posita sint, & utramque in partem agitentur probabiliter ; quam ob causam non videatur mereri nomen *scientiæ*. R. Fieri hoc loco denominationem à parte potiori. Multa enim traduntur in Physicâ , quæ videntur esse prorsus demonstrativa. Iis verò qui secus sentiunt, respondimus in Logicâ , *Disput. 4. cap. 6. sub finem*,

METHODVS  
ET  
INSTITVTIO  
PHYSICÆ VNIVERSALIS,  
PARS PRIMA  
De Natura & Principiis Corporis naturalis.

TRACTATVS PRIMVS  
De principiis intrinsecis, & de natura,  
seu essentia corporis naturalis.

DISPVATIO I.  
De principiis intrinsecis corporis naturalis.

CAP. I. *Notiones quædam principii, & corporis naturalis.*

**P**incipium aliquando idem est ac initium rei alicujus. Aliquando significat id vel unde res est, vel unde fit, vel unde cognoscitur; *5. metaph. 1.* Quamobrem alia dicuntur *principia cognitionis*; illæ nimirum propositiones quæ sunt primæ, & per se notæ, ex quibus solent inferri per discursum multæ aliæ cognitiones; *ut habetur in Introduct. ad Logicam. cap. 2.* Alia autem sunt *principia*

*pia rei*, ea nempe sine quibus res esse, aut concipi seu definiri non potest. Sic fundamentum & terminus dicuntur principia relationis: sic terminus à quo, & ad quem in omni mutatione, sunt ejus principia: sic maximè causa omnis, ut pote dans esse rei, vocatur ejus principium. Quo pacto ex principiis alia sunt *intrinseca*, alia verò *extrinseca*.

Principia extrinseca dicuntur ea quæ sunt extra rem principiatam; id est, quæ non sunt partes ipsius compositivæ. Ita *finis*, propter quem res esse, aut fieri intelligitur, est principium illi extrinsecum. Ita & *causa efficiens*, à quâ per veram productionem procedit effectus: ut suo loco fusiùs explicabitur.

Principia verò intrinseca, sunt partes aliquod totum componentes, ac proinde *intra ipsum* veluti inclusæ; solentque etiam appellari *elementa* compositi. Quæ quidem ut intelligantur de substantiâ corporeâ, seu de corpore naturali, cujusmodi est *homo*, *equus*, *lignum*, *ignis*, *aër*, &c.

Suppono 1. Substantiam corpoream, in eo differre maximè à substantiâ immateriali, qualis est Angelus, quodd illa sit composita ex substantiis partialibus, quæ totalem ejus essentiam constituent; quarum altera dicitur *materia prima*; altera autem *forma substantialis*. Sic homo constat ex corpore, tanquam ex materiâ, tum ex animâ rationali, tanquam ex formâ, quæ illi dat *esse* hominis, estque principium facultatum atque operationum quæ sunt hominis propriæ. Et verò ubi homo interiit, factâ animæ separatione à corpore, tunc manifestè deprehenditur, quemadmodum anima priùs cum corpore ipsam hominis essentiam totalem

con-

constitueret. Idemque istud patet ex quavis aliâ corruptione & transmutatione substantiali : ut quando lignum in ignem convertitur , peritque *esse* ligni. Tum enim necesse est, ut aliquid substantiale ipsius ligni remaneat , ne dicatur lignum prorsus annihilari, & consequenter ignis produci ex nihilo : illud autem quod remanet , semperque in eo casu perseverat incorruptibiliter , vocatur *materia prima* , ut jam dixi , peritque tantum ipsi adjuncta pars substantialis , quam *formam substantialem* nominant, quæ constituebat Tò esse ligni , eratque principium earum omnium proprietatum quæ sequuntur *esse* ligni ; ajuntque materiam & formam illam esse principia intrinseca , seu partes compositivas ligni : quo pacto etiam corpus & anima rationalis sunt principia intrinseca , seu partes ex quibus constat homo : quod perinde statuendum est de quavis aliâ substantiâ corporeâ. Jam verò

Suppono 2. Substantiam hujusmodi corpoream vocari *corpus* , & quidem *corpus naturale* ; quatenus sic dicitur constare ex materiâ primâ , & forma substantiali, quas vocant naturas.

*Notabis* enim 1. Variam esse hujus vocabulâ significationem. Et quidem sumitur ut plurimum pro essentiâ rei cujuscunque ; qualis dicitur natura Angelica, humana, equina, ignea , &c. Tum pro universalitate rerum ; pro collectione causarum naturalium ; pro rerum temperamento proprio, viribusque agendi propriis. Verum hoc loco sumitur tantum pro primo ac radicali principio earum operationum , aut proprietatum quæ sunt in substantiâ corporeâ completâ ; ut in homine, in equo, in lapide, &c. Sic forma substantialis per quam constituitur

lapis in esse lapidis, est principium emanativum illarum proprietatum & qualitatum, quæ reperiuntur in lapide; quo etiam pacto est principium illius gravitatis & motus, per quem deorsum tendit. Ita in animali, anima est principium *activum* earum operationum quas exercet. Ut enim vegetativa est, dicitur causa nutritionis, & augmentationis: ut sensitiva, est causa sensationum, tam internarum, puta imaginationis, quàm externarum, puta visionis, auditionis, &c. Item, sic est causa motus progressivi, causa motuum appetitus sensitivi, ut amoris, odii, tristitiæ, gaudii, &c. At materia prima est principium emanativum quantitatis, per quam habet extensionem partium, eamque mensurabilem, divisibilem, impenetrabilem, &c. Huc adde materiam quoque illam esse principium *passivum* multarum operationum, aut motuum qui in ea recipiuntur, & sine quâ non forent: ut nutritio, & augmentatio, aliæque id genus quæ propria sunt corporum animalium.

Paucis verò ista omnia comprehendit Aristoteles, ubi sic naturam, prout hoc loco sumitur, definit: *Est principium & causa primò & per se, & non secundum accidens, motus ejus in quo est: seu corporis illius quod constituit, & in quo includitur ipsa natura.*

*Notandumque est 2. Motum hîc sumi non tantùm pro motu propriè dicto, qualis est motus localis, tum motus intensionis, & augmentationis, sed etiam pro motu emanationis, unde procedunt proprietates ab essentiâ; item & pro illo genere mutationis quam seorsum afferunt novæ actiones ortæ ab ejusmodi principio intrinseco; ut diximus de nutritione,*

tionem, de intellectione, de sensatione, & aliis id genus.

Not. 3. Hic sermonem fieri de motu simul & de quiete, ubi particula (¶) debet intelligi in sensu disjunctivo, quatenus natura dicitur principium vel motus in iis quæ moventur, vel quietis in iis maximè, quæ acquisito termino, in ipso positivè consistunt; quomodo lapis hæret proprio in loco, resistendo etiam motui contrario.

Not. 4. Naturam dici principium & causam. In quo differt à *privatione*; quam sequenti capite ostendemus esse quidem principium, non autem causam.

Not. 5. Dicitur principium *primò ¶ per se, ¶ non secundum accidens*. Ut hoc pacto significantur materia & forma substantialis, quæ sunt prima principia & radicalia illius motus. Quod non convenit potentiis accidentalibus, v. g. gravitati, aut levitati, à quibus oritur quidem proximè, sed non *primò & radicaliter*: nec sunt in corpore naturali, ut partes ejus substantiales, sed tantum *secundum accidens*. Ita etiam ubi medicus per artem sibi propriam seipsum sanat, ars illa non est nisi secundum accidens, principium sanitatis in ipso medico: neque enim ars illa in nobis est, nisi ut forma accidentalis. Atque ex istis quidem

Colliges 1. Naturam hoc loco tum materiæ, tum formæ substantiali convenire, quandoquidem sunt partes substantiales ex quibus constat substantia corporea, quam *completam* appellant, ad distinctionem ipsius materiæ, aut formæ, quæ non sunt nisi substantiæ *incompletae*, id est, *partiales*, de se nimirum ordinatæ ad componendam totalem. Item

*Colliges 2.* Totalem hanc substantiam ideo vocari *corpus naturale*, quia sic constat ex *naturis*. Neque huic corpori naturali, aut substantiæ completæ cuicunque, puta Angelo, convenire hanc *naturæ* definitionem; quia non sunt partes compositi substantialis, in quo sint principia motus ipsi proprii. Item,

*Colliges 3.* Quemadmodum corpus naturale differat à corpore artificiali, puta à cathedra, quæ per artem accepit cathedræ formam ejusmodi. Neque enim motus deorsum, aut alii naturales motus, sunt ab ipsâ *v. g.* cathedrâ, quatenus est corpus artificiale, sed tantum quatenus est corpus naturale; seu lignum compositum ex materiâ & formâ substantiali.

*Notabis* verò ultimò; Objectum quidem materiale Physicæ esse corpus istud naturale: siquidem, ut initio aiebam, disputat de naturâ, proprietatibus & causis corporis naturalis. At proprium & formale ipsius objectum, aliud etiam non est, quàm idem corpus naturale, quatenus naturale est; nempe, quatenus constat ex materiâ & formâ substantiali, ut sunt principia illarum proprietatum quæ considerantur in corpore naturali. Nec ferè discrepant ii qui docent considerari à Physicâ ipsum corpus naturale, *quatenus mobile est*, seu quatenus habet in se principium motus. Naturale enim ut sic, idem est ac habens in se hujusmodi principium motus & quietis: immò non habet principium motus & quietis, nisi quatenus naturale est: ergo prius est naturale, quàm mobile; atque idcirco *naturale ut sic* potius statuendum est pro objecto formali Physicæ.



CAP. II. *Quot sint principia intrinseca corporis naturalis, tam compositionis, quam generationis.*

**D**ico I. In doctrinâ Aristotelis, materia prima, & forma substantialis sunt principia compositiva corporis naturalis; vel ut alii loquuntur, sunt elementa, seu principia compositionis. Prob. Quia sunt partes essentielles ex quibus constat. Illisque convenit definitio principiorum, ex 1. *Phys. Principia sunt ex quibus primò & per se, non per accidens, res naturales constituuntur.* Item, *Qua neque ex sese, neque ex aliis, sed ex ipsis omnia fiunt*; eo nimirum sensu, quodd omnia corpora naturalia fiant ex materiâ & formâ substantiali: nec materia illa, & forma fiant, seu componantur ex se invicem; id est, non habeant aliam aut materiam, aut formam sui constitutivam: alioquin fieret processus in infinitum.

*Notandumque est contra antiquos; non esse unicum duntaxat rerum omnium principium constitutivum, seu compositivum; puta, ignem, aut aquam, &c. Quia sequeretur inde nullam esse inter corpora naturalia diversitatem essentialem: neque verò etiam ex uno v. g. igne, aut ex alio pariter elemento prodirent tam diversæ proprietates, & operationes. At*

*Not. 2. Plura non esse quàm duo allata: quia sufficiunt; nec alia assignari possunt. Vnde meritò ab Arist. rejiciuntur veteres, qui principia alia, imò & infinita statuebant. Quomodo Epicurei docebant omnia constare ex atomis undequaque fortuitò concurrentibus; sicque adversabantur doctrinæ de providentiâ Numinis, Item, rejicienda est quoque illorum*

sententiâ, qui supponunt elementa, nempe ignem, aërem, terram & aquam, esse incorruptibilia; tum ex ejusmodi elementorum particulis duntaxat componi omnia corpora naturalia. Quod in Tract. De Mundo refutabimus. Disp. De Mundo Element. c. 1.

*Iam* verò ut agam de corpore naturali in fieri, seu de illius generatione: Supponendum est generationem hoc loco, esse actionem saltem passivam, unde corpus naturale intelligitur generari. Illa autem generatio viâ quidem naturali perficitur; quatenus materia prima jam præexistens sub aliquâ formâ substantiali, recipit dispositiones ad aliam, sub quâ postea existat, vetere deperditâ. Quare generatio naturalis, id est, quæ fit secundum ordinem naturæ, vocari solet transmutatio substantialis, quia sic materia prima transmutatur, quasi transeundo à non esse formæ alicujus substantialis, ad esse illius. Istudque Tò non esse formæ substantialis in materiâ jam dispositâ, propriè appellatur privatio, quia est carentia formæ in subjecto apto, seu disposito ad illam formam. His autem suppositis.

*Dico* I I. In doctrinâ Aristotelis 1. phy. c. 6. Principia intrinseca naturalis generationis, quatenus est transmutatio quædam, sunt materia prima, tanquam subjectum; deinde forma substantialis, ut terminus ad quem; ac deniquè privatio, ut terminus à quo. Prob. Quia illa dicuntur principia rei alicujus, sine quibus intelligi aut definiri non potest; ut initio monui. Atqui sine illis tribus generatio naturalis definiri, aut explicari non potest, quatenus est transitus seu transmutatio. Primò enim debet esse subjectum quod transit. 2. Terminus à quo  
fit

fit transitus. 3. Denique terminus ad quem fiat ; nam & iste est terminus à quo specificatur generatio, siquidem ex eo generatio dicitur vel humana, vel equina, quæ terminatur ad formam vel humanam, vel equinam, &c.

*Not. 1.* Illa generationis principia dici interna, non quidem ipsi generationi, quia non magis per proportionem ipsi interna sunt, quàm relationi subjectum & terminus ; aut motui terminus à quo & ad quem : debent igitur dici principia generationis interna solùm corpori naturali ; siquidem vel sunt ipsius intrinsecè constitutiva, ut materia & forma : vel quia privatio non alibi ut in subjecto reperitur, quàm in materia, quæ corpori naturali est intrinseca. Neque hîc agitur nisi de generatione quæ fiat viâ naturali, id est, materiâ jam præexistente sub formâ, & quæ disponatur ad formam novam. Alioquin dum creatur cœlum v. g. privatio in eo casu locum non habet.

*Not. 2.* Illa etiam dici principia *corporis naturalis in fieri* ; quia corpus naturale non generatur viâ naturali, nisi quatenus producitur forma substantialis in materiâ dispositâ, quæ consequenter transit à non esse illius formæ, ad ipsius esse. Verùm

*Not. 3.* Privationem hoc pacto non principiare, nisi ut terminum à quo, non autem ut elementum ; quia non est pars corporis naturalis. Item, sic dicitur principiare per se ; quia per se intelligi non potest illa generatio, sine privatione ut termino à quo. Cum autem scribit Arist. privationem habere se tantùm per accedens ad corpus naturale, tum sumit corpus naturale in factò esse. Item,

*Not. 4.* Ab Arist. prima principia dici *contraria*

traria & quidem prima contraria. Sed accipien-  
dus est tantum pro formâ & privatione. Nec  
agit nisi de contrarietate latè sumptâ, prout re-  
peritur quoque inter positivum & negativum.

### CAP. III. Solvuntur objectiones.

**O**bjec. 1. Quod non principiat realiter, non  
potest esse principium entis realis. Atqui  
talis est privatio; quia non est ens. *Neg. Ma.*  
Sic enim privatio principians tantum negativè,  
est nihilominus principium corporis naturalis,  
ut terminus à quo; sicque auget numerum prin-  
cipiorum, non quidem positivè, sed negativè  
saltem.

*Inst. 1.* Non principiat realiter & positivè. *C.*  
Ergo solum per rationem. *N. Conf.* Quia prin-  
cipiat negativè nemine cogitante.

*Inst. 2.* Non posset explicari quandonam  
principiaret: ergo non principiat. *Prob. Ant.*  
Neque enim principiat ante generationem,  
quia nondum forma producitur; neque post  
generationem, quia jam forma producta est;  
neque in instanti generationis, quia tunc simul  
esset cum formâ cui opponitur; quod implicat.  
*R.* Principiare in instanti generationis per sui  
desitionem, seu desinendo, vel per primum non  
esse sui.

*Inst. 3.* Tunc non existit privatio. *C.* Ergo  
tunc non potest principiare: alioquin pariter  
diceretur posse principiare, etiam quando cor-  
pus est in facto esse, quanvis tunc non existat.  
*Dist.* Non principiat quando non est absolute,  
sed quando non est desinendo; seu quando pri-  
mò non est.

*Inst. 4.* Quod nunquam fuit, non principiat  
desinendo; nam desinere alicujus rei, suppo-  
nit

nit illius esse. C. Atqui nunquam fuit privatio. *Quod sic probant* : quia tunc tantum esse potest , quando subjectum est aptum. C. Atqui non est aptum , nisi quando habet ultimam dispositionem ad formam : tunc autem generatur forma , cum qua nequit consistere privatio. *Dist.* Subjectum non est aptum perfecte & ultimo nisi quando est ultima dispositio. *Tr.* Antea non est aptum inchoative. N. Dico enim toto eo tempore esse aptum , & habere privationem , quo disponitur ad formam. Vides igitur quemadmodum satisfiat illi difficultati , nempe quomodo , & quando principiet privatio.

*Obje.* 1. Forma recedens tam deberet etiam dici terminus à quo generationis , quàm privatio : ergo sic plura essent principia generationis quàm tria. R2. Iuxta doctrinam Aristotelis debere hic fieri solum mentionem termini à quo proximi & immediati , quanvis de facto forma recedens possit quoque dici terminus à quo saltem remotus. Item sola privatio est terminus à quo per se ; nam intelligi absolute non potest generatio formæ in materia , quæ non transeat à non esse formæ ipsius , ad esse ejusdem , etiam non recedente formâ vetere , saltem per absolutam Dei potestatem ; quamobrem forma recedens est tantum terminus à quo per accidens. Item , in doctrinâ Aristotelis , *per accidens* est v. g. igni , quod generetur ex materiâ præexistente sub ligni formâ : cum generari possit ex materiâ sub aliis formis præexistente. At *per se* est , quod fiat ex *non esse* ignis.

*Inst.* Illud tantum dicitur terminus à quo in generatione , quod expellitur vi formæ advenientis. Atqui sic forma verus solum expellitur ; nam illud solum proprie expellitur , cui  
con-

contrariæ dispositiones producuntur ab agente. *Dist. Ma.* Quod expellitur vel positivè, vel negativè, quod privationi convenit; istudque sufficit.

*Objic. 3.* Totum ipsum quod positâ novâ formâ substantiali generatur de novo, est etiam terminus ad quem generationis. Ergo perinde ac forma debet dici principium illius. *R.* Formam esse terminum ipsius proximum; item & specificativum tam generationis, quàm corporis ipsius geniti; ideòque solùm hîc habetur ratio illius.

*Objic. 4.* Non potest aut intelligi, aut esse corpus naturale sine unione materiæ cum formâ. Ergo illâ unio debet accedere ad numerum principiorum internorum. *Dist. Ant.* Non potest intelligi sine unione tanquam conditione. *C.* Tanquam parte constitutivâ, quæ consequenter sit propriè principium. *N.*

*Objic. 5.* Generatio intelligi non potest sine causa generante. *C.* Ergo causa generans est etiam principium generationis. *Dist. Intrinsicum. N. Extrinsecum. Tr.* Nam hîc agitur solùm de principiis intrinsicis.

Quod etiam ajunt, non fieri generationem naturalem sine præviis dispositionibus; unde inferunt eas debere quoque annumerari principiis generationis. *R.* 1. Eas non pertinere ad generationem, nisi præsuppositivè; non autem formaliter. Item, *R.* 2. Eas tenere sese ex parte materiæ; nec proinde constituere principium ab eâ diversum, quatenus in generatione naturali, debet esse materia disposita.

## DISPUTATIO II. DE MATERIA PRIMA.

### CAP. I. *Natura materia prima.*

**S**I materia illa nudè consideratur, & præcisè tantùm secundùm propriam entitatem, vocatur *materia prima*; aut materia remota. Alioqui, si consideratur ut affecta est certis dispositionibus in ordine ad formam aliquam in se recipiendam, vocari solet *materia secunda*.

*Dico* autem I. Materia prima est substantia incompleta seu partialis, quæ formam substantialem in se tanquam in subjecto recipiens, cum eâ constituit corpus naturale; puta hominem, equum, arborem, lapidem, ignem, aërem, solem, &c.

*Notandum* enim est, nec materiam hominis v. g. debitis affectam dispositionibus; nec ejus animam, esse hominem, sed eas tantùm esse partes ex quibus componitur seu constituitur homo. Et sic de aliis. Item,

*Not.* 2. Solùm ejusmodi compositum dici *substantiam completam*; nam quæ entia de se ordinata sunt tanquam partes ad aliud constituendum, vocantur *incompleta*.

*Not.* 3. Materiam primam sic in genere suo causare corpus naturale; nempe recipiendo in se formam substantialem. Etsi enim dicatur quoque causa subjectiva formarum, tam substantialium, quàm accidentalium; hac tamen ratione formas substantiales non causat, nisi ut totum constituat. Dicitur verò causa formarum saltem materialium, quatenus illæ naturaliter

liter saltem existere nequeunt, nisi in materiâ tanquam in subjecto recipiantur; unde & ab eâ dicuntur *sustentari*. At anima rationalis quia spiritualis est, potestque de se naturaliter existere, & operationes sibi proprias, nempe rationales, exercere extra omnem materiam; ideo est independens à materiâ ut *sustentante*; non tamen ut *recipiente*; cum enim sit essentialiter forma corporis naturalis constitutiva, munus illud præstare non potest independentem à materiâ in quâ recipiatur, & quam informet.

*Not. 4.* Ex dictis in doctrinâ Aristotelis, constari duplicem materiæ primæ definitionem; quarum altera est *negativa*; altera autem *affirmativa*. Negativa est, quæ naturam materiæ primæ explicat per negationes; ut cum ait materiam ex qua fit v.g. homo, equus, lapis, &c. *Non esse quid*, id est, non esse hominem, equum, lapidem, aliâque id genus corpora naturalia, quæ sola propriè & simpliciter appellantur *quid*; quia habent quidditatem seu essentiam completam. Item ait, de se illam *non esse aut quantam, aut qualem, sed tantum in potentiâ aut ad quantitatem, aut ad qualitatem, aliâque accidentia*, quibus denominetur aut quanta, aut qualis, &c. Scribitque D. August. materiam primam, ubi tantum per negationes hoc modo cognoscitur, *cognoscendo ignorari secundum id quod est positivè*; quanvis nihilominus ita *ignorando cognoscatur* aliquâ ratione; nam & ipse Deus à nobis cognoscitur viâ negationis, cum asserimus eum non esse ens corporeum, finitum, &c.

Affirmativa autem definitio explicat naturam materiæ primæ secundum id quod est positivè. Ut cum ajunt *Esse subjectum primum ex quo*  
*per*



*per se, & non per accidens fit corpus naturale.* Nam est ejus pars substantialis, & ea quidem subjectiva, quia corpus naturale non constituit, nisi per modum subjecti, recipiendo in se formam substantialem. Additque Arist. *esse illud ultimum in quod abit corpus naturale, ubi corrumpitur.* Nam v. g. ubi lignum in ignem transmutatur, nihil ex ligno remanet nisi materia prima.

Dico consequenter I I. Natura materiae primae est *pati*, seu recipere in se formas; unde & vocari solet *ens potentiale*, seu *potentia passiva*. Prob. Quia hoc est proprium illius munus; differtque maximè in eo à formâ substantiali, quodd hæc materiam actuando, suam causalitatem exercent respectu compositi; materia verò formam in se recipiendo.

Notandumque est 1. Materiam primam vocari *puram potentiam passivam*; non eo sensu quodd in composito non habeat propriam entitatem, eamque actu existentem; vel ut vocant, *actum entitativum*. Nam etsi in genere substantiæ sit imperfectissima, suam nihilominus habet substantialem entitatem, verè & realiter corporis naturalis constitutivam, & quantitatis per quam illud extensum est ac physicè divisibile, emanativam: ut postea exponam. Quod autem est pars realis compositi, & proprietatis realis emanativum, non potest non esse reale, & actu ens. Eo igitur sensu duntaxat dicitur *purâ potentia passiva*, quodd nullum subjectum actuare queat, cum sit subjectum primum, ab aliis potius actuabile. Item, quodd in constituendâ essentia corporis naturalis, propriam causalitatem non exercent, nisi recipiendo in se formam substantialem. Ac

Not. 2. Potentiam illam passivam vocari ab alijs

aliis *gremium*, & *sinum* materiæ primæ, unde recipiat formas. Quanquam illa potentia passiva non est aliquid distinctum ab ipsâ entitate materiæ. Et si enim potentiam activam à causâ efficiente vulgò distinguant philosophi, non idcirco necesse est distingui passivam à subjecto recipiente, cum pauciora requirantur ad patiendum, quàm ad agendum. Conf. Quia si materiæ primæ opus foret potentiâ aliquâ realiter distinctâ ad formas recipiendas; haberet quoque opus & aliâ ad potentiam hanc recipiendam; & sic daretur processus in infinitum.

*Not. 3.* Materiam primam certo genere dispositionum affectam, hoc modo ad certam specie formam substantialem determinari, quæ vulgò dicitur *potentia materia proxima*, ipsique est accidentalis; quia materiæ primæ perinde est determinari ad hanc, aut ad aliam formam. Et verò si nudè, & secundum se consideretur, habet potentiam universalem & indifferentem ad quasunque formas, quæ vocatur *potentia remota*; estque ipsi essentialis, & necessaria. Quare cum unaquæque res appetat naturaliter propriam perfectionem; ita materia certis affecta dispositionibus, & ad certam specie formam determinata, dicitur illam appetere, seu naturali propensione in illam ferri, illamque exigere: alioqui nudè considerata, non unam potius, quàm aliam cujusunque generis formam postulat; qui vocatur *appetitus universalis*, atque *indifferens* ad quamcunque formam; sequiturque ad potentiam ipsius materiæ universalem atque indifferentem: quæ mox ostendam.

CAP. II. *Materia prima incorruptibilitas, & dependentia à formis substantialibus.*

**S**uppono materiam primam in generatione naturali non produci, totamque esse ab initio mundi creatam, & eandem perseverare sub variis formis substantialibus: Et verò quandoquidem illa subjectum non supponit, quia est primum omnium subjectum, non potest produci nisi per *creationem*, quæ vires agentium naturalium superat; estque actio Dei propria; ut tractatu sequenti explicabo. Ergo non potest produci in generatione naturali. Item nihil est naturaliter generabile, nisi quod corruptibile est. At

*Dico I.* Materia prima est naturaliter incorruptibilis. Prob. Quia ut docebam cap. I. superioris Disput. Illa remanet semper tanquam subjectum commune formæ corruptæ, & de novo genitæ, ubi v. g. lignum transmutatur in ignem. Alioquin sequeretur lignum annihilari prorsus, tum ignem sic naturaliter produci ex nihilo, quod repugnat. Deinde non posset afferri ratio cur fiat major ignis ex majore ligni copîa quæ in ignem conjicitur, si lignum secundum omnem sui entitatem substantialem desineret; neque enim ex eo fieri posset major igni accessio. Quod autem sic manet incorruptum; non potest non esse naturaliter incorruptibile. Et verò alioqui non posset esse subjectum commune generationum omnium.

*Objic.* Materia prima in generatione dicitur mutari. C. Quia transit ab *esse* unius formæ, ad aliud. Ergo sic corrumpitur. *Dist.* Corrumpitur subjectivè, quatenus hac ratione est subjectum corruptionis, uti & generationis. C. Non autem

autem corrumpitur terminativè, quatenus sit terminus corruptionis, ipsaque esse desinat.

*Inst. 1.* Illa vulgò dicitur esse principium corruptionis: neque enim res corporeæ sunt corruptibiles, nisi quia constant ex materiâ. Ergo à fortiori est corruptibilis. *R.* Non esse principium corruptionis aut generationis, nisi purè passivum, ipsūque etiam de se indifferens ad formam corruptibilem, aut incorruptibilem; nec forent de facto corpora corruptibilia, nisi de facto haberent subiectum ejusmodi passivum corruptionis. Quanquam ipsa corruptibilitas non oritur formaliter, nisi à formâ substantiali, quæ materiæ unitur solùm defectibiliter, nempe suppositis dispositionibus, quæ per vires agentium naturalium effectivè destrui non possunt.

*Inst. 2.* Dependet in suo esse ab existentia formæ corruptibilis, siquidem existere in rerum naturâ non potest sine formâ. Ergo est corruptibilis, & corrumpi de facto deberet deficiente omni formâ. *R.* Non alio modo dependet à formâ, quàm quia de se ordinatur ad constituendum corpus naturale per unionem sui cum formâ substantiali. Cujusmodi dependentiam ab ipsâ materiâ potest vicissim habere & forma incorruptibilis, putà anima rationalis, salvâ omni incorruptibilitate naturali.

*Inst. 3.* Sequeretur eandem numero materiam quæ est in Petro, maximè apud anthropophagos, reperiri posse in Paulo à quo fuisset voratus Petrus: & sic eadem fieret materia Pauli. Quomodo ergo in resurrectione propriam unusquisque materiam resumeret? *R.* Quod à nobis comeditur, minimâ solùm ex parte converti in nostram substantiam, reliquum abire  
ut

ut plurimum in excrementa. Sicque ex Dei providentiâ debere fieri, ut ne eadem materia unquam futura sit duorum hominum, nisi fortè minimâ ex parte aliquâ; unde patet solutio ad allatam hypothesim.

*Inst.* 4. Si materia prima est de se incorruptibilis, sequitur formam substantialem corruptibilem ab eâ superari in perfectione naturæ.

*Dist.* Secundum accidentalia ejusmodi. *Transf.* Non autem secundum essentialia. Sic enim forma est actus & principium operationum quæ reperiuntur in corpore naturali, quod materiæ non convenit.

*Dico* I I. Etsi materia prima de se est incorruptibilis, non potest tamen viâ naturali existere absque formâ substantiali. *Prob.* Quia materia prima de se, & essentialiter est ordinata ad formam in se recipiendam: habetque modum essendi proprium (qualis explicatur in *Metaphysicâ. Tract. 1. Disp. 3. cap. 4.*) per quem non existat connaturaliter nisi sub formâ substantiali. *Confir.* Quia non aliam ob causam corruptio unius formæ, est generatio alterius, unde consequenter nunquam de facto aliqua materia sit absque formâ; quod enim ita se habet, non potest non fieri per leges naturæ necessarias. Iam verò quod juxta hanc assertionem docent;

*Dico* I I I. Quandoquidem materia prima existere naturaliter saltem non potest sine formâ substantiali; consequens est, ut formam hujusmodi quantum est de se appetat, pro naturali rerum omnium inclinatione ad propriam perfectionem. Item, & ex eodem appetitu, secundariò saltem, refertur ad dispositiones accidentales, sine quibus forma in materiâ nec recipi,

nec conservari potest. Nam ad accidentia alia, quales sunt formæ artificiales, ut rotunditas in ligno; respectum & appetitum habet neutrum, seu indifferentem. Sed

*Not. 1.* Materiam nudè consideratam habere appetitum indifferentem hujus aut illius formæ, sive corruptibilis & sublunaris, sive incorruptibilis & cœlestis; sive nondum corruptæ & naturaliter producendæ, sive jam corruptæ & supernaturaliter solùm reproducibilis, cum de se postulet tantùm esse sub formâ substantiali, qualicunque tandem modo in eâ producat, hoc enim illi per accidens est. Et verò ut materia prima sit commune formarum, ac generationum omnium subjectum, debet ex naturâ suâ esse ad quamcunque indifferentem; si enim foret ad aliquam determinatam, non posset illam viâ naturali deponere, ut novam susceperet. Item

*Not. 2.* Materiam hanc jam aliqua formâ substantiali affectam, aliam absolutè non appetere, sed potius sub illa quasi quiescere. Frustra enim esset ille appetitus; quia formam non appetit, nisi quia de se est ordinata ad constituendum corpus aliquod naturale; quare obtento fine illo, nihil est cur novam appetat, nisi conditionatè, id est, ex hypothesi quòd illa expellatur. Nec dicas, ideo vulgò ajunt esse illam principium & causam corruptionis, quia pro suâ veluti inconstantia & mutabilitate, quam habet formam respuit, ut succedat nova. R. Novam non appetere nisi prout novis affecta est dispositionibus, per quas illius appetitus incipiat determinari ad aliam.

*Dico IV.* Etsi materia prima non existat connaturaliter, nisi sub formâ substantiali, potest

potest nihilominus absolutè conservari à Deo sine omni formâ. Prob. contra Thomistas. Quia hoc nullam involvit contradictionem. Nec valent objectiones Thomistarum nisi adversùs eos qui docent existentiam esse actum quendam realiter distinctum, qui *Toti*, aut formæ duntaxat, primò & per se communicetur; nec materiam existere nisi per existentiam formæ substantialis. Sed ultimâ hujus Tract. Disp. c. 4. & 6. 5. ostendemus nullum esse totum ejusmodi realiter distinctum à partibus collectivè sumptis; ipsamque materiam primam habere propriam sibi existentiam & essendi modum.

*Obje.* Sequeretur existere à parte rei individuum aliquod nullâ in specie entis determinati; siquidem materia secundùm se, neque est homo, neque ignis, neque aliud corpus naturale. R. *Nego hanc sequelam*: esset enim in specie entis determinati incompleti, seu substantiæ incompletæ.

*Notabis* igitur non debere necessariò suppleri aliquem effectum formæ substantialis circa materiam, ut sola extra omnem formam conservetur in rerum naturâ. Item

*Not. 2.* Quodd eo in casu acciperet à Deo & modum essendi per quem ad statum illum determinaretur. Istudque per proportionem debere admitti in formâ.

*Dico* enim V. Contra eosdem Thomistas, posset pariter forma substantialis etiam materialis existere extra omnem materiam. Prob. Quia istud non magis repugnat, quàm quod docet Christiana Fides de accidentibus Eucharisticis, quæ nimirum existunt extra omne subjectum, cùm tamen à subjecto non minùs dependeant, quàm forma substantialis.

*Objic.* Anima v. g. equi existens extra omnem materiam, operaretur independentem à materia : ergo spiritali modo : ergo ex eo diceretur forma spiritalis : quia illa dicitur esse forma spiritalis, quæ operatur independentem à materiâ. Atqui falsum conf. ergo & antecedens. R2. Probabilius est quòd in illo statu operari non posset, defectu facultatum organicarum, quibus careret ; nec impossibile est substantiam creatam constitui in eo statu, in quo non posset operari. Item, in illâ hypothese, anima equi non definiret esse materialis ; quia de se est substantia materialis, cum ordine ad operationes & proprietates omnes materiales ; sic enim habet & partes entitativas ; potestque suo modo fieri formaliter quanta, &c.

CAP. III. *Materie primæ unitas specifica, cum propriâ Quantitate.*

**D**ico I. Materia prima ubique est ejusdem speciei, sive in corpore sublunari, sive in cœlesti. Prob. Quia in iis non apparent signa ulla diversitatis specificæ. Ergo hæc diversitas admitteretur sine ullo rationis fundamento. Conf. De sublunari : quia alioqui non esset subiectum idoneum transmutationum naturalium ; nec posset naturaliter fieri v. g. ignis ex ligno, si materia ignis deberet esse diversæ speciei à materiâ primâ ignis. Conf. De cœlesti : ex eo quòd vulgò ajunt sacræ scripturæ interpretes ; Deum secundâ die creationis fecisse firmamentum, deinde postea cœlos alios, aut astra, ex aquis. Unde consequens est, ut materia illa cœlorum sit ejusdem speciei cum materiâ quæ est sub formâ hujus aquæ elementaris.

*Notandumque* est, Aristotelem loqui de materiâ



teriâ proximâ , cum ait , sublunarem non esse ejusdem rationis cum cœlesti. Item , cùm ait illa tantùm habere materiam communem quæ transmutantur , tunc materiam communem non accipit pro eâ quæ sit ejusdem , aut diversæ speciei ; sed tantùm pro eâ quæ potest reperiri tam sub unâ , tum sub aliâ formâ ; & sic fieri multis corporibus naturalibus successive communis.

*Objic.* Quæ materia ex naturâ suâ est subjectum corruptionis & generationis , differt specie ab eâ quæ talis non est. C. Atqui materia cœlestis de se non est subjectum ejusmodi ; contra autem materia sublunaris. R. De se utramque materiam non exigere ut sit , vel non sit subjectum formæ corruptibilis , aut incorruptibilis ; cùm potius de se ad utrumlibet sit indifferens. Vnde materia sublunaris perinde posset fieri materia solis , si Deus formam substantialem solis in eâ disponderet. Nec cœli idcirco dicuntur incorruptibiles , quia talem materiam habent , sed quia formas habent cum materiâ unitas indefectibiliter , id est , cum dispositionibus quæ per naturale contrarium destrui non possunt. Quare simpliciter negandum est quod supponunt adversarii , materiam primam in sublunaribus esse principium & radicem corruptionis , cùm de se illam non exigit , neque refugiat.

*Inst.* Non colligimus unitatem specificam in sublunaribus , nisi ex transmutatione : ergo illud statuere nequimus de materia cœlesti , quæ substantialem transmutationem non patitur. R. N.

*Ant.* Nam quantitas est etiam proprium signum materiæ primæ. Atqui ejusdem rationis quantitas utrobique reperitur. Et verò

**Dico II.** Ut qualitas de se consequitur ad formam, ita quantitas per quam corpus redditur extensum, divisibile, & impenetrabile; quantitas, inquam, est proprietas specifica materiæ primæ. Prob. Quia ubique sequitur illam materiam, & cum eâ reciprocatur; quod est signum accidentis proprii. Item specialem habet cum illâ materiâ proportionem; cum perinde activitatem non habeat, sitque instar subjecti immediati respectu aliorum accidentium materialium, quæ maximâ saltem ex parte in corpore naturali existunt.

*Notandumque* est consequenter, contra Thomistas, quantitatem non aliunde quàm à materiâ primâ procedere emanativè. Probat. Quia omnis proprietas fluit emanativè à proprio subjecto. Quidni ergo & quantitas? Quod etiam confirmatur in libro De Generatione, ubi agitur de resolutione ad materiam primam. Item

*Not. 2.* Materiam primam non habere aliud genus activitatis præter illam quantitatis emanationem; nam assignari non potest.

*Obje.* Materia prima non esset pura potentia, si esset hoc modo activa. R. Iam supra explicui quemadmodum dicatur pura potentia passiva.

*Inst.* Quantitas vulgò dicitur esse proprietas corporis. Ergo sequitur ad esse substantiæ corporeæ, & quidem completæ. R. Propterea statuimus quantitatem sequi ad materiam; cum hæc etiam materia sit corporis in esse corporis seu substantiæ materialis completæ constitutiva. Idem enim est esse corporeum, & esse materiale. Ergo ab eodem principio est corporeum, & materiale, unde constituitur corpus.

*Nota.*

*Notabis* enim, in serie prædicamentali *corporeitatem & incorporeitatem* esse differentias divisivas substantiæ; tum, secundum nostrum intelligendi modum, constitui in *esse corporis* per *corporeitatem*; quo pacto Angelus constituitur in *esse substantiæ incorporeæ* per *incorporeitatem*. Quemadmodum autem ista denominatio *incorporei* in Angelo non petitur ab aliquâ formâ physicâ, sed tantum ab *incorporeitate*, quæ est veluti forma quædam metaphysica, ita per proportionem nec *esse corporeum* in corpore petitur nisi à differentiâ *corporeitatis*, quæ differentia radicale principium sui aliud non habet quàm materiam. Nam aliud nihil est *esse corporeum*, quàm *esse materiale*; nec *esse materiale* petitur aliunde quàm à materiâ. At quavis inferiores differentiæ, & inferiora genera petantur tum à materiâ, tum simul à formâ physicâ, ut tradidi in *Metaphysicâ, Tractat. 1. Disp. 5. c. 5. de Genere*; non est necesse ut idem contingat in superioribus; quod per se patet de *incorporeitate*.

*Notandum* verò est ultimò, quantitatem, ut proprietas est materiæ, de se vulgò appellari *interminatam*, quia certam sui configurationem, certosque terminos non accipit, nisi à causâ per quam disponitur ad generationem novæ formæ substantialis.

## DISPUTATIO III.

DE

## FORMA SUBSTANTIALI.

CAP. I. *Natura, Divisio, & productio  
formæ substantialis.*

**F**orma interdum sumitur pro figurâ ; aliâs pro habitu corporis & pulchritudine ; aliquando pro quacunque perfectione sive substantiali , sive accidentali. Hic autem sumitur pro eo genere substantiæ partialis , quæ materiæ primæ adveniens , ipsamque actuans seu informans , cum eâ constituit corpus naturale , talis , vel talis speciei ; quod supra ostendebam ex transmutatione substantiali. Confir. Quia alioqui non posset assignari principium diversitatis specificæ & essentialis inter corpora naturalia , unde etiam fluere proprietates ; item , nec assignari posset unde aqua calida v. g. sese ad proprium frigus reduceret. Huc adde ex Concilio Lateranensi , hominem constitui in esse hominis per animam rationalem , tanquam per formam propriè informantem : quod à pari per proportionem de aliis æstimandum est. Iam verò consequenter

*Dico I.* Hanc afferri posse definitionem formæ substantialis. Est actus primus substantialis materiam primam informans , & cum ea constituens essentiam corporis naturalis sub tali , vel tali specie , estque principium operationum , ac proprietatum specificarum quæ in eo reperiuntur. Dicitur *actus primus* , quia primò & per se intenditur à materiâ ; neque ullæ prærequiruntur

tur dispositiones in materiâ, nisi in ordine ad formam substantialem, cum quâ duntaxat constituit corpus naturale. Item dicitur *actus primus*: quia est primum principium proprietatum, atque operationum, quæ specialiter tribuuntur corpori naturali. Ne quid dicam de iis proprietatibus quæ oriuntur à materiâ.

*Notandumque* est, eam dividi in materialem, & spiritualement, qualis est sola anima rationalis. Materialis dicitur, quæ habet proprietates solum materiales, qualis est divisibilitas, dependetque à materia in esse, & conservari. At materialium aliæ sunt incorruptibiles, ut in corporibus cœlestibus; aliæ corruptibiles, ut in sublunariis; ex quibus aliæ sunt formæ rerum inanimatarum; aliæ animatarum, & propriè vocantur *anima*; suntque etiam istæ vel solum *vegetativa*, ut formæ plantarum, vel *simul vegetativa, & sensitiva*, ut in brutis animantibus. Item

*Not. 2.* Formam omnem substantialem produci in materiâ tanquam in subiecto recipiente; producit inquam, in materiâ, siue per creationem, siue per educationem. Sola anima rationalis dicitur creari, quia producit à Deo in materiâ, independenter ab ipsa materiâ ut sustentante, quemadmodum exposui superiori Disput. cap. 1. Materiales omnes dicuntur educi ex sinu, seu ex potentiâ passivâ materiæ, quatenus in ea producantur tanquam in subiecto, non solum ut recipiente, sed etiam ut sustentante. Quanquam

*Not. 3.* Educationem hoc loco non esse sumendam propriè, sed tantum ex communi usu philosophorum. Alii enim huius vocis etymologia nimis addicti, supponunt formas substantiales præexistere formaliter, & quasi delirare

intra substantiam materiæ, quæ accedente causâ efficiente, veluti foras prodeant, educanturque. Sed cum Aristotele contra antiquos,

*Dico* I I. Formæ substantiales hoc modo non præexistunt, neque à materiâ sic emanant. Prob. Quia suam sententiam non probant adversarii. Ergo gratis confingitur. Item ex eâ sequeretur existere simul innumerabiles formas in iisdem materiæ partibus, quia educi ex illis possunt; ergo simul perinde contrariæ dispositiones & accidentia contraria in summo gradu simul existerent: quod per se repugnat. Item, sequeretur nullum esse causæ efficientis influxum, sed tantum ad illius præsentiam formas emanare ex materiâ; quod falsum est: nam potius ab ipsâ causâ efficiente procedunt effectus, & in eâ virtualiter continentur; ut suo loco exponam: ac proinde materia formas non continet, nisi passivè illas in se à causâ efficiente recipiendo.

C A P. II. De *varietate, aut multiplicitate formarum substantiarum in eadem materiâ primâ.*

**S**uppono duplex esse genus corporis naturalis. Aliud quod vocant *homogeneum*, cujus videlicet partes omnes sunt ejusdem rationis, & denominationis: ut aqua, ignis, lapis, &c. Nam omnes partes v. g. aqua, sunt aqua: aliud verò est *heterogeneum*, cujus partes sunt diversæ rationis & denominationis. Ut corpus vivens, putà humanum. Alia enim dicitur *caro*, alia *os*, alia *cerebrum*, &c. Suntque istiusmodi partes in vivente *simpliciter* heterogenæ, cum de se habeant illam diversitatem, tanquam instrumenta quædam, in ordine ad diversas animæ operationes. Nam aliæ sunt heterogenæ duntaxat *secundum*

*eundem quid*, ut in lapide Porphyrite, ubi una dicitur unius coloris, alterius autem altera: vel in ligno, cujus alia est calida; alia verò frigida. His igitur suppositis,

*Dico I.* In unâ eâdemque materiâ primâ corporis homogenei, unica solùm est forma substantialis, secundùm easdem partes. Prob. Quia frustra forent plures. Item

*Dico II.* In eodem corpore naturali, puta in homine, ad diversos gradus essentielles, aut ad diversos gradus viventis explicandos, non est opus nisi unicâ formâ substantiali, seu animâ. Prob. Quia frustra essent plures. Quodd enim homo dicatur *corpus*; non est opus aliquâ formâ corporeitatis propriâ, materiæ primæ coævâ, ut docuit Avicenna: siquidem in fine superioris disputationis ostendebam quemadmodum ratio corporeitatis sit à solâ materiâ, tanquam à principio radicali. Nec dicas, tam homo deberet dici *spiritualis*, ob animam ipsi propriam quæ spiritualis est. *Negatur.* Quia dum anima rationalis corpus informat, illi materiales duntaxat effectus communicat; præstando nimirum vices animæ vegetativæ, ac sensitivæ.

Item, ab eâdem numero animâ sunt diversi gradus viventis; quo pacto in homine *anima rationalis* eadem, est principium non tantùm ratiocinandi, sed etiam & vegetandi, tum sentiendi: nec repugnat diversas illas perfectiones in eâdem numero animâ contineri: ergo frustra supponerentur aliæ animæ in eodem v. g. homine. Immo, quanvis non est expresse definitum, unicam solùm existere animam in homine, ut scribit Pererius in *Gen. lib. 4.* Toletus tamen *lib. 2. de An. q. 7.* docet esse erroneum, aut valde periculosum in Fide, si quis quacunque

ratione plures admiserit, cum Ochamo, & aliis Nominalibus. Videre est autem in Metaphysicâ, *Tract. 1. Disput. 3. cap. 2.* quæ spectant ad diversitatem graduum essentialium in eodem individuo. Præterea verò

*Dico III.* Forma substantialis non potest alteri formæ substantiali ita subordinari, ut unum per se cum illâ efficiat. Prob. Vt enim proprium est materię subjici formæ, seu ab eâ informari; ita ex opposito proprium est formæ substantialis informare, seu actuare materiam, non autem, ut instar materię cujusdam ab aliâ formâ saltem substantiali actuetur, seu informetur; etsi quasdam accidentales formas in se recipiat. Sic enim, saltem oppositorum istiusmodi, hæc debet esse opposita ratio, & in eo sequi regulam oppositorum communem. Item, ex regulâ communi, quæ inductione manifesta est, non potest fieri unum per se ex actu, & actu ejusdem rationis, putà ex uno actu essentiae, & ex alio actu essentiae; sed tantum ex potentiâ & actu ejusdem ordinis, ut v. g. ex materiâ & formâ substantiali: ergo sic forma substantialis uniri non potest alteri formæ substantiali, ut unum per se cum eâ constituat. Confir. Quia forma substantialis de se est terminus, seu actus ultimus essentiae corporeæ, unde & ipsa essentia corporea constituitur in *esse* talis speciei ultimæ; neque enim alius ejusmodi actus essentiae assignari potest: ergo de se non est ulterius actuabilis per aliam formam substantialem. Quo pacto jam dixi ex doctrinâ Fidei, sic hominem constitui in *esse* hominis per animam rationalem, ut nihil amplius desideretur ad complementum ejus essentielle; quod secus eveniret, si de se iterum secundum animam esset actua-



actuabilis per aliam formam substantialem. Neque aliam ob causam vulgò negant Philosophi posse duas naturas completas in unum per se coalescere, ut hircum & cervum in hircocervum; sicque olim à SS. PP. refutati sunt hæretici, qui docebant naturam humanam cum naturâ Divinâ in Christo coalescere in unam naturam; cum in eo mysterio fiat tantummodo unum per se substantiale in unitate personæ.

*Obfic.* Forma accidentalis, puta quantitas, formas alias accidentales quæ sunt materiales in se recipit, ut constat in ipso V. Eucharistiæ mysterio. Ergo pariter, saltem per Divinam potestatem, forma substantialis poterit esse aliarum ejusmodi formarum substantialium subjectum. *R. N. pari.* Quia quantitas de se est quasi virtus materiæ, ut eâ mediante recipiat alia accidentia materialia, quamobrem potentiam ipsius materiæ passivam imitatur.

Iam verò, etsi forma substantialis, etiam de potentiâ Dei absolutâ non possit alteri formæ substantiali ita subordinari tanquam subjectum, ut unum per se cum eâ efficiat,

*Dico* tamen I V. Contra Thomistas, plures formæ substantiales per Divinam potentiam absolutam possunt simul immediatè informare materiam eandem secundum easdem partes, & cum ea constituere diversa composita substantialia, seu diversas essentias completas. Quo pacto per proportionem, plures formæ accidentales, ut albedo & calor, eandem materiæ partem afficiunt, unde cum albedine constituitur album; cum calore, calidum: & sic de aliis similibus formis accidentalibus. Prob. Quia hoc nullam involvit contradictionem; nec magis est absolutè impossibile, quàm id quod jam agebamus

mus fieri naturaliter in formis accidentalibus; aut quod ajunt vulgò Theologi de eâdem naturâ creatâ à tribus simul personis Divinis assumptibili; sic enim triplici modo, per triplicem substantiæ actum actuaretur. Atque ita merito credimus illius rubi, qui Moyfi apparuit, materiam simul extitisse sub formâ ligni & ignis, unde simul esset ignis & lignum. Ita si anima equi & leonis simul immediatè ponerentur in eâdem materiâ, efficeretur simul equus & leo, &c.

*Notandumque* est, illa composita fore nihilo minus inadæquatè saltem, seu secundùm formas substantiales distincta realiter. Quamquam

*Not. 2.* Non idcirco composita illa singula propriam sibi figuram & partium conformationem retinerent, aut connaturali modo operari possent; quia repugnat corpus idem simul variis subinseesse figuris, & terminis, qui inter se opponuntur indivisibiliter. Alioquin possent ea servare accidentia quæ oppositionem ejusmodi inter se non habent.

*Objic.* Materia prima sub unâ formâ substantiali haberet potentiam perfectè actuatam, & completam. Ergo ulterius non esset actuabilis. *Dist.* Haberet perfectè completam, nec esset actuabilis naturaliter. C. Supernaturaliter. N.

*Inst. 1.* Forma alia substantialis sic adveniret enti completo. Ergo sic faceret tantùm ens per accidens. *Dist.* Quod advenit enti completo prout completum est, vel secundùm illius actum complementem, putà si forma substantialis diceretur alteri advenire. C. Sed toti adveniret solùm secundùm ipsam immediatè materiam, prout incompleta est saltem supernaturaliter. Ita, in sententiâ D. Thomæ, si Pater uniretur hypostaticè Humanitati Christi, illam actuaret tantùm præ-

præcisè secundùm se, non autem ut est jam subsistens per Verbum.

*Inst. 2.* Eadem illa materia sic dependeret simul totaliter à diversis formis substantialibus, id est, simul tota ab illis informaretur. *Concedo* id fieri posse supernaturaliter; quomodo per proportionem & plures materiæ simul penetrativè positæ, ab eâdem formâ substantiali simul informari possent.

*Inst. 3.* Si duæ simul animæ rationales idem corpus informarent; cuinam esset in resurrectione illud attribuendum, ut esset particeps aut beatitudinis cum anima beata, aut damnationis cum damnata? R. In eo casu, qui est præter communem providentiam institutam à Deo, fieret particeps beatitudinis cum beatâ, si Deus eâ conditione obedientiam ad mandata imperasset: aut secus, prout libuisset Deo definire.

*Dico præterea V.* Non modò per absolutam Dei potestatem, & supernaturaliter, sed etiam viâ naturali plures formas substantiales simul in eâdem materiâ primâ secundùm easdem partes reperiri in corpore animato. Quod sequenti capite ostenderetur.

*Dico VI.* Quantitas multiplex, aut plura alia accidentia ejusdem rationis, ad formam substantialem dispositiva, aut cum iis naturaliter connexa, puta calores ejusdem intensiõis, non possunt quidem simul existere in eadem parte subjecti. Quia frustra essent; non enim possent illi subjecto conferre diversos effectus formales. Quod autem frustra est, non potest fieri à naturâ; siquidem non agit, nisi ex sapientissimâ determinatione causæ primæ; sub quâ etiam determinatione non agit nisi necessariò. Quæ commodiùs exponentur sub finem disputationis

nis de *Quantitate*, ubi de *intensione Qualitatis*.

*Dico VII.* Illud posset fieri supernaturaliter; unde subjectum idem, per duplicem quantitatem pedalem *v. g.* redderetur formaliter non quidem bipedale, sed *bis pedale*. Atque ita per mille calores ut unum, redderetur millies calidum ut unum, &c. Prob. Quia hæc nullam involvunt contradictionem.

### CAP. III. De formis partialibus.

**H**ic loco maximè congruit quæstio de formis partialibus, quam paucis expedio, ut magis constet de habitudinibus formarum substantialium ad materiam primam. Supponimus igitur in corpore simpliciter heterogeneo, quale est corpus vivens, inexistere animam, seu formam, quam *totalem* appellant, unde scilicet corpus universum animetur. Dubitant verò, num præterea requirantur aliæ substantiales formæ *partiales*, quibus singulæ partes organicæ in suo esse constituantur. *Exempli causâ.* Num in homine, præter animam rationalem, *caro* propriam habeat formam substantialem sui constitutivam; atque ita de *osse*, aliisque partibus heterogeneis.

*Prima Sententia* est D. Thomæ, Suarii, Conimb. &c. Frustra esse illas formas partiales. Ac proinde docent in homine *carnem v. g.* & *ossa* non differre inter se essentialiter secundum esse substantiale, sed tantum secundum esse accidentale; vel si lubet, os & carnem non magis differre substantialiter in eodem, quam ossa ipsa inter sese. Nec rectè colligi diversitatem formarum substantialium, ex diverso genere proprietatum atque operationum in eodem animali

mali individuo ; sed tantum in diversis. Item, in mortuo animali non esse eandem numero carnem secundum idem esse substantiale , quæ erat in vivente ; sed tantum secundum eandem accidentia. Tunc enim , ut ajunt , generantur formæ substantiales novæ singularum partium propriæ, ex quibus conflatur totalis, quam *cadaverinam* vocant. Hujus autem generationis causam vulgò assignant *cælum* , tum ipsas etiam qualitates in cadavere residuas , tanquam cœli virtutes instrumentarias. Quæ quidem cum videantur duriora ,

*Dico I.* Cum Scoto , multisque recentioribus Philosophis ; non esse rejiciendas illas formas partiales. *Confirmatur.* Quia dum vulgò ajunt hominem constare ex corpore & animâ , tunc *corpus* quod est subjectum animæ , non est tantum materia prima cum solis dispositionibus accidentalibus : ergo est materia cum forma substantiali *v. g.* tum carnis , tum ossis , &c. *Prob. Ant.* Non enim aliam ob causam legimus in symbolo S. Athanasii tanquam doctrinam Fidei , Christi Domini humanitatem constare ex *animâ rationali & carne*. Caro autem non est sola materia prima cum certâ temperie accidentium , sed potius, est ens quoddam substantiale , etiam secundum rationem formalem carnis. Certè, caro mortua, ex communi omnium sensu, constituitur in *esse carnis* per formam aliquam substantialem , sicque est formaliter substantia , quanvis ex Aristotele dicatur tantum æquivocè *caro* : ergo à fortiori statuendum illud est de carne vivente ; quæ non est æquivocè caro. Item , quomodo *v. g.* *esse* formaliter *corporeum* est radicaliter ab aliquo principio substantiali , ut dixi ; ita & à pari *esse carneum* :  
tam

tam enim homo est formaliter & substantialiter *carneus*, quàm corporeus. *Respondent*, carnem in *esse carnis* formaliter constitui per ipsam animam; quæ dicitur forma totalis. *Sed contra est*. Nam in homine non potest constitui in *esse carnis* per animam rationalem : ergo in homine habet *esse* substantialis carnis per aliquam aliam formam substantialem, quam *partialem* dicunt. *Prob. Ant.* Quia, ut anima rationalis daret *esse* formale carnis, deberet *esse* formaliter carnea, ac proinde corporea. Atqui repugnat illam sic *esse* formaliter corpoream, cum potius sit formaliter immaterialis. Ergo per formalem sui communicationem non potest dare corpori *esse carneum*. *Nec dicas*; Satis est quoddam sit eminenter carnea. *Respondet*, Quavis admitteretur illam *esse* eminenter carneam, non ideo per sui formalem communicationem daret *esse* formaliter carneum : quo pacto lumen v. g. quavis sit eminenter calidum, non ideo facit corpus luminosum, *esse* formaliter calidum. *Quæres* : Quomodo ergo, cum sit spiritalis, est nihilominus principium vitæ vegetativæ, & sensitivæ? *Rz.* Quia in illa corpore quod informat, emanat potentias vitales in genere tum vegetativo, tum sensitivo; nec repugnat substantiam immaterialem *esse* principium effectivum operationum, non tantum immaterialium, sed etiam materialium.

Probatur verò præterea, carnem in homine non constitui in *esse* substantiali carnis, per ipsam hominis animam. Quia ex doctrinâ fidei, caro eadem, seu corpus Christi Domini quod natum est ex B. Virgine, idem dicitur passum, & mortuum jacuisse in sepulchro. Atqui verum illud non foret, in adversariorum sententiâ: quia caro mor-

mortua fieret alia substantialiter caro , per novam formam substantialem carnis : ac proinde etiam verè non adoraretur in cruce *corpus natum ex virgine, &c.* Nec verè illud dici potuisset in personâ Christi Domini, *Caro mea requiescet in spe.* Neque enim corpus jacens in sepulchro, propriè fuisset caro Christi.

Item, Corpus seu caro, tum anima rationalis, sunt duæ inter se realiter distinctæ & diversæ partes substantiales hominis constitutivæ ; ergo una non est alia ; quin potiùs præscindit perfectè ab aliâ ; neque est illius constitutiva ; ut non negant adversarii de materiâ & formâ ut sic , quæ sunt principia intrinseca corporis naturalis. *Prob. Ant.* Ex illo symboli jam citati articulo. Vbi legitur Christus esse *perfectus Deus & perfectus homo, ex animâ rationali, & humanâ carne subsistens.*

Item , Ex Tridentino *sess. 13. cap. 3.* Habemus Christi Domini carnem seu corpus , sub specie panis existere *vi verborum* , non autem ibi animam existere , nisi ex *naturali connexionē, & concomitantia.* Unde consequens est, animam non esse principium formale constitutivum carnis , quia non sumeretur præcisè , & seorsim ab animâ ; tamque existeret *vi verborum* sub specie panis, quàm caro, cujus esset constitutiva.

Mitto id quod vulgè tradunt de sacris Sanctorum reliquiis ; puta, de ossibus, quæ tanquam eorum ossa propria coluntur à Christianis ; hoc autem explicari non posset in adversariorum sententiâ ; sicque ille omnis cultus rueret.

Mitto etiam , quodd à pari dicendum est ac de plantis ; in quibus rami , folia , & fructus perinde proprias habent formas partiales præter

ter formam totalem quæ in iis est vitæ principium primum.

*Objic. 1.* Ad explicandas vitæ vegetativæ, aut sensitivæ diversas operationes in diversis corporis membris, sufficit una anima. *Dist. Ant.* Ad explicandum earum operationum primum & radicale principium sufficit. C. Ad explicandum totale & proximum. N. Ita enim sola visionem exercere nequit sine oculo, & sic de aliis.

*Objic. 2.* Caro mortua esset eadem prorsus cum vivâ. C. Ergo quod scribit Arist. I. *De An.* non esset caro æquivocè, & improprie. *Dist.* in ratione carnis ut sic. C. Quis enim carnem manducans non iudicet eam esse verè & proprie carnem. At non est nisi improprie & æquivocè caro instrumentaria ad operationes vitales.

*Inst.* Accedente animâ, si caro cum eadem formâ substantiali remaneret, nec produceretur nova, juxta sententiam Thomistarum, non servaretur illud dictum Aristotelis, *corruptio formæ unius, est generatio alterius.* R. 1. Servari quidem illud universaliter in corporibus homogeneis; ne materia prima sit absque formâ substantiali. At R. 2. Quod spectat corpora heterogenea, non accipiendum est nisi de corruptione totali & adæquatâ; non autem solum de inadæquatâ. Sic enim tibi adæquatè v. g. corrumpitur homo, ex eo generantur vermes, fimus, cinis, &c. Quomodo è contrâ, in generatione totali & adæquatâ hominis, est corruptio materiæ illius, puta seminis, aut sanguinis, ex quâ formatur.

Dico consequenter II. In eo casu plures formas substantiales in eadem omnino materiâ reperiri: Ex quibus formæ *partiales* subordinentur *totali*, non quidem ut *potentia actui*, sui for-



*formaliter perfectivo* : hoc enim esse impossibile ostendimus capite superiori ; sed tantum *ut instrumenta causa principalis* , in ordine ad actiones vitæ.

*Notabis* enim , formam totalem seu animam ; ipsi materiæ primæ per formas tum accidentales , tum substantiales partiales eo pacto dispositæ , uniri immediatè ; non verò mediantibus illis formis partialibus. Ac proinde

*Not. 2.* Formas partiales non informari ab animâ , sed tantum requiri ut dispositiones materiales ; vel ut alii loquuntur ; non sunt tanquam partes actuabiles , sed potius tanquam *dispositivum* subjecti actuabilis ; sicut siccitas & calor v. g. requiruntur ut dispositiones ad formam ignis.

*Obijc.* Essent in homine v. g. plura composita substantialia. *Dist.* Essent plura totalia. *N.* Plura partialia. *Conc.* Ergo homo v. g. non esset quid unum substantiale. *N. Conf.* Quia unitas corporis animati petitur à formâ totali per quam in suo esse constituitur ; quocunque tandem modo se habeat materia illi subjecta. Et verò non potest esse subjectum illi proportionatum , nisi sub illis dispositionibus tam substantialibus , quàm accidentalibus.

*Inst. 1.* Formæ partiales non possent facere unum per se cum formâ totali ; cum nequidem illi uniantur , tanquam potentia passiva , actui sui perfectivo. *Rz.* Satis est ut materia prima per illas formas partiales disposita , faciat unum per se cum formâ totali. Neque est necesse , ut formæ partiales ullam habeant cum eâ unionem , nisi materialem , id est , ratione materiæ quam afficiunt , tanquam proprium subjectum , & quam disponunt ad animam. Item , *Rz. 2.* Illas etiam uniri formæ totali , eo per proportionem modo,

modo, quo solent instrumenta uniri causæ principali.

*Inst.* 2. Hoc repugnat superiori doctrinæ, ubi aiebamus non posse in eadem materiâ reperiri formas substantiales alteri subordinatas. *Dist.* Subordinatas instar potentiaæ ad actum sui perfectivum. *Conc.* Non autem instar instrumenti subordinati causæ principali.

## DISPUTATIO IV.

## DE TOTÓ,

### SEU

## COMPOSITO NATVRALI.

### CAP. I. *Natura seu essentia compositi naturalis.*

**I**llud dicitur *Totum*, quod constat ex partibus simul positis, & unitis; unde & appellari solet *compositum*, vel actuale; quando partes unitæ retinent nihilominus actualem inter se distinctionem; vel virtuale, quando non habent nisi virtualem distinctionem, ut aliàs ostendam, ubi *De continuo*.

*Suppono* verd, in unionem partium considerari vel causam unièntem; vel unionem, seu actionem unitivam, ratione cuius intelligitur causa efficiens unire acti partes; tum denique ipsam unionem, quæ nihil aliud est, quàm conjunctio per quam partes denominantur formaliter unitæ, seu conjunctæ: quomodo per proportionem dicimus calorem esse formam accidentalem, per quam subjectum denominatur formaliter calidum. Ac

*Not.*

*Not. 1.* Varia esse unionum genera. Primum enim alia est *per juxtapositionem localem*. Quomodo manus duæ simul junctæ, aut lapides in cumulo, dicuntur uniri. 2. Alia est *per continuationem*; ut cum duæ aquæ simul junctæ, fiunt una aqua continua. 3. Aliud est genus unionis quod efficitur per actuationem, aut informationem subjecti: ut quando anima unitur corpori ipsum animando; vel calor aquæ, ipsam reddendo formaliter calidam. Quare

*Not. 2.* Unionem illam actus aut formæ, *per informationem*, esse duplicem. Alia enim est *accidentalis*, quando est formæ accidentalis cum subjecto; alia autem est *substantialis*, si est unio substantiæ, aut modi alicujus substantialis, cum aliquâ substantiâ perfectibili. Item

*Not. 3.* Unum, aut totum, seu compositum quod resultat ex unione plurium inter se, esse multiplex. Primum enim est unum *per accidens*, vel *aggregationis*, quando plura junguntur, non per modum actus & potentiæ, sed tantum per juxtapositionem; vel est unum *per accidens informationis*, quando subjectum & actus sunt generis diversi: ut lapis & albedo, unde resultat album; quod est unum, seu compositum per accidens informationis. Verum, ut hoc loco non agamus de uno, seu toto per se continuationis: suppono tunc fieri unum per se informationis, quando potentia & actus sunt ejusdem generis; nempe quando utrumque illud extremum unionis est aliqua substantia, vel aliquid substantiale: ut quando materia & forma substantialis faciunt unum & totum per se essentielle: vel quando ex substantia completa & ex actu subsistendi resurgit totum, quod est unum unitate suppositi, aut personæ. Atque his prænotatis,

*Dica.*

**Dico I.** Materia prima, & forma substantialis per mutuam sui unionem, seu communicationem ad invicem, constituunt totam essentiam corporis naturalis; fitque hoc modo unum, seu totum & compositum per se & essentialiter. Prob. Quia sunt partes essentielles seu principia intrinseca corporis naturalis. Atqui partes ut partes, sunt de essentiâ totius quod constituunt. Nec plures, aut pauciores partes, seu principia intrinseca corporis naturalis reperias; ut primâ disputatione observavi. Quod enim spectat ad *unionem* partium, illa non est pars, sed tantum conditio essentialis, unde ex partibus resultet totum.

*Obje.* Illud non est de essentiâ corporis naturalis, quo sublato remanet eadem essentia. Atqui remanet semper idem essentialiter v. g. homo, quanvis eadem ipsius materia non permaneat, quia subinde secundum varias partes effluit, quæ per nutritionem reparantur: ergo non est de essentiâ. **Rz. 1.** Remanere semper eandem numero materiam successivè saltem & æquivalenter; ut aliàs dicam. **Rz. 2.** Remanet semper eadem essentia metaphysicè sumpta, quatenus res quæ definitur aliter esse non potest, quin constet ex materiâ & formâ: per accidens autem illi est, quod sit hæc; aut alia materia.

**Dico II.** Præcipuam hujus essentiæ, seu quidditatis partem, esse formam. Primò, quia est actus, qui semper de se nobilior est potentiâ perfectibili. Item consequenter, proprium formæ est, ut materiam de se indifferentem trahat ad speciem entis determinati, eo sensu, quodd faciat illam esse materiam corporis naturalis in tali, vel tali specie; ubi cum ipsâ constituit corpus talis, vel talis speciei. Item, forma sub-

substantialis, est principium proprietatum ferè omnium, & operationum quæ sunt in corpore naturali.

*Notabis* autem, quod etsi materia & forma simul conjunctæ unum per se efficiant, remanent nihilominus distinctæ realiter inter se cum illâ unione. Neque enim *v. g.* in homine corpus & anima quæ spiritualis est, fieri possunt eadem inter se entitas. Sicque definitum est reperiri in Christo Domino tres substantias, nempe Divinitatem, tum corpus & animam, ex quibus conflatur humanitas Divinitati conjuncta hypostaticè.

*Dico* III. Materiam & formam talis esse naturæ, ut neutram in corpore naturali supplere per seipsum Deus, etiam absolutè, possit. *Prob. de materiâ.* Quia non potest esse subiectum alicujus formæ. Deinde cum Deus sit ens spirituale, ubi cum formâ poneretur, non conferret homini gradum corporeitatis. *Prob. de formâ.* Nam de fide est, contra Apollinarem, Deum non posse supplere vices animæ rationalis, quod ille hæreticus existimabat fieri in Christo, ut hac ratione diceretur Deus. Certè homo esse non potest, nisi habeat principium essentialiter hominis constitutivum, nempe animam rationalem; ergo sic Christus homo esse non potuisset sublatâ animâ rationali.

**CAP. II.** *Modus quo uniantur partes in toto, seu composito naturali.*

**V**niuntur quidem materia prima & forma substantialis, per mutuam sui communicationem ad invicem, materia quidem recipiendo in se formam; forma autem informando ipsam materiam, ipsique suos effectus formales com-

municando, ut quando anima facit corpus esse animatum. At

*Dico I.* Materia supponitur esse priùs disposita ad talem formam, per certam qualitaturn reinperiem, aut partium etiam conformationem. Prob. Quia non frustra producuntur à natura præviæ dispositiones ad formam substantialem: ergo sine illis introduci naturaliter non potest. Quin etiam videmus destructis dispositionibus idoneis ad formam, corrumpi totum; qua ratione ingrueute morbo perit animal. Ratio à priori est, quòd materia quidem per modum essendi sibi connaturalem determinetur ad formam in genere; at per dispositiones fit propria formæ alicujus in specie.

*Dico præterea II.* Requiri præsentiam intimam formæ cum materiâ. Nam eâ conditione sublatâ, nequidem absolute posset illi uniri, seu illi communicare suos effectus formales. Quamquam

*Dico III.* Forma sic posset esse intimè præsens materiæ, nec tamen illi uniretur per informationem. Credimus enim Petrum posse divinitus poni penetrativè cum Paulo, ita ut anima Pauli tam intimè sit præsens corpori Petri, quàm anima ipsius Petri; sicque adesse posse plures alias animas eidem corpori, ad omnes æquè disposito, quarum tamen nulla ipsum informet actu. Et verò etiam, si præsentia localis hujusmodi intima sufficeret ad unionem substantialem inter materiam & formam; pari modo sufficeret ad unionem hypostaticam inter personam Divinam, & naturam assumptam; ipsisque tribus personis Divinis Christi Domini humanitas deberet uniri hypostaticè, cum creata substantia quævis alia, cum ubique per suam

suam immensitatem sint substantialiter præsentes. Quamobrem plerique ex recentioribus docent opus esse aliquem unionis modum realiter distinctum, quo tanquam vinculo, seu nexu quodam intermedio materia & forma inter se connectantur. Huic tamen doctrinæ vehementer adversatur D. Th. Quem ut cum recentioribus conciliem,

*Dico* I V. Modum unionis intermediæ realiter distinctum esse quidem frustra. Prob. Quia materia unitur formæ quatenus illam in se recipit; & vicissim forma unitur materiæ, quatenus illam actuat, neque opus est aliâ unione formæ cum materiâ, quàm illâ actuatione, siquidem hoc ipso intelligitur unita, quòd illam actuat; sintque idem *unio* formæ cum materiâ, ac ipsius actnatio, seu informatio. Atqui informatio illa nihil est aliud quàm formæ communicatio ad materiam, unde resultet totum substantiale. Illa autem communicatio non potest non esse immediata, citra modum entitativum illis superadditum, quandoquidem materia & forma seipsis essentialiter & immediatè sunt potentia & actus, cum mutuo respectu; possitque materia quantum est ex se recipere immediatè formam, & forma ipsam actuare materiam. Certè, non negant adversarii ipsum unionis modum seipso immediatè uniri per informationem, absque unionis modo realiter distincto. Item *modus* ille in homine, vel materialis est; & sic non foret idoneus uniendæ animæ quæ est spiritualis: vel è contrà, est spiritualis, & sic materiæ non congrueret. Vel omnino est duplex, siquidem tam una pars intrinsecè denominatur unita, quàm altera, nec volunt denominationem ejusmodi oriri nisi à formâ uniti-

vâ , quæ simul esse non potest intrinseca duobus subjectis oppositis, & consequenter deberet esse duplex. Atque istud quidem totum multi concedunt. *Sed contrà est.* Nam pari modo juxta illam doctrinam deberet aliquis modus unionis admitti in Verbo Divino per quem formaliter uniretur humanitati in Christo, cùm tamen repugnet aliquid recipi in Deo, tanquam in subiecto; nec alio modo illi humanitati uniatur, quàm quodd illam actuat instar suppositi. Vnde pariter dicimus satis esse formæ substantiali, ut denominetur unita materiæ, quodd illam per se immediatè actuet.

At inquires: Forma de se est indifferens ut materiæ etiam dispositæ, & intimè præsentī uniatur, quemadmodum constat ex allatâ hypothesis. *Conc.* Ergo debet illi superaddi modus ejusmodi unitivus, per quem determinetur ad informandam materiā, sitque instar nexus cujusdam. *N. Conf.* Siquidem ad hoc sufficit proprius *essendi modus.*

*Suppono* enim ex Metaphysicâ *Tract. I. Diss. 3. cap. 4.* Rei cuilibet suum communicari proprium *essendi modum*, per quem determinetur ut vel in se, vel in alio subsistat; tum ut forma aliqua vel extra omnem materiā existat, vel hanc, aut illam determinatè informet, &c. Qui modus propterea in hoc casu vocari potest *modus unionis*, non quidem *formaliter*, quodd sit veluti nexus partes intermedius; sed *causaliter* duntaxat; quatenus ita recipitur in formā, ut ipsam formaliter determinet ad talem numero materiā informandam; quandoquidem (ut supponimus de naturâ modificationum ejusmodi) *est* essentialiter actualis modificatio & determinatio hujus formæ, cum ordine essentiali ad talem



talem numero materiam. Et verò nihil est sui communicativum, nisi perfectum, id est, nisi fuerit cum certâ perfectione. Ille autem *essendi modus*, est actualitas quædam & perfectio, quæ rei accedat unde compleatur, perficiaturque in essendo.

*Notandumque* est, hoc pacto conciliari utramque ex oppositis sententiam. Sic enim cum Thomistis, non negamus partes illas uniri per sese immediatè ad invicem; simulque cum aliis fatemur esse opus aliquâ actualitate, aut essendi modo, unde ultimo compleantur, determinanturque ad mutuam ejusmodi unionem. Ac proinde nulla hîc potest esse disputatio, nisi de nomine.

### CAP. III. *Solvuntur Objectiones.*

**O***Bjic. 1.* Contra id quod dictum est, materiam & formam uniri seipsis immediatè, seu absque unionis modo & nexu realiter distincto; sic, inquam, objiciunt: Partes de non unitis denominantur formaliter unitæ; quî transitus de contradictorio in contradictorium non potest esse absque aliquâ mutatione reali; ac novâ entitate. *Tr.* Respondeo enim fieri novam de facto mutationem in rebus; non modò ex parte materiæ quæ tunc dicitur informata; sed etiam ex parte *totius*, quod de novo existit in rerum naturâ.

*Inst. 1.* Supponatur materia disposita, tum forma producta cum proprio etiam *essendi modo* ad illam materiam determinativo, quæ tamen defectu præsentia intimæ non sit unita. *Sic arguuntur.* Vbi per actionem causæ efficientis unietur, non poterit assignari terminus realis qui per eam unionem producat. *R.* assignari *totum*.

Quomodo per proportionem , quis lapides jungendo simul , dicitur efficere vel cumulum, vel domum , &c. Quæ sunt entitas etiam realiter distincta ab ipsis partibus unitis *distributivè* sumpris, ut sequenti capite exponetur.

*Inst. 1.* Partes possunt esse sine unione , ut si seorsum conserventur etiam cum proprio essendi modo : ergo distinguuntur realiter ab illâ unione, juxta illud commune dictum, *Qua nemine cogitante possunt existere sine invicem , distinguuntur realiter.* R. Partes sic posse quidem existere sine unione denominativè & defectu connotati extrinseci, aut alterius conditionis ; non autem defectu intrinseci. Forma enim sub proprio essendi modo sui determinativo ad talem numero materiam , habet intrinsecè quicquid requiritur ad hoc ut illam informet , si tamen fuerit disposita & intimè præsens. Sic etiam per certum essendi modum creatura redditur capax, determinaturque ad hoc v. g. ut subsistat per subsistentiam Verbi Divini, aut aliarum personarum divinarum.

*Obje. 2.* Cùm ille essendi modus quem supponimus , sit formæ determinativus ad talem numero materiam ; Anima rationalis , servato eodem essendi modo, non posset extra illam materiam existere, quin potius deberet in eâ novus produci. R. Non est necesse ut illum mutet : ed inaximè qudd dicatur retinere semper inclinationem naturalem ad *reunionem* cum eodem corpore. Etsi autem determinetur ad informandam actu talem materiam, non sequitur tamen ut illam debeat actu informare, nisi sit intimè præsens cum debitis dispositionibus.

*Inst.* In aggeneratione partium quæ fit per nutritionem , deberet produci novus essendi  
modus

modus in anima , per quem determinaretur ad partes illas de novo informandas ; quod videtur per se absurdum ; neque enim ille essendi modus in animâ humanâ , cûm sit spiritalis , posset produci à potentiâ nutritivâ. *¶* Partes ejusmodi aggeneratas fieri unam & eandem successivè materiam cum eâ quæ ab ortu fuit , ad quam essendi modus idem semper de se est determinativus.

**C A P. I V.** *Totius à partibus unitis & collectivè sumptis indistinctio.*

**P***Artes* alicujus compositi , etiam ut unitæ , considerari possunt duobus modis. Primò , distributivè , seu sigillatim , vel ut ajunt , quatenus una aliam vel in se recipit , vel informat , actuatque , si agitur de toto & composito per se ; vel certè quatenus ex illis partibus aliæ quocunque tandem modo junguntur cum aliis ad constituendum aliquod totum. Secundò , sumi possunt collectivè , seu quatenus sunt aliqua rerum simul positarum collectio.

*Dico autem I.* Totum à partibus distributivè sumptis distinguitur realiter. *Prob.* Quia cûm duo ita se habent , ut aliquid positivè & realiter includatur in uno , quod non reperitur in altero , illa distinguuntur inter se realiter. Atqui ita se habent totum & partes distributivè sumptæ. Ergo distinguuntur realiter. *Prob. min.* Materia enim seorsim , seu distributivè sumpta ; forma pariter distributivè sumpta , non est totum corpus naturale ; cûm præter materiam , aut præter formam , includat simul partem alteram. At contra Scotum , tum contra plurimos ex Thomistis celeberrimis , quos citat Suarez ,

*Dico II.* Totum à partibus unitis & collectivè

ctivè sumptis non distinguitur realiter; seu non est aliqua tertia entitas partibus simul positis superaddita, quam causent ipsæ partes collectivè sumptæ. Prob. Quia frustra illud est. Legiturque apud Arist. 2. *De Anima* c. 1. Animal non esse nisi animam, & corpus simul. Sicque etiam habemus in Symbolo fidei S. Athan. *carnem* seu corpus, & *animam*, esse *hominem*; nec hominis individua natura est aliqua entitas præter illas partes: alioquin faceret pariter & compositionem cum illis partibus; quâ ex compositione deberet quoque resurgere quarta alia entitas; & sic in infinitum. Quinetiam hominum turba, aut cumulus lapidum deberet esse aliqua entitas præter homines, aut præter lapides simul positos. Nam in ratione *totius ut sic* conveniunt, quanvis sub illâ ratione genericâ differant, quodd homo v. g. sit totum substantiale & essenziale, quia constat ex potentiâ & actu, tanquam ex partibus substantialibus ejusdem essentialitatis constitutivis: cumulus verò sit tantùm ex aggregatione per accidens partium quæ uniuntur per solam juxtapositionem; & sic de aliis.

*Dico III.* Ne quidem formaliter distinguitur totum à partibus collectivè sumptis. Quia partes simul sumptæ idem sunt ac totum ipsum, & è contrà. Ita homo quatenus sumitur solùm pro individuo naturæ humanæ, non plus dicit, quàm corpus & animam, ut jam aiebam ex S. Athanasio. Neque *sex* plus dicunt, quàm bis tria; aut *Ba*, quàm *B.* & *A.* quanvis ut scribit Arist. non sit idem cum illis partibus distributivè sumptis, sitque homo v. g. tertia substantia hoc modo ab illis distincta. Non nego tamen totum distinguì à partibus ut objectum distinctè cognitum, à par-

à partibus confusè cognitris. Sed nihil inde sequitur contra positam assertionem.

*Objis.* 1. Vnum per se, & multa, non sunt idem realiter; cùm oppositionem realem habeant ad invicem. Atqui corpus naturale est unum per se; partes autem ex quibus constat, sunt plures entitates actu realiter inter se distinctæ. Ergo non sunt idem realiter. Ergo distinguuntur realiter. *Dist.* Vnum compositum, non est idem ac multa componentia ex quibus constat. N. Sic enim cumulus idem est formaliter ac multi lapides simul positi. Conceditur verò *Ma.* de uno ente simplici, & de multis non componentibus.

*Inst.* 1. Vnum illud compositum, & partes, se habent ut principiatum seu causatum, & principia seu causæ. Atqui causæ & causatum non sunt idem; neque enim quidquam sibi dat esse, &c. R. partes non esse principia *totius*, nisi distributivè sumptas; quo sensu habent distinctionem realem à toto.

*Inst.* 2. Etiam collectivè sumptæ sunt causæ totius, non enim principiant *totum*, ut separatæ. Ergo ut simul sunt. Ergo ut collectivè sumuntur. R. Non quidem causare totum in statu separationis, sed tantùm sub unione in fieri, seu quatenus ad invicem ununtur. Quanquam nihilominus & eo in statu mutæ communicationis ad invicem, sumuntur vel collectivè; quo pacto non causant Totum, cùm sint formaliter ipsum *Totum*; vel sumuntur seorsim & distributivè, quatenus videlicet forma informat materiam, & materia recipit in se formam, atque hoc sensu distinguuntur ab ipso *Toto*. Ita lapides *A. B. C. &c.* collectivè sumpti sunt idem formaliter ac cumulus; At non sunt cumulus ipse,

neque illum constituunt nisi seorsim sumpti. Nam ut per se patet, nec lapis *A*, aut lapis *B* seorsim, & secundum se, est cumulus; sed potius lapis *A*, aut lapis *B* collectivè sumptus; id est, cum aliorum collectione. Notandumque est, eâ ratione partes dici etiam principia *Totius* in facto esse. Sic enim totum existit per continuam formæ informationem, & materiæ materialisationem, ut vocant.

*Inst. 2.* Si partes collectivè sumptæ, puta corpus & anima, idem sunt ac *totum*; sequitur & eas esse idem inter se. Nam quæ sunt eadem uni tertio, sunt idem inter se. *Dist.* Quæ sunt eadem uni tertio adæquatè. *C.* Si tantum inadæquatè, uti in nostro casu contingit. *N.*

*Objic. 2.* Si totum non distinguitur à partibus etiam collectivè sumptis, non poterit à nobis assignari ullus terminus generationis, seu entitas ulla quæ per generationem naturalem producat. Etsi enim v. g. dicatur generari equus ab equo, quatenus ab eo producit anima equi in materiâ dispositâ; saltem responderi non poterit de generatione hominis, in quâ anima rationalis non producit terminativè, nisi à Deo per creationem: nec possumus assignare modum unionis realiter distinctum, quem rejecimus. Ergo superest ut assignemus *totum* à partibus collectivè sumptis distinctum realiter. *R.* Terminum *ut quod* in omni generatione corporis naturalis, esse totum ipsum, à partibus distributivè sumptis realiter distinctum; terminum autem *ut quo* esse formam totius constitutivam. At in naturali hominis generatione hæc non attinguntur terminativè, seu tanquam terminus qui per ipsam generationem producat formaliter; sed tantum dispositivè, quatenus ab  
ho.

homine inducuntur dispositiones, quæ de se talem formam exigunt.

*Inst.* Ergo generatio humana non esset substantialis, quæ solum terminaretur ad dispositiones accidentales. *N. Conf.* Quia illæ dispositiones per se ordinatæ sunt ad formam substantialem. Huc adde ex illis dispositionibus multas esse substantiales; in sententiâ de formis partialibus.

*Obijc.* 3. Multa attribuuntur *Toti*, quæ non conveniunt partibus etiam collectivè sumptis. Ergo non sunt idem. *Prob. Ant.* Nam *Totum* dicitur generari & corrumpi; ut quando moritur homo. Hoc autem partibus non convenit. *Rz.* Partibus collectivè sumptis & unitis hoc idem convenire. Sic enim illæ dicuntur corrumpi secundum simultatem quam inter se habent, ut quando in morte v. g. hominis, anima separatur à corpore, etsi non desinat esse in eorum naturâ; quod in aliis contingit. Sic materiæ primæ & animæ rationali unitis & collectivè sumptis convenit denominari formaliter corpus per differentiam corporeitatis petitam à materiâ, ut supra explicui. Sic illi collectioni competit constare ex partibus. Et sic de aliis.

C A P. V. *De Existentiâ compositi naturalis.*

**E**X Thomistis qui docent *Totum* esse tertiam aliquam entitatem à materiâ & formâ simul unitis & collectivè sumptis realiter distinctam; cum etiam supponant existentiam formaliter sumptam, distinguere realiter ab essentiâ: illi, nec materiæ, nec formæ volunt propriam ullam esse existentiam, sed existere per unicum & simplicem existendi actum ipsum, quem soli duntaxat *toti* primò & per se competere arbi-

trantur. Quanquam alii putant formam substantialem esse proprium atque immediatum illius existentiae realiter distinctae subjectum; cuius tantum beneficio existat materia.

*Dico* I. Nec materia, nec forma existunt per existentiam totius. Prob. Quia ex superiori capite, nullum est totum huiusmodi à partibus unitis & collectivè sumptis distinctum realiter; nec proinde ulla est ejus existentia.

*Dico* II. Nec materia prima existit per existentiam formae, cum ipsa materia, perinde ac forma propriam habeat existentiam, & proprium essendi modum. Prob. Quia supponitur ex Metaphysicâ, existentiam esse indistinctam ab ipsâ re existente. Vnde manifestum est rem unamquamque existere per propriam existentiam. Confirm. 1. Quia cum actio rei productiva terminetur maximè ad ipsius rei productae existentiam; necesse est consequenter, ut materia prima quæ propriam habet entitatem, ac proinde propriam producibilitatem, habeat etiam & propriam existentiam, unde intelligatur sic formaliter existere extra causas. Confirm. 2. Quia forma substantialis quæ de novo generatur, præsupponit materiam ex quâ educitur; ergo quæ propriam habeat existentiam: alioqui diceretur forma recipi in non existente, seu in eo quod esset nihil actu. Item, ut ajunt, sequeretur materiam tunc definere & corrumpi, quotiescunque forma & totum corrumpitur; tunc enim illa perderet existentiam per quam existit. Sed istud non moror; quia Respondent, novam existentiam succedere immediatè pòst, quam ob causam non possit dici carere unquam existentia, Consequenter verò

*Dico*



**Dico II.** Totum seu compositum non existit nisi per existentiam partium; quomodo nec etiam habet aliam, quàm partium entitatem. Patet ex dictis.

*Obijciunt* 1. Materia non existit nisi per existentiam totius, aut per existentiam formæ. Ergo non habet propriam existentiam, nec potest etiam existere extra omnem formam, quandoquidem non existit nisi per existentiam formæ. *Prob. Ant.* Quia existentia est ultima rei actualitas, quâ res sistitur extra suas causas; ita ut per efficientiam causæ non communicetur illa actualitas, nisi veluti præsuppositâ formâ, & toto, cui solùm per se & primò competat; materiæ verò tantùm secundariò. *R.* 1. Ab adversariis supponi existentiam tanquam actualitatem quandam realiter distinctam: quod à nobis non admittitur. Item *R.* 2. Quocunque modo accipiatur existentia, hanc esse illius rei propriam, quæ propriam habet entitatem, ac producibilitatem. Quo pacto materia prima sistit, terminatque actionem sui productivam.

*Inst.* 1. Si materia prima haberet propriam existentiam: sic per se independenter à formâ diceretur esse in actu ultimo constituta: ergo forma non posset cum eâ facere unum per se. Quia ex duobus entibus ultimò completis non fit unum per se; siquidem ex illis alterum non esset in potentiâ. *R.* Formam non uniri materiæ ut existens est, seu mediante illius existentia, sed tantùm quatenus est potentia immediate receptiva illius formæ, cum quâ proinde sic facit unum per se.

*Inst.* 2. Ex Arist. forma est quæ dat esse rei: ergo materia habet esse, id est, existentiam à

formâ. R2. In antecedente agi tantum de esse essentiali completâ, cujus formale constitutivum est forma; neque enim res est talis speciei, nisi propter formam.

*Inst.* 3. Ex existentia materiæ, & existentia formæ non posset fieri unum per se in ratione existentia; siquidem actus per se ultimus, qualis dicitur existentia, non habet ullam potentialitatem respectivè ad aliud. R2. *Transcat* illud *Totum*. Fiet saltem existentia una totalis ex duabus illis partialibus, quanvis unam per se non componant.

*Notandumque* est, unum etiam, tum materiæ, tum formæ esse proprium, quem vocamus *essendi modum*, de quo in Metaphysicâ loco jam citato. Item, habent & proprium *subsistentia actum*, qui totalem unum constituent; de quo in Metaphysicâ *Tract.* 1. *Disput.* 6. Illique propriè convenit esse *ultimam substantiæ actualitatem*; quod negandum esse diximus de existentia, contra Thomistas.

# TRACTATUS II. DE PRINCIPIIS

Seu causis extrinsecis corporis  
Naturalis.

## P R Æ F A T I O.

De Natura, & Divisionibus causæ in Comuni.

**O**STENDI hæcenus de substantiâ corporeâ completâ, quemadmodum constet ex materiâ primâ, & formâ substantiali, tanquam ex duabus naturis, unde & appellatur corpus naturale. Item, quemadmodum hæc sint illius partes, seu elementa & principia compositionis; quibus principiis accedit privatio, ut terminus à quo, ubi consideratur in fieri. Superest igitur ut agamus de ipsius principiis, seu causis extrinsecis. Sed

Observandum prius est, causam ut sic, esse principium per se dans esse alteri realiter & naturâ à se distincto: ut quando lumen, aut calor procedit ab igne: vel quando materia & forma, per mutuam sui communicationem, dant esse corpori naturali, ab illis distributivè sumptis realiter distincto. Ex qua quidem definitione colliges, privationem, quanvis sit principium generationis, non esse tamen illius causam; cum enim sit non ens, alteri dare esse non potest. Item, condiciones ad agendum non sunt cause, quia non dant esse. Item, Pater æternus dans esse Filio quem generat, non est propriè illius causa, quia non habet distinctum esse naturæ.

Not. 2. Quatuor hæc vulgò enumerari causas: Primò, est efficiens; quæ definiri solet principium unde res est; seu à quo procedit effectus; neque ullus est effectus sine causâ ipsius productivâ. 2. Est causa

causa finalis, nempe, id propter quod res est, aut fit. Sic enim v. g. sanitas acquirenda, est causa aut medicina, aut deambulationis. Præterea verò si effectus est quid compositum ex partibus, habet illas partes, tanquam sui causas intrinsecas, à quibus esse accipit. Ita corporis naturalis causa intrinseca dicuntur materia prima, & forma substantialis. Atque hoc quidem pacto materia prima dicitur principium, ex quo subinexistente fit corpus naturale. Forma autem, est principium ex quo inexistente fit corpus naturale, & constituitur in esse talis speciei completa.

Notandumque est 3. Quatuor tantum ista esse causarum genera; nempe causa efficiens, finalis, materialis, & formalis. Nam quæ dicitur causa Idealis seu exemplaris, estque imago rei efficiendæ residens in mente artificis, revocatur ad causam efficientem, quia sic concurrat ad operis effectiorem, potentiam effectricem dirigendo. Item

Not. 4. Ex illis causis, materiam & formam solas esse intrinsecas, quæ scilicet ingrediantur effectum, ut partes ipsius constitutivæ. At efficiens & finalis non ita ingrediantur effectum, sed potius extrinsecas sunt, quamobrem vocantur causa extrinseca. Item

Not. 5. Necessariam esse connexionem inter causam materiale & formalem, siquidem causare totum non possunt sine mutuâ ad invicem communicatione; quod etiam ultimâ disputatione ostenditur de causâ efficiente & finali. At præterea

Not. 6. Hæc distinguenda esse in omni causâ; nempe entitatem ipsius causæ; tum virtutem causandi, conditiones ad causandum actû, ac denique ipsam causalitatem. Entitas causæ, est res ipsa quæ dat esse alteri. Virtus causandi, est ratio unde res potest dare esse alteri; ut in igne, vis productiva alterius ignis; & sic de aliis agentibus. In fine virtus cau-

causandi est bonitas per quam movet ad sui perfectionem. In materiâ, est ratio potentie passiva, unde formam in se recipiat. In formâ, est ratio actus, unde materiam actuare possit. Condicio, est id sine quo causa suam causalitatem exercere non potest, etsi in illam causalitatem nihil influat. Sic presentia intima, est conditio sine quâ forma non informat materiam. Ita in causâ efficiente condiciones ad agendum, sunt distinctio agentis & passi; tum dissimilitudo, indistantia; proportio majoris inaequalitatis seu excessus virtutis activæ supra resistantiam passivæ, &c. Quæ Disputatione quintâ exponentur.

Causalitas est id quo posito, causa intelligitur causans actu: Vel si lubet; est influxus actualis in rem causatam. Sic actio, est causalitas cause agentis; sic in fine, est finalizatio; in materiâ materializatio; in formâ informatio. Quare duobus modis considerari potest causa omnis. Primo, quatenus causare potest; tumque appellatur causa in actu primo. At 2. Si consideratur quatenus actu causat, dicitur causa in actu secundo.

Notandumque est 7. Rem eandem posse diverso respectu diversas exercere causalitates. Sic enim eadem anima respectu materiæ & compositi habet rationem cause formalis; respectu suarum facultatum & actuum immanentium, est causa subjectiva seu materialis: est autem effectiva respectu actuum illorum quos producit; ac denique est finis generationis. Item

Not. 8. Causam omnem esse naturâ priorem suo effectui. Quemadmodum verò illud sit intelligendum, habetur in Metaph. Tract. 1. Disp. 2. c. 2.

Not. 9. Causarum omnium perfectissimam esse efficientem. Est enim principium unde res est, nec de se ullam involvit imperfectionem; ideoque hac ratio causa Deo maxime convenit.

## DISPUTATIO I.

De Natura & Divisionibus, seu multiplicitate causæ efficientis.

CAP. I. *Natura causæ efficientis.*

**D**ico I. Causa efficiens, est principium unde res est, seu à quo procedit effectus. Sic enim differt ab aliis causarum generibus; quod supra jam aiebam.

*Dico* autem II. Causas creatas ac naturales per virtutem sibi intrinsecam verè ac physicè producere effectus. Contra nonnullos qui docuere, non creaturas, sed Deum ipsum tantummodo ad præsentiam creaturarum producere illos effectus. *Prob. 1.* Ex doctrinâ Fidei passim in sacris literis, ubi sol v. g. dicitur lucere, Terra germinare herbam, &c. Eosque damnat Tridentinum, qui dicunt voluntatem humanam non agere, sed habere se merè passivè. Certè non posset alioquin explicari quemadmodum intelligeret, mereretur, peccaretve homo, &c. quæ Christianæ Fidei repugnant. *Prob. 2.* Experienciâ, & ratione naturali. Videmus enim à sole illuminari mundum; ab igne produci tum calorem, tum ignem; ab equo equum: experimur nobis inesse visionem, loquelam, & cætera id genus. Item, nisi agerent ipsæ causæ naturales, non posset cognosci rei ullius natura per effectus, aut discrimen viventis à non vivente, quod deprehenditur solùm ex proprio operandi modo. Neque verò etiam, quod obijciunt, frustra esset illa operandi virtus in rebus creatis, cùm Deus de se ad rerum omnium productionem sufficiat, illudque ex communi sententiâ,

tentiâ , de facto præstet per universalem concursum simultaneum. *Contra enim est* , Divinæ gloriæ plurimum servit agendi vis illa rerum naturalium ; siquidem hoc pacto nobis manifestantur variæ Dei perfectiones à creaturis participatæ ; ut bonitas & potentia.

*Notandumque est*, pari modo confutari Themistii , Avicennæ , & aliorum deliria , ubi supponunt dari certam aliquam substantiam spirituales , quam Colchodeam seu datricem formarum appellant , à quâ formæ substantiales in materiam ab agentibus naturalibus dispositam inducantur. Ab iis autem differunt Platonici , quod singulis speciebus singulas ejusmodi formarum causas universales , quas dicunt Ideas , adscribant.

C A P. II. *Causa efficientis varia divisiones.*

**D**ividitur I. In Increatam , & creatam. Increata est Deus , qui & *causa prima* nuncupatur. Nam creatæ omnes ideo dicuntur causæ secundæ , quia Deo tanquam supremo rerum omnium principio subordinantur , à quo etiam tum esse , tum operandi virtutem hauriunt.

*Dividitur II.* In universalem , & particularem. Universalis , superior est ad aliquas saltem particulares , ad earum proprios effectus concurrento. Sic Deus , sic etiam sol dicitur cum equo concurrere ad productionem equi ; cum igne , ad productionem ignis , &c. Causa particularis , est ea quæ certos quosdam effectus propriæ virtuti respondentes , sola per se attingit , non autem cum aliis causis subordinatis. Ita sol ipse dicitur producere lumen suum ut causa particularis ; ita & ranam , quando se solo , non concurrento cum aliâ ranâ , in illius generationem influit.

*Divi-*

*Dividitur* III. In univocam, & æquivocam. Univoca, est quæ attingit effectus ejusdem secum naturæ, & speciei; qualis est equus respectu equi; vel ignis respectu ignis. Causa autem æquivoca, est diversæ naturæ à suis effectibus. Ita Deus; ita sol, est causa æquivoca respectu omnium suorum effectuum.

*Dividitur* IV. In causam necessariam, & liberam. Necessaria est quæ positis omnibus requisitis ad agendum, non potest non agere. Quod iis omnibus competit quæ non agunt ex cognitione & libero arbitrio. Nam causa libera est quæ positis omnibus ad agendum prærequisitis, potest agere aut non agere, qualis est voluntas libera. *Vide quæ in Morali de natura hujus libertatis prosecui sumus.*

*Dividitur* V. In Physicam & Moralem. Physica est quæ per suam agendi virtutem naturalem attingit effectum. Vt Petrus loquens, currens, disputans, alium percutiens, &c. Causa autem moralis dicitur ea, quæ vel orando, vel imperando, vel consulendo movet causam physicè effectivam ad præstandum effectum; quamobrem illi imputatur effectus.

*Notandumque* est, causam physicam seu naturalem sumi non modò prout opponitur aut morali, aut liberæ, de quibus proximè agebam; sed etiam prout opponitur tum artificiali; tum obedientiali & supernaturaliter elevatæ. Quare ut in istâ causæ efficientis divisione pergamus:

*Dividitur* VI. In naturalem, & artificialem. Artificialis, est ea quæ agit ex ideâ operis faciendi, & juxta præcepta quædam. Naturalis autem agit sine hujusmodi cognitione, aut ideâ. Vt quando sol producit effectus suos, ignis calorem, oculus visionem, &c.

*Notan-*



*Notandumque* est 1. Brutas animantes, putà, hirundinem in ædificando nido; apes, fornicas, &c. idcirco non operari propriè ex arte, sed potiùs ex solo instinctu; quia non agunt ex præceptis, &c. Item

*Not. 2.* Artem ad opera naturæ posse concurrere applicando actiua cum passivis. Sic enim Agricultura stercorendo & vertendo agros, ad uberiores fructuum generationem; sic Chymica ad metallorum transmutationem concurrit; sic Dæmones plerumque, ex pacto cùm magis pluviam, grandinem & tonitrua excitant, serpentes, ranas, aliæque id genus procreant, applicando actiua passivis.

*Dividitur VII.* In naturalem, supernaturalem & obedientialem. *Naturalis* est ad effectus ordinis duntaxat naturalis, neque ad agendum requirit alium Dei concursum, quàm generalem sibi debitum. Ea autem solet vocari *potentia supernaturalis*, quæ cùm in entitate sit ordinis supernaturalis, respicit per se quosdam effectus supernaturales, quos cum solo Dei concursu generali sibi debito potest producere. Quomodo *v.g.* lumen gloriæ concurrit ad visionem beatificam. At *potentia obedientialis* dicitur ea, per quam res creata, quatenus Dei voluntati subdita est, potest aliquid supra naturalem suam vim ac virtutem agere, aut pati. Duplex enim est, ac primò quidem *passiva*, per quam res in se recipit formam diversi ordinis, putà in entitate supernaturalem, cùm sit ipsa naturalis; ut quando anima recipit gratiam sanctificantem: vel ejusdem ordinis, non tamen ab agente naturali per vim activam naturalem operante. *Activa*, de quâ præcipuè hîc sermo est, dicitur *vis agendi* per quam res creata,

ut subdita est Deo, potest volente ipso, & quasi imperante, attingere effectus supra vim propriam, ac sibi connaturalem. Quomodo Sap. 16. tam multa narrantur facta per elementa supra eorum vim naturalem. Sic manna quemlibet reddebat saporem; sic virga emisit flores. Sic ignis inferorum verè ac physicè cruciat Dæmones, ut exposuimus in Metaph. *Disput. De Angelis* c. 2. Sic denique intellectus beatificus elicit visionem Dei in entitate supernaturalem, non per aliquam sibi naturalem virtutem; ergo per *potentiam obedientialem*, quæ lumine gloriæ ipsi superaddito compleatur *eleveturque*.

*Notabis* enim 1. Visionem beatificam, cum sit actus vitalis, efficienter prodire etiam ab intellectu, non autem à solo gloriæ lumine per quod elevatur ipse intellectus. Item, de facto

*Not. 2.* Eâ in re quæ ad agendum physicè elevetur, necessariò præsupponi vim aliquam inchoatam saltem, atque imperfectam, per quam influat in effectum supernaturalem, eo ferè per proportionem modo, quo virtus debilis adjuncta per potentiorē, tollit pondus ipsi longè impar. Quanquam hoc loco discrimen afferri debet, quodd concursus causæ aliam supra vires proprias & connaturales *elevantis*, est supernaturalis ipsi causæ elevatæ, nec elevari aut compleri potest per solas causas naturales. Iam verò probatur necessitas virtutis illius, saltem inchoatæ, in causa elevabili. Primò. Quia nulla res agit, nisi prout est activa; id est, prout habet vim agendi in ordine ad effectum. Item actio supponit non tantum agens existere, sed habere & vim agendi. Nam sicut id quod non existit, non potest elevari ad agendum, ita nec  
illud

illud quod vim agendi nullam habet. Quinetiam alioqui diceretur solus Deus agere ad ipsius rei præsentiam, non autem res ipsa; quæ proinde solum hoc pacto diceretur causa *moralis*, non autem *physica* illius effectus. Sicque agebamus modò, intellectum beatificum lumine gloriæ adjutum, influere effectivè in visionem beatificam. Quod per proportionem æstimandum est de aliis tum ipsius intellectus, tum voluntatis actibus supernaturalibus, ut supernaturales sunt; quemadmodum docetur in Trident *sess. 6. Can. 4.* traditurque apud Suarem *Tom. 1. in 3. p. Disp. 31. sect. 6.*

*Notandumque* est 3. Potentiam illam obedientialem esse idem realiter cum entitate causæ creatæ; vimque habere tam debilem, & tam exilem influxum tribuere, ut ad effectus productionem indigeat vel qualitate aliquâ superioris ordinis ipsi additâ; quo pacto intellectus per lumen gloriæ disponitur ad visionem beatificam; vel saltem indiget concursu Dei simultaneo speciali & uberiori supplente vices illius qualitatis superadditæ.

*Notabis* enim 4. Ex communi sententiâ contra Thomistas apud Maratium *Tract. de Deo, Disp. 12.* posse in eo casu intellectum, aut quamlibet aliam facultatem elevari per solam Dei extrinsecam assistentiam, seu concursum specialem simultaneum. Sic enim Deus potest supplere concursum virtutis cujuscunque creatæ non vitalis; siquidem potest per seipsum immediatè illud efficere, quod facit per causas creatas, quarum vim activam omnem in se continet. Excipiebam autem influxum potentiae vitalis, quia de se tantum est à potentiâ vitali, ut explicatur in *Tract. de Animâ.* Et verò juxta com-

communem Theologorum doctrinam, sic de facto supplet concursum habitum supernaturalem fidei, & charitatis, dum primi earum virtutum actus eliciuntur; aut quoties istorum actuum aliquis intensior habitu exercetur. At contra existentiam potentiae obedientialis illius quam hic supponimus.

*Obje.* Sequeretur in entibus naturalibus esse partialem aliquam vim activam, & quidem naturaliter congenitam, ad actus supernaturales. Atqui consequens est Pelagianum; sic enim aliquid tribueretur naturae in ordine ad supernaturalia. *Dist. Ma.* Partialem vim aliquam naturaliter congenitam, ipsamque naturalem. *N.* Obedientialem, eamque imperfectam & incompletam, unde res potius dicatur *elevabilis*, & tantum remotè potens influere in actus supernaturales. *C.* Nec rudè in Fide negaretur, inquit Suarez, *loco citato*. Quia sicut de fide est v.g. intellectum & voluntatem solis naturae viribus, & ex concursu duntaxat generali non posse actus supernaturales exercere; ita etiam Divinam Fide certum est, posse illud praestare, ubi juvantur auxilio supernaturali.

*Inst. 1.* Sequeretur ejusmodi potentiam obedientialem rebus creatis ingenitam, esse supernaturalem. Quia virtus proximè activa est ejusdem ordinis cum suo effectu, & ab eo specificatur. Ergo si effectus est supernaturalis, erit quoque & vis illius activa supernaturalis. Atqui repugnat rebus naturalibus innatam esse virtutem supernaturalem: quia supernaturale dicitur id quod est supra omnem naturam. Ita vulgè Thomistae contra Suarem, aliosque recentiores. *R.* Cum Maratio *Tract. de Sacram. Disp. 4. sect. 9.* Potentiam illam obedientialem  
nec

nec dici naturalem, nec supernaturalem, sed *innatam*, seu *congenitam*, quia concreata est rei cui inest, siquidem ab ejus entitate non distinguitur: quomodo per proportionem ab entitate *v. g.* caloris non distinguitur virtus tam multiplex, ad tam diversos effectus aut substantiales, aut accidentales, quos tanquam instrumentum potest producere, prout diversis formarum substantialium generibus conjungitur. Illius autem discrimen à causâ naturali & supernaturali habes ex dictis initio hujus capitis; maxime verò ex eo quòd ut agat, requirit semper simul aut agens in entitate supernaturale à quo adjuvetur, quale est lumen gloriæ in intellectu, ad Dei visionem; aut saltem exigit concursum uberiores sibi non debitum, unde compleatur ad agendum.

*Inst. 2.* Potentia illa obedientialis esset actu infinita, quia esset ad omne producibile, sicque haberet idem objectum cum omnipotentia Divinâ, cujus ad nutum *obedit*. *Re.* Non posse rem quamlibet elevari ad quidlibet, aut per modum subjecti in se illud recipiendum; quomodo Angelus *v. g.* dealbari non potest, aut quantitatem in se recipere, per quam efficiatur formaliter divisibilis in partes, cum ex naturâ suâ sit indivisibilis. Item, nec potest elevari ad producendum quidlibet: sic enim vulgò ajunt, nec auditum ad percipiendos colores, nec visum ad percipiendos sonos esse elevabilem, &c. Item etiam Theologi docent in *1. part. D. Thoma*, esse aut de fide, aut saltem fidei proximum, non posse oculum corporeum elevari ad visionem Dei ut in se est. Quo pacto etiam brutum elevari non potest ad ratiocinandum, aut ad agendum liberè, unde

visionem Dei promereri & obtinere queat. Per se enim repugnat, ut res materialis vivat vitâ spirituali, &c.

### CAP. III, *Aliæ Divisiones causa efficientis.*

**E**X causis aliæ sunt ejusdem generis, quales sunt vel materiales inter se comparatæ, vel formales, vel efficientes, &c. Sed inter causas ejusdem generis, putà inter efficientes, reperiuntur diversi ordines; siquidem ex istis aliæ sunt *particulares*, aliæ *universales*. Item, aliæ sunt *totales*; aliæ *partiales*. Item, ex iis aliæ dicuntur *principales*; aliæ autem *instrumentales*. Dixi jam de causâ universali & particulari. Superest ut explicemus naturam totalis & partialis; tum agemus de principali & instrumentali; quibus subjungam divisionem in *causam per se*, & *per accidens*; ubi & De Fato.

Dico igitur I. Causa totalis ea est, à quâ in tali ordine pendet effectus secundum totam suam perfectionem; seu quæ in suo ordine sufficiens est ad producendum talem effectum, & sub tali perfectione. Sic candela *A*, quæ sola lucet, dicitur esse totalis causa luminis illius quo spatium istud collustratur. At si per accessionem candelæ alterius ponat in eadem parte medii effectum intensiorem, quàm possit sola & seorsim producere; tunc dicitur esse tantum *causa partialis*; pluresque illæ causæ ejusdem ordinis, putà plures candelæ simul junctæ ad producendum effectum intensiorem, & ad majorem distantiam, dicuntur causæ *partiales* constantes unam *totalem*. Dixi *eiusdem ordinis*. Nam quæ est causa superior & universalis, cui scilicet partiales illæ subordinantur, ea censetur totalis in suo genere, nec dicitur cum

cum istis concurrere partialiter, seu instar causæ partialis.

*Dico II.* Causa principalis ea est, quæ agit per propriam virtutem, & effectui proportionatam. Vt ignis produciens ignem, aut calorem; qui effectus non sunt perfectionis majoris, quàm quæ est ignis propria. Contrà autem instrumentum, seu causa instrumentalis ea est, quæ agit tantùm per subordinationem ad causam principalem, aut in virtute illius, nec habet effectus nisi illi causæ principali per se proportionatos. Quare instrumentum vulgè dicitur elevari à causa principali per *motionem*, quam ab ipsâ, vel dependenter ab ipsâ recipiat. At motio illa vel est virtus activa, ut quando aqua calefacit per calorem ab igne derivatum; vel est motus localis, per quem ad agendum applicatur; ut quando pictor utitur penicillo ad pingendum. Quamobrem duplex est genus instrumenti. Aliud quidem *activum* quod accipit qualitatem activam: aliud autem *purè motum*, quia nihil accipit præter motum localem, nec tam est activum, quàm id quo agit causa principalis, istudque propriè est *instrumentum artis*; ut calamus quo scribo. Alia autem solent dici *instrumenta naturalia*; quæ quidem habent vim activam instrumentariam, vel secum natam, ut semen quod est instrumentum arboris ad aliam arborem producendam: vel certè ad illam activitatem concurrunt tantùm passivè & materialiter, ut quando aqua recepto calore fit instrumentum ignis ad calefaciendum. Quinetiam ejusmodi instrumenta vel sunt *conjuncta*, vel *separata*. Illud dicitur *conjunctum* instrumentum, quod non agit nisi actu conjunctum causæ principali, & ab eâ motum actu; ut penicillus,

*Separatum* verò illud est, quod non eget actuali concursu causæ principalis ad hoc ut agat actu. Sic enim aqua calida calefacit absente igne; ita semen arboris aliam producit arborem, &c.

*Notabis* igitur ex dictis primò, pro diversitate causarum principalium diversa esse genera instrumentorum; quâ ratione agebamus modò, alia esse instrumenta *physica* seu *naturalia*; alia autem instrumenta *artis*. Item, alia sunt propria agentium intellectualium: quo pacto doctor locutione uritur tanquam instrumento, ad informandum discipuli animum, phantasmata & conceptus idoneos excitando, unde rem ex scientiâ comprehendat.

Item, alia dicuntur instrumenta *Moralia*; cujusmodi est ille homo per quem alius imperat, prohibet, orat, &c. Ita legatus acceptâ auctoritate à Rege, dicitur illius instrumentum morale.

Specialem verò habent rationem instrumenta potentiae Divinae; ubi nimirum creaturis utitur Deus ad effectus producendos qui vim earum naturalem superent. Nam ignis v. g. per potentiam obedientialem supernaturaliter elevatam, est Dei instrumentum ad captivandos, tum etiam ad comburendos Dæmones. Ita sunt à Christo Domino instituta Sacramenta, tanquam causæ instrumentales ad producendam in nobis gratiam sanctificantem.

*Notabis* enim eam esse vim Sacramentorum Legis Christianae, ut gratiam illam conferant, etiam independenter ab opere operantis; id est, independenter à merito vel administrantis Sacramentum, vel illud susipientis; modò non ponat obicem; sed potiùs illam conferunt ex opere operato, id est, vi operis externi, quod ritè,

&amp;c.



& juxta institutionem Divinam applicatur, seu hoc ipso quòd debitè applicetur. Item,

*Not. 2.* Sacramenta sic dici causas morales illius gratiæ, quatenus pro institutione Christi, Deum movent ut de facto gratiam infundat. Quamquam & physicè quoque produci gratiam per ipsa Sacramenta supernaturaliter elevata, Theologi non pauci, cum Thomistis docent.

*Not. 3.* Ad rationem Divini instrumenti physicè activi, pertinere potentiam obedientialem, quæ ad effectus supra naturam ipsius creaturæ producendos elevatur à Deo, saltem per concursum uberiores, uti aiebamus. Quamquam

*Not. 4.* Non omne quod agit per virtutem obedientialem & supernaturaliter, idcirco habere tantum rationem propriè dicti instrumenti. Sic enim *v. g.* intellectus beatificus per lumen gloriæ elevatus, est causa principalis partialis respectu visionis beatificæ; quia quatenus est intellectio, suam habet cum intellectu proportionem, &c.

*Not. autem V.* Contra Thomistas, instrumentum per se non habere aliquam actionem sibi propriam antecedenter ad eam, quam exercet in virtute causæ principalis. Neque enim *v. g.* calamus præviā aliquam operationem habet ad scriptionem, aut ferra ad scissionem, aut aqua calida ad calefactionem; neque verò etiam in iis ullo modo est realiter duplex actio. *Confir.* maximè in instrumentis agentis Divini, ut per se patet.

*Objic.* Nulla esset ratio cur *v. g.* ferra diceretur instrumentum fabri, neque ad hoc elevari posset, nisi propriam haberet actionem, nempe *scissionem* proportionatam effectui artis

fabrilis : & sic de aliis. R. Serram non scindere nisi ut motam à fabro , ac proinde *scissionem* illam esse effectum causæ principalis , cui simul consequens est forma operis artefacti , puta cathedræ. Etsi autem in istis artis instrumentis requiratur certa dispositio , unde redantur idonea ad proprios artis effectus ; non ideo requiritur actio distincta ab actione causæ principalis , ipsique prævia , nisi aliquando , & per accidens.

*Inst.* Sequeretur instrumentum de se non esse activum formaliter ; sed habere se tantum merè passivè , actionem causæ principalis quasi transmittendo ad effectum ; cum tamen instrumentum sit causa verè & propriè effectiva. R. Sic ferram v. g. esse quidem causam propriè effectivam , sed actione causæ principalis ipsi appropriatâ ; Item , aqua calida , sic dicitur propriè calefacere per virtutem aliunde ipsi communicatam , &c.

*Dico* IV. Causa per se , est ea quæ per vim sibi propriam , & ex instituto naturali , attingit effectum. Ita sol per se lucem producit , ignis calorem. Sic architectus ut architectus per se ædificat. Contrà autem , causa per accidens , nec vi propriâ quatenus talis est , nec proprio ex instituto attingit effectum. Sic aqua calida , per accidens duntaxat calefacit. Sic architecto per accidens est canere , aut pingere tabellam ; uti & musico ædificare. At

*Not.* 1. Duplex est genus causæ per accidens. Primò enim alia est per accidens ex parte causæ ipsius ; ut in allatis exemplis ; quando nimirum effectus non est ex proprio causæ instituto. 2. Alia est per accidens ex parte effectus ; quando effectui vel naturali , vel per se intento ,  
alius

alius effectus adjungitur, aut qui sit præter agentis intentionem, aut qui nullam cum illo habeat connexionem. Cujusmodi quidem effectus dicuntur vel *casuales*, vel *fortuiti*: quia eorum causa dicitur vel *casus*, vel *fortuna*: differuntque in eo, quod effectus fortuiti sint tantum ab agentibus intellectualibus, quatenus operantur ex intentione & prævisione. Sicque inventio thesauri, quæ terram vertenti in ordine ad faciendam sementem, contigit, vocatur *fortuita*, facitque illum agricolam *fortunatum*; quia præter ipsius prævisionem & intentionem evenit. Cum autem lapis v. g. pro suâ naturali gravitate decidens, prætereuntem lædit; illa læsio dicitur effectus casualis; quia non est à causâ agente ex intentione finis alicujus.

*Notandumque* est consequenter, nihil respectu Dei posse contingere casu, aut fortuito. Quia nihil fieri potest præter illius prævisionem, tum præter illius intentionem, aut permissionem. Item viris sapientibus pauca fortuito contingunt: cum soleant agere ex prudentiâ & consilio, futuros eventus penè omnes prævidendo: quamobrem vix illud dictum usurpant, *non putabam*.

*Not. 3.* Ad effectus casuales revocari monstra, nempe effectus naturales illi, qui à rectâ & solitâ secundum speciem dispositione deficiunt: pura si homo nasceretur biceps, &c. quæ in Tractatu de generatione corporis animati explicantur.

*Dico I V.* Fatum, secundum rei veritatem, aliud nihil est quam dispositio causarum omnium secularum in ordine ad suos effectus, prout subest liberæ Dei providentiæ. Vel si lubet: ipsa est libera Dei providentia prout mundum

dum univēsum administrat, causas secundas disponens certos ad effectus, necessarias quidem determinando, liberis autem concursum indifferentem atque indeterminatum præbendo, ut singula suis propriis nutibus, ac propriæ naturæ permittantur. Quare

*Notandum est, rationem fati secundum veteres Stoicos aliosque id genus philosophos, rejiciendam esse à Christianis, cum libertatem omnem destruat. Aiebant enim fatum quo regerentur universa, esse necessitatem quandam tum Deo, tum rebus aliis omnibus impositam, quam subire cogerentur. Quanquam alii Deum ab illa fatali necessitate exinebant; cætera autem vel certæ cuidam æternæ legi, vel astro- rum influxibus ita subiciebant, ut nequidem voluntas humana ulla resistere ipsis posset. Sed rectè monet D. August. s. De Civit. Dei. Si quis virtutem, vel potentiam Dei, nomine fati appellat; sententiam teneat, linguam corrigat. Id est, rectè quidem sentit, sed eam potius nominet Divinam providentiam; non autem fatalem necessitatem.*

## DISPUTATIO II.

Causæ efficientis Causalitas, seu Actio.

### CAP. I. Actionis natura, & divisiones.

**V**T causa efficiens dicitur esse in actu primo, quatenus intelligitur habere virtutem causandi, seu inferendi effectus; ita & dicitur efficiens in actu secundo, prout de facto infert effectum; quo pacto etiam dicitur agens actu, seu habere actionem actu, cum  
actio

actio fit propria causalitas causæ efficientis, quæ positâ intelligatur causare actum.

*Dico autem I.* Actio est actualis influxus causæ in effectum. Vel si lubet; est exitus, seu processio effectus ipsius à causâ; unde & causa denominatur actu agens. At

*Dico II.* Actio specificatur à termino, id est, ab effectu producto. Actio enim est essentialiter connotativa termini sui, nec proinde causam denominat agentem actu nisi posito effectu in fieri. Mirum igitur non est si specificetur ab illo termino; id est, quod dicatur esse talis actio, quia est ad talem terminum. Ita quæ est ad formam equi in fieri, vocatur generatio equina; quæ est ad calorem, calefactio; ad lumen, illuminatio; & sic de aliis. Sic illa dicitur actio *naturalis*, cum effectus producitur viâ naturali; alioquin diceretur actio *supernaturalis*.

*Notandumque* est obiter hîc interdum fieri æquivocationem. Nam aliquando actio sumitur pro ipsa re quæ efficitur; cum propriè actio dicatur esse processio effectus à causa. Porro hac positâ observatione,

*Dico III.* Multiplicem esse actionis divisionem. Primò enim est actio substantialis, quando producitur aliqua substantia. Sed actio substantialis, vel est creatio, quando substantia producitur ex nihilo subjecti. Vel est eductio seu generatio naturalis, si producitur forma substantialis in materiâ priùs dispositâ.

2. Est actio accidentalis, quæ pro termino habet entitatem accidentalem. Hæcque est vel alterativa, si producitur qualitas alterativa, ut calor, per quem scilicet disponitur subjectum ad aliquam transmutationem substantialem. Vel

est tantum actio perfectiva, ut illuminatio. Item, alia dicitur actio artificialis, ubi figura, vel opus aliquod ex præceptis artis efficitur. Item alia est actio prudentiæ, &c.

Item ex modo rei producendæ, alia est actio quæ dicitur successiva, quando effectus non simul totus, sed per partes post partes produci-  
tur, ut motus. Alia est actio instantanea, quan-  
do totus simul existit; ut illuminatio, visio,  
intellectio.

Item, alia est actio quæ vocatur transiens, quando effectus produci-  
tur ad extra; id est, non in ipsâ causâ recipitur: ut quando crea-  
tur mundus à Deo: quando ignis produci-  
tur ab igne, &c. Alia verò est actio immanens;  
ubi effectus produci-  
tur tantum ad intra; id  
est, in ipsâ causâ. Vt cum oculus elicit visio-  
nem, aut intellectus intellectionem, quam in  
seipso recipit.

*Notandum* verò est, actionem immanen-  
tem dividi in eam quæ dicitur fieri cum trans-  
mutatione subjecti, ideoque propriè appellatur  
actio, terminaturque ad propriè dictum effe-  
ctum; ut intellectio, aut visio: nam visio pro-  
ducitur in oculo, cum priùs, quantum est ex se,  
in eo non existeret. Et sic transitur à non *esse*  
visionis, ad *esse* illius visionis. Verum alia est  
actio immanens, quæ de se non est cum ejusmo-  
di transmutatione; neque illius terminus pro-  
priè dicitur *effectus*; hæcque appellatur *emana-  
tio*. Vt emanatio caloris in igne: quia ignis,  
quantum est ex se, non est unquam sub priva-  
tione caloris; quomodo neque aqua, neque  
res alia, quantum est ex se existit unquam sub  
privatione suæ proprietatis; simul enim ac res  
est, suam emanat proprietatem; & consequen-  
ter

ter illam non recipit cum sui transmutatione. Item, processio in Divinis dicitur emanatio, non autem propriè actio, neque illius terminus propriè est effectus.

Præterea tandem actio omnis dividitur in activam, & passivam. Passiva est in effectu, per quam denominatur agi, seu produci. Quam Arist. 3. Phys. definit *actum hujus* (nimirum effectus) *ut ab hoc*, id est, agente. Cùm è contra dicat passionem esse *actum hujus*, id est, agentis, *in hoc*, videlicet, passio. Neque verò, ut inquit, repugnat actum alterius esse in altero, sicut doctio, quæ est actus docentis, est in docente: ubi sermo est de actione passivâ, seu terminativè sumptâ; sicque ait D. Th. esse actum agentis, non quidem quo perficiatur, sed quo perficiat. Eamque tradunt, ex eodem Aristotele, non magis distinguî à passione, quàm distinguatur via Athenis Thebas, & Thebis Athenas. Iam verò

*Dico I V.* Actio activa est intrinsecè in ipsâ causâ, per quam denominetur agens actu, seu inferens effectum, ipsique esse communicans. Sic Arist. lib. de somno & vigilia, *ibi est actus*, inquit, *cujus est potentia*. Prob. Vt enim agi, seu produci habet se ex parte effectus, ita & agere, & consequenter actio activè; seu causaliter sumpta, se habet ex parte causæ. Item, in eo est actio, in quo est relatio causæ ad effectum; quia relatio fundatur in actione: sed relatio causæ ad effectum est in ipsâ causâ: ergo & actio, quam activam, seu causaliter sumptam nominamus. Confir. ex proportionem ad productiones Divinas immanentes. Sic enim in Patre est productio seu generatio activa, unde intelligitur generare Filium; quomodo se habet ex parte Filii generatio passiva per quam intelligitur generari.

*Obiic.* Illa omnis actio diceretur immanens, quia semper est in causâ. *Rz.* Ex eo tantum dicitur immanens, aut transiens, quod terminus ipsius producat vel ad intrâ, vel ad extrâ, ut vulgè loquuntur.

*Inst.* Esset in ipso Deo actio per quam denominatur creans mundum: ergo per eam denominaretur necessariò creans, & quidem ab æterno; quia nihil est in Deo, quod non sit necessariò, & ab æterno; imò quod non sit ipse Deus, &c. *Rz.* Deum quidem hoc modo esse suam actionem, & in eo existere necessariò quoad entitatem, non tamen quoad denominationem. Cum enim actio sit essentialiter connotativa sui termini, habeatque cum illo connexionem necessariam, non denominat subjectum suum agens actu, nisi ubi actu infertur effectus; sicque actio creativa non est denominativè in Deo, nisi in tempore quo creatur mundus actu.

*Notabis* tandem, *actioni* oppositam esse *passionem*, quæ est receptio formæ productæ in subjecto, seu receptio *re esse* in re productâ. Sic enim effectus dicitur recipere esse à causâ, à quâ producitur. Atque ista quidem passio dicitur indistincta realiter ab actione, passivè sumptâ, per quam effectus dicitur *agi*, seu *produci*.

## CAP. II. Actionis indistinctio.

**D**ico I. Actio activa à causa; tum passiva ab effectu distinguitur saltem formaliter. Sic enim est formalitas quæ saltem definitione, & conceptu formali ab iis distinguitur. At

*Dico* II. Non distinguitur ullo modo realiter. Sic Arist. quando 5. *Metaph.* scribit eam aliâ ratione non esse mediam inter agens & pateriens, quàm *habitus* vestimenti inter vestimentum  
tum



tum & personam vestitam. Cujusmodi medium nolunt ipsi adversarii esse aliquid realiter distinctum. Ergo à pari actio. Conf. Quia non unus, sed duo modi actionis realiter distincti admitti deberent, cum supponamus tam esse actionem in agente, quam in effectu; quod nolunt adversarii. Item, causalitates aliarum causarum, ut informatio à formâ, non distinguuntur: ergo à pari neque actio. Confir. 2. Quia frustra esset illa distinctio realis, cum in effectus tam seipso immediate ab ipsâ causâ possit procedere, quam actionis modus aliquis realiter distinctus. Nec actio activa est aliud quam positio ipsius effectus; quomodo passiva est ejusdem effectus processio à causâ. Item, ille actionis modus non est ens improductum; ergo si in creatis, id quod ab alio producitur, exigit de se produci mediante aliquo actionis modo, modus iste actionis produci debebit mediante alio actionis modo realiter distincto; & sic fiet processus in infinitum. Respondent, actionem esse per seipsam formaliter actionem, & produci tantum *ut quo*; quamobrem non habet parem cum aliis effectibus rationem. *Contrà est.* Nam quanvis seipsâ formaliter sit talis, quomodo calor seipso formaliter est calor, hoc non impedit quominus sit efficienter ab alio. Item, est terminus *ut quod* actionis, quia est aliquid quod producatur formaliter.

*Obje.* Actio vulgè dicitur *via, tendentia*, & *medium* ad effectum. Sed hæc distinguuntur realiter, quomodo via Thebis Athenas distinguitur realiter ab utroque illo extremo. R2. Actionem non ita appellari nisi per metaphoram, & juxta nostrum concipiendi, aut imaginandi modum. Nam etiam Theologi nomine *Via* utuntur ad explicandas processiones Divinas; cum tamen

proprie loquendo non sint nisi emanatio unius ab alio, vel activa, vel passiva.

*Inst. 1.* Illa distinguuntur realiter quæ possunt esse sine invicem : atqui causa potest esse sine actione , tunc scilicet ubi non causat actu : ergo. *Dist. Ma.* Quæ possunt esse sine invicem entitative, seu realiter, & non tantum denominative. C. Atqui denominative tantum causa potest esse sine actione , defectu connotati , seu effectus in fieri.

*Inst. 2.* Fieri posset vel in causâ , vel in effectu ipso , transitus de contradictorio in contradictorium sine mutatione. Nam ex hypothesi quod v. g. lumen à sole productum , sole ipso præsentem , conservetur à Deo solo ; tunc explicari non poterit quo pacto à sole influxum sui conservativum non recipiat , nisi dixeris in eo casu impediri aut destrui actionem solis præsentis ; unde consequenter inferatur dari actionem realiter distinctam ejusmodi , per quam sol influat, seu per quam determinetur ad influendum in hoc numero lumen. B. Tunc lumen accipere à Deo modum essendi , sub, quo non potest conservari , aut accipere influxum à tali agente. De quo essendi modo jam supra ex Metaphysicâ, *Tract. 1. Disput. 3. cap. 4.*

# DISPUTATIO III. DEPENDENTIA CAUSÆ CREATÆ AB INCREATA.

## CAP. I. De Creatione.

**N**ulla res extra Deum potest existere, nisi vel creetur à Deo; vel saltem nisi immediate procedat à Deo concurrente cum causâ creatâ. Sic enim causa creata nullum effectum potest attingere, nisi iuvante Deo per concursum simultaneum, aut etiam prævium; tum denique, nisi præterea per eundem concursum determinetur effectus in individuo. Quæ quidem ut singulis capitibus prosequar,

*Dico I.* Nihil unquam fuisse creatum, nisi à Deo. Est autem hic sermo tantum de creatione propriè sumptâ. Hoc fides Christiana docet ex Conc. Nicæno & Lateranensi. *Tu creasti omnia.* Apoc. 4. Item, ad Heb. 4. *Qui creavit omnia, Deus est.* Quinetiam

*Dico II.* Nullam ex creaturis non modò non creasse quidquam, sed neque habuisse vim connaturalem ad creandum. Prob. Quia *Ecl. i.* dicitur Deus *unus altissimus creator omnipotens.* Item, cum nulla unquam de facto quidquam creaverit, sequitur vim ejusmodi nulli concessam fuisse. Neque enim Deus universaliter privat creaturas illis operationibus, quarum habent facultatem naturalem. Item, nullum apparet signum tantæ virtutis quæ creaturis concessa fuerit, cum omnes agant dependenter à subjecto, quantum quidem possumus cognitione assequi. Præterea verò

*Dico*

*Dico* III. Nulla creatura, quantumcunque perfecta, creare quidquam potest, saltem ut causa principalis, & per vires sibi connaturales. *Prob.* Quia in sacris literis, virtus creandi numeratur inter attributa Divina; quod ex locis jam citatis colligi potest: legiturque *Iobi c. 12.* quomodo vel ex ipso mundi ac rerum singularem conspectu, manifestè constet Deum esse omnium creatorem. Quod non esset verum, si præter Deum posset esse alius creator. Ita vulgò ex iisdem sacris literis Sancti PP. probant contra Arianos, Filium in SS. Trinitate esse verum Deum, quia creare potest, cum solius Dei proprium sit creare. Hoc contendit D. Athan. *serm. 3. contra Arianos.* D. Basil. 4. *contra Eunom.* Ita D. Aug. lib. 5. *De Genesi ad literam.* c. 15. scribit tam impossibile esse Angelum creare quippiam, quàm seipsum, &c. Quamobrem Gregorius à Valentia, aliique vulgò Theologi statuunt hanc omnino tenendam esse sententiam, ob tam gravem auctoritatem, etsi rationes quæ affefri solent videantur minùs efficaces. Vnam hanc profero ex D. Th. Quæ propria est Dei actio, censerì debet omnino creaturæ incommunicabilis. Neque enim minùs est incommunicabilis creaturæ, quàm proprius essendi modus, aut propria Dei ipsius attributa alia. Atqui talis est actio creativa. *Prob.* Quia illa actio est per se Dei propria, quæ per se est omnium prima; siquidem, ut habet D. Th. 2. *contra Gentes c. 21.* ordini agentium debet respondere ordo actionum. Ergo quæ per se est actio omnium prima, debet respondere primo agenti, & esse ipsius propria. Creatio verò est actio de se omnium prima, quia de se nullam aliam præsupponit, & præsupponitur ad alias omnes creatura-

turarum operationes. *Prob.* Quia ut agens aut naturale, aut artificiale agat, præsupponit subjectum quod habeat esse per creationem; creatio autem nihil præsupponit, siquidem est productio effectus ex nihilo. Confirmatur argumento Vasquesii in 1. p. Disp. 175. Angelus, inquit, etsi perfectissima est creatura, non potest habere vim ad creandum; quia supponitur Angelus per se & directè non esse operativus ad extra, nisi eorum quæ spectant ad motum localem, aut res in loco continendas: hæc autem subjectum necessariò præsupponunt: ergo creare non potest; ergo vis illa tam eximia creaturis aliis communicari nequit.

*Objic. 1.* Satis est, ut actio dicatur esse Dei propria, quòd fiat sine subordinatione ad agens superius. *C.* Atqui si creatio aliqua foret à creaturâ, non fieret sine subordinatione ad aliud agens superius; nempe ad Deum. Vnde inferri posset creationem hujusmodi non fore actionem Dei propriam. *Dist. Min.* Ex illâ hypothese non fieret sine subordinatione; aliunde verò absolute & in se, cùm sit actio Dei propria, fieret sine subordinatione. Ergo simul fieret, & non fieret sine subordinatione. Quod repugnat

*Objic. 2.* Possunt participari à creaturâ perfectiones aliæ Divinæ, ut sapientia, bonitas, &c. *Tr.* Ergo à pari & virtus creandi. *N. Conf.* Quia perfectiones aliæ possunt communicari creaturis modo non proprio Dei, id est cum limitatione. At virtus agendi quæ Divina est, potest quidem similiter participari à creaturâ, sed non cum modo proprio Dei, nempe per creationem.

*Inst. 1.* Virtus finita omnis communicari potest creaturæ. *Tr.* Atqui virtus creandæ v. g. muscæ

muscæ alicujus, est finita; quia non est nisi ad terminum finitum, seu finitæ solùm perfectionis; neque verò etiam, quod volunt nonnulli, ens ejusmodi creatum distat infinitè à nihilo sui; quia non distat nisi per gradus perfectionis quos in se continet, qui finiti sunt. R. Virtutem etiam creandæ muscæ esse infinitam, quia est virtus agendi cum modo Dei proprio; hæc autem est infinita. Sicque omnis creatio exigit virtutem infinitam saltem specificativè, id est, quæ sit infinita; quanvis non reduplicativè, id est, quanvis non exigit infinitam ut infinitam, seu quæ influat in effectum modo infinito.

*Inst. 2.* Potest communicari vis generandi aut hominis, aut leonis. C. Ergo à fortiori, vis creandæ muscæ; quia creatio muscæ non est nobilior; quàm generatio hominis. R. Non est nobilior ratione termini producti; sed est nobilior ratione modi quo producitur.

*Dico IV.* Cum D. Th. nequidem instrumentaliter posse creaturæ communicari vim creandi. Quia nequidem hac ratione actio Dei propria, seu modus agendi proprius communicabilis est creaturæ. Ita modus agendi vitaliter viventium proprius, nulla ratione est communicabilis lapidi; cùm tamen illa vitalitas non sit magis viventium propria, quàm per proportionem creatio propria sit Dei.

*Obje.* Elevatur vox Sacerdotis tanquam instrumentum quoddam ad reproducendum corpus Christi Domini in Eucharistia, aliæque id genus quæ non sunt valdè absimilia creationi. Tr. Respondeo enim in communi Theologorum sententiâ, Sacerdotem esse tantum instrumentum morale illius effectus, qui à solo Deo physice perficitur. Ut explicui *Disp. 2. hujus Tract. c. 3.*

C A P. II. De Conservatione.

**C**onservatio est actio per quam res jam accepto esse, in eo persistit; fitque istud duobus modis. 1. Indirectè: cùm scilicet removeatur prohibens, aut contrarium destructivum. Quomodo ille dicitur conservare domum, qui incendium extinguit; aut etiam quomodo pharmacum vitam tuetur, expellendo humores noxios. 2. Directè res conservatur, cùm *esse* suum accipit à causâ in illam jugiter influente; quâ ratione lux conservatur à sole. Atque hæc quidem directâ conservatio vel mediata est, quando fit aliâ causâ mediante; vel immediata, nullâ causâ mediante. Atque his positis,

*Dico* Rem omnem creatam in suo esse conservari à Deo, non solùm indirectè, quatenus pro suâ providentiâ removet actionem contrariorum, sed etiam directè atque immediate, quatenus *esse* à Deo jugiter accipit, quasi per continuatam sui productionem; quo pacto per proportionem lux à sole conservatur. Est de fide: sicque in sacris literis dicitur Deus *portare omnia verbo virtutis sue*. Ad Heb. 1. Sic dicimur *in ipso esse, vivere & moveri*. Act. 17. Item, & *omnia in ipso constant*. ad Coloss. 1. Item huc facit quod legitur Ioan. 5. *Pater meus usque modo operatur, & ego operor*.

Probatur rationibus. 1. Quia, ut suppono ex Metaph. De Ente increato, ubi de naturâ entis improducti. Creatura est ens essentialiter ab alio, nimirum à Deo; vel ut loquitur D. Th. est ens essentialiter participans. Ergo à Deo necessariò semper dependet; nec possibile est sine iugi & continuatâ illius efficientiâ conservari in esse: quod enim est alicui rei essentialē, ab eo  
sepa-

separari non potest. Confir. Quia creatura magis dependet à Deo in suo *esse*, quàm effectus à suâ causâ; non enim potest excogitari major dependentia, quàm creaturæ à Deo. Atqui sunt multi effectus qui à causâ sui productivâ dependent, non tantùm ut primò existant, sed etiam ut existant continuè. Ita lumen à sole dependet effectivè, visio ab oculo, intellectio ab intellectu, &c. Ergo à fortiori sic creatura in suo esse dependet à Deo. Et verò non potest alioquin explicari supremum Dei in res creatas dominium, nisi assignetur concursus ille conservativus, à quo sic dependeant, ut isto subtracto, in nihilum omnes recidant. Nec dicas, effectus plerique naturales & artificiales, sic à suis causis procedunt, ut postea conservari ab ipsis non exigant. *Respondet* enim longè disparem esse rationem, quia creaturæ sunt essentialiter à Deo; nec dependentiam ejusmodi à suis causis naturalibus habent illi effectus.

### CAP. III. De Concursu Dei simultaneo ad agendum rebus creatis necessario.

**S**tatuendum est, ex doctrinâ Fidei saltem proximâ, contra Durandum; creaturam non modò *in essendo*, sed etiam *in operando* sic dependere à Deo; ut effectum attingere ullum nequeat, nisi ab eo simul concurrente & juvante immediatè procedat. Ita movere manum, aut festucam levare non possum, nisi adjuvante Deo; ita sol lumen suum, oculus visionem, planta fructum non potest producere, nisi à Deo simul immediatè comproducat. Probatur iisdem argumentis, quibus explicui necessitatem conservationis Divinæ. Neque enim res secundùm esse



esse suum debet minùs pendere à Deo , quando fit primò existens , quàm ubi postea in suo esse conservatur : siquidem habet semper eandem rationem entis ab alio. Item, multò magis causa omnis creata in agendo dependet à Deo , quàm possit ulla dependere ab aliâ causâ creatâ. Atqui sunt nonnullæ quæ ita dependent ab aliis, ut sine illis immediatè concurrentibus operari non possint; sic enim habitus, & species impressæ operari non possunt absque simultaneo concursu potentiarum quas afficiunt. Quod à fortiori dicendum est de causâ creatâ respectu Dei. Item, ratio supremi dominii in Deo existens postulat ut positis omnibus requisitis ad agendum, causa naturalis sic ab agendo impediri possit per solam subtractionem concursus simultanei, nihil destruendo in ipsâ causâ. Item; quod explicabitur cap. 5. recurrendum est ad primam causam, quæ per suum concursum simultaneum causam determinet ad hunc potiùs, quàm ad alium effectum : unde etiam colligitur necessitas ejusmodi concursus simultanei. Confirmatur verò hæc doctrina auctoritate sacræ scripturæ , ubi legitur Deus *operari omnia in omnibus* , 1 Cor. 12. *Omnia per ipsum fieri*, Act. 27. *Producere in montibus fœnum*, Psal. 103. *Plasmare suis veluti manibus*, & *formare hominem in utero*. Ex Iob. c. 10. &c. Hæc enim omnia sonant immediatam Dei operationem , aut cooperationem. Quod enim quis veluti propriâ manu perficit , utique illud facit per se immediatè , non autem alio mediante.

*Notandumque* est concursum Dei passivum esse eundem realiter cum passivo concursu creaturæ, & realiter identificari cum effectû: quemadmodum supra explicui de actione passivâ. At  
con-

concurſus activus, qui nimirum tenet ſe ex parte cauſæ, aliud nihil eſt quàm volitio libera, ſeu decretum liberum voluntatis in Deo, quo ſtatuit inferre ſimul effectum cauſæ creatæ, ſic illam juvando. At

*Not. 2.* Decretum illud reſpectu cauſarum naturalium, & quæ neceſſariò agunt, eſſe abſolutum ac determinatum, unde neceſſariò inferatur effectus. Nam reſpectu liberæ voluntatis, non eſt decretum niſi indifferens, ſeu indeterminatum, & conditionatum; quatenus videlicet offertur voluntati concurſus ad utrumlibet. Alioquin cùm non poſſit creatura operari circa concurſum Divinum, ſi foret iſte abſolutus, & determinatus ad unum; deſtrueretur libertas voluntatis; ſiquidem hoc modo non haberet indifferentiam, aut poteſtatem ad utrumlibet. Quare

*Not. 3.* Cauſam creatam hac ratione ſupponere ſemper concurſum Dei ſimultaneum. Sed quandoquidem, ut dixi, reſpectu cauſæ liberæ eſt indifferens, ab eâ determinari debet concomitanter; quomodo nec ſupponitur niſi concomitanter, non autem antecedenter.

#### C A P. I V. Solvuntur Objeſtiones.

**O**Bje 1. Cauſa creata habet virtutem agendi adæquatam, ſeu ſufficientem ad proprium effectum, ut ignis ad producendum ignem. Ergo non eſt neceſſe ut à Deo ſimul concurrente juvetur ad agendum. *Diſt. Ant.* Habet vim adæquatam, & ſufficientem ex parte ſui, & in ratione cauſæ creatæ. *Tr.* Habet ſufficientem ex parte effectus. *N.* Nam ob eſſentialem dependentiam quam habet à Deo, non poteſt produci, niſi ipſo ſimul immediate concurrente.

*Inſt.*

*Inst.* 1. Deus ad causalitatem materiæ aut formæ non concurrit. *C.* Imò neque illud fieri potest à Deo, nec ratio ulla istud exigeret. Ergo non concurrit ad causalitatem causæ efficientis. *N. parit.* Ob essentialem dependentiam quam à Deo habet ens omne ad extra producibile.

*Inst.* 2. Potuit illa virtus communicari causæ creatæ, ut se solâ proprium effectum attingeret: ergo ad id non est absolutè necessarius ille Dei concursus. *Prob. Ant.* Quia effectus qui finitus est, non superat potentiam virtutis creatæ cujuscunque. *R.* Cùm de se sit etiam essentialiter dependens à Deo, tanquam à causâ etiam immediatâ, non potest consequenter à solâ causâ creatâ procedere.

*Inst.* 3. Ergo non posset effectus ullus quantumcunque finitus produci absque influxu causæ infinitæ; nempe increatæ. *C.* Quanquam sic dependet ab influxu causæ infinitæ specificativè sumptæ; non autem reduplicativè ut infinita est, quatenus infinito modo influat.

*Inst.* 4. Ergo superfluous esset influxus causæ creatæ, siquidem effectus hac ratione totus est ab increatâ. *N. Conf.* Suprà enim movui, quemadmodum hoc faciat ad majorem Dei gloriam, quòd virtutem causandi rebus creatis communicet.

*Inst.* 5. Ergo idem effectus simul dependeret à duabus causis totalibus. *Dist.* à duabus totalibus ejusdem generis atque ordinis. *N. diversi. Tr.*

*Inst.* 6. Si Deus concurreret ad meam actionem aut manducandi, aut videndi, &c. ex eo deberet dici aut manducans, aut videns meâ visione corporeâ, &c. *N. seq.* Nam illæ actiones denominant tantùm principium sui productivum illud, in quo etiam recipiuntur.

*Ob-*

*Objic. 2.* Sequeretur inde imperfectio in Deo, quòd à creaturâ determinaretur ad agendum; nam imperfectius est determinari à liberâ alterius voluntate ad agendum, quàm sese ipsum liberè determinare. *Rz.* Nego esse imperfectionem sic determinari solùm concomitanter, aut etiam objectivè. Nam alioqui solus Deus sese liberè, formaliter, atque antecedenter determinat ad concurrendum cum liberâ voluntate creatâ, quotiescunque voluerit illa agere. Cùm autem sese voluntas nostra determinat, actu suam volitionem eliciendo; tunc simul & concomitanter sese determinat Deus ad cooperandum. Dicitur verò sic etiam objectivè determinari, quòd oblato suo concursu indifferenti, videns nostræ voluntatis determinationem, sese concomitanter determinet ad concurrendum; quò in casu, illa nostræ voluntatis libera determinatio, est tanrùm instar conditionis, quâ positâ, Deus ex debito causæ universalis decernat illi semper cooperari. Sed

*Not. 1.* Conditionem ejusmodi ex parte causæ creatæ, non idcirco præcedere concursum Divinum; nam etsi Deus illam supponat, concomitanter saltem; minimè tamen supponitur existere antecedenter. Item,

*Not. 2.* Sic consequenter Deum quasi expectare voluntatis nostræ liberam determinationem; nec tamen idcirco præbet illi suum concursum indifferentem quasi cæco modo, vel ignorans illud quod sequi debet; novit enim saltem per scientiam conditionatam, quam in partem sese pro suâ libertate sit determinatura, supposito concursu indifferenti quem illi offert. **Quemadmodum verò dicatur Deus expectare nostrum**

nostrum consensum, jam illud explicui in *Morali, Tract. 2. Diss. 2. c. 4. ad Inst. 6.*

*Objic. 3.* Actus peccati qui est à liberâ voluntate nostrâ, perinde secundum omnem suam realitatem procederet à Deo. C. Ergo Deus perinde esset causa peccati, ac voluntas nostra: quod falsum est. *Respondet D. Th.* Deum quidem sic esse causam peccati: vel si lubet, esse causam peccati materialiter, non autem formaliter; quia Deus non habet in se principium formale peccati, nempe esse ex nihilo sui; quod tantum convenit creaturæ. At vulgò Respondent alii, Deum idcirco non esse causam peccati formaliter, & ut peccatum est, quia cum nostrâ voluntate in illum actum non influit, nisi per concursum indifferentem, seu indeterminatum; neque verò etiam vi hujusmodi concursus Divini sequitur actum esse moraliter malum; potest enim ille actus fieri absque ullâ morali malitiâ; ut si homo ageret ex ignorantia invincibili. Vnde colliges eum tantum esse causam peccati ut sic, seu peccati formaliter, qui ex advertentiâ malitiæ in peccato existentis, vel sese determinat; vel certè alium aut impellit, aut determinat ad illud peccatum.

*Inst. 1.* Vellet Deus hoc peccatum ad quod concurrat. Atqui falsum conf. Ergo & Ant. *Prob. Ma.* Quia concursus Dei saltem activus aliud nihil est quàm volitio ipsius actus qui inferri debet à creaturâ: ergo si ille actus creaturæ est peccatum, sic Deus intelligetur velle peccatum. R. Deum non velle actum hujusmodi ut peccatum est, voluntate positivâ & determinatâ, sed tantum voluntate indeterminatâ & permissivâ, vi cujus ille actus non habet rationem peccati, sed tantum vi voluntatis illius quæ ad

peccatum se determinat, aut alium, ut dixi, ad peccatum vel impellit, vel determinat.

*Inst. 2.* Sequeretur ex eâ doctrinâ Deum non esse in nobis causam bonorum operum, quatenus sunt bona imoraliter; nam perinde ad illa non concurrit nisi ut causa universalis, atque indeterminata. *N. pari.* Quia Deus non offert nobis concursum illum indifferentem, nisi ex intentione boni operis liberè exercendi, ad illud nos impellendo; permittendo solùm ut peccemus si libuerit.

*Inst. 3.* Non deberet igitur præbere nobis concursum istiusmodi, cùm prævidet nos illo malè usuros; siquidem odit peccatum, &c. *R. N. Conf.* Quia ut causa universalis, debet habere rationem boni communis; nec obstare nostræ libertati. Quamobrem sic nobis præbere debet concursum indifferentem, ut servetur jus illius libertatis quam nobis concessam esse voluit; illi autem providentiæ universali per accidens est duntaxat, quòd peccamus; cùm de se nihil ordinet, nisi ad bonum.

*Inst. 4.* Concursus ille est determinatus ad effectum in individuo. Ergo non est indifferens. Respondebitur huic difficultati sequenti capite.

**C A P. V.** *Determinatio causa creata ad effectum in individuo, per concursum Dei simultaneum.*

**E**ffectus determinatus à causâ indeterminatâ ut sic, aut à causâ sese non determinante prodire nequit. Alioquin sequeretur causam simul esse indeterminatam, ex hypothesi; tum simul determinatam, quia effectum determinatum attingeret. Atque ita causa libera de se indeterminata quoad speciem actus, quatenus potest

test vel amorem, vel odium exercere circa ob-  
jectum, sese ad alterutrum determinare debet.  
Causa naturalis, eademque universalis de se in-  
determinata ad plures & diversos specie effe-  
ctus, v. g. sol, determinari solet per dispositio-  
nes materiæ in quam agit, sicque ajunt commu-  
niter, causam universalem agere juxta disposi-  
tiones subjecti; ut modò ranam, modò plantam,  
aliâque id genus producat.

*Notabis* autem causam determinatam quoad  
speciem effectus, remanere nihilominus inde-  
terminatam quoad individuum. Cum enim in  
suâ virtute activâ contineat plures in infinitum  
effectus ejusdem rationis, & æquè producibiles;  
non habet de se unde potius unum producat,  
quàm alium: ergo determinari ad illud debet.  
Nec dicant Thomistæ, effectus illos, puta ignes,  
aut calores, qui virtualiter in igne tanquam in  
causâ continentur, habere ordinem inter se,  
unde unus exigat priùs produci, quàm alius.  
Gratis enim istud traditur, immò repugnat ille  
ordo & series effectuum, cum omnes sint ejus-  
dem inter se rationis. Et verò etiam possunt ab  
eodem igne multi simul calores, aut ignes, mul-  
tis in circumjacentibus subjectis produci, qui  
consequenter nullam servabunt ejusmodi ratio-  
nem prioris & posterioris. Ergo nullam ha-  
bent. *Quare*

Statuendum est determinationis istius causam  
aliunde peti non posse, quàm ab ipso Deo, qui  
pro suâ libertate hunc numero effectum præ  
aliis eligat, tum ad illum dirigat suum concur-  
sum simultaneum, unde *hic* determinatè per  
cooperationem causæ secundæ inferatur. Sed

*Notabis 2.* Causas naturales & necessarias sic  
determinari quidem à Deo per concursum ab-

solutum ac determinatum, tam ad speciem actus, quàm ad individuum. Causæ verò liberæ, etsi habeant concursum determinatum ad tale individuum, habent nihilominus simul & indeterminatum quoad speciem, ut earum servetur libertas. Non enim offert Deus concursum duntaxat ad hunc numero actum, v. g. ad hunc amoris actum circa tale objectum, sed etiam simul & ad hunc numero actum odii circa idem objectum. Item, concursum illum indeterminatum ad speciem, & sub illis speciebus simul determinatum ad individua opposita, non offert absolutè, sed tantùm conditionatè; nempe ex hypothesi quòd velis exercere actum amoris circa tale objectum, non poteris exercere nisi hunc numero amoris actum; neque enim cadit sub nostram electionem, quòd *hic* numero actus à nobis exerceatur potius, quàm alius, cùm nequidem cognoscamus illam actuum nostrorum diversitatem numericam.

*Objic.* Concursus Divinus determinat voluntatem ad hunc numero actum: ergo sic destruit illius libertatem, quæ in eo posita est, ut seipsam pro suo nutu ad alterutrum determinet. R. Satis est ad libertatem quòd se determinet ad speciem actus. Et verò nemo vel laudatur, vel vituperatur, quòd talem numero actum; sed potius quòd talem specie actum exercuerit.

*Inst.* 1. Determinans ad hunc numero actum, determinat ad speciem; quia species includitur in individuo, nec ab eo distinguitur. Ergo Deus determinans ad hunc numero actum, determinat ad speciem; & consequenter nulla est allati argumenti solutio. *Dist.* Determinans absolutè ad hunc numero actum, determinat ad speciem absolutè, unde consequenter tollatur libertas.

C. Ac



**C.** At Deus non offert concursum nisi indeterminatum, seu indifferentem vel ad hunc *v. g.* amoris, vel ad illum odii actum, circa idem obiectum. Ac proinde ex hypothesi, quodd voluntas velit amare, non exercebit nisi hunc numero actum, quem elegit Deus, ac suo concursu determinatè producit.

*Inst.* 2. Si Deus me determinaverit ad hunc numero actum, ille mihi non est liber, nec proinde agendo mereri, aut demereri possum; quia nullum actum exercere possum, nisi individuum; ergo à Deo determinatum. *Dist.* Determinatum *absolutè*. *N.* Determinatum *ex hypothesi*. *C.*

*Inst.* 3. Sequeretur inde nos quotiescunque peccatum admittimus, illud determinari à Deo; & sic Deum esse causam omnis peccati; siquidem nullum admittitur nisi in individuo. *R.* Deum non esse causam peccati ut peccatum est, quia ex munere causæ primæ offert duntaxat concursum indifferentem atque indeterminatum, vel ad hunc amoris *v. g.* vel ad hunc odii determinatum actum; nec determinatio ad alterutrum existit nisi à solâ voluntate creatâ. Resque eodem modo per proportionem se habet, ac in concursu simultaneo, de quo superiori in capite.

**CAP. VI.** *De subordinatione causæ secundæ; tum de præmotione & concursu Dei prævio, causæ illi secundæ ad agendum necessario.*

**S**ubordinatio in agendo, est dispositio agentis inferioris sub superiori, nempe vel instrumentalis sub principali; vel particularis sub universali; à quo, factâ præmotione, ordinetur ad agendum. Motio verò, seu præmotio per quam inferiora superioribus subordinantur, vel

est motus localis, vel virtus activa; ut *cap. 3. Disp. 1. jam monui*: illéque vulgè est concursus prævius, unde causa inferior à superiori perficiatur, compleaturque ultimò tandem ad agendum. Non enim per concursum duntaxat simultaneum rectè explicaretur subordinatio; cum hoc modo causa sit tantùm concomitanter agens, non autem ordinata sub aliâ, per motionem, seu per virtutem, unde illi subjiciatur tanquam inferior superiori, &c.

*Notandum* verò est, præmotionem aliam esse prædeterminativam causæ ad effectum, unde & appellari solet *prædeterminatio*; alia autem est non prædeterminativa; quia causam relinquit indeterminatam, seu indifferentem ad agendum, aut non agendum; qualis est gratia actualis supernaturalis, quam prærequirit causa libera ad actus supernaturales eliciendos. Atque his positis,

*Dico I.* Corpora sublunaria cœlestibus in agendo subordinantur per influxus quos ab iis accipiunt. Illa enim est cœlestis motio, quâ virtutes naturales inferiorum agentium complentur in ordine ad varios effectus, quos alioqui non ita perfectè, aut certè vix ullo modo attingerent. *Confir.* Quia nemo dixerit frustra esse illos influxus cœlestes, quibus etiam propagandis ne quid obstat, natura tantopere vacuum refugit, uti suo loco exponemus. Item, patet experientiâ, quemadmodum accessu, vel recessu corporum cœlestium, ac præcipuè solaris, vel deficient, vel novis generationibus reparentur sublunaria, unde est illud commune ex *Arist.* *Sol & homo generant hominem, &c.*

*Notabis* verò hæc infima sic mediatè subordinari Deo, tanquam supremo rerum omnium prin-

principio. Nam corpora cœlestia suas habent sibi addictas *Motrices Intelligentias*, quibus proinde hoc pacto subordinantur. Tum denique ipsæ Intelligentiæ à Deo immediatè leges accipiunt, quibus hunc orbem corporeum administrant. At præterea

*Dico* II. Creaturæ omnes Deo immediatè subordinantur in agendo. Quod variis modis explicari potest. Ac primò quidem quatenus dispositæ sunt sub ipsius directione; nec agunt nisi in ordine ad finem quem intendit. 2. Eo sensu dicuntur illi subordinatæ res omnes, quòd possint ab ipso elevari, tanquam instrumenta ad varios effectus supernaturales. At 3. Deo præcipuè subordinantur per virtutem agendi sibi naturalem ab eo acceptam & jugiter conservatam. Quomodo v. g. ignis per calorem à Deo acceptum & jugiter conservatum dicitur esse illi subordinatus in agendo. Et sic de aliis. Ita Suarez. *Confir.* Quia hæc ratio sufficit ad explicandam essentialem istiusmodi subordinationem in agendo, quam *vulgò* omnes causæ naturales habent ad Deum. Iste enim est concursus prævius, & motio recepta in causâ creatâ per quam jugiter perficitur, completurque ad agendum. Nec dicas, motio propriè dicta vel est motus localis, ut in penicillo; vel qualitas activa subjecto præternaturalis ipsi realiter superaddita, ut calor aquæ. C. Ergo illa virtus connaturalis & propria, non est præmotio nisi impropriè. *Tr.* Nihil tamen hoc impedit quominus creatura per eam propriè dicatur Deo subordinata in agendo; cum huiusmodi virtus, quantumcunque naturalis, magis dependeat à Deo in suo esse & conservari, quàm ulla motio instrumentalis propriè dicta dependeat à suâ causâ principali.

pali. Deinde, sic etiam explicatur quomodo causa secunda non agat nisi mota à primâ, sitque hac ratione velut ipsius instrumentum, quanvis improprie; quia instrumentum proprie dictum, non attingit effectum per virtutem sibi propriam & effectui proportionatam, ut supra ostendi. Item, sic explicatur quemadmodum Deus habeat rationem agentis primi respectu cujuscunque effectus; quia causa secunda in illum non influit, nisi ut prius naturâ accipiens à Deo virtutem jugiter conservatam. Quare

*Not. 1.* Nos hac ratione conciliari cum Thomistis, quatenus docent, & quidem rectè, non posse causam creatam agere nisi cum subordinatione ad Deum, & acceptâ ab eo præmotione. Quanquam

*Not. 2.* Discrepare nos à Thomistis, dum ajunt agens creatum per motionem ejusmodi improprie dictam, seu per virtutem naturalem, puta ignem per calorem, nondum esse ultimè completum ad producendos effectus, dum præterea motionem aliam, seu qualitatem aliam à Deo accipiat, per quam ipsi subordinetur in agendo: alioquin, inquiunt, sublatâ motione illâ, nullus ab igne vel calor, vel ignis prodire posset. Item,

*Not. 3.* Præmotionem illam, in eorum sententiâ, esse prædeterminativam, & simpliciter vocari *physicam prædeterminationem*. Quâ positâ non possit non agere sive causa naturalis, sive etiam causa libera, quæ perinde ipsi Deo hac ratione debent subordinari. At

*Dico III.* Frustra est illa prædeterminatio; quandoquidem sufficienter explicatur subordinationo causæ creatæ ad Deum per virtutem agendi naturalem à Deo acceptam, & jugiter con-

conservatam ; aliisque modis quos in assertione superiori protuli. Quinetiam

*Dico* I V. Illa prædeterminatio in causis liberis destrueret prorsus libertatem ad meritum, aut ad demeritum necessariam. *Prob.* Quia ex definitione Innocentii X. libertas ad meritum, aut ad demeritum necessaria, est libertas indifferentiæ, seu libertas à necessitate. Vt habetur in *Morali Tract. 2. Diss. 2. c. 2. assert. 4.* Vel quod in idem recidit; libertas ea est, quâ, positis omnibus ad agendum prærequisitis, voluntas potest agere, aut non agere : quamobrem ille qui agit liberè, dicitur agere cum dominio in proprium actum, quatenus illum exercere, aut non exercere possit, aut ad illum sese determinare; quod est proprium facultatis liberæ, & in quo differt à naturali, quæ agit ex antecedenti determinatione, non autem sese determinando, &c. Atqui his omnibus repugnat voluntatis prædeterminatio ; hæc enim infert necessitatem antecedentem ad ipsum voluntatis actum, nec consequenter potest voluntas non agere, nec habet dominium sui actus, nec sese ad illum determinat, cum potius agat ex prædeterminatione. Quam autem afferunt adversarii distinctionem de sensu diviso & composito, tum de indifferentiâ iudicii ; aut de indifferentiâ remotâ, & de proximâ, illud jam refutatum est in *Morali*, capite jam citato.

Deinde ex illâ prædeterminatione physicâ sequeretur Deum esse authorem & causam peccati quod oritur à voluntate creatâ. Atqui hæreticum illud est cons. Ergo & Antec. *Distinguunt Majorem*, & concedunt quidem sic posse dici causam peccati materialiter, seu entitativè sumpti, id est, actus illius qui est peccatum ; sed

negant esse causam illius prout peccatum est formaliter, seu malitiæ ipsius. *Sed contra est.* Quia voluntas sese determinans ad actum peccati etiam materialiter sumpti, seu ad volendum rem illicitam, hoc ipso dicitur causa peccati formaliter sumpti, seu malitiæ illius; neque enim alio modo potest esse causa illius; siquidem non potest ferri in malum sub ratione mali & peccati. Neque alio modo vel homo, vel dæmon dicitur propriè causa peccati, ubi suasionibus aliquem directè inducit ad prosequendam rem illicitam. Ergo à fortiori Deus dicitur causa & auctor peccati, voluntatem directè prædeterminans ad actum pravum; quia pariter foret causa illius rei, cui necessariò conjuncta est malitia rectæ rationi opposita. Item, sic maxime dicitur velle peccatum; nihil enim dicitur quis magis velle, quam quod absolutè vult fieri, mediisque efficacibus procurat. Atqui hæreticum est, si quis dixerit Deum velle peccatum; neque ut ait D. Aug. eorum esset justus ultor, quorum esset author.

Ac postremò tandem sequeretur ex illâ prædeterminatione physicâ, peccatum à nobis vitari non posse, sicque Divina præcepta fieri nobis impossibilia. Quod Innocentius X. declaravit esse impium, blasphemum, atque hæreticum. *Prob.* Quia positâ illâ prædeterminatione, quæ in nobis fiat independenter à nobis, non possumus non agere: ergo sic non possemus non peccare. *Respondent quidem* dari simul gratiam sufficientem ad vitandum peccatum. *Sed contra est.* Quia gratia illa non est sufficiens, quæ nullum habere effectum potest: quod in eo casu contingeret, ubi voluntas sub prædeterminatione hujusmodi non potest non operari.

*Nota.*

*Notabis* præterea, fuisse hanc quoque ab adversariis excogitatam solutionem; nempe illam necessitatem quam inferimus, non oriri nisi ex suppositione liberi decreti Divini, & motionis Divinæ: necessitatem verò ex suppositione, non impedire ut idcirco res minùs liberè fiat. *Quomodo*, inquiunt, ex hypothefi quòd loquaris, necesse est te loqui; cùm tamen absolutè & simpliciter possis non loqui; item, ex hypothefi, quòd ab æterno sit præscita tua damnatio, necesse est te damnari, & tamen simpliciter potes non damnari; quæ sufficiunt ad libertatem. Sed *Rz.* Tunc impediri libertatem, quando suppositio non est in nostrâ potestate; nec pender ab aliquo, quod sit in nostrâ potestate. *Quo pacto* non est in nostrâ potestate ut existat Divinum illud decretum absolutum, & ab eo profecta prædeterminatio nostræ voluntatis, juxta adversarios, sequiturque in eâ doctrinâ, uti jam monui ex *Lessio in Apol. cap. 3.* sequitur, inquam, omnia fato quodam inevitabili evenire, nec posse nos facere alia, nec alio modo aut tempore, quàm quæ facimus. Item, nec Dei præcepta, etiam hoc sensu, iis esse possibile, à quibus non servantur; quòd, denegatâ illâ prædeterminatione, non habeant vires sufficientes ad agendum: alioqui non posset non fieri opus imperatum; nec posset resisti Spiritui Sancto, aut abjici inspiratio, cui, & per quam consentimus: quod tamen repugnat *Trident. Sess. 6. cap. 5.* Neque verò etiam aliud fati aut necessitatis genus impugnamus contra hæreticos; nec disputamus cum illis, nisi de sensu composito; nec aliam ob causam negant liberum arbitrium.

*Nota*, hîc egisse me de subordinatione quam ad Deum *vulgo* habent causæ naturales; ne quid

dicam de iis quæ per potentiam obedientialem subordinantur Deo ; cùm istud suprâ jam satis fuerit explicatum.

### C A P. VII. *Solvuntur Objectiones.*

**O***Bjic.* 1. Contra id quod dictum est causam omnem creatam subordinari Deo per virtutem ab eo acceptam, & jugiter conservatam : sic, inquam, *Objic.* Causa creata subordinatur Deo, dependetque ab ipso, non tantùm in ratione entis, & principii habitualis suorum effectuum; sed etiam in ratione principii actualis. *C.* Atqui per virtutem illam à Deo productam & jugiter conservatam, non dependet nisi in ratione principii habitualis, unde nimirum possit actu producere suos effectus; cùm præterea, ut dixi, requiratur dependentia in ratione principii actualis, unde illos effectus actu producat; quod habere solùm potest per actualem præmotionem, &c. *R. Neg. Min.* Nam virtus illa permanens jugiter à Deo conservata, eadem est etiam per quam causa influit actu in effectum. Neque enim habitualiter in causa existit, nisi ut cùm adsunt omnia ad agendum requisita, tunc agat causa naturalis, quæ de se ad agendum est determinata, nec aliâ opus habet determinatione.

*Inst.* 1. Illa virtus agendi deberet etiam in agendo subordinari Deo per motionem aliquam. *Negatur.* Quia de se est virtus ad agendum. Alioquin idem deberet dici de motione quam supponunt adversarii, ac proinde cogerentur admittere processum in infinitum.

*Inst.* 2. Etsi agat ignis *A* cum igne *B* : aut equus *A*, cum equo à se producto, cui consequenter agendi vim communicaverit, non ideo dicitur



dicitur illum sibi subordinare in agendo; neque enim sic illo superior & perfectior est in agendo. Ergo nec subordinatio creaturæ ad Deum explicari debet ex eo quodd creatura agat per virtutem ab ipso acceptam. *R.* Fuisse additum *Tò & jugiter conservatam.* Quia sic veluti per jugem influxum movet ac perficit creaturam in ordine ad proprias illius operationes.

*Inst.* 3. In Divinis, Filius cum Patre producit Spiritum S. per virtutem à Patre jugiter conservatam; nec tamen idcirco dicitur ipsi subordinatus; quia subordinatio dicit inferioritatem, cujusmodi nulla est in personis Divinis. Ergo à pari in creatis virtutis activæ productio, & jugis illius conservatio non est sufficiens ad explicandam subordinationem. *R.* *Neg. parit.* Quia virtus spirativa in Patre & Filio est eadem, cum eadem naturâ; nec consequenter ibi est locus subordinationi, aut inferioritati.

*Inst.* 4. Causarum nobilissimæ, nempe cognoscitivæ, non agunt nisi acceptâ specie impressâ, tanquam præmotione quadam propriè dictâ, quæ scilicet est virtus aliqua facultati naturali superaddita. Ergo idem à fortiori statuen- dum est de aliis. *R.* *N. parit.* Nam ex speciali ratione potentia cognoscitiva recipit speciem impressam, quia nimirum de se indeterminata est ad speciem actus; sub quâ indeterminatio- ne agere non posset.

*Inst.* 5. Ergo à pari voluntas, cùm de se etiam sit indeterminata, debet quoque acci- pere & præmotionem sibi superadditam, sui- que determinativam ad actum. *Nego parit.* Quia proprium est facultatis liberæ ut seipsam deter- minet.

*Inst. 6.* Ergo sic voluntas immota seipsam moveret. Atqui proprium est Dei, ut dicatur *movens, & agens immotum*. R. Per hoc etiam voluntas creata differt à Deo, quòd agat ut virtus ab ipso producta, & jugiter conservata; quam etiam ob causam dici potest moveri *ad esse*, ut aliàs tradam ex doctrinâ Aristotelis. Item R. Servatâ in loquendo verborum proprietate, in Petro v. g. voluntatem non operari, nisi *ut quo*; solum autem Petrum operari *ut quod*, juxta illud axioma metaphysicum, *Actiones sunt suppositorum*. Quâ factâ suppositione, dico Petrum non operari, aut velle, etiam in ordine naturali, nisi acceptâ præmotione à Deo, per quam ipsi ut primo agenti subordinetur: hæc autem in allatâ hypothesis, alia non est, quàm voluntas à Deo accepta, & jugiter conservata.

*Inst. 7.* Hoc non impedit quominus voluntas, aut homo per voluntatem sit primum principium suæ determinationis, seu primum determinans sese; Tr. Ergo omnis effectus creaturæ non referretur ad Deum, tanquam ad primam sui causam; essentque plura absolutè prima principia: quod dici non debet. N. Conf. Sufficit enim quòd voluntas non agat sine influxu Dei jugiter sui conservativo, &c.

*Objic. 2.* Contra id quod dictum est, prædeterminationem voluntatis à Deo, repugnare cum ipsius libertate. Sic inquam, objic. Dei præmotio quâ prædeterminat causam secundam, ita sese illius naturæ accommodat, ut non tantum operationem infallibiliter inferat, sed etiam & modo ipsi consentaneo; id est, efficit ut agat liberè, si causa est libera. Alioquin Divinus ille concursus non esset illimitatus, & uni-

universalis tam ad substantiam actus, quàm ad modum ipsius. *R.* Res creatas moveri quidem à Deo, modo ipsis consentaneo. Quare, si agitur de causâ liberâ; dicendum est, illam non moveri à Deo cum prædeterminatione; ut liberè agat; hoc enim involvit contradictionem; eo-que in casu admittenda solùm est præmotio, quæ vim agendi indifferentem ad utrumlibet, & sui determinativam non lædat.

*Inst.* 1. Illa antecedens & *potentialis*, ut vocant, *indifferentia*, non est de ratione libertatis: ergo prædeterminatio illi opposita nihil repugnat libertati. *Prob. Ant.* Quia sufficit ad libertatem, quòd ita operemur actu, ut in sensu diviso possimus non operari, aut operari oppositum. *Ita Thomistæ.* At contrarium ostendimus in *Morali Tract.* 1. *Disp.* 2. c. 2.

*Inst.* 2. Tunc quotiescunque operaremur, destrueretur libertas: quia tunc destrueretur illa indifferentia: siquidem ex hypothesi quod voluntas sit determinata ad actum, tunc amplius non est indifferens ad oppositum. *R.* Tunc quidem destrui *consequenter* libertatem ad actum; non autem *antecedenter*. Ut habetur in *Morali*, *cap.* 5. *eiusdem Disp.* *Affert.* 5. Vbi etiam exposuimus quemadmodum & ipse actus qui tunc exercetur, dicendus sit maximè liber.

*Notandum* enim est, ad uberiores loci illius explicationem, liberum arbitrium in actu secundo, seu quoad usum, non esse nisi actus præsentis, seu actus illius quem de facto elicit. *Prob.* Quia voluntas antequam agat dicitur tantùm libera in actu primo, nec adhuc habet meritum, aut demeritum proprium actus liberi. Neque verò etiam dicitur tunc tantùm libera, postquam egit: sic enim duntaxat verum est

est eam fuisse in agendo liberam. Ergo tunc maximè est libera cum actu agit. Nec tantùm habet in suâ potestate futuras actiones, aut respectu solùm futuri actus est libera. Alioquin, ut dixi in Morali, explicari non posset, quemadmodum aliqua actio in Deo sit libera ab æterno, non enim ulla id genus fuit illi futura, puta voluntas creandi mundi; cum potius illam habeat ab æterno. Sequereturque etiam Angelos in momento quo fuerunt creati; aut Christum Dominum in ipso instanti Incarnationis non meruisse, quia neque ipse Christus Dominus, neque Angeli extiterunt antequam illos meriti actus, ac proinde liberos exercerent.

*Notandumque* est etiam, seclusâ prædeterminatione illâ Thomistarum, explicari nihilominus quemadmodum Deus prævideat determinatè liberos voluntatis actus futuros; aliâque id genus, quæ ad effectus gratiæ & prædestinationis attinent; ut legere est *cap. 4. ejusdem Disp. moralis*. Tum in *Metaphysica Tract. 2. Disp. 2. cap. 7. & 8.*

## DISPUTATIO IV.

### De Virtute Activa Causarum Naturalium.

#### CAP. I. *Vis emanativa, & activitas Accidentium.*

**V**T actionis, ita & virtutis activæ, seu activitatis duplex est genus. Alia enim est emanativa, per quam alicujus subjecti proprietates producantur; ut in igne calor & siccitas; nec terminus emanationis ut sic, proprie dicitur

dicitur effectus; quomodo in Theologiâ non licet terminos Divinarum emanationum appellare *effectus*. Alia autem est virtus propriè activa, & ad *effectus* propriè dictos, sive illi sint *immanentes*, sive *transseuntes*.

*Dico autem I.* Virtutem emanativam proprietatum, non esse aliquam facultatem realiter distinctam ab ipsâ essentiâ, seu naturâ; unde sequitur illas immediatè procedere ab ipsâ rei essentiâ, puta calorem ab essentiâ ignis. Prob. Quia si fieret istud mediante qualitate aliquâ, de eâ institueretur eadem difficultas; & sic foret processus in infinitum. *Quamquam*

*Notabis* productionem proprietatum tribui generanti, ex doctrinâ Aristotelis. Vnde & vulgè jactatur istud, *dans esse, dat & consequentia ad esse*. Sed ille est sensus, quodd generans, ubi esse in effectum influit, cum eo consequenter concurrat ad productionem proprietatum; saltem immediatè, quatenus dat esse ipsi effectui.

*Dico II.* Accidens, seu qualitas accidentalis per suam entitatem immediatè producit alia accidentia. Probatur experientiâ. Calor enim, etiam cum est in aquâ, producit alium calorem: quo in casu solus calor per se potest esse causa caloris producti. Sicque accidens potest esse activum, non tantum actione transeunte, ut in allato exemplo; sed etiam immanente; ut quando intellectus in seipso producit intellectionem.

*Dico III.* Ab accidentibus non solum accidentia, sed etiam substantiæ possunt immediatè produci. Prob. experientiâ. Sic enim sæpe rana producitur absente ranâ, per solas qualitates ad ipsam ranæ formam dispositivas;  
idem-

idemque est dicendum de muribus, aliisque id genus quæ ex materiâ putri oriuntur. Hucque est revocandum illud Averrois dictum, *eiusdem esse virtutis activa disponere materiam, & formam inducere*. Sic absente igne producitur ignis in sagittâ missâ per aërem. Item, per qualitates occultas è cælo influentes perficiuntur in Terræ visceribus lapides & metalla. Item, semen plantæ concurrit efficienter ad generationem plantæ, plantâ ipsâ à quâ decisum est, jam corruptâ. Nec dicat Scotus, ab ipsâ solis substantiâ, per actionem in distans, res illas efficienter attingi; nam ostendam postea, ejusmodi actionem in distans esse impossibilem. Neque verò etiam philosophicum est ad Deum, tanquam ad causam quæ defectum substantiæ propriæ suppleat, recurrere. Item, sequeretur inde plantam v. g. nunquam generare sibi similem in specie, quia nunquam hoc præstat nisi mediante semine: quod est absurdum. Nam si rebus inanimatis hoc concessum est, puta igni, ut sibi simile in specie generent; debet à fortiori convenire & viventibus, ut plantæ; nec alioqui Deus naturæ vires ad sui conservationem in specie sufficientes suppeditasset; quod repugnat communi philosophiæ. At

*Dico I V.* Accidentia efficienter sic attingere substantiam, non in propriâ virtute, sed in virtute substantiæ ad quam pertinent. Prob. Quia accidens est inferioris ordinis ab substantiam: ergo illam non potest in propriâ virtute attingere; quod enim dat esse alteri in genere causæ principalis, aut in propria virtute, debet illius perfectionem, saltem æquè perfectè, in se continere.

*Notabis verò, accidens eo sensu non agere in*  
vir-

virtute substantiæ, quodd substantiæ ipsi inexistat : neque enim calor ferro inexistens, dicitur idcirco ignem producere in virtute ferri. Item, neque etiam hoc sensu, quodd recipiant in se aliquam virtutem sibi superadditam à substantiâ ; nam illa virtus esset aliquod accidens, de quo rediret quæstio, & sic fieret processus in infinitum.

*Notabis* igitur 2. Accidens eo sensu agere in virtute substantiæ, quodd de se, & ex naturâ suâ sit virtus substantiæ, unde propriè loquendo non debet dici agere in virtute substantiæ, sed potius *ut virtus, seu facultas* substantiæ. Nam accidens non est activum nisi quatenus est ens, & eo modo quo est ens : atqui ex naturâ suâ non est nisi entis, id est, substantiæ ens, ut sæpe cum Aristotele loquitur D. Th. Vnde sequitur non esse activum, nisi quatenus est ens, seu facultas & virtus substantiæ. Quamobrem

*Not.* 3. Accidentia etiam ejusdem speciei, quatenus tamen sunt à diversis specie substantiis, esse diverso modo activa, pro diversis essendi actibus quos consequenter accipiunt, juxta nostram doctrinam de actu, seu modo essendi. Sic enim, ut vulgè ajunt, modus agendi sequitur modum essendi : nec modus agendi varius esse potest in accidentibus ejusdem speciei, nisi ex vario essendi actu. Ita calor ut ab igne est, fit productivus ignis; ut à vivente, attingit vivens, &c. Vnde etiam qualitates quæ fluunt à nobilioribus substantiis in ordine ad aliquos effectus, habent nobiliorem tum essendi, tum agendi modum ; ut cœlestes influxus. Nam & corpora cœlestia cum sint causæ universales ad effectus causarum sublunarium, vim habere debent longè præstantissimam, universalissimamque.

## CAP. II. Solvuntur Objectiones.

**O** *Bjic.* 1. Accidens, seu forma accidentalis, dum alteri sese formaliter communicat, dat tantum esse accidentale, puta *esse calidum, frigidum, &c.* C. Ergo non potest effectivè alteri communicare nisi esse accidentale. N. *Conf.* Quia ut virtus instrumentaria substantiæ, potest communicare *esse* nobilius quam proprium.

*Inst.* 1. Non continet in suâ virtute activâ esse substantiale, quia est inferioris ordinis ad illud esse. R. Inde sequi tantum quod non contineat illud *principaliter*, sed nihil impedit quominus contineat *virtualiter & modo instrumental*; nec effectus substantialis illi est indebitus, nisi ut causæ principalis.

*Inst.* 2. Deus non tribuit accidenti concursus, nisi ipsi debitum, talis autem concursus non est ad producendam substantiam. *Dist.* Ad producendam principaliter. C. Instrumentaliter saltem. N.

*Inst.* 3. Nullum instrumentum agit sine influxu actuali causæ principalis; nec consequenter vel sine motu locali, vel sine virtute activâ superadditâ: quod non reperitur in accidente, ubi dicitur ab eo generari substantia. Ergo illi talis effectus non est attribuendus. R. Concedo illud de instrumento propriè dicto, non de solâ virtute instrumentariâ, cujusmodi est accidens. Sufficitque in eo virtualis quidam influxus substantiæ; eo sensu, quod tota substantiæ virtus contineatur instrumentaliter in accidente, quasi vicario ipsius substantiæ. R. 2. *Dist. Ant.* Instrumentum *conjunctum* non agit sine influxu causæ principalis. C. *Separatum*, cujusmodi est istud. N. Objic.



*Objic.* 2. Calor v. g. separatus ab igne ; vel virtus ranæ productiva , potest ranam producere etiam nullâ ranâ existente : ergo sic ageret independententer à ranâ ; ergo non ut virtus ejus instrumentaria. *Rz.* Nunquam agere nisi ut virtutem instrumentariam suæ causæ principalis , v. g. ranæ ; neque etiam est ens nisi cum dependentiâ ; servatque idcirco semper relationem essentialem ad ipsam ranam, etiam non existentem , quia relatio essentialis potest esse ad terminum non existentem actu.

*Inst.* 1. Illud accidens non est virtus ranæ , nisi quatenus productum à ranâ , & ipsius effectus. At effectus non habet nisi relationem accidentalem ad suam causam creatam , quâ destructâ perit relatio. *Rz.* 1. Illud accidens considerari vel ut effectum, vel ut virtutem. At quatenus est virtus , habet relationem essentialem ; neque ut sic est necesse ipsum produci à ranâ , aut ab aliâ substantiâ cujus sit virtus ; ut quando producitur tantum à sole.

*Inst.* 2. Sic consequenter illa diceretur virtus solis , non autem ranæ. *N. Conf.* Non enim est virtus ranæ ex eo præcisè quòd sit producta à ranâ ; sed potius quia ex suâ naturâ est facultas debita ranæ per quam agat ipsa rana. Quomodo per proportionem instrumentum pictoris, ut penicillus , aut instrumentum statuarii , ut malleus fabricatus à fabro lignario , non idcirco dicitur esse instrumentum fabri lignarii , sed tantummodo vel pictoris , vel statuarii cui deservire potest.

*Inst.* 3. Non posset dici cujus substantiæ, puta cujus ranæ esset illa virtus à sole producta. *Tr.* Ergo non esset virtus ullius ranæ. *Dist.* Vllius determinatè, C. Indeterminatè, N.

*Inst.*

*Inst.* 4. Sequeretur ergo solùm illam esse virtutem ranæ in communi. Atqui nulla est rana in communi, nisi Platonica & chymærica. *By.* De factò non esse virtutem ranæ in communi, sed tantùm ranæ alicujus individua, & indeterminata; nec referri ad aliquam ranam individuum, nisi indeterminatam. Quomodo per proportionem dicimus materiam primam de se referri ad formam substantialem ut sic, hanc videlicet, aut illam indeterminatè. Vel quomodo etiam dicimus penicillum hunc numero, esse instrumentum pictoris, quanvis determinatè nullius sit, sed alicujus tantùm indeterminatè.

CAP. III. *Activitas substantia creata mediis accidentalibus potentiis.*

**D**ico I. Substantia creata de se est activa. *Prob.* Quia vis agendi est aliqua perfectio, quæ potiori jure tribuenda est substantiæ, quàm accidenti. *Conf.* Quia accidens non producit substantiam, nisi ut virtus instrumentaria substantiæ; cùm substantia sit de se effectus accidenti improporionatus. Ergo à fortiori substantia debet esse activa. Et verò, substantia semper est principalis causa effectus, saltem substantialis, qui ab accidente procedit. Sicque ajunt vivens procedere à vivente in similitudinem naturæ, &c. puta equum ab equo; etsi ab equo non producit nisi mediante ipsius virtute seminali.

*Dico* II. Accidentia quæ propria sunt alicujus substantiæ illique inhærent, cum ipsâ concurrunt ad eos effectus quos producit. *Exempli causâ;* calor igni inhærens, cum ipso igne concurrat ad productionem aut ignis, aut caloris alterius. *Prob.* Quia frustra calor esset igni adjunctus;

unctus; nec habet activitatem, nisi ut illam cum igne exerceat. Et verò si accidens potest attingere substantiam, etiam quando est separatum à substantiâ; debet à fortiori idem præstare ubi conjungitur substantiæ, cujus est proprium; nam & eâ ratione reddi debet magis activum; siquidem virtus simili alteri virtuti unita, plus agit. At

*Dico III. Cum D. Th. Substantia propriè dictos effectus, seu qui citra emanationem sunt, non attingit, connaturaliter saltem, nisi mediantibus potentiis accidentalibus ipsi realiter superadditis. Sic Arist. lib. de sensu & sensili, cum ait: ignem quâ ignem; & quâ Terram, nihil esse nata agere, aut pati: sed tantum quatenus iis contrarietas inest. Id est, quatenus habent qualitates contrarias, quibus mediis ad invicem agant. Probatur 1. ratione à posteriori. Quia videmus rebus omnibus à naturâ concessas esse potentias accidentales, per se immediatè activas; ut igni calorem: quæ certè frustra essent, si substantiæ seipsis immediatè operari possent. Ergo illis tantum mediantibus potentiis operantur. Istudque etiam inde manifestum est, quòd remanente semper eadem substantiâ, debilitatis potentiis, actio fiat remissior. Item, agebamus superiori capite, quemadmodum res agant sæpe, ubi secundum substantiam non adsunt, sed tantum secundum accidentia, seu virtutes instrumentarias. Ergo pariter, & à fortiori, ubi adsunt secundum substantiam illis accidentibus instructam, statuendum est per ipsa influere in suos effectus. Prob. 2. ratione à priori. Quia nihil est alterius perfectivum, aut sui efficienter communicativum, nisi præsupponatur in se perfectum. Atqui substantia sine suis potentiis*

tentiis naturalibus non est perfecta & completa, tam secundum esse substantiale, quam accidentale; unde consequenter sine illis non est sui efficienter communicativa. Neque verò est cum illis sui efficienter communicativa, nisi quatenus illis mediantibus effectus suos attingit.

Atque inde solvitur obiectio petita ex eo quod ipsa substantia immediatè suas facultates, ut ignis calorem suum emanet; ac proinde possit alium calorem citra emanationem pari modo producere immediatè. Disparitas enim est, quod res præsupponatur in se perfecta, ut sese efficienter communicet ad propriè dictos effectus. Quanvis illi non superent in perfectione qualitates eas quas in se emanat; ut patet in exemplo caloris respectu ignis.

*Inst. 1.* Substantia potest immediatè pati. *C.* Ergo & agere. *N. Conf.* Quia plura requiruntur ad agendum, quàm ad patiendum.

*Inst. 2.* Substantia potest id totum quod potest facultas quàm in se emanat. Ergo à fortiori potest præstare immediatè, quod supponitur efficere per illam facultatem; ut anima per intellectum; ignis per calorem. *Dist. Ma.* Potest id totum quoad substantiam rei producendæ. *C.* Non quoad modum, quia non potest immediatè.

*Inst. 3.* Potest & quoad illum modum: ergo nulla solutio. *Prob. Ant.* Quia modus ille est convenientior substantiæ, quàm accidenti; siquidem modus ille est perfectior, & consequenter debetur enti perfectiori, cujusmodi est substantia. *Dist.* Modus ille est perfectior tantum secundum quid, ac proinde potest convenire enti imperfectiori. At modus agen-

di substantiæ proprius, & qui secundum se perfectior dicitur, est modus agendi *primario* & *principaliter*. Certè perfectiones aliquâ ex parte majores convenire possunt enti imperfectiori, quomodo incorruptibilitas convenit non modò cœlo, & aliis entibus perfectissimis, sed etiam materiæ primæ, & quibusdam accidentibus; non autem corpori viventi; quòd ratione vitæ, est nihilominus simpliciter perfectius quàm corpus cœleste. Atque istud per proportionem dici potest de modo agendi immediatè.

*Inst. 4.* Modus agendi cum independentiâ, est substantiæ proprius, & magis perfectus. Sed talis est modus agendi immediatè, & independentè à potentiis accidentalibus. Ergo, &c. *Prob. Ma.* Quia modus agendi debet sequi modum essendi. Atqui modus essendi substantiæ est independens ab accidentibus. cum ipsa etiam de se prior sit ad omne accidens. R. Nego modum agendi cum independentiâ; ipsumve esse, aut agere independentè ab accidentibus, esse substantiæ creatæ proprium. Cum enim, ut supra jam monui, non habeat modum essendi completum sine accidentibus, mirum non est si agere nequeat sine accidentibus. Vnde etiam ignis destitutus calore proprio, stupam injectam ne quidem calefaceret.

*Inst. 5.* Ergo substantia creata sic tantum ageret per accidens. *Dist.* Id est, ageret per potentiam accidentalem. C. Id est, non ageret per potentiam sibi propriam. N. Sic autem agere per potentiam sibi propriam, est agere per se.

*Obijciunt* etiam hoc loco adversarii incommoda quæ viderentur sequi ex eo, quòd substantia mediantibus potentiis accidentalibus

atingat effectus substantiales, quasi accidens ad hoc elevari non possit. Sed eâ de re satis constat ex doctrinâ capitis superioris.

*Dico* autem IV. Etsi creata substantia effectus propriè dictos attingere immediatè viribus naturalibus nequeat; nihil tamen impedit quominus id præstare possit, saltem per virtutem obedientialem. Neque enim hoc magis repugnat, quàm ab ipsâ substantiâ prodire immediatè propria accidentia. Quod ostendebamus *cap. I. Ass. I.*

**CAP. IV.** *De spherâ activitatis agentium naturalium; & de eorum actione directâ, reflexâ, & refractâ.*

**D***Vplex* est agentium naturalium genus. Alia enim agunt solùm movendo localiter; nec habent determinatum suæ activitatis terminum. Nam si daretur medium infinitum, lapis in eo posset descendere in infinitum. Verùm alia sunt ex agentibus naturalibus quæ agunt per virtutem, seu qualitatem activam à se in medium diffusam: ut ignis per calorem, sol per lumen. Cùm autem nulla sit ratio cur agant potiùs in unam, quàm in aliam partem, siquidem habent de se virtutem agendi suam æqualiter ad omnes partes determinatam; idcirco agunt in spheram, suamque activam qualitatem in omnes circumquaque partes æqualiter diffundunt, quantum est in se. Ut patet experientiâ candelæ medio in aëre lucentis.

*Dico* autem I. Sic omne agens naturale habere semper determinatam aliquam spheram suæ activitatis: nam virtus omnis creata finita est, ac determinata; neque hoc modo consequenter potest agere in infinitum. Item

*Dico*

**Dico II.** Qualitatem illam prout in directum effunditur, non esse uniformem; id est, æqualis ubique intensiōis, sed potiùs difformem; quatenus in partibus remotioribus, minori est cum perfectione, ut patet experiētiā. Quanquam sic vulgò ajunt illam diffundi *uniformiter difformiter*; quia decrescit eā proportione, quā distat ab agente sui productivo.

*Notabis* tamen ex probabiliori sententiā, in illo perfectionis decremento, & uniformi difformitate non servari proportionem, ut ajunt, arithmeticam, qualis reperitur in figurā conicā, prout acuminatur à basi ad verticem. Sed potiùs decrescit in proportione geometricā; quatenus v. g. toto primo in pede fortasse habeat intensiōem ut 7. in secundo & dimidio, fortasse ut 6. & sic deinceps. Dixi *fortasse*; quia quantitas illa vix dignosci potest; nec habetur illud sensibilibiter, nisi in magneticis; ubi maximè agitur de illo genere verticitatis, quam appellant magneticam inclinationem ad polum Terræ. Sic enim adhibito idoneo instrumento, nempe circulo, suos in gradus ritè diviso, percipies motum inclinationis non fieri nisi certā in proportione geometricā hujusmodi, prout magis acceditur ad polum Terræ; quem Terræ polum supponimus per virtutem à se diffusam motam illum acus inclinatoriæ determinare. Quod facile est experiri movendo acum versoriam circa æquatorem lapidis magnetici, incipiendo à puncto gradus 90. versùs alterutrum polum. Vt quidem satis intelligunt studiosi Magneticæ Philosophiæ, cujus principia tradidi in opusculis Mathematicis. Cum autem hæc ita fieri videamus in qualitate magneticā, probabile est legem eandem servari in aliis om-

nibus qualitatibus; nec ratio ulla est disparitatis. Nihil tamen certi haberi potest, unde improberetur sententia de uniformi difformitate, servatâ proportionem arithmeticâ: ut igitur hæc præteream, confir. ista doctrina sequenti Tractatu, Disp. 4. c. 7. circa finem.

*Dico* consequenter III. Per se fieri semper majorem intensiorem in minori distantia, seu in subjecto minus remoto. Quodd enim sol v. g. beneficio corporis reflectentis, aut refringentis, fortius agit in remoto, quam in propinquo; ut modò postea exponam; contingit istud tantum per accidens. Nempe sol corpus illud vel reflectens, vel refringens sibi subordinat, & cum eo simul & cum toto medio constituit agens totale unum majoris virtutis, unde sol ipse, posita illâ conditione, producat effectum intensiorem in majori distantia. Nec effectus illius causa alia assignari potest.

*Notabis* etiam inde sequi, ut agens naturale, vel etiam in parte subjecti sibi proximâ, non possit qualitatem producere cum eâ perfectione quam in se habet. Confirm. Quia si calidum ut 4. potest in parte sibi vicinâ producere calorem ut 4; pars ista poterit consequenter & in aliâ parte sibi vicinâ similem calorem ut 4. producere, atque ita fiet processus in infinitum; nec agentia naturalia dicerentur habere sphaeram determinatam activitatis suæ, cum uniformi difformitate; quod repugnat experientiæ.

*Objic.* Ergo agens naturale non assimilaret sibi passum, nisi intimè & penetrativè positum. R. Non assimilari quidem hoc modo perfectè in qualitatis intensiione. Quanquam ignis v. g. producto calore in ligno, unde in ignem convertatur;



vertatur, sic perfectè suum effectum sibi assimilat, mediatè saltem.

*Dico I V.* Plures causæ rationis ejusdem, ut plures candelæ simul positæ, constituunt agens totale unum fortiùs, unde actio citiùs fiat, tum ad majorem distantiam, & majori cum intentione. Probatur experienciâ ipsâ candelarum, aut multorum ignium simul positorum. Sic integer scyphus aquæ meliùs restinguit sitim, quàm plures guttæ subinde solùm infusæ. Hucque refertur commune illud dictum; *virtus una fortior est, seipsâ divisâ*. Ratio est, quia sic multæ simul causæ, mutuo sese juvant, fiuntque perfectiores saltem extensivè, etsi perfectionem intensivam non accipiant ab invicem.

*Notandumque est 1.* Effectum eundem sic indivisibiliter totum procedere à multis illis agentibus simul positis. Prob. Quia v. g. luminis major intensio in eâdem parte mediî, non posset esse ab ullo ex iis agentibus, si seorsum sumeretur. Fitque etiam hoc pacto per accidens, ut agens debilius conjunctum fortiori, influat in effectum suâ virtute propriâ perfectiorem. At

*Not. 2.* Agentia ejusmodi naturalia plura, & plura in infinitum simul posita, non posse idcirco producere effectum majoris intensiois, quàm in ipsis reperitur. Prob. Quia nulla potest esse major perfectio in effectû, quàm in causâ; siquidem tota perfectio effectus derivatur à causâ. Item

*Not. consequenter 3.* Quemadmodum densitas in agente naturali conferat ad majorem perfectionem effectus qui ab ipso procedit. Quia scilicet multitudo partium addensatarum habet rationem multorum agentium partialium,

tialium, quæ melius unita, conflent totale agens unum perfectius. Confirm. experientiâ. Quia ferrum duntaxat calidum ut 4. levissimo contactu adurit fortius fortiusque agit, quàm flamma ipsa rarior, licet habeat calorem ut 8. Nam & impunè manus per flammam ejusmodi rariorem traducitur.

*Dico V.* Causæ naturales de se, id est, nisi interjecto aliquo obice impediuntur, agunt semper actione directâ, seu per lineam rectam. Prob. experientiâ. Quamobrem excepto per astronomici quadrantis pinnulas solis radio, potes designare locum ipsius in cœlo, & sic de aliis. Prob. ratione. Quia cùm natura nihil faciat frustra, agit semper, & tendit ad terminum brevissimâ quâ potest viâ: linea autem recta, cæteris paribus, est brevissima omnium earum quæ ab uno puncto ad aliud produci possunt. At

*Not. I.* Si qualitati per medium diffusæ occurrit corpus ultra quod nequeat propagari, aliam in partem reflectetur; diciturque hæc actio reflexa; *Consule Tabulam in fine libri appositam*; & adverte ad figuram 1. laterculi secundi. Tum in eâ quidem observabis primò, corpus reflectens seu speculum *b.* impediens ulteriorem propagationem luminis producti à sole *a.* Linea *a. b.* vocatur radius directus. Linea *b. c.* radius reflexus. Pars *b.* in quam veluti incidit radius directus, dicitur punctum incidentiæ. *C.* verò est punctum reflexionis. Angulus sub *a. b.* est angulus incidentiæ. Illi autem oppositus sub *b. c.* appellatur angulus reflexionis, qui semper est æqualis cum angulo incidentiæ; & sub quo solummodo videri potest objectum.

Figura secunda repræsentat speculum concavum,

vum, ex quo radii omnes reflexi concurrunt simul in unum punctum, quem idcirco vocant *focus*, quia in eo generari solet calor intensissimus, aut etiam ignis.

*Not. 2.* Corpus reflectens seu impediens propagationem luminis ulteriorem, vocari corpus *opacum*. Soletque definiri, corpus quod lumen à corpore lucido diffusum, aut species ab objectis visibilibus missas, intra se non admittit, trajectionemve impedit. Huic autem opponitur corpus *diaphanum*, seu *transparens*, quod specierum visibilium, aut luminis per medium diffusi trajectionem non impedit. Sed

*Not. 3.* Species visibiles, aut radios à corpore lucido transmissos per media diaphana inæqualis raritatis, aut densitatis, refrangi ad occursum corporis diaphani, aut rarioris, aut densioris; id est, non tendere ultra per lineam rectam, sed potius declinare in aliam partem, ubi tamen agitur de radiis obliquè incidentibus in superficiem illius medii raritatis, aut densitatis inæqualis; nam radius perpendicularis, seu qui perpendiculariter incidit, non patitur refractionem, sed rectè semper tendit. Exemplum habes in sole radios emittente per vitream lagenam aqua plenam; *ut in fig. 3.* in quâ vides radios post refractionem concurrere tandem ad perpendicularem certo in puncto, quod vocant *punctum refractionis*, in quo fit actio intensior. *Vide in Mathemat. Tract. De Opticâ. cap. 5.* hæc iterum fusiùs explicata.

*Notandumque* est obiter, puncto refractionis, vel reflexionis applicatam chartam albam, non comburi, quod albedo vires actionis illius veluti dissipet; contrà autem si fuerit nigra, aut pannus niger, &c.

## DISPUTATIO V.

## De Conditionibus ad agendum.

CAP. I. *Distinctio agentis, & passivi; tum de actione per antiperistasis.*

**P** *Assum* illud dicitur, quod agentis actionem in se recipit; dubiumque est an debeat esse quid distinctum ab agente; an potius agens possit agere in seipsum, illaque distinctio sit conditio necessaria ad agendum.

*Dico I.* Agens quidem potest agere in seipsum indirectè actione vel perfectivâ, ut quando quis sibi alimentum sumit, unde conservetur; vel actione corruptivâ; ut sibi alimentum subtrahens, unde pereat. Atque ita calor naturalis in animantibus resolvens humidum radicale, in quo residet tanquam in subjecto, deperit consequenter, pereunte illo subjecto.

*Dico II.* Idem in seipsum, & secundum eandem partem potest directè agere actione æquivocâ. Sic enim aqua reducit sese ad suum frigus. Sic anima in se suas facultates emanat. Sic intellectus, aliæque vitales potentie in se actus suos eliciunt.

*Objic.* Idem respectu ejusdem non potest esse actu, & in potentiâ; quia esse in potentiâ ad actum dicit privationem illius actus. *Dist.* Non potest quidem simul esse actu formali, & in potentiâ univocâ; potest tamen esse simul in potentiâ æquivocâ, & actu virtuali respectu ejusdem; quo pacto causa semper est in actu virtuali respectu effectus quem potest producere; nihil enim producit actu formaliter, nisi quod in se virtualiter contineat.

*Inst.* Idem posset movere seipsum, seipsum vide-

videlicet perficiendo. Quod repugnat Aristoteli; ex quo, *Quicquid movetur, ab alio movetur*, Dist. Ex Aristotele, quicquid movetur ad esse sui, (qui tamen est motus improprie & late sumptus) hoc sensu movetur semper ab alio. Quia quod generatur, necesse est illud ab alio generari. At potest aliquid moveri à seipso motu perfectivo & accidentali, nempe per emanationem, aut aliam actionem immanentem.

*Dico I I I.* Idem in seipsum, secundum idem, agere non potest directe actione univoca. Ita calor nequit seipsum intendere, &c. Prob. Quia calor ut quinque intendens seipsum, produceret calorem ut sex. Ergo daret id quod non habet; ageretque supra suas vires. Conf. Quia calor v. g. ut 4. subjecto proprio & naturali inexistenti, subjectum ipsum destrueret, supra modum sese intendendo: quod repugnat, &c.

*Obje.* Lumen reflexum ad angulos rectos simulque veluti incidens cum radio directo, ipsum intendit. Ergo sic radius directus concurrrens ad reflexum, hoc saltem modo seipsum intenderet. R. Sic agit tantum in se indirecte & per accidens, quatenus est veluti instrumentum conjunctum cum sole, à quo, posita hujusmodi conditione, producit intensior ille effectus; ut postea rursus explicabo.

*Inst. 1.* Calor & frigus per antiperistasim, id est, ad circumobstantiam agentis contrarii, sese intendunt. Nam perfectionem acquirunt majorem, quæ aliunde oriri non potest: siquidem à qualitate contrariâ circumobstante potius destrueretur. Sic fontes in æstate redduntur frigidiores; & aër in cavernis evadit calidior, unde & ipsæ cavernæ fumant. Est autem *antiperistasis* vox Græca, significans contrarii circum-

cum obfessionem; docetque Arist. intensionem per antiperistaltim fieri potissimum in calidis, & frigidis At

*Dico I V.* Fit illa intensio præcipuè duobus hisce modis. Ac primò quidem fit, quando agens contrarium impedit ne spiritus intus conclusi erumpant, diffuantque. Quo pacto in hyeme frigus constringens poros corporis, impedit ne spiritus effluant, unde redditur calor stomachi intensior, citiusque coquuntur cibi. Sic etiam frigus constringens terram, impedit ne exhalationes erumpant, quamobrem aër in cavernis magis incalescit, atque instar fumi cujusdam, inde prodeunt halitus, qui etiam fontanis & putealibus aquis permixti, calidiores illas efficiunt. Contrà autem (qui secundus est modus hujusce rei explicandæ) calor æstivus circumobstans efficit ut exhalationes calidæ, quâ datâ viâ, laxatis Terræ poris erumpant liberius; unde aquæ puteales & fontanæ sibi relictæ, & impermixtæ illis exhalationibus, proprium frigus emanant, adeoque redduntur in æstate frigidiore. Item, calx viva, ubi aqua infunditur, solet exardescere; quia spiritus ignei intus conclusi hoc modo continentur ne diffuant, tum inutud sese ad invicem allidentes, majorem acquirunt raritatem, unde coguntur erumpere, aquam ipsam calefaciendo cum ingenti ebullitione.

#### C A P. I I. *Dissimilitudo agentis & passi.*

*Dico I.* Cum Aristotele, simile secundum ejusdem qualitatis gradum, in aliud simile non potest agere actione perfectivâ, ipsum videlicet intendendo. *Prob.* Quia non esset potior ratio cur unum diceretur potius pati, quàm aliud.

aliud. Conf. Quia si calidum ut quatuor, diceretur agere in aliud calidum ut quatuor, ipsum intendendo, deberet in eo producere quantum caloris gradum. Ergo sic ageret supra suas vires, daretque id quod non habet. Item, duo calida remissa possent mutuo sese perducere ad summum intensiōis gradum.

*Dico I I.* Non potest etiam agere in aliud simile actione destructivâ. Prob. Quia calidum huiusmodi in alio calido non posset producere nisi calorem, quo potius perficeretur; tantum ergo abest, ut sequatur ejus destructio.

*Objic. 1.* Major ignis extinguit minorem. Ergo simile agit in simile. *Dist. Ant.* Extinguit directè. N. Indirectè, absumendo ipsius pabulum. C.

*Inst. 1.* Cum duo vitra se mutuo collidunt, tunc simile agit in simile. R. Habere tunc contrarios impetus, & sic in impetu saltem sunt dissimiles.

*Inst. 2.* Speculum unum, speciem ab objecto aliquo receptam, in speculum aliud simile transmittit: ergo, &c. R. In eo primum speculum est alteri dissimile, quod speciem receperit, quâ careat alterum.

*Inst. 3.* Agens densum, puta ferrum calidum ut 4. fortius est quàm aliud calidum ut 4. maximæ raritatis; ergo ipsius calorem potest intendere. *Dist. Ant.* Fortius est quatenus propter densitatem potest producere intensiorem effectum, intra limites propriæ intensiōis, non autem quod possit limites illos transgredi. Nam densitas non augeat virtutem in actu primo, sed tantum facit, ut agat fortius, quemadmodum agebam supra *Disp. 4. c. 4. Assert. 4.*

*Inst. 4.* In ingenti igne partes remotiores agunt

agunt in propinquiores, unde ab illis simul sumptis vehementior producat calor ad extra: vel certè remotiores illæ dicerentur agere in distans sine medio, quod postea refutabitur. Ergo simile agit in simile; nam partes illæ ignis calorem ejusdem intensiōis omnes habent. *℞.* Non agunt in illas, sed potiùs cum ipsis constituunt unum agens totale; ut capite sequenti sub finem explicabo.

*Inst. 5.* Aër frigidus aquam similiter frigidam congelat, in eâ frigus intensius producendo. Ergo simile hoc pacto agit in simile. *℞.* Aquam sub summo frigiditatis gradu servare connaturalem sibi fluiditatem: ergo non ex eo præcisè durescit in glaciem, quod majorem frigoris intensiōem accipiat; sed tantum quod multas exhalationes siccas intra se admittat.

*Objic. 1.* Virtus magnetica unius magnetis perimit similem virtutem in alio magnete; ut patet experiētiâ. Ergo, &c. *℞.* Polos magneticos ejusdem respectus habere contrarietatem, unde sese mutud perimant, ut tradidi in Mathematicâ; tibi de Magnetismo Terræ.

### CAP. III. *Agentis & passi indistantia; tum de concursu medii, &c.*

**I**lla indistantia, idem est ac immediatio, seu præsentia, aut propinquitas, & contactus agentis & passi. Ac præsentia quidem illa & immediatio potest fieri duobus modis. Primò, ratione suppositi; quando scilicet causa ipsa per suammet entitatem ac substantiam est præsens passo. 2. Ratione virtutis, quando subjectum ipsum distans attingit tantum per virtutem à se diffusam. Quo pacto sol dicitur esse imme-



immediatè præsens Terris, immediatione virtutis per suum lumen. Qui etiam dicitur *contactus virtutis*, ut distinguatur à contactu mathematico, per quem duo corpora contigua sibi ad invicem applicantur. His suppositis,

*Dico* I. Ex doctrinâ D. Thomæ contra Scotum: Causa in passum seu subjectum distans agere non potest, non agendo per medium. Prob. Quia nulla res agit nisi ubi est, vel ratione suppositi, vel ratione virtutis per medium diffusæ. Nam agere sequitur ad *esse*; comparanturque inter sese agens & patiens, tanquam perfectivum & perfectibile. At perfectibile nullum à perfectivo recipit perfectionem, nisi applicetur ipsi; quomodo per proportionem materia non perficitur à formâ nisi intimè ipsi applicatâ. Atqui causa subjecto distanti applicari non potest nisi servatâ illâ conditione. Confirm. 1. Quia alioqui nulla ratio afferri posset, cur agentia naturalia suam habeant sphaeram activitatis, nisi dicantur hoc pacto conjungi cum subjecto distante. Item, nulla ratio afferri posset, cur natura tantopere vacuum refugit, nisi ut inferiora per cœlestes influxus perficiantur. Conf. 2. Quia sic agerent independentes à medio, & consequenter possent agere ad quamcunque distantiam; posset res vel minima videri à nobis etiam ex longissimis intervallis. *Nec dicas*, servari nihilominus aliquam propinquitatem. *Contrà enim est*, siquidem servatâ eadem propinquitatem, ubi aliquod obstaculum interponitur, cessat nihilominus actio: ut constat in illuminatione à sole. Confirm. 3. Ex communi sententiâ Theologorum, qui inde probant Dei præsentiam in rebus, quòd ab eo producantur, & jugiter conserventur directè atque

immediatè, immediatione suppositi, juxta illud Act. 17. *In ipso vivimus, movemur, & sumus.* Unde si per suam immensitatem non esset ubique substantialiter præsens, etsi habeat vim agendi infinitam, non posset tamen agere in distans sine medio. Quod autem ajunt de mutuâ locutione Angelorum etiam longè distantium: item, quomodo crucientur ab igne inferorum ii dæmones, qui in superioribus istis regionibus versantur; illud explicui in Metaphysicâ De Angelis.

*Dico II.* Medium per quod agens naturale attingit subjectum distans, esse plerumque qualitatem, vel *sensibilem*, seu quæ percipitur aliquo sensu; cujusmodi est lux à sole, aut calor ab igne; vel *occultam*, quæ scilicet nullo percipitur sensu, qualis est magnetica, per quam aut attrahitur, aut repellitur ferrum. Nam profluere à magnete qualitatem occultam, vel ex eo constat, quod ferrum magneti affricatum, similem attrahendi ferri virtutem concipiat; neque illud aliunde potest contingere, quàm à qualitate magnetis relictâ in ferro.

*Notandumque* est, causam à quâ diffunditur qualitas per medium, vocari *agens principale*, à quo effectus procedit primariò, cùm secundariò duntaxat procedat à *medio*, seu à qualitate per quam corpus interjectum, puta aër, elevatur ad rationem medii activi, respectu talis effectus. Sed

*Dico III.* Medium hoc modo non agit nisi ut *instrumentum conjunctum*, non autem ut *separatum*. *Prob.* Quia alioquin lumen per foramen immissum intra cubiculum, non illuminaret solum in lineâ directâ, sed etiam sphæroides, perinde ac alia agentia naturalia, quæ per se & separatim agunt. Quod enim secundarium lumen  
ab

ab eo producitur, non est ejusdem intensiois, cum eo quod producitur in lineâ directâ intra eandem distantiam. Item, eam ob causam calor directè profusus ex ore fornacis, magis est acti-  
vus, quàm qui ad latera percipitur. Item, spe-  
cies impressa quæ funditur ab objecto visibili, non repræsentat objectum, nisi in lineâ directâ; ergo non agit nisi ut *medium conjunctum* cum agente principali à quo diffunditur; nam istius rei causa hæc sola esse potest.

*Notandum* verò est, medium & agens princi-  
pale esse veluti causas partiales, quæ simul effi-  
ciunt unum agens totale; siquidem ubi sepa-  
ratim sumerentur, eodem modo non agerent.  
Item,

*Not. 2.* Vt agens principale faciat unum agens  
totale cum medio, non est necesse ut in ipsum  
medium exerceat aliquam efficientiam, si modò  
sit in medio virtus sufficiens, quæ simul possit  
coagere. Sic in sole, aut in ingente igni, partes  
remotiores agunt ad extra cum partibus pro-  
pinquioribus, non agendo in illas propinquo-  
res, siquidem simile hoc pacto non agit in simi-  
le. Item, ut agens principale agat in passum di-  
stans, satis est ut corpus intermedium faciat cum  
illo *passum totale*, simul etiam patiundo. Sic  
enim sufficienter servabitur immediatio agentis  
& passi ad agendum requisita.

C A P. I V. *De vario genere qualitatum, per  
quas explicari potest ælio in distans.*

**M**ulta in hoc genere vulgò jactantur fieri  
per sympathiam, aut antipathiam; item,  
per aliquam spirituum transmissionem, aut per  
qualitates occultas, & specificas. Quæ quidem  
ut intelligantur:

*Suppono 1.* Sympathiam esse mutuam diverforum ad invicem consensionem & inclinationem à naturâ insitam. Contrà autem, antipathia est naturalis dissensio ab invicem : hæc autem per occultas qualitates, aliisque modis exerceri, postea ostendam.

*Suppono 2.* Præter calorem, frigus, humiditatem, & siccitatem, quæ vocantur *manifestæ* qualitates, quia sensibus percipiuntur, ut capite superiori aiebam; suppono inquam, alias esse insensibiles, quæ ideo vocantur *occultæ*, nec deprehenduntur nisi per effectus ab ipsis profectos. Item vocantur & *specificæ*, quia certæ speciei corporis naturalis addictæ sunt. Tales sunt apud Medicos *cathartica*, id est, purgantes, unde & medicamenta cathartica: Item *smectica* seu absterisivæ; item *caustica*, quæ nimirum vim habent adustivam; item, *narcotica*, quibus stupor ac torpor inducitur. Item, aliæ dicuntur virtutes *diuresica*, & ad movendam urinam idoneæ; aliæ *deleteria*, seu mortifera, quia calorem nativum extinguunt, &c. Certè, si hæc fierent tantùm manifestis qualitatibus, seu per excessum primarum qualitatum, cur aqua pura, cur piper, cur vinum sublimatum, seu aqua vitæ, cur spiritus sulphurei, inter deleteria non numerarentur? cùm intus accepta generent sæpe aut calorem, aut frigus majoris intensiōis. Sic mercurius seu hydrargyrum per propriam virtutem specificam auro adhærescit, ipsumque pervadit, fugat à corde malignas qualitates, ubi ex collo suspenditur; tum etiam pedum plantis illitum, videtur colligare omnes corporis humores, qui per os diffluunt, luem curando. Hujusmodi etiam occultæ virtuti adscribendum foret, quod narrant histo-

historici de Remorâ, seu Echeneïde, si quam veritatis haberet speciem. Sed navi prætoris Antonii, aut quinquere mi Caligulæ retinendæ vim parem obtinere non potuit tam exiguus pisciculus ibi fortuitò compertus; potestque aliâ ratione servari fides historiæ; si nimirum dixerimus istud contigisse ex aquis occurrentibus, aut ex maris æstibus contrariis; cum sæpe numero naves onerariæ in mari Siculo secundis impulsæ ventis, mediis in fluctibus hac ratione consistent; uti quidem vulgò ferunt. Sed his prætermisissis,

*Suppono* 3. Plerisque hujusmodi qualitatibus specificis inesse vim aut attractivam, aut expulsivam. Sic bufo seu rubeta sole exsiccata, ubi tuberibus pestiferis applicatur, humorem noxium attrahit, ægrumque sanat. Sic medetur moribus aranei impositus araneus; sic plagam à se inflictam curat Scorpius; sic apum aculeos mel etiam sanat; sic morsum viperæ, caro viperina quam æger comederit; sic terrestre virus serpentes, aquaticum diplades; ærium aranæ duplici officio attrahunt, dum sibi consulunt; nam iis cedit in alimentum, tum à nobis quod foret detrimento, avertunt. Ita erucæ, papilio-nes, aliæque id genus insecta, dum plantis ac fructibus insident, per qualitates sibi proprias noxia exugunt; quemadmodum de innumeris aliis observat Kircherus.

*Notabis* autem, nihil hîc dici à me de virtute magneticâ (quæ inter qualitates específicas atque occultas locum facîle principem obtinet) quia in Mathematicâ, *Tract. de Spharâ Terrestrî, ubi de Magnetismo Terra*; proprietates illius, ac effectus planè mirabiles prosecutus sum. Ex iis enim intelligere est, cur magnes & ferrum, aut magne-

magnetes inter se vel diffideant, vel consentiant. Quomodo illa qualitas simul sit attractiva & directiva. Quomodo simul in omnibus subjecti sui partibus existat quasi indivisibiliter cum virtute bipolari, utroque polo simul dissentiens; nec habeat magnes suæ illius virtutis centrum, nisi in circumferentiâ; duoque centra oppositæ virtutis contineat in eadem circumferentiâ. Ibi præterea causam assignamus, cur magnes plus valeat ferro armatus, quàm inermis. Cur ipsi ferro tribuat vim majorem, quàm ipse exerat. Cur ferrum magneti eripiat ferrum aliud. Cur eidem polo affricatæ acus contrariam inter se virtutem hauriant. Cur poli dissimiles tantùm sint amici. Cur polus tertius duobus amicis interveniens, eorum amicitiam impediat, neque in magneticis amici esse possint nisi duo, qui tamen tendant in oppositas mundi partes. Cur se erigat acus in polis oppositis secundùm oppositas partes. Cur unius poli virtus ab alio polo, aut etiam per contrarium motum destruat, &c. Atque his suppositis tradi faciliè poterit ratio multiplex explicandæ actionis in distans.

C A P. V. *Varii modi explicandæ actionis in distans.*

**D**ico I. Actio in distans perficitur interdum beneficio qualitatæ occultæ & specificæ; ut contingit inter magnetica. Quâ etiam ratione testudo marina piscatoris brachium stupefacit. Ita serpens Americanus, quem ob ingentem magnitudinem appellare *trabem* solent, prætereuntem cervum vi halitus à se profusi constringit attrahitque, dum postea integrum illum deglutiat, solo capite & cornibus relictis. Sic vetulæ

tulæ quædam aut tactu , aut visu pueros & animalia fascinant, iuxta illud Poëtæ :

*Nescio quis teneros oculus mihi fascinat agnos.*

Vt enim certis hominibus humores benefici cum afflatu suauissimi odoris à naturâ sunt insiti , quod de Alexandro Magno narrat Plutarchus ; sic reperiuntur nonnulli qui ex pravo corporis habitu vim maleficam , & noxios spiritus , instar jaculi cuiusdam veneno illiti , vel ipsis oculis evibrant ; quo affecti contabescunt. Quod fascini genus inesse vetulis solet , ob maiorem humorum corruptionem , quam ut plurimum contrahunt vel ex defectu caloris nativi , vel ex menstruo sanguine. Scribitque Plinius , extitisse olim in Africâ totas fascinantium familias. Iam verò quòd per oculos transmitti possint noxiæ qualitates , aut spiritus qui alios perimant ; probatur ex mulieribus , quæ tempore menstruorum specula inficiunt maculis quibusdam veluti sanguineis. Quinetiam solo aspectu cætera animalia enecat serpens basiliscus , ut vulgò commemorant. Nec merito fidem huic historiæ denegabit Martinus Delrio , quòd per actionem videndi , cùm sit immanens , hæc præstari nequeant : non enim dicimus hæc fieri per actionem videndi , sed tantum per oculos intuentium evibrari noxias exspirations illas, concurrente imaginatione, spiritus ad oculos evocando. Hic autem agimus tantum de naturali fascino , non de eo quod ope dæmonum à veneficis mulieribus & sagis perficitur.

*Dico II.* Sic etiam sympathia, aut antipathia exercetur in distans. Hoc enim modo ex palmis mas & foemina sese mutuo fovent, pereuntque idcirco ubi transplantantur; Contrà autem,  
vitis

vitæ quæ claviculis res alias omnes stringere & amplexari solet, à caulibus brassicisque, si prope fata sint, inquit Cicero, tanquam à pestiferis & nocentibus refugit. Cantharides vel manu tractatæ perniciosi vesicæ afferunt sæpe, lotiumque reddunt sanguinolentum. Medicamenta virtute stomachi veluti imprægnata & excitata, humores ad ipsum stomachum, quasi ad commune totius microcosmi penarium colligunt, indeque in intestina tanquam in sentinam devolvuntur; quos tandem natura simul cum medicamentis, ut perniciosos sibi hostes propellit in secessum.

Quod autem accadat plerumque ex aliquâ veluti antipathiâ, ut cadaver occisi hominis effundat sanguinem ad præsentiam illius qui perpetratæ cædis est reus, difficile est causam illius effectus naturalem assignare; satiusque est recurrere ad specialem Dei concursum, qui in eâ circumstantiâ velit hoc modo prodere homicidam, ut debito supplicio afficiatur.

Item, quod ajunt pulverem sympathicum sanare vulnera hominis procul distantis, cum istud naturæ legibus repugnet; nihil superest, nisi ut dicamus rem esse aut stultitiæ, aut superstitionis plenissimam. Huc revocandum est quod vulgò jactant de variis musicæ effectibus, aut sympathicis, aut antipathicis. Cum enim de se tota sit ad hilaritatem comparata, ideo dicitur esse in luctu importuna narratio. Quia tamen aliunde contraria curantur contrariis, ubi aures demulcet, recreatque spiritus animales inertiam veluti quadam ac torpore laborantes, tunc discutitur vapor melancholicus, quo sensuum internorum organa tenentur obseffa; sicque melancholicos, ac furiosos, immò & ipsos



iplos energumenos sanat, cùm istos animi affectus captare soleat dæmon, & eorum beneficio in homine dominari. Hoc quippe testatur sacra scriptura de Saùle, quem ab infesto ejusmodi spiritu liberabat David cytharam percutiendo. Verùm, ut longiori Tractatu describit Kircherus, enitet maximè in curando Tarantismo vis musicæ. Sciendumque est ad Tarentum Apuliæ civitatem in Italiâ, sub æstivos menses nasci phalangiorum seu araneorum genus quoddam, Tarantulas à regione vocant incolæ; cujusmodi phalangia si quos moinorderint, tum morfu inditum venenum diffunditur per totum corpus, ex quo affectus oriuntur prorsus exotici. Nam ex Tarantiacis, seu ictis à Tarantula, alii miserabilem in modum sese risu enecant, alii furiosorum instar debacchantur, contabescunt alii, alii obrigescent, dum tandem ingravescente vi morbi intereant. Huic autem malo præsentius remedium nullum est, quàm musica certâ ratione decantata, pro diversitate paroxysmi quo vexatur æger: hac enim excitatus tandiu saltando corpus agitat, dum solutis poris, venenum omne difflexerit. Notandumque est aberrare illos qui scribunt morbum hunc tam exitialem vigere tantùm vivente Tarantulâ, quæ absentes etiam torqueat; nam brevioris est vitæ Tarantula, perinde ac muscæ, bruchi, aliâque insecta, cùm tamen ad multos annos subinde statis vicibus laborent Tarantiaci.

*Dico III.* In viventibus, actio in distans propter sympathiam aut antipathiam, fit sæpe ex naturali instinctu & præviâ apprehensione rei aut amabilis, aut fugiendæ. Sic amor inclinationis, ut vocant, in nobis nascitur; sicque ex solo alterius conspectu nonnunquam tam dirus ardor

ardor, & tam exoticus animum subit; unde & quasi fasciatus videatur. *Vt vidi, ut perii*: inquit Poëta. Sic ovis ubi in lupo occurrit, solet perhorrescere. Sic inter lusciniam & serpentem tanta exercetur antipathia; ut eam ob causam luscinia dumera & vepres amet, cum hæc loca vitentur à serpentibus. Item, luscinia pavonem quærit, quia juxta hunc secuta latet, cum pavo sit formidabilis serpentibus; alioqui si luscinia serpentis in conspectum se dederit, terribili faucium hiatu, & oculorum fulgore illius attonita sic obstupescit, ut viribus destituta ex arbore decidat, fiatque hosti præda. Quod mustelæ eodem etiam ferè modo evenit, cum incidit in bufonem. Bufoni autem perinde est infesta aranea; ipsique suo morfu, ac veneno mortem infert: unde conjicias araneam bufoni præstare quoad vires veneni.

Pertinet quoque ad istud caput, problematis illius explicatio; cur scilicet oscitante aliquo, ut plurimum provocemur ad oscitationem. Rationem hanc vulgò proferunt ex Arist. quia tunc in nobis excitatur memoria & appetitus illius boni, quod per oscitationem comparatur. Sic enim ex musculis vultus excutitur vapor aliquis iners, qui vel morbo, vel defatigatione, vel tædio in iis partibus contrahitur.

*Dico* I V. Multa præterea sunt problemata de actione in distans, quæ sine motu locali nequeunt explicari. Primò. Cur, ubi imponitur igni lebes aquæ plenus, superiores partes calidæ fiant, frigente fundo. Ratio est, quodd ubi pars aquæ ad fundum calorem concepit, indèque levior facta est, statim ascendit, superiori, quæ frigidior graviorque est, descendente. Quamobrem apparet in aquâ ipsâ quasi motus circularis

laris partium infimarum ac supremarum, dum tota penitus calida fuerit.

2. Cur chorda musici instrumenti resonans, distantem aliam concitet, quæ sub eodem tono fuerit extensa. R. Quia commotus aër sonum deferens, in chordam eodem inodo præparatam incurrit. Idemque contingit in chordâ quæ octavam reddit; neque enim hæc differunt nisi in acuto & gravi sono, censenturque veluti eadem chorda repetita; unde pueri, & mulieres, ubi cum viris rem eandem decantant, facile cum iis octavas efficiunt.

3. Vnde ille horror quem sentimus ex stridore ferri, etiam distantis. R. Nascitur ex eo quodd ubi sonus ille stridulus membranam auditus offendit, hæc sese contrahat simul cum nervis, qui ad dentium radices pertingunt. Quo in casu spiritibus destituuntur, unde frigus ad dentium radices illas incidens horrorem ingenerat.

4. Quomodo araneus fila traducit ex unâ arbore ad aliam, aut ad locum alium sibi inaccessiblelem. R. Aranem ex filo pendentem tandiu librare sese, dum levioris alicujus venti beneficio ad oppositas partes deferatur, illisque adhærescat.

CAP. VI. *De excessu virtutis activæ requisito ad superandam passivæ resistantiam.*

**R**esistentia ut sic, est impedimentum actionis ne fiat; vel est retardatio ne tantâ cum celeritate, aut intensione fiat. Illius autem est genus duplex. Nam altera dicitur resistantia negativa; quando subjectum propter incapacitatem, ab alio pati non potest. Ita res incorporeæ dicuntur resistere negativè actioni agentis  
cor-

corporei ; quo pacto Angelus negativè resistit divisioni sui , aut receptioni quantitatis per quam fiat extensus modo corporeo. & divisibili. Altera est resistantia positiva , per quam realiter & positivè actioni agentis alicujus resistitur. Cujusmodi reperitur inter contrarias qualitates. Hæcque est duplex ; passiva scilicet, seu formalis ; tum activa.

Resistentia formalis seu passiva , est ipsa formæ in hæsiō in subjecto, per quam habet impossibilitatem cum aliâ formâ ipsi oppositâ. Cum enim, ex communi sententiâ juxta Aristotelem, non possint nisi octo gradus ejusdem contrarietatis consistere in eâdem parte subjecti, necesse est ut ad productionem alicujus contrariæ qualitatis, tot successivè gradus oppositæ qualitatis corrumpantur ; quare sic *v. g.* calor resistit frigori , quatenus impedit quominus totum simul producat in tali subjecto, cum successivè tantum & gradatim ipse destrui queat.

Resistentia autem activa , est vis agendi per quam agens naturale resistit contrario, sive illud debellando, sive proprias qualitates in se emanativè conservando ; quo pacto & resistantia formalis juvatur ab activâ.

*Notandumque* est diligenter , vim illam activam agentium naturalium majorem esse in conservandis gradibus remissis, quàm intensis. Ratio est , quia ignis *v. g.* in octavo gradu caloris conservando , agit ex totâ & adæquatâ virtute, totamque, ut ita loquar , potentiam suam in eo exhaurit. Contrà autem , in gradibus remissis conservandis agit per virtutem excedentem, adeoque fortius illos conservat. Quemadmodum si quis homo validus ~~ut~~ 8, trahat pondus ut 8, tum agit per virtutem adæquatam, nec tam  
facile

facile potest resistere adversario renitenti, quàm si traheret solùm pondus ut 2. Item

*Not. 2.* Quando virtus activa est æqualis cum resistantiâ passî, tunc habitudo illa vocatur *proportio æqualitatis*. Sin virtus activa minor est, dicitur *proportio minoris inæqualitatis*. Contrà autem si fuerit major, est *proportio majoris inæqualitatis*. At his præmissis,

*Dico I.* Vbi est superanda contraria qualitas, non est necesse ut virtus agentis superet vim activam passî; immò patet experienciâ glaciem frigidam fortè ut 7, calefieri nihilominus, & resolvi à calore manus intenso tantùm ut 3. At

*Dico II.* Debet saltem superare ipsius resistantiam formalem, seu passivam. Quo pacto vulgò ajunt actionem hujusmodi esse à proportionem majoris inæqualitatis. *Prob.* Quia nihil superatur nisi à fortiori, non autem ab inferiori, aut æquali. Quinetiam

*Dico III.* Excessum illum virtutis activæ non esse quemcunque, sed aliquem saltem determinatum. *Prob.* Quia agentia naturalia simpliciter non agunt, nisi sub determinatâ aliquâ perfectione virtutis activæ; alioquin afferri non posset ratio, cur sphæram activitatis in infinitum propagare nequeant, nisi quòd extremæ illius sphære partes non sunt satis activæ; ergo à pari etiam requiritur excessus aliquis determinatus supra resistantiam passî, ut superari possit.

*Notabis* autem tunc dici actionem *victoriosam*, putà ignis, quando contrarium ipsum prorsus absumit, & in ignem convertit.

## CAP. VII. De Reactione.

**R** *Eactio* est actio reciproca seu mutua, per quam passum eo ipso tempore quo patitur  
*Phys. Vnivers.* G ab

ab agente aliquo, saltem secundum aliquam sui partem, secundum eandem etiam partem in ipsum agens reagit, & quasi par pari refert. Et alteri quidem ex duobus istis quod fortius est, tribuitur nomen *agentis*, alteri autem nomen *patientis*, seu *passi*.

Verum, etsi omne agens naturale non repariatur ab alio; certum tamen est ex quotidianâ experientiâ, frequentissimam esse reactionem inter agentia naturalia. Primum enim si glacies manu calidâ contrectetur, simul glacies calore manus liquefiet, simulque manus frigeſcet ab ipsâ glacie. Ita, si aqua calida frigida permisceatur, aut ferrum candens in ipsam immergitur, simul aquam calefacit, simulque ab aquâ frigeſcit. Item, cibus alterans stomachum, vicissim à stomacho immutatur. Aër aspiratione ductus refrigerat pulmones, & vicissim ab iis incalescit. Item, vasa vitrea mutuo collisa, sese mutuo frangunt; culter lignum secans, à ligno retunditur, &c. Sed hîc agitur potissimum de actione & reactione inter qualitates contrarias; cuiusmodi semper fit in generatione mixtorum, dum qualitates elementares sese mutuo refrangunt; nihilque impedit quominus de facto reperiatur inter eiusmodi contraria. Nam calidum ut 8. v. g. agens in frigidum etiam ut 8. facile potest ipsius resistantiam formalem superare, producendo in eo primum caloris gradum, per quem expellatur frigoris gradus octavus. Nam ille octavus gradus resistit tantum ut unum, siquidem conservatur tantum à virtute adæquatâ: cum è contra, primus caloris gradus, in illâ hypothesi, inducatur per virtutem excedentem septem gradibus. Et sic per proportionem de aliis,

*Objic.* Si quæ esset reactio inter elementa, maximè contingeret inter ignem & aquam; cùm hæc opponantur per qualitates maximè activas. Atqui ex Arist. 2. *De partib. Anim. c. 2.* ignis frigesieri non potest: unde sequitur eum nec repati. *R.* Non frigesit quidem sensibiliter, ex defectu sufficientis densitatis quæ in eo reperiri non potest. Vel certè, *transseat*, quanvis frigesieri non possit, quæ est propria ipsius natura; non inde sequitur inter calidum alterius naturæ, & frigidum non reperiri reactionem. Neque *ignis* hoc loco supponitur nisi ad exemplum *calidi*, abstrahendo à rei veritate.

*Inst. 1.* Si datur reactio inter contrarias qualitates, agens univocum non poterit unquam sibi assimilare passum. *R.* Non assimilabit perfectè, nisi ubi fuerit actio cum victoriâ.

*Inst. 2.* Consule tabulam in fine hujus libri affixam; fiatque hypothesis juxta primam & secundam figuram primi quadranguli. Nempe sit calidum *B.* primæ fig. & frigidum *A.* quod quidem frigidum non reagat nisi in partem *d* dicti calidi, quæ idcirco vocatur *pars repassa*. Pars autem *c* vocabitur *pars non repassa*; totum agens *b* dicitur *agens principale*; quomodo ex opposito frigidum *a* vocatur *passum principale*. His autem suppositis, sic argumentor. Si datur reactio, sequetur idem secundum idem moveri motibus per se contrariis; seu gradum eundem frigoris producti in parte repassâ simul fieri & corrumpi; sicque esse simul & non esse; quod implicat. *Prob. sequela antecedentis.* Quia quo tempore producetur à passo principali, simul debet corrumpi à parte non repassâ; quæ nimirum sufficientem ad id potentiam habeat, sitque illi sufficienter applicata; immodò cùm totum

G 2

agens

agens principale *b* agat in passum *a* ; necesse est ut pars *c* tunc agat in partem *d*, ne dicatur actio illius fieri in distans sine medio. Istud fuit argumentum Ioannis Suisseti , qui eam ob causam cognominatus est *calculator*. R. 1. Partem non repassam simul quidem agere cum parte repassâ, & facere cum eâ unum agens totale ; neque idcirco necesse est , ut in illam agat, quemadmodum supra docui sub finem capitis 3. Item , R. 2. Primum illum gradum frigoris productum in parte repassâ , non posse destrui à parte non repassâ , quandiu conservabitur à passo reagente ; sic enim conservatur per vim activam excedentem pluribus gradibus ; nec posset expelli , nisi ad productionem octavi gradus caloris , qui non potest introduci, nisi per virtutem adæquatam ; uti colligere est ex doctrinâ capitis superioris. Non ergo destruetur ille gradus, nisi remoto , vel prorsus debellato passo principali reagente.

*Inst.* 3. In illâ hypothese, saltem aër intermedius moveretur motibus per se contrariis, simul calorem recipiendo ab agente principali, tum simul frigus à passo reagente. R. Aër intermedius, quatenus habens calorem sufficientem, faceret unum agens totale cum agente principali; tum aliunde quatenus frigidus, faceret agens totale cum passo reagente ; vel saltem faceret unum totale passum cum ipso passo principali.



DISPUTATIO VI.

De Producibilitate Rerum.

GAP. I. *An effectus idem sit producibilis totaliter ab agentibus diversis ejusdem ordinis.*

**S**uppono idem à seipso, secundum se totum primò produci non posse. Nam sequeretur idem seipso esse simpliciter prius, & simul posterius; siquidem causa est prior effectu. Dixi, produci secundum se totum; nam animal, aut planta, dum ex intus suscepto alimento nutritur, videtur sic à se accipere esse secundum aliquid sui. Dixi, primò produci; ut abstraham ab eâ quæstione, an res aliqua saltem supernaturaliter seipsam possit reproducere.

Suppono 2. Rem eandem posse causari totaliter à pluribus simul causis generis diversi. Quia de facto rana simul totaliter causatur à materiâ, in genere causæ materialis; à formâ, in genere causæ formalis; à sole & ranâ sui productivâ, in genere causæ efficientis, &c. Nam singulæ illæ causæ in suo genere sufficiunt. Habes autem ex Disp. 1. c. 3. *quid sit causa totalis.*

Suppono 3. Effectum eundem posse totaliter pendere, seu produci ab agentibus diversis, ordinis diversi. Sic enim rana totaliter producitur ab aliâ ranâ, tanquam à causâ particulari; tum simul à sole & à Deo, tanquam à causis universalibus. Sic idem totaliter effectus est à causâ instrumentali, tum simul à principali, tanquam à diversis totalibus causis in suo ordine. Item,

Suppono 4. Effectum eundem posse indivisibiliter totum simul produci à diversis agentibus,

tibus, etiam ejusdem ordinis partialiter concurrentibus, & simul conflantibus eandem causam totalem. Sic enim lumen idem à diversis candelis simul positis; aut calor idem à diversis carbonibus simul conjunctis, efficienter procedit. Item,

*Suppono* 5. Agentia naturalia etiam particularia continere in suâ virtute activâ possibiles effectus plures, & plures sine termino, & in infinitum. Ita enim sol per totam æternitatem produceret semper nova lumina. Intellectus idem novas semper cogitationes; ignis idem novos ignes, &c. Quanquam non inde sequeretur idcirco possibiles v. g. intellectiones omnes ab eodem intellectu produci posse: quomodo per proportionem quantitas hæc pedalis non continet partes quantitatis omnes possibiles, licet contineat possibiles in infinitum, ut sequenti tractatu explicabitur. At nihilominus

*Dico* I. Causa univoca continet in suâ virtute activâ possibiles effectus omnes ejusdem secum rationis; &, quantum est de se, potest illos producere; unde consequenter ignis *A.* potest producere ignes producibiles ab igne *B.* & sic de aliis. Prob. Quia nihil impedit quominus id fiat; ut patebit ex solutione objectionum. Confir. Quia ignis *A.* potest concurrere cum igne *B.* ad productionem ignis, aut caloris *C.* Ergo sic eosdem effectus in suâ virtute activâ continent. Item calor *C.* productus totaliter ab igne *A.* potest directè & immediatè conservari ab igne *B.* quod est in ipsum jugiter influere idem esse: ut habetur in Disput. 3. cap. 2. Ergo illum effectivè in suâ virtute activâ continet. Certè potest saltem supernaturaliter assumi à Deo ad productionem ejusdem effectus; ergo illum  
vir-

virtualiter in se continet, nihil enim dat quod non habet. Item, ex doctrinâ *de continuo*, cum idem ignis sit divisibilis in infinitum in varios ignes, sequeretur in quolibet igne, secundum diversas ipsius partes, contineri series effectuum diversorum ejusdem rationis diversas in infinitum; quod per se absurdum est. Iam verò consequenter

*Dico I I.* Contra Thomistas. Idem effectus à diversis causis ejusdem generis, & ordinis dependere potest totaliter, seu totaliter produci viâ supernaturali. Prob. Quia nihil repugnat; siquidem effectus productus v. g. ab igne *A*, continetur idem, & sub eadem perfectione in igne *B*. Ergo sic potest produci ab iis, sive ponantur divisim, sive conjunctim.

*Notandumque* est, hîc sermonem esse maximè de causis univocis, quæ quidem, cum ex naturâ suâ tales sint, ut sese mutuo juvent ad agendum, debent aliæ aliarum effectus in suâ virtute activâ continere. At

*Dico I I I.* Si duæ causæ ejusmodi ponantur conjunctim, non possunt viâ naturali singulæ totaliter influere in eundem effectum. Prob. Quia duo ignes simul positi, naturaliter jungunt vires suas, ut faciant unam causam totalem, eamque fortiolem respectu caloris quem attingunt. Is enim cum tantâ intensiōe, & in eâ distantia, ab alterutro igne solo non produceretur. Conf. Quod alioquin ex illis causis alterutra vel nihil ageret, vel certè actum ageret; nempe totum effectum eundem sub eadem perfectione productum ab alterâ causâ, iterum produceret; quod frustra esset, nec debet admitti, ut infra mox adhuc ostendam.

.. *Objic.* Duo fines simul movere totaliter singuli

guli possunt ad aliquid agendum. Vt si quis velit ire Romam, tum visendæ urbis, tum peragendi alicujus negotii gratiâ ; ita ut alterutra ex illis rebus esset causa sufficiens. Ergo à pari de causâ efficiente. *Rz. N. parit.* Nam illi fines movent tantum pro nostro libito. Item *Rz. 2.* Simul sumptos fines illos, alio modo movere quam divisim. Ergo sic uniuntur ad faciendam causam unam totalem, seu finem unum totalem.

*Notabis* verò hoc loco, quod etsi agentia ejusdem rationis simul posita, de se vires suas naturaliter jungant ad faciendum unum agens totale ; posse tamen hoc impediri per specialem Dei concursum simultaneum, quo singula ex iis agentibus determinantur ad eundem effectum totaliter producendum, juxta secundam assertionem.

*Dico* autem IV. Nec positæ etiam divisim illæ causæ, naturaliter eundem effectum attingerent, ita ut qui jam productus est ab unâ causâ naturali, idem iterum ab aliâ causâ naturali, vel alio in loco, vel alio in tempore, naturaliter producat. *Prob.* Quia licet absolute eundem effectum contineat in suâ virtute activâ, quatenus tamen subest determinationi Divinæ, reproducere illum non potest. Supponimus enim ex *Disput. 3. cap. 5.* causam omnem creatam sic dependere à primâ, ut effectum hunc numero attingere nequeat, nisi per illius liberam determinationem. At Deus pro suo libero decreto, ad majorem universi perfectionem, & ad suam bonitatem magis communicandam, nunquam determinat causas creatas ad eisdem numero effectus ; patetque experienciâ : nunquam enim videntur iidem canes, iidem equi, &c. Item, sequeretur inde posse naturaliter eundem numero effe-

effectum reproduci. Quod quidem c. 3. ostendam iterum fieri non posse.

C A P. I I. *Solvuntur Objectiones.*

**O***Bjic. 1.* Quemadmodum iidem specie effectus non procedunt nisi à diversis specie causis, ut equus ab equo, canis à cane, &c. Ita iidem numero effectus non possunt esse nisi ab eâdem numero causâ. Quod est contra primam assertionem. *Rz. N. paritatem*; quia nullus effectus ex suâ differentiâ individuali exigit produci ab hac tantum, aut ab illâ numero causâ, siquidem etiam in omni sententiâ, qui effectus producitur ab illo igne, idem produci potest à Deo, aut ab aliâ causâ universali.

*Notandumque* est consequenter actiones activas totales, & realiter distinctas plures simul posse ad eundem numero effectum terminari.

*Inst. 1.* Sequeretur ignem hunc qui possibiles omnes alios ignes in suâ virtute activâ contineat, esse virtutis infinitæ. *N. Conf.* Illa enim solum est virtus infinita quæ continet effectus possibiles se superantes in perfectione essentiali in infinitum versus maximum; quod Divinæ omnipotentia duntaxat convenit.

*Inst. 2.* Effectus productus ab unâ causâ, per accidens duntaxat ab illâ dependeret; nec Petrus diceretur filius Pauli, nisi per accidens, nam perinde potuisset esse filius Ioannis; cum tamen sit à causâ per se, & non tantum per accidens. *Rz.* Eo sensu dici à causâ per se, quod illa per propriam virtutem agat. At nihilominus effectus creatus rectè dicitur per accidens tantum pendere à causâ creatâ, cum essentialiter à Deo duntaxat dependeat, quatenus non potest non esse dependenter à Deo. Item, potest esse à Deo

solo, illique est per accidens quod sit potius à tali causâ creatâ, quàm ab aliâ; nam illud pendet tantùm à determinatione Divinâ, ut suprà dixi.

*Inst. 3.* Color unus species visibiles ab alio simili colore producibiles non continet, nec species visibilis hujus numero coloris est ab ipso per accidens; alioquin non esset potius repræsentativa hujus, quàm alterius; cùm tamen color sit de genere illorum agentium, quæ mutud sese juvant; sic enim plura visibilia ejusdem rationis fortius movent potentiam visivam. *Rz.* Speciem visibilem habere ex modo essendi sibi proprio, quod sit potius repræsentativa hujus coloris quàm alterius; etsi perinde ab alio produci posset. Suppono autem ea quæ jam toties dixi de modo essendi, ex Metaph.

*Inst. 4.* Idem posset seipsum reproducere, saltem supernaturaliter, siquidem continet in suâ virtute activâ effectus omnes possibiles ejusdem secum speciei. Atqui falsum consequens. Nam debet esse distinctio producentis & producti, inter quæ etiam est relatio. Et verò, quomodo alioquin in Divinis Pater producat Filium, diceretur producere aliam à se personam? *Rz.* De fide est, in Deo tres de facto esse personas distinctas, non eandem reproductam. *Rz. 2.* Sequeretur solum assertionem à nobis positam non valere, nisi positâ illâ conditione, ubi nimirum potest esse distinctio producentis & producti. At nihilominus sic posset præterea esse causa sui ipsius mediata saltem, quatenus posset ignis *A* reproduci ab igne *B*, quem ignis *A* jam produxisset. Item, tam posset illud præstare immediate, quàm mediata. Quanquam

*Notabis,* quod ignis *A* non posset seipsum reproducere, nisi suppositâ materiæ propriæ reproductione

ductione per creationem à Deo , in eâ sententiâ quæ docet creaturam nequidem instrumentaliter creare posse ; & sic ignis ille *A* non posset adæquatè saltem seipsum reproducere.

*Objicies* consequenter 2. Contra secundam assertionem de effectu qui supernaturaliter procederet à duabus simul causis totalibus. Sequeretur inde simul non esse causas totales ; quia causa totalis excludit consortium alterius ; atqui quando supponuntur duæ causæ , conjunctim saltem , influere simul totaliter in eundem effectum , una non excludit consortium alterius ; & sic definit esse causa totalis. *R.* Non definit esse causa totalis ex eo præcisè quòd agat conjunctim cum aliâ ; sed tantùm ex eo quòd cum aliâ conjungat vires suas ad agendum perfectiori modo.

*Inst.* 1. Sequeretur effectum pendere totaliter ab unâ ex illis causis , & simul non totaliter , quia penderet quoque ab aliâ , & quidem per se. *R.* sic per se , & multoties totaliter penderet.

*Inst.* 2. Non possunt esse plures causæ formales totales ejusdem corporis naturalis constitutivæ. *C.* Ergo nec plures totaliter effectivæ. *N. parit.* Nam & de facto sunt plures totales effectivæ ordinis diversi , nec destruunt unitatem effectus ; quo pacto plures formæ substantiales destruunt unitatem essentiae & corporis naturalis ejusdem.

*Inst.* 3. Sequeretur in iis causis esse virtutem eandem productivam ; quia unum & eundem formalem terminum haberent. *N. sequelam istam ;* sunt enim duæ numero virtutes , ob multipliciter subjectorum , quæ tamen virtutes sunt ad eundem terminum.

*Inst.* 4. Sic idem effectus productus ab unâ cau-

causâ , reproduceretur ab aliâ , sicque ageretur actum. *C. Totum.* Atqui repugnat rein eandem ita reproduci. N.

### CAP. III. De Reproductione.

**P***latonis* error fuit, quemadmodum legere est apud D. Aug. *lib. 12. De Civit. Dei c. 13.* peracto magno anno , quem circiter quadraginta annorum nostrorum millibus definiebat, syderibus omnibus eundem inter se ordinem ac situm retinentibus , redituras easdem omnino rerum omnium generationes , eundemque rerum omnium statum. Sed hæc nullo nituntur rationis fundamento , suntque fidei Christianæ contraria ; quare veritatem nullam habere possunt.

Quæstio solùm est , an res eadem jam producta ; quæ tamen esse desit, fuitque etiam annihilata prorsus ; item , an res nondum corrupta, adhucque existens, possit iterum reproduci.

Certumque est ex præcedenti doctrinâ , satisque probatur ipsâ experientiâ , res easdem quæ productæ sunt , iterum simul viâ naturali de facto non reproduci ; neque etiam , ut loquitur Aristot. à privatione regressum fieri ad habitum ; ubi sermo est de privatione quæ potentiam excludit simul cum actu ; quemadmodum habetur in *Logicâ Disput. 2. cap. 6.* Quomodo res mortua , sibi nunquam per vires naturæ restituitur. Quod enim ajunt de Pelicano pullos suos revocante ad vitam , proprio sanguine illos aspergendo, fabula est ; quanvis illo exemplo utantur SS. PP. in mysteriis fidei explicandis ; aut si reviviscunt (quod de Phœnice pariter loquuntur Poëtæ ) non iidem numero reviviscunt. At

*Dico I.* Res corrupta , putà mortuus homo, potest



potest idem numero Divinâ virtute reproduci & resurgere. Prob. Quia nihil implicat; sicque est de fide mortuorum resurrectio.

*Notabis* tamen in ejusmodi corruptione rerum naturalium, remanere semper materiam primam, nec in morte hominis desinere aut materiam, aut animam, quæ immortalis est, sed tantum existere separatim à corpore. Quod si tum corpus, tum anima illa, inquit Durandus & Tostatus *in cap. 2. Matth. q. 238.* penitus annihilaretur, reproduci eadem numero non posset. At

*Dico* I I. Hæc Durandi & Tostati sententia vulgò censetur erronea contra fidem. Neque verò implicat ullam contradictionem, si res annihilata reproducatur; quandoquidem non est de illius essentiâ, ut semel tantum existat; quo pacto per proportionem non est de illius essentiâ, ut in uno tantum loco existat, & non in variis simul; quod Christiana fides docet de Christi corpore in Eucharistiâ. Item, sic habet D. August. *Serm. 19. de Verbis Apost.* Si in nihilum rediremus, facere posset Deus ut essemus; sicut fecit nos esse, cum antea non essemus; non enim alterum altero est difficilius. Præterea verò, contra Thomistas,

*Dico* I I I. Res quoque nondum corrupta, & adhuc existens potest Divinâ virtute reproduci. Probatum eadem ratione, quâ præcedens assertio; quia nihil repugnat; nec difficilius est Deo reproducere quod jam fuit, aut actu existit, quam illud quod nunquam fuit. Item, sic rectè solùm explicari potest quemadmodum de facto Christi Domini humanitas fiat verè & substantialiter præsens tum in cœlo, tum aded multiplici in loco sub speciebus Eucharisticis.

*Objic.* Quod jam existit, non est ampliùs in potentiâ ad *esse*: Ergo nec ampliùs producibile: ergo produci, aut reproduci non potest. *Dist. Ant.* Quod jam existit, non est ampliùs in potentiâ naturali ad *esse*, nec potest naturaliter reproduci. C. Non est in potentiâ obedientiali ad *esse* iterum, seu non habet reproducibilitatem obedientialem. N.

*Inst.* 1. Quod producit, aut reproducitur, transit de *non esse* sui ad *esse* sui: atqui hoc non potest convenire illi rei quæ jam est existens, ut transeat de *non esse* sui ad *esse* sui; quia non habet *non esse* sui: ergo non potest illi convenire ut reproducatur. R. Non habet *esse* sui reproductum, quanvis habeat simpliciter *esse* sui jam productum.

*Inst.* 2. Non posset assignari ullus terminus novæ reproductionis, per quam idem v. g. Petrus iterum existeret: quia ex parte Petri nulla esset realitas de novo producta. R. Vt primæ productionis terminus est Petrus in rerum naturâ de novo existens; sic iteratæ productionis terminus est idem Petrus, ut iterum de novo existens; qui proinde hoc pacto fit multiplex virtualiter, & multis æquivalens; ut dicitur, ubi de corpore eodem in multis locis replicato.

*Inst.* 3. Petrus bis existens non esset idem Petrus. Ergo sic esset idem, & simul non idem. *Prob. Ant.* Quia quod est bis existens, est consequenter multiplicatum, & multa. Ergo non est idem. Et verò quod bis numeratur, non est nisi multiplex. R. Ad id sufficit virtualis multiplicitas; idemque omnino dicendum est de corpore Christi Domini in Eucharistiâ replicato.

*Inst.* 4. Idem simul esse posset præteritum,

&c

& præsens ; quod repugnat ; nam præteritum non potest non esse præteritum : ergo non potest esse præsens. R2. Idem potest simul esse præsens , & præteritum diverso respectu , & ratione iteratæ productionis ; quo pacto etiam diximus fieri virtualiter multiplex.

*Inst.* 5. Illa rei producibilitas , aut potentia obedientialis, vel esset finita, vel infinita. Neutrum dici potest. Non enim est infinita ; quia sequitur ad esse creatum : nec finita , quia tam nullies & in infinitum reproduci à Deo posset , quàm semel. R2. Non esse infinitam absolute : sed tantum respectivè ad omnipotentiam Divinam , cujus viribus reproduci in infinitum potest.

*Notandum* verò est, ex rebus producibilibus, alias esse permanentes , quæ videlicet habent suum esse totum simul ; alias autem successivas , quæ videlicet non habent esse suum , nisi per partes post partes ; cujusmodi sunt motus & tempus ; quæ propriam etiam producibilitatem non habent ; siquidem , ut suppono , propriam non habent entitatem. Item

*Not.* 2. Ad unitatem numericam motus requiri unitatem temporis ; qui enim motus fit diversis temporibus , ille necessariò est multiplex. Quomodo & unitas numerica temporis , ut suppono , petitur à tali virtuali parte Divinæ æternitatis, aut temporis imaginarii cui responderet. Quare his suppositis ,

*Dico* I V. Motus idem numero qui præterit, reproduci non potest. Probatur Quia eidem tempori amplius respondere non potest ; cum etiam idem numero tempus redire amplius nequeat ; quia non potest respondere iisdem partibus virtualibus æternitatis Divinæ ; aut  
- tem-

temporis imaginarii ; quod supponitur redire non posse.

C A P. IV. *An ab eâdem causâ possint esse contrarii effectus.*

**C**ertum est materiam primam in suo genere, naturaliter fieri causam diversorum corporum naturalium, diversas formas substantiales in se successivè recipiendo. At forma nulla sive substantialis, sive accidentalis naturaliter transire potest de subiecto ad subiectum ; aut de novo subiectum aliquod, saltem totale informare ; quia per suum essendi actum determinatur semper ad hoc numero subiectum, dixi *totale saltem* ; sic enim anima novas subinde partes materiæ, quæ per nutritionem aggenerantur, de novo informat. Item, hoc habet omnis forma, ut non possit diversos effectus formales communicare suo subiecto ; sic enim albedo non potest facere nisi album. At certum est 2. Finem eundem posse fieri causam contrariorum effectuum. Nam propter sanitatem potest quis vel deambulare, vel quiescere. Quod autem spectat ad causam efficientem,

*Dico I.* Causa libera potest exercere contrarias operationes circa idem objectum, saltem successivè ; potest enim ex diversis motivis rem eandem tum amare, tum odisse.

*Dico II.* Causa naturalis universalis, ut sol, contrarios effectus naturales producit, pro diversâ dispositione subiecti. Ita enim indurat lutum, & emollit ceram.

*Dico III.* Causa omnis per se alicujus effectus, potest per accidens esse causa contrarii. Sic ignis ut absens dicitur esse causa congelationis. Sic balnea calida, per accidens dicuntur refrigerare

gerare sanguineum, poros corporis resolvendo, unde spiritus interni diffuant. Secùs autem contingit ex balneis frigidis.

*Dico I V.* Causa naturalis necessaria & particularis, agens ex eodem principio, tum ex eodem fine, respectu ejusdem aut similis materiæ eodem modo dispositæ, non potest esse causa contrariorum effectuum. Prob. Quia sic idem manens idem, semper facit idem.

## DISPUTATIO VII.

### DE CAUSA FINALI.

#### CAP. I. *Natura cause finalis.*

**D***ico I.* Causa finalis seu finis, est id cujus gratiâ aliquid vel est, vel fit. Aut si lubet, est id propter quod agens operatur. Hæc enim sunt de ratione *finis*, tum ut propter se appetatur, tum ut alia appetantur & fiant propter ipsum.

Quæ autem sunt finis aliæ proprietates, & divisiones, illæ jam traditæ sunt in Morali.

*Dico II.* Finis est vera & realis causa. Ita Arist. enumerat quatuor genera causarum realium & physicarum, inter quas est finis. Nam verè & propriè illud est causa, à quo positivè dependet effectus: sic autem *finis* causa est cur fiat effectus. Quâ ratione paratur medicina, ut obtineatur sanitas; disponitur materia ut fiat compositum naturale, &c. Quod quidem compositum naturale generatur etiam à naturâ, tum propter bonum universi, tum propter alia quædam particularia bona inferenda, pro intentione authoris naturæ.

*Obje.*

*Objic.* Est de ratione causæ realis, ut sit principium influens esse in aliud. Atqui *finis* non est principium; nam *finis* & principium opponuntur, siquidem principium est quid primum, *finis* autem est terminus & quid ultimum. R. *Finem* ordine executionis esse quidem ultimum; quo pacto v. g. sanitas per deambulationem acquirenda non existit, nisi factâ deambulatione. At in intentione est quid primum, neque enim sic agens operatur, nisi ex amore *finis* obtinendi; quamobrem ab hujusmodi fine incipit motus omnis, ut in eo tandem quies habeatur.

*Inst. 1.* Quod non existit à parte rei, non potest dici principium influens esse in aliud. Atqui *finis* non existit à parte rei, quando movet causam efficientem ad agendum; ergo. *Dist. Ma.* Quod non existit neque in se, neque in alio. C. At *finis* causans existit saltem intentionaliter in mente seu cognitione operantis propter finem, unde alliciat voluntatem ad sui prosecutionem. Istudque est proprium causæ finalis, ut hoc solummodo existens causare actu possit.

*Inst. 2.* Solet esse relatio in causa ad effectum. Atqui *finis* dum causat, non existit; nec proinde potest referri ad effectum. R. Non est de ratione causæ cujusunque ut referatur ad effectum; quod in *Metaph. De Relatione* ostenditur de primâ causâ, & de fine ultimo; cujus proprium est ut aliorum ad se relationes terminet, non autem ut referatur, seu ordinetur ad aliud, nisi extrinsecè, & secundum rationem: puta quando quis per amorem concupiscentiæ ordinat Deum ad se, tanquam proprium sibi bonum.

*Notandumque* est, finem esse primam causarum in ordine intentionis, quia causa efficiens non agit

agit nisi propter finem obtinendum, & ab eo mota. Quamquam

*Not. 2.* Finem sumi non tantum *ut obtinendum*, sed etiam *ut obtentum*; quo in casu est obiectum gaudii & fruitionis; alioquin ut obtinendus, est obiectum desiderii, &c. Item

*Not. 3.* Eundem dici ultimum *in ordine executionis*, qui primus est *intentione*, ut satis patet ex dictis. At

*Dico I I I.* Effectus causæ finalis sunt: Primò, movere causam efficientem ad prosecutionem sui. Item, causare executionem mediorum, ut ipse finis obtineatur. Quamobrem finis causat media, ipsaque media causant mutuo finem, sed in genere diverso: ut quando sanitas obtinenda movet ad parandam medicinam, quæ in genere causæ efficientis causat ipsam sanitatem. Item, finis officium est terminare tandem & sistere motum appetitus, ipsum satiando, unde & appellatur *finis*.

**C A P. I I.** *Quomodo finis moveat ad agendum.*

**S**uppono 1. Quod observavi in morali; ex agentibus propter finem alia esse cognitione prædita; alia autem non cognoscitiva. Item, ex illis alia finem intendere, quod est ex cognitione sese ad illius prosecutionem liberè determinare; alia autem ad finem non tendunt, nisi cum prædeterminatione ad unum; ut agentia naturalia. At

*Suppono 2.* Rationem finis constitutivam in ratione causæ finalis esse *bonitatem*; quia bonitas sola est illud quod movet appetitum ad sui desiderium & prosecutionem. Illa autem bonitas non movet, nisi cognita; nam *ignoti nulla cupido*. Quare bonitas finis ad hoc ut moveat cau-

causam efficientem, debet in eâ priùs existere *secundùm esse intentionale*, ut ajunt; id est, ratione cognitionis per quam repræsentetur ut amanda. Notandumque est consequenter bonitatem illam considerari, tum secundùm *esse reale*, nempe secundùm illud esse quod habet reipsâ; tum secundùm *esse intentionale*, id est, secundùm *esse cognitum* quod habet in causâ ipsius prosecutivâ. Item,

*Suppono* 3. Distinguendum esse hoc loco duplex genus motionis; altera enim est *physica*, & propriè dicta, ubi scilicet imprimatur vel motus localis, vel qualitas activa; quâ ratione dicimus instrumentum moveri à causâ principali. Altera verò huc spectans, est duntaxat *metaphorica*, quæ consistit in amore & desiderio quo res appetibilis voluntatem ad se allicit. Atque his suppositis,

*Dico* I. Ratio constitutiva *finis* in actu primo ad finalizandum, est bonitas secundùm esse reale: vel si lubet, bonitas finis non causat, aut movet, nisi secundùm esse reale. Prob. Quia finis non causat nisi secundùm illud esse quod agens obtinere intendit, quomodo v. g. ægrotus sumendo medicinam, solam intendit sanitatem, non autem ipsius duntaxat sanitatis *esse intentionale*, seu *esse* per cognitionem apprehensum.

*Dico* enim II. Apprehensio finis in eo casu, est tantùm conditio requisita ad hoc ut bonitas finis moveat voluntatem; siquidem, ut ajebam, *ignoti nulla cupido*. Quare

*Notabis*, posse quidem voluntatem moveri à bonitate finis, tam secundùm *esse* ipsius reale, quàm intentionale; sed diverso sensu accipiendum illud est. Quia nimirum à bonitate movetur



vetur formaliter secundum *esse* ipsius reale ; verum ab ipsâ secundum *esse* intentionale non movetur , nisi quatenus illud *esse* intentionale seu apprehensum , est conditio per quam voluntati applicetur bonitas objecti.

*Objic.* Si bonitas finis causat secundum *esse* suum reale ; sequetur finem *esse* causam & effectum sui ipsius secundum entitatem suam realem. *Dist.* Sub eodem respectu. N. Sub diverso. C. Sic enim sanitas movet ægrotum ad sumendam medicinam , quæ sanitatem ipsam efficienter attingat.

*Inst.* 1. Dum finis causat , nullum habet *esse* , nisi intentionale , neque enim sanitas quam intendit æger sumendo medicinam , alio modo existit quàm in illius mente. Ergo finis ille tunc non causat , nisi secundum *esse* intentionale , seu secundum *esse* cognitum quod habet in mente agentis. Nihil enim causat , nisi secundum illud *esse* quod habet quando causat. R. Finem dum causat , habere *esse* objectivum , quod est reale saltem potentiâ ; & secundum illud dici causam actu. In quo differt ab aliis causarum generibus , quæ ad causandum requirunt actualem existentiam secundum *esse* suum reale.

*Inst.* 2. Sæpe illud quod impossibile est , nihilominus movet voluntatem actu , ut quando quis desiderat montes aureos , &c. Ergo ad rationem finis non requiritur ut moveat secundum *esse* reale , sed tantum secundum *esse* intentionale. R. In eo tamen casu movet etiam bonitas secundum *esse* reale , quod tale saltem existimetur. Quanquam ubi falsò per cognitionem repræsentatur , tunc dicitur *esse* desiderium boni solum apparentis.

*Inst.* 3. Ratio formalis per quam finis exercet

cet propriam causalitatem seu finalizationem, illa est quæ actum voluntatis circa finem specificat. C. Atqui specificatur actus voluntatis circa finem diverso modo, prout variis modis repræsentatur apprehenditurque; sic enim finis aliquis per se honestus, ubi apprehenditur tanquam turpis, facit ut actus circa illum sit turpis. Ita bonum, quando repræsentatur vel ut præsens, vel ut absens, causat actum vel amoris, vel desiderii, &c. Ergo esse repræsentativum est ratio formalis per quam finis exercet suam causalitatem, &c. R. Diversitatem illam specificam non oriri nisi ab objecto tanquam à ratione formali: quanquam dicatur quoque oriri à diversâ cognitione ipsius repræsentativâ, tanquam à conditione objectum ipsum diverso modo applicante & repræsentante.

*Notabis* verò 1. Instinctum naturalem in quibuscunque viventibus, aliud nihil esse, quam istiusmodi *esse cognitum*, seu cognitionem boni convenientis, cum inclinatione ac determinatione appetitus ad ipsum prosequendum; ubi agitur de fine prosecutionis. Alioquin ubi res tanquam disconveniens repræsentatur, fit fuga; tamque est naturaliter determinatus appetitus ad fugam mali, quàm ad prosecutionem boni.

*Notandumque* est 2. Brutas animantes non operari nisi ex instinctu. Sicque ex naturali instinctu hirundines eodem modo ædificant nidos; eodem modo ab apibus construuntur favi, & mella in iis congeruntur, &c. Sed

*Not.* 3. Minus perfectum esse operari ex instinctu, quàm ex ratione & libertate; licet *per accidens* interdum aberret ratio & libertas. Prob. Quia modus operandi naturæ intelligentis proprius, debet ex naturâ rei esse perfectior quàm

quàm ille qui brutis animantibus conuenit. Et verò etiam de se perfectiùs est agere ex cognitione circumstantiarum, & cum dominio in suas operationes, quàm ex solâ necessitate & cognitione imperfectâ.

*Notabis* autem, Brutas animantes quæ solùm agunt ex instinctu; tum res etiam inanimatas quæ cognitione sunt destitutæ, nec tendunt ad finem, nisi per qualitates naturaliter insitas, agere nihilominus propter finem cognitum, & liberè intentum, saltem ab alio, nempe à Deo, sub cuius directione agunt. Quamobrem hoc pacto vulgè ajunt, *opus natura esse opus intelligentia*, nec agere causas naturales, nisi motas à Deo, in ordine ad gloriam ipsius, quemadmodum explicui in Philosophia morali.

## PHYSICÆ VNIVERSALIS

## P A R S S E C V N D A.

## TRACTATVS VNICVS

## De proprietatibus corporis naturalis.

## P R Æ F A T I O.

**P**Ræter intrinseca seu essentialia principia, tum præter extrinseca, suas habet proprietates diversas corpus naturale.

Ac primo quidem in eo est quantitas, unde reddatur formaliter extensum per partes ab invicem separabiles, &c. Item, circa illud considerari solet finitudo, locus conaturalis, motus & duratio. Sed illarum omnium proprietatum per se notissima, & maximè intrinseca est Quantitas; cuius naturam ut certâ methodo investigem;

Suppono I. Quantitatem hic sumi pro extensione oppositâ indivisibili, quod videlicet, ex definitione Mathematicorum, nullam habeat extensionem in longum, latum, aut profundum.

Alia autem est extensio formalis, alia virtualis. Formalis extensio dicitur, qua propria est rerum corporearum, seu per quam ad diversas loci partes extenduntur divisibiliter secundum diversas sui partes, easque impenetrabiles, & ab invicem separabiles. Atque huiusmodi quidem extensionem vulgo appellant quantitatem molis, seu extensionem quantitativam; cum illius partes similiter vocant formales, & quantitativas. Contrâ vero extensio virtualis, cuiusmodi reperitur in substantiis spiritualibus, ut in Angelo, est ea per quam toti spatio, singulisque ipsius partibus totus v. g. ipse Angelus indivisibiliter coëxistit; id est, totus in toto, & totus in qualibet parte. Esi enim Angelus partes non habet, ea tamen vis ejus est, ut secundum substantiam singuli totius spatii partibus coëxistat, seu correspondeat. Quam ob causam dicuntur in illâ extensione esse partes virtualiter, propter æquivalentiam cum partibus quantitativis, ad coexistendum cum spatio. Quamquam illa partes virtuales non existunt actu, nec complentur in ratione partium ejusmodi

vir-

virtualium, nisi per actualem coëxistentiam quam habent cum variis spatii partibus. Item,

Suppono 2. Ex Metaphysica Tract. 1. Disp. 8. c. 3. Vbi de Categoria Quantitatis. Suppono, inquam, Quantitatem in communi vulgò illud dici, quod est divisibile in partes; continetque sub se tanquam species quassdam, tum Quantitatem continuam, tum discretam.

Continua est, inquit Arist. qua habet partes communi termino copulatas: id est, cujus partes ad invicem ita coherant, ut omnes eundem terminum, seu extremum idem habeant; quemadmodum postea secundum nostram sententiam interpretabimur. Vel si lubet, Quantitas continua est, cujus extrema sunt idem. Quo pacto v. g. baculus dicitur aliquod continuum, quia ejus extrema sunt idem lignum, non quidem indivisibiliter, sed divisibiliter & continuative; nec faciunt plura ligna actu distincta. Contra autem, quantitas discreta partes habet actu ab invicem sub proprii terminu distinctas; ut numerus; cujus naturam jam prosecutus sum in Metaphysicâ, loco citato. At

Not. I. Omnem illam quantitatem esse vel permanentem, vel successivam. Successiva est, cujus partes nulla simul coëxistunt, sed tantum alia post aliam, ut in motu, & in tempore; qua sunt species quantitatu continua successiva; nam alioquin oratio, est: quantitas successiva discreta.

Quantitas continua permanens ea dicitur, cujus partes sunt simul. Vt enim in tempore prima hora non existit simul cum secunda, ideoque vocatur quantitas successiva; ita ex opposito lignum v. g. dicitur habere quantitatem permanentem, quia partes ejus simul eodem tempore coëxistunt.

Notabis autem 2. Eam esse quantitatem verum corporum propriam, loci repletivam cum exclusionem corporis ab eodem loco; per quam etiam sunt mensurabiles, habentque divisibilitatem in partes ab invicem separabiles, cum extensione in longum, latum, & profundum, qua est trina corporis cujuscunque naturalis dimensio; quam vulgò appellant Quantitatem molis.

Notandumque est consequenter, Quantitatem hanc dividi in tres species. Prima est linea, qua definitur extensio in longum duntaxat. Secunda est superficies, seu extensio in longum simul & in latum. Tertia est corpus,

Physica Univerſ.

H

tri-

trinam complectens dimensionem; est enim extensio in longum, latum, simul & profundum. Quo loco animadvertes, corpus sumi non tantum pro substantiâ corporeâ, aut pro parte materiali animalis, ut quando dividimus hominem in corpus & animam, sed etiam pro hac tertiâ specie quantitati, qua nimirum est aliqua entitas accidentalis. Item

Not. 3. Tres illas species Quantitativæ esse distinctas inter se, s. item formaliter: Quia diversas habent definitiones. Non autem distinguuntur realiter; quia frustra foret illa realis distinctio, nec probari ullâ ratione potest. Est enim species distincta qua idem genus participant, habeant saepe realem inter se distinctionem, puta species arborum, aut animalium; illud tamen verum est tantum de iis qua propriam habent entitatem; at linea v. g. aut superficies, non est ens propriâ entitate, sed eâ duntaxat entitate qua communis est corpori, &c. Nec definitio unius ex illis speciebus quantitatis, ingreditur definitionem alterius formaliter, sed tantum materialiter; ut cum dicimus, superficies est extensio in longum & latum, &c.

Ac disputatio quidem solum est hoc loco de hoc genere Quantitatis, per quam scilicet corpus naturale denominatur aut Quantum, aut Continuum.

DISPUTATIO I.

De Quantitate propria Corporis naturalis.

CAP. I. *Distinctio, & Subjectum huius Quantitatis.*

**D**ico I. *Quantitas corporea, seu quantitas molis, est entitas accidentaliter distincta à substantiâ. Sic Arist. 1. Phys. ubi contra Parmenidem & Melissum, qui volebant omnia esse unum ens; ostendit substantiam & quantitatem esse saltem duos entia. Dicamque postea, quemadmodum in rarefactione producat de novo, saltem extensio localis aliqua realiter distincta. Probatur assertio, ex doctrinâ Fidei, de V. Eucharistiæ Sacramento. In eo enim remanet quantitas panis & vini, destructâ ipsius tum panis, tum vini substantiâ: ergo realiter distinguitur. Quæ enim forma potest separatim à subjecto suo existere, necesse est ut dicatur esse entitas ab eo realiter distincta; alioquin idem realiter sine seipso secundum eandem realitatem non potest aut destrui, aut conservari; ut patet. Respondent Nominales: Eam quæ remanet, esse propriam albedinis & aliorum accidentium quantitatem, ab iis realiter indistinctam. Contrà est. 1. Quia explicari non posset unde illa accidentia tantam, & tam constantem unionem inter se retineant, ut ad motum unius, moveantur & alia, nisi dixerimus illud ex eo fieri, quod in eadem communi quantitate realiter distinctâ, tanquam in subjecto inhæreant, quo mediante prius uniebantur propriæ substantiæ. 2. Calor*

v. g. qui de novo producit in Eucharistiâ , sic consequenter produceretur naturaliter extra omne subjectum , si non præsupponeretur quantitas ipsius receptiva ; quod aliàs refutavimus. 3. Cùm illa accidentia sint simul loco , sequeretur multas quantitates naturaliter penetrativè simul poni ; quod repugnat : Quia jam ostensurus sum , omnem corporum impenetrabilitatem naturalem oriri à quantitate. Et verò , quidni consequenter sacræ hostiæ simul esse possent penetrativè ? Hæc doctrina est communis Theologorum contra Nominales , quia mysteriis Divinæ Fidei explicandis sola videtur consentanea.

*Dico I I.* Quantitatis subjectum receptivum non esse totum à partibus collectivè sumptis realiter distinctum. Nam in parte superiori hujus Physicæ , rejecimus illam sententiam de Toto realiter à partibus simul & collectivè sumptis distincto.

*Objic.* Quantitas Toti suam tribuit denominationem. Sic enim homo v. g. vel equus denominatur quantus , &c. Ergo Quantitas Toti ejusmodi inhæret. *Prob.* Quia accidentia non tribuunt suam denominationem , nisi illi subjecto cui inhærent. R. Satis est ut inhæreant Toti inadæquatè , seu secundum aliquam ipsius partem : quo pacto homo denominatur *sciens* ab habitu scientiæ soli animæ inhærente. Atque ita homo denominatur *Quantus* , à quantitate illi secundum materiam inexistente.

Item , nec materiæ simul & formæ substantiali tanquam subjecto inhæret quantitas. *Prob.* Cùm enim forma substantialis sit penetrativè simul cum materiâ cui unitur , sequeretur duo quanta simul esse naturaliter penetrativè.

Conf.



Conf. 1. Quia in homine anima rationalis, quæ de se est incapax effectus formalis qui tribuitur à quantitate, illam in se recipere non potest; ergo sic quantitas de se inhaeret soli materiæ.

Conf. 2. Quia eadem quantitas, eademque alia accidentia quæ erant in homine, vel in equo corrupto, remanent, formâ hominis, aut equi recedente. Quo quidem ex loco, & ex superiori simul doctrinâ,

*Colligimus* 1. Accidentia illa non esse nisi in materiâ tanquam in subjecto receptivo: neque enim alia ratio afferri potest, cur in corruptione totius, accidentia illa remaneant, nisi quodd remaneat semper eorum subjectum, nempe materia prima: alioquin pereunte subjecto, pereunt illius accidentia.

*Collig.* 2. Alia accidentia non inhaerere materiæ nisi mediante quantitate, cui immediatè uniantur.

*Collig.* 3. Formam substantialem materialem non fieri extensam formaliter & proximè divisibilem, nisi ex adhæensione quantitatis, quatenus videlicet recipitur in materiâ sic formaliter extensâ & divisibili. Item

*Collig.* 4. Accidentia quoque alia non reddi quanta, nisi prout recipiuntur in ipsâ quantitate, quæ suos effectus formales tam multiplici hac ratione tribuat.

## CAP. II. *Natura & formalis effectus Quantitatis.*

**S**uppono substantiam materialem, tum accidentia omnia materialia secundum suam entitatem habere partes, seu posse dividi in partes, quas ideo vocant *entitativas*. Prob. Quia substantia v. g. linea, existens sub hac quantitate

titare bipedali, non est tota indivisibiliter sub qualibet ejus parte assignabili : ergo tantum divisibiliter, & pars sub parte : ergo habet partes. Quod est contra Thomistas, qui docent in materiâ non esse ullam partium rationem nisi per quantitatem. Certè potest Deus destruere partem substantiæ quæ est sub parte *A* quantitatis istius ; conservatâ illâ parte quæ est sub parte *B* ejusdem quantitatis : ergo in eâ substantiâ secundum se est pars & pars ; distinguiturque substantia capitis à substantiâ pedis, &c. Huc adde, partes illas substantiæ præsupponi debere ad partes quantitatis, ut recipiant ejus effectum formalem ; nec aliam ob causam Angelus, aut anima rationalis est subiectum incapax quantitatis, nisi quia partes entitativas non habent. Item, substantia totius mundi, præcisâ quantitate, est major quàm substantia grani synapis : atqui aliunde major dici non potest, nisi quodd habeat plures partes *entitativas*. Et verò agens condensatum, puta ignis in furnulis Chymicorum, ideo vim exercet majorem, quia sub minori extensione plures sunt partes substantiæ igneæ. Quare consequenter, contra eosdem Philosophos,

*Dico I.* Formalis effectus *Quantitatis* non est tribuere substantiæ materiali rationem partium ; siquidem illam de se habent independentem à quantitate.

*Notandumque* est, partes illas considerari primò, prout habent ordinem in se, seu in toto ; id est, prout pars hæc illi determinatæ parti unitur ; Quomodo *v. g.* caput unitur immediatè collo ; nec pedi unitur nisi mediantibus aliis partibus quæ certum inter se ordinem servant in toto illo quod constituunt. Secundò verò consideran-  
tur

tur prout ordinem habent ad locum ; id est , quatenus totum illud quantum , diversis loci partibus , secundum diversas sui partes correspondet , revocaturque ad *suum*. Et verò possunt etiam de facto partes servare ordinem inter se , sine respectu ad locum ; quanvis non è contrà. *Exempli causâ.* Corpus Christi Domini positum in Venerabili Eucharistiâ , habet partes inter se ordinatas ; cum tamen illæ omnes sint confusæ loco , id est , simul sint penetrativè eodem in loco , simulque omnes toti quantitati panis , tum singulis ipsius partibus indivisibiliter respondeant , eo modo qui est rerum spiritualium proprius ; ut quando anima rationalis dicitur esse tota quidem toto in corpore quod informat , simulque tota indivisibiliter in singulis ipsius partibus. Atque istâ quidem factâ observatione.

*Notabis 2.* In aliorum sententiâ , effectum formalem Quantitatis primarium & essentialem esse , ut partibus rerum materialium entitativis tribuat extensionem , seu veluti extraneitatem ab invicem , cum ordine inter se. Supponunt enim partes entitativas rerum materialium de se , & præcisâ quantitate non modò esse indivisibiliter simul loco , seu loco confusas , ut jam aiebam de corpore Christi Domini in V. Sacramento , sed præterea sic quoque absolute esse confusas , ut nullum inter se ordinem servant ; nec illum ordinem habere , nisi per formalem effectum quantitatis. *Probant.* Quia , ut inquirunt , solus ille assignari potest formalis effectus quantitatis , prout reperitur in Christi corpore Sacramentaliter posito in V. Eucharistiâ : ergo ille omnino est admittendus ; siquidem nullum est accidens subjecto inhærens , nisi

formalem effectum illi communicando; quo pacto albedo *v. g.* facit subjectum album, &c. Quodd autem Christi Domini corpus eo in statu propriam retineat quantitatem, communis est Theologorum sententia; docetque Gregorius à Valentia. *Tom. 4. Disp. 6. De Eucharistia. q. 4. puncto 1.* contrariam esse in Fide erroneam; nam alioqui sequeretur corpus Christi Domini in illo Sacramento non esse corpus organicum, & vitalium operationum capax, quale de facto esse debet corpus quod ipse Christus Dominus dicit esse *suum*. Quod Fidei doctrinæ repugnaret. Sic autem de illo effectui formali quantitatis sentiunt Capreolus, alique insignes Thomistæ; Fonseca, *Metaph. Tom. 2. Conimbricenses 1. Phys.* Gregorius à Valentia, loco citato; Vasquesius *Tom. 3. Disput. 190. cap. 3.* ubi rem variis probat argumentis, scribitque hanc fuisse veterum omnium doctrinam cum D. Thomâ, contra Nominales.

*Notandumque* est consequenter 3. Ex iis authoribus, duplex extensionis genus convenire corpori ratione quantitatis. Altera, quæ dicitur extensio partium in ordine ad se, quam statuant esse primarium & essentialem effectum ipsius quantitatis, quam *essentialem & internam* vocant. Altera autem est earundem partium extensio in ordine ad locum, de quâ vix ulla est disputatio, cum facilè omnes ferè concedant illam oriri ab entitate illi internæ quantitatis superadditâ, quam vulgò appellant *modum localis extensionis*, tum *quantitatem externam*. Ut autem statuamus de illo quantitatis effectui formali primario & essentiali, de quo tota est difficultas:

*Dico I I.* Cum Suario *Tom. 3. in 3. p. Disp. 48. sect. 1.*

*se. 7. 1.* quem sequuntur jam ferè omnes Philosophi præter Thomistas & Nominales : substantia corporea habet extensionem & partes extra partes inter se ordinatas independentes à quantitate. Prob. Quod alioqui non posset in se secundum diversas sui partes esse subjectum quantitatis ; partesque ipsius quantitatis diversas , secundum diversas sui partes in se recipere & sustentare ; neque enim inextensum ita aptari posset cum extenso. Ergo quantitas præsupponit subjecti extensionem. Et verò etiam quantitas ita respicit materiam tanquam ipsius proprietas , ut pars *A* quantitatis , à solâ parte *A* materiæ procedat emanativè ; quomodo in aquâ , frigoris diversæ partes non emanant nisi à diversis partibus ipsius aquæ : ergo, &c. Item, nihil repngnat Divinitus conservari totam substantiam corporis humani , destructâ ipsius quantitate omni ; quo in casu substantia capitis non idcirco amitteret unionem cum substantia colli , & sic de aliis partibus ; ergo unio partium ejusmodi & extensio tam ad se , quam ad locum , non est formalis effectus quantitatis : ergo inquirendus est alius. Quare

*Dico III.* Facere quantum , qui dicitur formalis effectus quantitatis , est tribuere extensionem partium cum exigentiâ impenetrabilitatis , aliarumque id genus proprietatum. Prob. Quia habere partes in ordine ad se , & loco coextensas , potest convenire substantiæ independentes à quantitate , ut aiebamus : ergo extensio quæ tribuitur per quantitatem ea est , quæ ex differentiâ essentiali postulat impenetrabilitatem , tum physicam divisibilitatem , mensurabilitatem sive activam , sive passivam. Item , esse subjectum immediatum aliorum acciden-

cidentium, &c. quæ sunt diversæ proprietates quantitatis.

*Notabis* igitur 1. Substantiam corpoream, si solam habuerit quantitatem internam, posse nihilominus cum eâ esse indivisibiliter in loco, ut corpus Christi in V. Eucharistiâ; opusque habebit *modo extensionis localis* illi superaddito, per quem extendatur divisibiliter ad locum. Quem *extensionis localis modum* inde constat distinguere realiter à quantitate internâ, quia sine illo realiter esse potest; tum quia remanente eadem quantitate internâ, mutatur illa *extensio* localis in rarefactione aut condensatione, quemadmodum dicam postea.

*Notabis* tamen 2. Substantiam sub eâ quantitate non idcirco habere de se actualem impenetrabilitatem, sed tantum esse in proximâ aptitudine ad illam, & illam de se connaturaliter exigere; seu habere ex differentiâ essentiali, ut sit principium radicale illius. Neque enim de facto, omne corpus etiam extensum localiter, habet actu impenetrabilitatem, ut de corporibus beatorum dicitur *Disp. De loco cap. 3.* Item

*Not. 3.* Alias esse proprietates, & munera hujus quantitatis, uti jam insinuabam. Nam primò quidem, munus illius est, in se immediate recipere alia accidentia immaterialia; quod superiori cap. exposuimus. Ut enim substantia illa non est activa, nisi mediantibus qualitatibus superadditis; ita nec passiva est nisi mediante quantitate. Neque verò etiam agere, aut pati ab agente naturali potest, nisi sub quantitate localiter extensâ.

Item, ad extensionem localem sequitur physica divisibilitas. Nam etsi Divinitus corpus non

non quantum dividi in partes absolutè posset, hoc tamen nequireret præstari ab agente naturali.

Item, huc accedit mensurabilitas sive activa, sive passiva: quòd hoc solùm pacto mensurari, aut mensurare alias magnitudines possit.

Item, proprium quoque est localis saltem extensionis, ut per eam fiat corporum naturalium aut rarefactio, aut condensatio, quemadmodum explicabitur postea cap. 8. hujus Disput. At

*Not. 4.* Ideo corpus Christi Domini in V. Sacramento, etsi non habeat localem extensionem, retinere tamen propriam quantitatem, ut sit tanquam subjectum immediatum qualitatum & affectionum earum quæ sunt necessariae ad constituenda principia vitalium operationum in corpore organico.

### CAP. III. *Quantitatis, aut continui compositio.*

**S**upponendum est hoc loco discrimen inter *continuum, contiguum, & consequens, seu deinceps.* Nam *consequens seu deinceps* dicitur id quod est post aliud, aliquo tamen mediante. *Contiguum* autem ita est post aliud, ut nihil mediet. Quamobrem contigua definiuntur ab Arist. Ea quorum extrema sunt simul: id est, immediatè conjunguntur. At contiguo superaddit continuum, quòd ejus partes ita jungantur simul, ut proprios terminos non retineant, nec habeant nisi unum commune extremum, cujusmodi est *superficies*; fiantque hoc pacto una & eadem entitas continua, puta vel ligni, vel aquæ. Quo sensu etiam continua dicuntur ea, quorum extrema sunt unum.

*Notandum* verò est, hîc non agi de partibus

rei essentialibus, quales sunt materia & forma substantialis in corpore naturali; sed disputatur solum de partibus entitativis & integralibus, cujusmodi sunt in homine caput, brachia; pedes, &c.; aut in aqua plures guttæ ex quibus constat. Gravisque est controversia quænam sint illæ partes continui integrantes. Nam Stoici quidem antiquiores credebant eas esse indivisibilia mathematica; atque ita corpus constari ex superficiebus, superficiem ex lineis; lineam autem ex punctis quæ nullam habeant aut formalem, aut virtualem extensionem; sicque aquam v. g. per divisionem resolvi tandem posse usque ad ejusmodi indivisibilia. Aristoteles verò docet constare ex partibus extensis; nec posse unquam dividi, nisi in semper divisibilia. Quod recentiores quidam nostrorum temporum philosophi cum difficile putent, minùsque probabile, excogitarunt novi generis puncta, ut vocant, *physica*, quæ licet realiter sint indivisibilia, habeant tamen virtualem extensionem, qualem per proportionem attribuius substantiæ Angelicæ; tum statuunt ex certo id genus indivisibilium numero prodire continuum. At

*Dico I.* Continuum non potest constare ex indivisibilibus mathematicis. *Prob.* Quia indivisibile conjunctum alteri, est consequenter cum ipso penetrativè; non enim potest ipsi uniri secundum unam sui partem aliquam, tum secundum oppositam cum altero continuari; siquidem ex hypothese, partes non habet: ergo se toto illi unitur: ergo cum illo est penetrativè, nec proinde sic potest esse extra: ergo non potest facere extensionem partium extra invicem positarum, Istud præterea confirmat

Arist;



Arist. in hunc modum. Sequeretur motum velocem æqualem esse cum tardo. *Probat*ur illa *sequela*. Quia æquali temporis spatio testudo lentigrada, iter æquale conficeret cum Achille celerissimo cursu properante. Ut enim quantitas hæc molis supponitur esse ex punctis indivisibilibus, ita & tempus esset quoque ex instantibus indivisibilibus. Quâ factâ hypothesi, sic argumentor: quo temporis instanti Achilles decurrit primum spatii seu itineris sui indivisibile, testudo quoque primum sui spatii indivisibile percurrit; & ita de aliis. *Prob.* Quia dici non potest quoddam propter suam tarditatem, illius indivisibilis partem solum peragret, quia partes non habet: ergo necesse est ut perinde ac Achilles singulis momentis singula percurrat indivisibilia ex quibus conflatur spatium. Ergo æquali tempore æquale cum Achille spatium perficiet; quod repugnat.

Confirm. 2. Variis rationibus geometricis, hoc pacto:

1. Linea omnis dividi potest æquales in partes, ut demonstrari solet. Atqui in eâ sententiâ inferri deberet contrarium, si daretur linea constans numero punctorum impari. Nam punctum excedens non posset bipertitè dividi.

2. Diagonalis in quadrato esset æqualis lateri: quia nullum esset punctum in latere, quod non haberet aliud distinctum sibi respondens in diagonali, ut patet in fig. 9. tabulæ ad finem hujus libri appositæ. Ergo sic diagonalis foret æqualis costæ, seu lateri: quod patet esse falsum.

3. Diameter esset æqualis semicirculo; quia totidem ex punctis constaret; nulla enim essent puncta in semicirculo, à quibus lineæ ductæ

non caderent perpendiculariter in diversa puncta diametri. Vt patet in fig. 10.

4. Eandem ob causam basis trianguli foret etiam duobus aliis simul lateribus æqualis. Nam ex singulis punctis illorum laterum caderent lineæ perpendiculares ad diversa puncta basis; unde sequeretur basim tot habere puncta, quot dicerentur reperiri in duobus illis lateribus simul sumptis; quod repugnat. Vide fig. 11. Item pari modo hypotenusa seu latus *a. c.* in fig. 12. æqualitatem haberet cum basi trianguli illius: quod repugnat. Nam latus oppositum majori angulo, cujusmodi est hypotenusa, semper majus est.

Item 5. Eandem ob causam circulus minor, æqualis foret majori; ut videre est in fig. 5. Nam à singulis punctis majoris circuli possunt duci diversi radii ad centrum, designantes æqualem numerum diversorum punctorum in circulo minori; siquidem radii à circumferentiâ ducti ad centrum, alibi non concurrunt quàm in centro.

*Dico II.* Eo maximè nomine repudianda est sententia de indivisibilibus physicis, quòd sine ullâ necessitate doctrinam Aristotelis, & omnium Peripateticorum variis in locis evertat, ut ipsi adversarii non dissitentur; nec pauciores habet difficultates, quàm Aristotelica. Ac primò quidem, confundit proprietates essentielles rerum materialium cum spiritualibus; proindeque tollit principium unde res corporeæ ab incorporeis dignoscantur. Nam in eo differt res materialis ab incorporeâ, quòd ista nullas habeat partes entitativas, nec consequenter habere possit quantitativas. Cùm ergo illa indivisibilia sint materialia, non deberet ipsis attribui ratio  
ex-

extensionis tantum virtualis propria rerum immaterialium, sed potius ratio partium entitativarum, tum quantitativarum. Certè quæcumque in partem hujus chartæ immittam forfices, dividi omnino poterit; secus autem contingeret si constaret ex indivisibilibus, nec fieri posset quin interdum saltem extra commissuram eorum incurrerent: atqui hoc repugnat experientia, nihil enim in eo casu quidquam offendimus, nisi divisibile. Item, in eâ sententiâ non potest explicari rarefactio, in quâ minùs materiæ ponitur sub majori extensione. Nam ubi supponeretur punctum aliquod virtuale rarefactum, eadem esset materia, nec minores haberet partes sub majori extensione, quàm sub minori, quia punctum illud non habet partes. Item, Angelus extendendo sese virtualiter ad majus spatium, diceretur perinde rarefieri. Item, in eâ sententiâ punctum, seu indivisibile id genus, potest rarefieri & veluti inflari saltem virtualiter in infinitum. Quâ in hypothese, dolium ingens poterit repleti uno indivisibili aquæ, sicque sorberi in instanti, non autem per partes, quia partes non haberet. Item, posset fieri vestis ex unico panni indivisibili, unde sic aliquis tutus foret contra ictus aut ensium, aut bombardarum; nam perforari, id est, dividi non posset. Item, posset ex unico indivisibili ceræ mollissimæ confici vinculum etiam tenuissimum, quo tamen aliquis ita ligaretur, ut ne per Divinam quidem potentiam frangi posset. Item, funis ex ejusmodi indivisibili rarefacto, sic posset in medio sui accendi, & nunquam absumi; quod alioquin inde sequeretur divisio inter partes illius extremas. Et cætera id genus, quæ videntur per se absurda,

Dico consequenter III. Retinendam esse doctrinam Aristotelis, nempe *quantum* istud, seu *continuum* non posse confluari nisi est ex quantis, seu extensis; nec posse dividi nisi in partes quæ semper sint divisibiles: alioquin si fieret resolutio usque ad indivisibilia, sequeretur componi ex indivisibilibus: quod aiebamus esse impossibile. Et verò positâ ante oculos figurâ 7. primi laterculi, facile intelligere est, quemadmodum in lineâ finitâ; puta in lineâ *e. f.* designari possint novæ & novæ partes in infinitum. Si enim producantur in infinitum parallelæ *a. b.* & *c. d.* Tum ex puncto *g.* funis successivè ducatur per singulas partes lineæ superioris *a. b.* Inde fiet ut in lineâ finitâ *e. f.* novæ semper designentur partes, nunquam deveniendo ad extremum, quia funis *g. h.* supponitur semper traduci per puncta lineæ *a. b.* quæ nunquam cœunt cum parallelâ inferiori *c. d.*; quod alioqui deberet contingere. Resque ista eadem ostenditur tum in fig. 14. tum in fig. 8. Nam ex centro *a.* duci possunt lineæ in infinitum ad parallelam *c. d.* quæ novas semper designent partes in quadrante adscripto, nec tamen ad finem ipsius unquam pervenietur, ob rationem modò allatam.

*Notabis* tamen 1. *Quantitatem* non esse hac ratione semper divisibilem in partes determinatas, aut nui certæ alicui æquales secundum idem genus extensionis, quas vocant partes *aliquotas*. v. g. Hoc lignum non est divisibile in infinitum secundum longitudinem in palmos, & palmos. Inde enim sequeretur quantitatem hanc fore actu infinitam.

*Notabis* igitur 2. Considerari hoc loco aliud genus partium, quas vocant *aliquantas*, seu *alteri*

*communicantes*, ubi scilicet longitudo v. g. bipalmaris dividitur in duos palmos; cum palmus alter in duas alias medietates; quæ medietates iterum in alias medietates dividantur, & sic in infinitum. Dicuntur autem illæ partes *communicantes*, quia semper dividuntur ex majori in quâ sunt inclusæ. Item solent dici & *proportionales*, cum *minores & minores*, quia majores illæ dividuntur juxta certam proportionem in minores & minores communicantes, putà in medietates, & medietates, majoribus aliis medietatibus inclusas. Nec sermo est nisi de hoc genere partium, ubi quantitas dicitur esse in infinitum divisibilis. Item,

*Not. 3.* Quantitatem hoc modo non esse divisibilem nisi mathematicè, & respectivè ad potentiam Divinam, non autem physicè. Item

Supponendum est ex doctrinâ capitis sequentis, continuum sic constare seu componi ex partibus, quæ in eo non distinguuntur *actu*, sed tantum *potentiâ & virtute*: quam ob causam dicitur compositum duntaxat *virtuale*; non autem *actuale*, cujusmodi v. g. est homo constans ex corpore & animâ, tanquam ex partibus actu distinctis inter sese. Item

*Notabis* consequenter ex dictis; quandoquidem continuum est divisibile in semper divisibilia, non posse unquam *adequatè* dividi in omnes partes indeterminatè sumptas & *collectivè*, ut inquirunt, ita ut fiat collectio aliqua possibilium omnium in quas est divisibile. Neque enim divisio illa fieri potest nisi in omnes *distributivè*, id est, in has, aut illas *determinatè* assignabiles, quarum singulæ sint præterea semper divisibiles in alias & alias *indeterminatè*.

CAP. IV. *Solvuntur Objectiones.*

**O***Bjic.* 1. Ex Arist. 1. Top. 14. punctum se habet in lineâ, ut unitas in numero. Ergo quemadmodum numerus resolvitur in unitates de se indivisibiles, tanquam in suas partes, ita & linea in puncta. *R.* Nihil aliud velle Aristotelem, quàm punctum vel reale, vel virtuale esse principium, aut terminum lineæ, quo pacto per proportionem unitas est principium aut terminus in numero.

*Inst.* 1. Unitas addita unitati facit numerum, qui est vera species quantitatis, etsi unitates illæ de se sint indivisibiles. Ergo idem à pari dici potest de punctis respectu lineæ. *R.* *Nego parit.* Quia extensio numeri, non est extensio magnitudinis, sed pluralitatis duntaxat. Quare unitates quidem possunt facere *plus*, non autem *majus*, quod est proprium quantitatis continuæ.

*Inst.* 2. Continuum est quoddam compositum. *C.* Atqui compositum omne potest resolvi in sua omnia principia componentia, seu partes sui constitutivas: ergo & continuum; quod proinde resolvi debet usque ad aliqua indivisibilia: ergo componitur ex indivisibilibus. *R.* Minorem esse duntaxat veram de composito formali & actuali, seu quod partes actu distinctas continet: non autem de composito virtuali, quod non habet partes nisi virtute & potentia. Talis enim est naturæ, ut in omnes possibiles adæquatè, seu collectivè resolvi nequeat.

*Inst.* 3. Quantitas est divisibilis & resolubilis in eas partes quas continet, seu ad quas est in potentia. *C.* Ergo in omnes. *Dist.* Omnes distributivè, seu determinatè in has, aut illas  
affi-

assignabiles. C. In omnes indeterminatè, aut collectivè. N.

*Inst.* 4. Potentia omnis debet posse reduci ad actum; alioquin non diceretur potentia in ordine ad illum actum. Ergo potentia ad omnes partes debet posse ad illas reduci. *Dist. Ant.* Sic debet posse reduci *adæquatè*. N. Sufficit si *inadæquatè*, quia talis est ejus natura, ut colligimus ex dictis

*Inst.* 5. Si Deus vellet quantitatem dividere quantum potest, non divideret illam in partes tantum finitas; siquidem foret ultra divisibilis. Ergo in omnes; & consequenter in infinitas: ergo usque ad aliqua indivisibilia: ergo est ex indivisibilibus. R. Cum totum istiusmodi sit de se indeterminatum, deberet Deus sese determinare ad certum numerum partium, cum ad omnes collectivè nulla sit potentia.

*Obje.* 1. Sequeretur quantitatem omnem fore infinitam, quod ejus partes hac ratione exhaustiri non possent: Sic enim definitur *infinitum*; est illud ex quo semper accipientibus, restat semper aliquid accipiendum. *Dist.* Si partes illæ semper accipiendæ forent alicui certæ æquales, sequeretur quantitatem esse infinitam. C. At dividitur solum in minores & minores proportionales, easque alteri communicantes; quæ simul junctæ, non superarent magnitudinem illius à quâ separarentur. Quo pacto nummus aureus dividi absolutè posset in tot laminas aureas quibus regeretur orbis universus; quæ tamen simul sumptæ non redderent majorem molem, quam nummi ejusdem divisi.

*Inst.* 1. In eâ quantitate non posset assignari pars aut prima, aut ultima, quæ non esset divisibilis in infinitum. *Transf.* Ergo non esset finita. N. *Conf.*

*N. Conf.* Eam enim ob causam ne dicatur esse pars aliqua aut prima, aut ultima amplius non divisibilis; vulgò terminos illius explicant per negationem ulterioris extensionis: ut suo loco exponetur.

*Objic. 3.* Contra eos qui admittunt gradus qualitatis homogeneos. Sic objicies, inquam: In eo casu posset admitti infinitum simpliciter. Nam illud est infinitum simpliciter, ex quo desumi possunt in infinitum partes uni certæ æquales. Atqui juxta hanc sententiam possent in infinitum desumi ex quanto partes caloris v. g. ut duo. Ergo sic posset existere calidum infinitum actu, si partes illæ caloris simul ponerentur. Quod postea repudiabitur. *Rz.* A nobis negari hypothesim de gradibus homogeneis; ut exponemus ad finem hujus Disputationis.

*Objic. 4.* Si quantitas habet partes potentiâ infinitas, non possent illæ à mobili decurri per spatium temporis finiti; nam per motum continuum deberent omnes, & quidem aliæ post alias successivè designari, nec posset deveniri ad ultimam ulteriùs non divisibilem. Atqui hoc repugnat experientiæ. *Rz. 1.* Hoc argumento solum illos urgeri, qui supponunt in quantitate esse formaliter partes cum actuali distinctione ab invicem. At sequenti capite ostendam, in eâ partes non reperiri, nisi virtualiter; nec ante assignationem, esse aliquam aut primam determinatam, putà primum aut ultimum, aut pedem, aut alias similes. Item *Rz. 2.* Mobile quod per aliquam quantitatem continuè & successivè traducitur, nullas in eâ designare partes; quomodo si digito continuè & successivè percutram totam aliquam hujus libri lineam, non dicat designare ullos istius lineæ characteres,



cteres, sed potiùs totam lineam. Nam designare, est determinare aliquid, ipsum quasi distinguendo ab alio; nec consequenter possent aliquæ partes in continuo designari per motum, nisi fierent partes motus distinctæ inter se, vel per intermediam aliquam quietem, vel per aliud assignationis genus. R. igitur 3. Motum finiri tandem, quatenus sit toti continuo, vel spatio quod decurritur adæquatus; vel, ut postea dicam, finitur, quatenus incipit primò non esse, cùm antea existeret.

*Inst.* Immò nec posset aut incipere, aut finiri motus. Quia in eo non esset, nec assignari posset pars prima, aut ultima, quæ adhuc non esset divisibilis in infinitum, non modò ratione ipsius motus, de quo postea similiter dicam, sed etiam ratione ipsius continui, quod decurritur per motum. *Respondetur* huic difficultati capite 4. Disput. De Duratione.

*Objic.* 5. In istâ doctrinâ, quæ palea successivè comburitur, non posset unquam tota tandem absumi, quia comburendæ forent partes aliæ post alias in infinitum. *Respondeo iterum*, hîc supponi falsò partes, cùm tantùm illud successivè comburatur, quod est divisibile in partes, illasque tantùm continet virtualiter; diciturque tandem ultimò absumi palea, quatenus non potest fieri ampliùs ulterior inflammatio.

**C A P. V.** *Partes in continuo distinctionem actualem non habent.*

**Q**uaritur an partes in continuo servant realem distinctionem actu. Neque enim ex eo quodd res aliquæ inter se uniantur, idcirco desinunt esse distinctæ actu; siquidem unio non opponitur distinctioni, sed tantùm divisioni. Quo

Quo pacto materia & forma unitæ, non ideo desinunt esse actu realiter distinctæ.

*Dico I.* Non servant realem distinctionem actu. Sic passim Arist. 5. metaph. Item 5. & 8. c. 10. ubi ait in continuo non esse actu Mercurium, sed potentiâ. *Prob.* Quia inde sequeretur existere numerum rerum infinitum actu: Atqui falsum consequens, ut sequenti disput. ostendatur: ergo & antecedens. Major certa est, quia multitudo illa partium actu distinctarum non foret tantum finita, ut supra docui: ergo actu infinita. Perindeque essent actu infinitæ, ac duæ actu distinctæ. Item, partes illæ continui distinctæ actu, in adversariorum sententiâ, sunt singulæ à Deo determinabiles, quatenus videt unam ex illis non esse hanc, aut illam, &c. Ac proinde potest ad singulas illas creare Angelos: qui certè non facerent numerum nisi actu infinitum.

Nec dicas partes continui, etsi distinctas actu, non ideo facere numerum actu; huicque ob stare quodd non habeant divisionem ab invicem. *Contrà est.* Quia corpus & anima v. g. in homine, quanvis habeant unionem, non desinunt facere numerum, ob distinctionem realem actu quam servant; dicunturque esse omnino duæ hominis partes: quomodo per proportionem Personæ in Deo faciunt numerum, quanvis divisæ non sint. Certè possent saltem absolute à Deo conservari continui partes, destructis illarum unionibus, quo in casu, haberent & divisionem quam requirunt adversarii, sicque existeret infinitum actu. Item, si continuum sic supponeretur divisum in omnes partes; fieret illius resolutio usque ad indivisibilia; aut certè non esset divisum in omnes partes amplius non divisibiles.

*Notandumque* est, hic valere argumentum motus infiniti per finitam quantitatem, quia decurrendæ essent partes actu infinitæ. Item valet argumentum circuli majoris, qui foret æqualis cum minori concentrico supra jam descripto; siquidem nullæ essent partes majoris, à quibus duci non possent lineæ ad diversas partes minoris: ergo uterque haberet æqualem numerum partium. *Quare*

*Dico* II. Sequitur ut partes illæ continui sint tantum distinctæ potentiâ, seu potestate, ut loquitur Arist. eo nimirum sensu, quod quantitas dividi possit in multas partes; *quarum unaquæque fiat hoc aliquid*: quemadmodum loquitur ipse Arist. Sic igitur quanvis continuum sit totum aliquod actu existens, non dicitur tamen totum actuale, aut totum formale, sed tantum virtuale; quia non habet partes formaliter, seu actu distinctas.

*Notandumque* est, hic disputari solum de distinctione actuali intrinsecâ; alioquin dici potest continuum habere partes distinctas actu extrinsecè, nimirum per assignationem, quæ per formas accidentales, aut substantiales etiam aliquas fiat. Ut quando ramus aliquâ sui parte est viridis, aliâ autem siccus. Item, fieri potest assignatio diversarum partium, vel tactu, vel solâ mente, &c.

*Objic.* Ex Arist. passim dicuntur esse partes in continuo, & quidem partes extra partes, in quas est divisibile. *Rz.* Tunc sermonem esse tantum de partibus potentiâ, non actu.

*Inst.* 1. Omne totum, quale est continuum, constat partibus actu, siquidem non existit actu, nisi per partes sui constitutivas actu. *Dist.* Debent inesse partes actu saltem *entitatis*, aut actu *etiam*

etiam compositionis. C. Actu distinctionis. N. Et verò sufficit ad constituendum actu compositum virtuale huiusmodi, ut sint actu quoad entitatem, non autem quoad distinctionem.

*Inst. 2.* Partes illæ sunt multa actu componentia; ergo distincta; quia non est multitudo, nisi ex pluribus actu distinctis. R. Ad compositionem huiusmodi virtualem sufficiunt multa virtualiter; quanvis non sint multa formaliter.

*Inst. 3.* Continuum est ex multis formaliter, puta aqua ex multis aquæ guttis. Ergo in eo sunt multæ formaliter partes. R. Esse quidem multas formaliter & actu distinctas ante actualem compositionem, seu unionem: at fiunt quid unum continuum sub unione.

*Inst. 4.* Unio ut sic non tollit distinctionem actualem partium unitarum; siquidem de se ut sic non opponitur distinctioni, ut patet de unione materiæ & formæ. *Dist.* Non tollit in toto actuâli, seu formali. C. In virtuali inter partes continui. N. Hæc enim est specialis illius natura, ut supra ostendebamus colligi ex eo, quod sequeretur dari infinitum actu, &c.

*Inst. 5.* Unio non est nisi inter extrema distincta; nihil enim sibi ipsi unitur: ergo hæc supponuntur partes esse distinctæ. *Dist. Ant.* Unio est inter extrema distincta vel actu, vel potentiâ. *Item & Dist. Conf.* Ergo supponuntur partes distinctæ vel actu, vel potentiâ. C. Non est autem necesse, ut supponantur habere distinctionem illam actu.

*Inst. 6.* Partes continui non essent unquam partes illius actu, sed tantum potentiâ. Nam ante compositionem, nondum sunt illius partes; nec etiam amplius sunt ejus partes post earum sepa-

separationem. *Dist.* In ipso continuo non sunt partes actu distinctionis. C. Satis est quoddam sint actu entitatis, & compositionis. Post separationem possunt etiam dici partes actu, non quidem absolute, sed respectivè ad totum, cujus aut fuerunt, aut iterum possunt esse partes.

*Inst.* 7. Sunt realiter ab invicem separabiles: ergo distinguuntur realiter. Nec aliam ob causam dicimus formam aliquam esse actu realiter distinctam à subjecto, nisi quia est ab eo realiter separabilis. *Res.* Quæ sunt ab invicem separabilia, distingui realiter saltem potentiâ, ut partes continui. At forma realiter inseparabilis à suo subjecto, nequidem est ab eo distincta realiter potentiâ; cum sit eadem indivisibiliter entitas cum ipso subjecto; quemadmodum in *Metaph.* diximus de relatione.

*Inst.* 8. In continuo, nemine cogitante, una pars dicit negationem alterius; id est, una non est alia. Sic enim gutta aquæ continuata cum guttâ vini, non est ipsum vinum: ergo ab ipso distinguitur realiter. *Dist.* Una pars non est alia, seu non est eadem cum aliâ indivisibiliter. C. Eadem divisibiliter, seu continuativè. N. Sicque aqua non est eadem indivisibiliter entitas cum vino cui continuata est; cum tamen illi per continuationem identificetur divisibiliter; id est, faciat cum eo eandem entitatem continuam, seu continuum idem. Nec obstat, in allato exemplo, diversitas formarum substantialium, quominus saltem ipsæ quantitates, tum materia prima vini & aquæ, inter se continuentur: neque verò etiam repugnat, quominus dicantur continuari & formæ ipsorum substantiales.

*Inst.* 9. Pars quælibet aut vini, aut aquæ, in  
*Phys. Univers.* I eo

eo continuo retinet propriam entitatem & existentiam. C. Ergo & propriam unitatem ; unde consequenter sunt *multa una* , faciuntque multitudinem : ergo habent inter se distinctionem ; neque enim est multitudo , nisi plurium distinctorum. R. Quia entitates hujusmodi in continuo proprios terminos non retinent , cum potius illos ad invicem confundant ; ideo non retinent propriam unitatem ; nec remanent *multa una* , ac proinde multitudinem non faciunt , etsi retineant propriam entitatem & existentiam partialem cum entitate aliarum partium continuatam.

*Inst. 10.* Ex metaphysicâ , unitas idem est cum entitate , & ab eâ inseparabilis : ergo remanente eâdem entitate , remanet eadem unitas. *Dist.* Unitas est idem realiter cum entitate , & ab eâ secundum realitatem inseparabilis. C. At potest nihilominus ab eâ denominativè , seu secundum ætuationem denominationem separari , sublati certis conditionibus. Nempe entitas sub iis terminis retinet semper eandem etiam denominativè unitatem. C. At quando est sub diversis terminis , faciendo scilicet unum continuativè cum alio. N.

*Inst. 11.* Quæ distant ab invicem , suntque in distinctis simul locis , necesse est ut distinguantur realiter ; neque enim idem , naturaliter saltem , simul est distinctis in locis. Atqui partes continui ejusdem , ut aqua , & vinum ipsi continuatum ; pes & caput in eodem homine ; partes eadem in eodem baculo ; palmus cœli in oriente & palmus in occidente ; illæ , inquam , partes sunt distinctis in locis : ergo distinguuntur inter se realiter. *Dist. Ma.* De his quæ sunt distinctis in locis , & sub propriis terminis,

minis, illos scilicet per continuationem non confundendo cum aliis. C. Secùs. N. Quare pes idem est continuativè cum capite; seu facit eandem cum ipso entitatem continuam; etsi cum ipso non sit eadem indivisibiliter entitas; ut suprà monui.

*Inst.* 12. Hæc habent ad invicem relationem realem distantia. C. Ergo & distinctionem realem; quia relatio realis non est nisi inter extrema distincta realiter. *Dist.* Distincta realiter vel actu, vel saltem potentiâ. C.

*Inst.* 13. Pars una potest agere in aliam sibi continuatam; ut quando pars una paleæ inflammata; aliam sibi proximam inflamat. C. Ergo distinguuntur ab invicem realiter: sic enim idem in seipsum non ageret. R. Hic sufficere distinctionem realem potentiâ.

*Inst.* 14. In motu, vel in Tempore, pars una distinguitur realiter & actu ab aliâ. Ergo à parî & in continuo permanente. R. Huic difficultati satisfiet postea: istudque negabitur de quantitate successivâ, perinde ac de permanente.

Iam verò ex dictis sequitur continuum ut sic esse simplicem formaliter entitatem, cum solâ virtuali compositione ex partibus, quæ ante compositionem erant quidem multæ formaliter; sed in compositione ipsâ fiunt quid unum continuativè & divisibiliter. Quanquam ita est simplex entitas, quatenus non est multa actu, ut tamen sit multa potentiâ realiter distincta; habeatque diversas sui partes realiter, hoc saltem pacto, distinctas; in quo differt ab alio genere entitatum simplicium, quæ nequidem habent partes potentiâ realiter distinctas.

## CAP. VI. De unione partium in continuo.

**C**orporum ad invicem conjunctio alia est per solam juxta positionem; alia per agglutinationem, aliis-ve tandem modis; sed hic agimus tantum de eâ quæ fit per *continuationem*. Dubium est enim, an partes continui uniantur se ipsis; an potius per aliquod genus entitatis realiter superadditum. Quod quidem deberet esse *indivisibile*; alioqui si nexus hujusmodi intermedius diceretur divisibilis in partes, eadem foret difficultas de unione partium illarum; & sic fieret processus in infinitum. At

*Not. 1.* Illa indivisibilia, quibus inter se uniri partes continui supponunt alii, vel esse *superficies*, ad uniendas partes corporis; vel *lineas* pro partibus superficierum; vel *puncta* pro lineis. Item,

*Not. 2.* Non modò continuandis partibus deservire illa indivisibilia, juxta Suarem, aliosque complures, sed etiam & terminando ipsi continuo. Sic enim ajunt lineam terminari per puncta; superficiem per lineas; corpus autem per superficiem. Quanquam

*Not. 3.* Duobus modis sumi posse illa indivisibilia: primò, positivè, seu realiter & formaliter, id est, tanquam entitates aliquas positivè & realiter distinctas: secundò, negativè & virtualiter tantum; ita ut corporis superficies v. g. nihil sit aliud, quàm ipsius corporis partes extremæ, quatenus intelliguntur habere negationem profunditatis, & æquivalere superficiei realiter distinctæ. His autem suppositis,

*Dico I.* Contra Suarem, partes continui inter se non uniri per aliqua indivisibilia realia, tanquam per nexus quosdam intermedios realiter di-



diſtinctos. *Prob. 1.* Quia illa fruſtra ſunt; ut parebit ex ſolutione objectionum. *Prob. 2.* Quia illa indiviſibilia realiter diſtincta, inferunt partes unitas eſſe actu realiter diſtinctas; quod ſuperiori capite refutavimus; eſſetque perinde admittendus numerus infinitus actu illorum indiviſibilium. Item, indiviſibile unum non poteſt duas inter ſe partes unire, niſi illas aliquo modo attingendo: atqui hoc præſtare non poteſt, niſi ſecundum aliqua ſui diverſa utramque partem afficiat: atqui diverſas partes non habet; quin potiùs foret penetrativè cum alterâ ſolùm ex iis partibus uniendis. Item, assignatis in lineâ duobus punctis, quibus pars *a.* continuetur parti *b.* tum pars *b.* parti *c.* pars hæc intermedia carere deberet punctis continuativis, etſi diviſibilis eſt in infinitum, ergo potiori jure non deberent admitti puncta in aliis partibus. Vel certè ſi inter duo illa puncta nulla pars mediat, ſequitur punctum eſſe immediate junctum cum alio puncto, & ſic dicitur continuum conſtare ex punctis; quod ſuprà oſtendimus eſſe impoſſibile. Quare conſequenter

*Dico II.* Neceſſe eſt ut partes in continuo uniantur ſeipſis ad invicem. Et verò etiam majorem habent proportionem ad invicem, quàm ad illa indiviſibilia, quæ ſupponuntur ab adverſariis.

*Objic. 1.* Meminit non rarè Ariſt. iſtorum indiviſibilium; ut etiam cùm definit continuum eſſe id cujus partes communi termino copulantur. *Reſ. 1.* Ariſtotelem modum hunc loquendi mutuari ex Mathematicis, qui ad faciliorem doctrinæ ſuæ explicationem, ſupponunt ejuſmodi indiviſibilia, abſtrahendo à rei veritate, aut falſitate. Et verò ipſe Ariſt. 8. *Metaph.* 14. aliis

*aliisque in locis*, de illis non agit nisi ex hypothesi quoddam dentur. Immo 2. *De Animalium incessu* ait expressè nullam esse indivisibilem substantiam, &c. R. 2. Continui partes, eo sensu, communi termino copulari, quoddam partes illius uniantur sub communi, eademque superficie. Item, *extrema esse unum* ; id est, esse eandem continui entitatem.

*Obijc.* 2. Cum duæ aquæ uniuntur inter se, fit transitus de contradictorio in contradictorium ; siquidem de non unitis denominantur unitæ, seu continuatæ. C. Item, hoc non fit sine aliquâ reali mutatione, & novâ aliquâ entitate. C. Atqui hæc alia esse non potest, quàm indivisibile, tanquam unionis modus ; vel certè cum aliis admittendus foret novus aliquis *hæccitatis* modus. N. Min. Nam illa nova entitas, & terminus novæ mutationis realis, est novum individuum, seu compositum à suis partibus seorsim sumptis realiter distinctum ; sufficitque istud ad solutionem difficultatis.

*Notandumque* est obiter, res liquidas hanc habere ex naturâ suâ proprietatem, ut immediatè juxta positæ, uniant sese ad invicem, & fiant unum continuum.

*Inst.* 1. Non possunt aliqua fieri unum per se, ni saltem sese habeant ad invicem ut actus & potentia; quod non convenit partibus continui. R. Hic sumi unum per se, prout opponitur composito per accidens, aut per solam juxtapositionem. Item R. Habere hoc ex naturâ suâ partes continui, ut ita continuentur de facto, etsi non habeant rationem actus & potentia: hoc enim convenit iis tantum, in quibus unitur actus cum subjecto.

*Inst.* 2. Possunt divinitus saltem duæ aquæ  
poni

poni simul etiam penetrativè, quo tamen in casu non fiat unio continuationis. Ergo ad istud determinari debent per aliquod indivisibile, aut per aliud quippiam id genus. R. De se ad illam unionem, positâ hujusmodi conditione, esse determinatas; & necessariò illam sequi, nisi aliqua durities, aut alia qualitas impediens, divinitus accedat.

*Inst.* 3. In V. Eucharistiæ Sacramento sanguis Christi Domini totus est simul loco, nec tamen sanguis v. g. pedum confunditur, aut continuatur cum sanguine capitis, aut aliarum partium; quod oriri non potest nisi ex defectu indivisibilis, aut similis alicujus modificationis determinativæ. R. Christi sanguinem in eo statu, ita esse simul loco, ut tamen servet ordinem cum aliis partibus ejusdem corporis. Quare, qui suis est inclusus vasis, non potest hoc modo cum alio permisceri; quomodo sanguis unius arteriæ, non potest simul esse cum sanguine alicujus venæ.

CAP. VII. *Corporis Quanti, seu Continui terminatio: tum de illius contactu.*

**V**T punctum vulgè dicitur esse terminus lineæ; & linea superficiæ, ita & ipsa superficies corpus terminat; quemadmodum jam monui; ideoque solent hoc loco appellari *indivisibilia terminantia*. Quæritur verò an istæ sint aliquæ entitates realiter distinctæ.

*Dico* I. Non habere ullam distinctionem realem, seu entitativam. *Prob.* Quia frustra esset. Nam ex eo ipso quantitas intelligitur finita seu terminata, quòd habeat negationem ulterioris extensionis. Et verò si ejusmodi superficies in corpore naturali, quam adversarii

supponunt esse realiter distinctam, si inquam, per absolutam Dei potentiam destrueretur, corpus illud non desineret esse terminatum; quia idcirco non redderetur infinitæ extensionis. Ergo superficies realiter distincta ad id muneris est superflua. Deinde, cum duæ aquæ simul continuantur, tunc interire deberent superficies earum terminativæ, productis indivisibilibus continuativis: & è contrà, ubi separantur ab invicem, tunc deberent accipere de novo superficies sui terminativas: nec tamen assignari posset earum causa productiva: ergo nec earum productio de novo est admittenda. Quare consequenter

Not. 1. Illa indivisibilia terminantia non esse realiter & positivè in quantitate, sed tantùm virtualiter, & cum virtuali distinctione; quatenus quantitas ipsa secundùm extimas sui partes idem præstat, quod ejusmodi indivisibilia realiter distincta, iisque æquivalet. Sic enim planum dicitur tangi ab alio plano, non secundùm profunditatem, quia hoc pacto fieret naturaliter corporum penetratio; sed tantùm secundùm extimas partes, prout æquivalent superfici ei realiter distinctæ, seu secundùm superficiem virtua-lem. Quo etiam pacto cylindrus tangit planum, aut alium cylindrum, secundùm lineam virtua-lem; ac denique globus perfectus alium globum, aut planum aliquod non tangit, nisi secundùm punctum virtuale. Item,

Not. 2. Nulla ex iis quæ dicuntur formalia, tum positiva & realia indivisibilia esse in quantitate admittenda, sive *componentia* mathematica, aut physica; sive *continuantia*; sive etiam *terminantia*, nisi virtualis. Quinetiam probabilius existimem esse impossibile hujusmodi indivi-

divisibile mathematicum realiter seu entitati-  
vè distinctum , atque ita nihil esse quod aliquâ  
ratione non participet divinam immensitatem  
beneficio alicujus extensionis sibi propriæ.  
*Prob.* Si enim , ut ajunt , punctum esset possi-  
bile , unde etiam posset Angelus *v. g.* sese ad  
punctum reducere ; posset consequenter sese ad  
lineam in longum veluti conformare : quia  
non esset potior ratio unius quàm alterius ; &  
sic posset extendi in infinitum , ut demonstra-  
vi in Geometriâ. Atqui hoc consequens absur-  
dum est ; ergo & antecedens. Item, si daretur  
aliqua *v. g.* superficies realiter distincta & se-  
parata , posset secundùm idem esse concava &  
convexa ; tum secundùm idem respicere orien-  
tem & occidentem simul ; ( neque enim hoc  
præstaret secundùm diversas sui partes etiam  
virtuales oppositas , quia partes nullas haberet  
ejusmodi. ) Atqui hoc per se repugnat. Ergo &  
illud unde sequitur.

*Objic.* Linea, superficies, & corpus sunt species reales quantitatis continuæ permanentis. C. Ergo sunt inter se realiter distinctæ. N. *Conf.*

*Inst. 1.* Nemine cogitante dicunt negationem sui invicem; id est, unum non est aliud. Ita enim superficies non est profunditas, &c.

*Dist.* Non est formaliter atque indivisibiliter idem cum profunditate; C. Sed tamen cum ipsâ profunditate idem est realiter divisibiliter. Sicque omnis superficies est realiter profunda. Item, linea omnis realiter est lata & profunda; quod per proportionem dicendum est de puncto virtuali, in quo dicitur tangi planum à globo perfectè rotundo.

*Inst.* 2. Multa fiunt realiter secundum superficiem, puta contactus corporum, quæ non fiunt

secundum profunditatem. C. Ergo hæc distinguuntur inter se realiter. N. *Conf.* Quia eadem entitas continua secundum diversas virtualitates hæc præstare potest.

*Inst.* 3. Non possent contiguorum extrema fieri simul, juxta doctrinam Aristotelis, nisi supponerentur habere superficies realiter distinctas, quæ simul penetrativè existant; nam impenetrabilitas est propria duntaxat corporis, seu quantitatis profundæ. Bz. Explicari assertionem 3. quo sensu illa Aristotelis verba accipienda sint in definitione contiguorum.

*Inst.* 4. Fit sæpe nova superficies, eadem prorsus remanente profunditate: C. Ergo distinguitur realiter. N. *Conf.* Quia non fit secundum novam realitatem, sed tantum secundum novam formalitatem. Quod perinde statuendum est de figurâ, quæ est aliquid necessariò consequens ad corpus extensum. Nam

*Dico* II. Figura est certam corporis quanti partibus dispositionem tribuens. Nec illa partium dispositio distinguitur realiter ab extensione locali. *Prob.* Quia frustra foret distinctio ejusmodi; cum sufficiat formalis. Quare dum cera v. g. remanente etiam eadem extensione locali, de quadratâ per solam compressionem fit rotunda; est quidem effectus novus realis, sed tantum secundum novam formalitatem, non autem secundum novam realitatem. Habes autem ex Geometriâ, quænam sint figurarum genera & species: item quænam sit earum tum natura & proprietates: agiturque hic solum de circulari & sphericâ, an scilicet dari possit corpus perfectè sphericum, cujus partes extimæ omnes æqualiter distent à centro. Nec apparet ratio ulla cur istud sit absolutè impossibile.

Quod

Quod enim ajunt illud non esse absolute perfectissimum, quod fieri potest perfectius in infinitum. *Tr.* Atqui sphaericum potest fieri perfectius. *N.* Non enim suscipit magis & minus in ratione circularis, aut sphaerici, quanvis possit esse major, vel minor circulus, aut sphaera, cum majori, aut minori partium singularum curvitate. Nam circuli ejusdem partes sub eadem diametro eandem necessariò talem vel talem servant curvitem, cum æquali distantiâ à suo centro. Quanquam alii distinguunt inter circulum, aut sphaeram physicè, id est, ex partibus continuis; & mathematicè, id est, ad imaginationem mathematicorum sumptam, constantem nimirum ex punctis, ut supponunt. Atque hujusmodi solùm vel sphaeram, vel circulum ex punctis realibus dicimus esse impossibilem.

*Dico III.* Alia corporis quanti proprietas est contactus & contiguitas. Contigua sunt ea, inquit Arist. quorum extrema, id est, superficies sunt simul: eo nimirum sensu, quodd nihil inter eas mediet; non autem quodd corpora contigua suas superficies habeant simul & penetrativè positas; ut aliqui tradunt sine ullo rationis fundamento. Item contactus vulgò dicitur esse unius corporis ad aliud applicatio sive immediata, sive mediata.

*Notabis* autem ex communi sententiâ, vix dari actu contactum immediatum inter corpora saltem solida, quodd semper aliquis medius aër interjiciatur. *Prob.* Quia inde solùm oritur sonus, quodd aër inter corpora ejusmodi interceptus collidatur; ut suo loco exponam. Item, quando planum alteri plano adæquatur simul secundùm omnes partes, omnis aër inter plana illa diffusus deberet simul totus recedere; & sic fieret

fieret motus aëris illius in instanti; quod admitti non debet: ergo neque id unde sequitur. Item, explicari alioqui non posset quomodo clavus ligno infixus extraheretur inde, non relicto vacuo, nisi dixerimus, vel aërem intermedium tunc rarefieri ad replendum vacuum; vel saltem esse aliquid spatii ad latera, per quod novus aër subeat ad impediendum illud vacuum. Atque hinc etiam consequens est virgam, aut ferulam dum infligitur, non immediatè applicari, sed mediante solùm aëre.

*Notabis* tamen 2. Posse divinitùs saltem immediatè applicari solidum cum solido. Quid enim implicat quominus per divinam potentiam, sic admoveantur ad invicem, ut nihil mediet?

*Obijciunt.* Duo corpora diversa hoc modo simul essent loco; atqui hoc repugnat. *Dist. Ma.* Simul essent loco adæquato, eo sensu, quodd simul constituerent locatum adæquatum amplioris loci occupativum. *C.* Simul essent, eo sensu, quodd unum alterius etiam corporis loco simul coëxisteret. *N.*

*Inst.* 1. Sequeretur planum perfectum tangi posse à globo perfecto. *Tr.* Atqui hoc repugnat recte etiam Arist. 3. *Metaph.* 1. 8. Ratio est, quia tangere aliud corpus, est illi adæquari; non potest autem sphaericum perfectum adæquari cum plano; siquidem ab eo tantùm attingi potest secundùm indivisibile punctum, saltem virtuale, ut suprà dictum est. *Rz.* 1. Aristotelem eo loco loqui de globis, quales vulgè conficiunt, qui quidem cum perfecti non sint, mirum non est si nequidem in puncto virtuali globum alium, aut planum tangant. *At Rz.* 2. Tangere, non esse alteri adæquari, sed tantùm appli-



applicari. Item, neque etiam rectè diceretur commensurari; hæc enim ratio loquendi in ea tantum cadit, quæ sese tangunt divisibiliter, & secundum idem extensionis genus.

*Inst. 2.* Globus ille tangeret simul indivisibiliter, & divisibiliter. Nam tangeret secundum aliquid sui: atqui nihil habet nisi divisibile: ergo tangeret secundum aliquid divisibile: ergo & divisibiliter. Quod repugnat cum primâ parte propositionis, quâ dicitur tangere indivisibiliter. R. Tangit quidem secundum aliquid sui realiter divisibile; sed tamen virtualiter indivisibile; seu prout secundum aliquid sui inadæquatè sumptum æquivalet puncto indivisibili. Ita per proportionem fatentur vulgò omnes, planum tangi immediatè ab alio plano indivisibiliter secundum superficiem virtualem & formaliter indivisibilem, quæ tamen simul realiter sit divisibilis secundum profunditatem.

*Inst. 3.* Globus ille, dum volveretur supra planum, in eo designaret lineam, quæ consequenter diceretur constare ex punctis, seu ex fluxu puncti. Atqui ostendimus non posse lineam constare ex punctis. R. Designaret quidem lineam virtualem; non ideo tamen diceretur constare ex punctis, quia lineam illam non describeret nisi per motum continuum, non autem puncta & puncta successivè designando.

*Inst. 4.* Posset & punctum reale, tum lineam realem designare, si colore aliquo imbutus globus, illum plano imprimeret. R. Materia illa colorata quam globus in plano relinqueret, non posset non esse realiter extensa & divisibilis: nihil enim supponitur esse in superficie illius globi, nisi realiter divisibile: quanvis ratione

figuræ, globus tangendo vel globum alium, vel planum, illi applicetur tantum indivisibiliter, ratione puncti virtualis.

*Inst. 5.* Globus puncto illo virtuali divideret saltem aërem; quo in statu aër divinitus saltem conservatus, retineret vacuum illud realiter indivisibile; quod etiam repleti posset alio indivisibili reali: ergo sic admitteretur reale indivisibile. R2. Nullum in eo casu fore spatium, aut distantiam extremorum in spatio fundatam; quia spatium omne dicit aliquod extensionis genus: neque extrema illa per contactum globi à se invicem divisa haberent se alio modo, quam duo plana immediatè applicata ad invicem; non enim magis distarent: quia indivisibile non facit distantiam.

*Notabis* igitur, stare nostram sententiam in omni hypothesi, siue admittatur globus tangens in puncto mathematico, siue negetur; & in quacunque hypothesi sufficere indivisibilia virtualia, ad omnes difficultates explicandas.

### C A P. V I I I. *Corporis Quanti rarefactio, & condensatio.*

**Q**uia solum beneficio localis extensionis perficitur rarefactio & condensatio; ad hunc maximè tractatum attinet quæstionis istius explicatio.

*Notabis* enim 1. Aliam esse rarefactionem, aut condensationem improprie dictam, ut quando spongia, aut cera comprimitur, vel dilatatur man; ideoque tantum unâ ex parte vel crescit, vel minuitur, quantum vel decrescit, vel augetur ex aliâ. At in rarefactione proprie dictâ & naturali, partes omnes quantum est de se omnem in partem dilatantur. Ut quando  
aqua,

aqua , vel lac in lebete , igne supposito intumescit , totumque incipit replere lebetem sine ullâ novæ materiæ additione : cùm è contrâ in condensatione detumescit. Certè per additionem aut novæ aquæ , aut lactis novi , aliorumve id genus corpusculorum , sive aqua , sive lac non crescit ; quod enim in eo casu principium illius materiæ productivum assignari posset ? Item, ut sermo sit tantùm de quantitate essentiali , prout distinguitur ab extensione locali.

*Not. 2.* Non acquiri novam ejusmodi quantitatem veteri deperditâ. *Prob.* Quia pereunte subjecto , pereunt accidentia quæ ipsi inhaerent. Ergo si periret vetus quantitas , perirent consequenter & qualitates accidentales , tum notæ, & characteres ipsi existentes: quod repugnat experientiæ. Deinde , cùm species consecratae ad ignem applicatae rarefiunt, desinente ipsâ veteri quantitate , desinerent & omnes species consecratae ; nec proinde sub iis ampliùs contineretur Christi Domini corpus. Item, quæ nova quantitas eo in casu contingeret, produceretur extra omne subjectum : quod naturaliter fieri non potest. Præterea verò

*Not. 3.* In rarefactione, veteri quantitati non addi aliam novam , neque in condensatione interire. *Prob.* Quia nova quantitas veteri accedens , vel simul cum eâ esset in eadem parte materiæ ; & sic daretur naturalis penetratio ; vel certè careret omni subjecto ; quia nulla esset pars materiæ , quæ à veteri quantitate non informaretur. Item , in rarefactione specierum consecratarum , non posset explicari cuinam subjecto adveniret nova quantitas ; neque illa nova quantitas contineret Christi Domini corpus , quia non foret consecrata. Quare , cum  
alia

alia ratio explicandæ rarefactionis, aut condensationis non superfit.

*Dico* consequenter I. Fieri tantum illam per maiorem aut minorem extensionem localem, quæ de novo in iisdem quantitatis partibus producat. *Conf.* Quia hoc ipso quod eadem partes intelligantur positæ sub maiori extensione locali, quantitas intelligitur esse rarior; aut è contrà. Et verò, proprium est illius formæ facere magis, aut minus extensum localiter, quæ simpliciter facit extensum localiter. Quod solum competit extensioni locali, per quam ipsa quantitas eâ ratione modificatur.

*Notabis* igitur 1. Raritatem esse paucitatem materiæ sub maiori extensione locali. Rarefactionem autem esse acquisitionem maioris extensionis localis in iisdem partibus materiæ. Ac denique illud dici rarum, quod sub maiori extensione continet pauciores partes materiæ. Densum autem è contrà. Neque alia est ratio cur v. g. ignis condensatus fortius agat, nisi quia de facto plures habet materiæ partes sub minori extensione locali. Item

*Not. 2.* Quantitatem eandem hanc de se indifferentem esse ad maiorem, aut minorem extensionem localem: & sic posse vel minimam quantitatem, putà granum synapis, per Divinam potestatem crescere ad magnitudinem totius mundi; totumque ipsum mundum factâ minori extensione locali contrahi ad parvitatem grani synapis. Item etiam consequenter

*Not. 3.* Nullam esse raritatem aut densitatem in corpore quanto, sublatâ extensione locali. Sicque in corpore Christi Domini posito in V. Eucharistiâ, partes aliæ, defectu localis extensionis, non sunt formaliter & actu aliis rario-

rariores, sed tantum radicaliter, quatenus de se habent eas partes entitativas, quæ postulant talem extensionem localem.

*Not. 4.* In motu rarefactionis, cum partes eadem recipiant successivè majorem & majorem extensionem localem, non ideo plures simul remanere illius extensionis localis *modos*, quia per formalem incòmpossibilitatem unius cum alio, priores successivè intereunt, ad productionem successivam posteriorum.

*Dico I I.* Raritas & densitas non habent determinatæ causæ genus. Modò enim raritas ex calore, modò ex aliis qualitatibus prodit. Quamquam in istis sublunaribus vulgò æstimatur consequi ad calorem; quia in iis de facto calor præcipuè est causa raritatis. At

*Dico III.* Ex rarefactione prodeunt varii effectus. Qualis est vis illa & impetus, quo emittitur globus ex tormento bellico, ob subitam & vehementem rarefactionem, quam ignis in pulvere sulphureo conceptus ex se naturaliter emanat. Cujusmodi etiam effectus innumerabiles contemplari licebit in rebus meteorologicis.

#### APPENDIX. De Intensione Qualitatum.

**H**ic subjicienda est disputatio de *intensione* qualitatum, quia per aliquam proportionem cum extensione locali explicari debet.

*Suppono* igitur proprium esse qualitatis ut intendatur, aut remittatur, id est, ut suscipiat magis aut minus; seu fiat majoris, aut minoris perfectionis; unde etiam reddatur vel magis, vel minus activa. Sic lumen, aut calor idem modò intensior est seu vehementior, modò remissior, unde & subjectum dicitur vel magis, vel minus calidum; atque ita de aliis: quam-

quamobrem intensio definiri solet ; Perfectio qualitatis in eadem parte subjecti : & sic qualitas sumitur non tantum secundum *extensionem* quam habet in subjecto materiali localiter extenso , sed etiam secundum *intensionem*. Cujus quidem intensionis latitudo à philosophis dividi solet certas in partes , quas *gradus* vocant ; atque intensissimæ quidem qualitati gradus octo attribuunt ; quorum primi dicuntur *remissi* ; excellentes autem vocantur *intensi*.

*Notandumque* est , eo sensu qualitatem , ubi intenditur ; magis veluti radicari in subjecto , ut quidem loquuntur alii , quia hoc modo vires acquirit majores , unde fortius inhaereat subjecto , difficiliusque ab eo expelli possit. Tunc autem accidens , quemadmodum habetur in metaphysicâ , simpliciter est radicatum in subjecto , quando ab eo emanat , & emanativè in eo conservatur , ut calor in igne. Item

*Not. 2.* Non fieri ejusmodi radicationem , seu majorem intensionem , nisi per additionem novæ alicujus entitatis & perfectionis. *Prob.* Quia idem entitativè calor sine ullâ novæ perfectionis realis additione , non faceret subjectum magis calidum , nec foret magis activus ; item , nec deberet dici calor in igne esse major quàm in aquâ tepidâ ; perinde enim est utrobique in omnibus subjecti sui partibus. Item , neque ex eo præcisè dicitur fieri intensior , quod removeatur qualitas contraria. Quia intenduntur qualitates etiam quæ non habent contrarium ; ut lumen. Ita charitas , ex Concil. Trid. intenditur , abstrahendo ab omni contrario , siquidem non reperitur cum statu peccati mortalis. Quod perinde existimandum est saltem de multis aliis qualitatibus spiritualibus. Quanquam nihilominus ,

Dico

**Dico I.** Qualitas non intenditur per additionem qualitatis unius ad aliam ejusdem rationis qualitatem, seu per gradus realiter distinctos, sive homogeneos, id est similis inter se perfectionis, sive heterogeneos, id est majoris & majoris perfectionis, saltem individuae. Sic Arist. 8. phys. t. 84. ubi ait *ex calido fieri magis calidum, nullo facto in materia calido.*

**Probat**ur 1. De homogeneis. Quia intensio est quædam qualitatis perfectio, unde consequenter se habet ut perfectivum, comparative ad ipsam qualitatem tanquam ad perfectibile. Atqui perfectivum & perfectibile non sunt ejusdem rationis; sunt enim ut actus & potentia. Et verò si multi calores, etiam rationis ejusdem simul positi, calorem constituunt non tantum extensive, sed & intensive perfectiorem, fieri tunc posset calor infinite perfectus, si calor qui diffusus est per omnes subjecti partes in unam cogere-tur; ergo & esset infinite activus. Quod quidem argumentum valet maximè contra eos qui supponunt in quantitate partes esse actu distinctas. At saltem contra alios sic urgeri potest: Non opus est majori virtute in igne ad producendas caloris partes illas quascunque in eadem parte subjecti, quàm in variis subjectis. Ergo cum possit in variis subjectis in infinitum, quæritè circum apponerentur, partes caloris varias producere, ut omnes fatentur; posset & in eadem. Immo calidum ut duo posset producere calidum ut octo, & plures in infinitum; Nam in octo & pluribus in infinitum subjectis circumpositis posset producere aliquos gradus caloris, qui, Divinitus saltem, coacti unam in partem subjecti, redderent summæ illius intensiõnis calorem. Quinetiam & deberet idem præstare in eadem

eâdem parte subjecti, quod præstat in pluribus circa positis. Neque enim secundus & alii consequentes gradus superarent vim illius activam, siquidem supponuntur esse omnes ejusdem rationis. Item, in eâ sententiâ, simile secundum intentionis gradum, puta calidum ut quatuor posset agere in aliud simile. Posset enim alium gradum caloris super illi addere: quid enim impediret, si omnes sunt perfectionis ejusdem?

Omitto dicere, quòd in eâ sententiâ, plura accidentia solo numero distincta reperirentur naturaliter in eâdem parte subjecti. Quod quidem etsi verum est de accidentibus intentionalibus, ut habetur in Tract. de Anima sens. *Disp. 2. De specie intentionali, cap. 2.* Ut quando plures species intentionales objectorum similium sunt in eâdem parte aëris; aut quando simul habeo plures cognitiones distinctas hominum diversorum: idem tamen non contingit in iis maximè accidentibus, quæ dicuntur alterativa, & dispositiva ad formam substantialem; ne simili ratione dicerentur esse naturaliter posse plures simul formæ substantiales in eâdem materiâ. Quod repugnat iis quæ docuimus in hac Phys. univers. *primâ parte Tract. 1. Disp. 3. cap. 2.*

*Prob. 2. De gradibus heterogeneis.* Cùm enim in istâ sententiâ supponatur unus gradus ab alio perfici; consequens est ut sit diversæ ab illo rationis; siquidem, ut suprâ aiebam, perfectivum & perfectibile non sunt ejusdem speciei. Atqui qualitas ab aliâ diversæ speciei non intenditur, ut patet inductione. Item, secundus gradus est perfectioris virtutis quàm primus; adeoque per se præstat id quod fieri potest à primo: ergo frustra remaneret primus cum secundo;



cundo; & sic de aliis: ergo non essent plures simul distincti gradus ejusdem qualitatis in eadem parte subjecti. Denique verò, ubi calidum ut 8. agit in frigidum ut 8. singuli caloris gradus deberent agere in singulos frigoris oppositi gradus. Quid enim vetaret? Ergo simul omnes expellerentur, simulque produceretur totus calor ut 8. quod repugnat experientiæ. Quare ut probabilius philosopher cum Aristotele, loco citato, & cum insignioribus Thomistis ex mente D. Thomæ:

*Dico I I.* Novam eam entitatem quæ producitur in intensione, aut remissione; & per quam ipsa qualitas magis aut minus subjectum afficit; novam, inquam, eam entitatem esse novum quemdam modum & actualitatem, seu perfectionem qualitati realiter superadditam; quo pacto per proportionem extensio localis est modus aliquis quantitati superadditus, per quem in ordine ad locum perficitur. *Prob.* Quia refutatis superioribus sententiis, nihil superest, nisi ut istud asseramus, juxta Aristotelem; nec ullam patitur difficultatem hæc philosophandi ratio. Ergo est admittenda.

*Notabis igitur I.* Quodd quemadmodum quantitas non existit naturaliter sine modo extensionis localis sibi superaddito, ita nec qualitas sine modo intensiōis. Item, ut modus extensionis localis non est quantitas, sed tantum ipsius quantitatē perfectio quædam modificativa; nec in rarefactione, aut condensatione acquiritur aut deperditur nova quantitas, sed tantum illa modificatio: ita in intensiōe, aut remissione v. g. caloris, remanet semper eadem qualitas essentialis, puta calor idem essentialis, aut acquiritur, aut deperditur novus calor.

calor, sed tantum ille intensificationis modus, qui proprie etiam non appellatur qualitas. Item, sicut quantitas eadem de se est indifferens ad quamcunque extensionem localem; ita perinde per proportionem qualitas eadem & ad quamcunque intensificationem.

*Notabis* enim 2. Modum hunc intensificationis fieri perfectiorem & perfectiorem quasi per gradus quosdam virtuales, ita ut quæ actualitas, seu modus intensificationis est perfectus ut 4. superet in perfectione actualitatem seu modum ut 3. vel ut 2. vimque illorum & perfectiones in se contineat eminenter. Etsi autem illæ qualitates perfectiores & perfectiores, habeant aliquam inter se heterogeneitatem; non differunt tamen plusquam numero; majorque illa aut minor perfectio sequitur tantum ad differentiam individualement. Certè species intentionalis repræsentativa Petri, magis differt à specie repræsentativa Pauli, quam ab aliâ specie repræsentativa ejusdem Petri; nec tamen illæ omnes species differunt inter se nisi individuo; ergo non omne quod plusquam numero differt, saltem secundum quid, differt specie essentiali. Item

*Not.* 3. Modum illum intensificationis, prout sumitur *in fieri*, quando fit successivè, esse ens successivum, quod fit per partes post partes, non tamen simul permanentes; eâ per proportionem ratione quâ dicunt alii in motu locali successivè produci ubi locationem fluentem; tum ubi locationem illam fieri permanentem, quando amplius ultra non tenditur. Quid autem partes ejusmodi priores & posteriores non remaneant simul. *Prob.* Quia frustra permanerent priores cum posterioribus, siquidem istæ sunt præ-

præstantiores, possuntque idem & perfectiori modo præstare quod priores. Ergo necesse est perire priores per formalem impossibilitatem cum istis posterioribus.

*Not. 4.* Intensivus modum hunc conservari in qualitate per vim ipsius veluti emanativam, nec remittitur, saltem in contrariis qualitatibus, nisi posito contrario tanquàm conditione sine quâ non. Ita enim calor *v. g.* cùm in sui conservationem incumbat quantum potest, non emanat remissiorem intensivis modum, nisi eâ proportionem quâ redditur insufficiens ad retinendum perfectiorem, propter contrarietatem qualitatis oppositæ. Quæ autem inter naturales qualitates non habent contrarium, ut lumen, illæ ut plurimum intensivis modum suum non conservant ullâ ratione sine influxu actuali agentis à quo pendent in suo esse: nec *v. g.* luminis intensi remissio explicatur, nisi ex eo quoddam minorem influxum recipiat ab agente sui productivo.

*Not. 5.* Latitudinem intensivis, etsi respectu potentie Divinæ crescere in infinitum possit, naturaliter tamen certos habere terminos, tum virtute agentis naturalis, tum capacitate subjecti, seu rerum ipsarum exigentiâ definitos. Primum enim cùm agens naturale vim habeat tantum finitam, non potest attingere effectus nisi finitos. Quod autem spectat ad ipsum subjectum, puta corpus naturale, talem tantum postulat, non majorem qualitatum suarum intensivis; alioqui destrueretur, puta si lignum fieret calidum ut 8; & sic de aliis.

*Dico III.* Rei cuilibet propriè & per se non convenit intèndi, aut remitti. Ita ex Aristot. essentia dicuntur esse ut numeri. Quemadmodum

dum enim v. g. binarium non potest esse magis aut minùs binarium, quàm aliud quodvis binarium; ita per proportionem homo non potest esse magis homo, quàm quivis alius homo; quamvis secundùm accidentalia, aut etiam personalia possit esse perfectior. Quam ob causam inter substantialia, forma substantialis dicitur non recipere magis & minùs. Quod satis ipsâ patet experienciâ. Si enim imminuto aquæ frigore, forma substantialis aquæ defectum pateretur; non posset sese ad pristinum gradum revocare; uti videmus contingere. Et verò cùm forma substantialis detur *supposito*, tanquam fundamentum ipsius esse completi, & omnium proprietatum; necesse est consequenter ut illud sit fixum atque invariabile.

Quod spectat quantitatem, etsi potest esse major & minor, certum est quoque ipsam non recipere magis aut minùs: quo pacto bipedale non potest esse magis bipedale; si enim excederet, jam defineret esse bipedale. Et sic de aliis.

Item, nec Relationi per se convenit intensio vel remissio. Quodd enim v. g. albedo dicatur fieri cum alia albedine magis aut minùs similis, illud oritur solùm ex majori aut minori intensione qualitatis.

Dico igitur I V. Qualitatibus duntaxat propriè & per se convenit intendi aut remitti. Quanquam nec omnis qualitas suscipit magis & minùs. Primò enim figura, quæ ex Aristotele habet locum inter qualitates, licet possit esse major aut minor, non tamen suscipit magis & minùs. Quo pacto sphæricum non potest esse magis sphæricum, &c. Ita nec quædam qualitates secundæ speciei, ut animæ facultates, nonnullæ saltem, non suscipiunt magis & minùs.

Cùm

Cùm enim anima emanet suas facultates, nonnullas saltem, quantum potest, quia contrarium non habent, nihil impedit quominus illas habeat secundum omnem perfectionem. Sicque ajunt vulgò de intellectu, de voluntate, & de nonnullis aliis, quæ licet modò perfectiùs, modò imperfectiùs operentur, id evenit solùm ex defectu qui reperitur in organo.

## DISPUTATIO II.

### DE INFINITO.

#### CAP. I. *Natura infiniti.*

**I**nfinítum esse illud dicitur, quod finem seu terminum non habet; & à quo secundum quantitatem accipientibus, semper aliquid superat accipiendum. Et in eâ quidem *infiniti* acceptione convenire omnes debent, ne in institutendis generis istius quæstionibus, sola sit disputatio de nomine. At

*Not. 1.* Aliud esse infinitum *secundum essentiam*, seu quod in sua ratione essentiali possibiles omnes perfectiones continet. Aliud verò est infinitum duntaxat secundum accidens, quod in aliquâ ratione sibi accidentali finem non habet: puta si corpus dicatur esse extensionis infinitæ; si calor infinitæ intensiõis; si res fuerint numero infinito, &c. Præterea

*Not. 2.* Aliud quoque esse quod dicitur tantum *comparativè* infinitum; quando res tantæ est perfectionis, ut possibilibus aliis inferioris ordinis etiam infinitis dignitate præstet. Quo pacto v. g. homo species tum plantarum, tum brutarum animantium omnes in infinitum possibiles superat naturæ perfectione; quanvis ipse

ab alio, puta ab Angelo superetur. Alioquin illud dicitur *absolutè* infinitum, quod alia omnia superat, & à nullo superatur. Agiturque tantum hoc loco de isto genere infiniti. Item,

Not. 3. Aliud etiam duplex esse infiniti genus: ac primò quidem *infinitum actu*, secundò autem, *infinitum potentiâ*. Infinitum actu illud est, quod secundum rationem suam actualem, seu secundum ea quæ actu continet, nullo terminatur fine. Vocaturque infinitum *simpliciter*, & *categorematicè*; quia, quemadmodum in Dialecticâ terminus ille dicitur categorematicus, qui per se, & absque addito significat: ita illud dicitur infinitum categor. quod simpliciter est infinitum. Nam

Infinitum potentiâ illud dicitur, quod in ratione actuali quam habet, aut quæ in eo assignari potest, semper quidem est finitum, sed est simul cum potentiâ ad aliud sine termino. Cujusmodi ratio infiniti rebus iis convenit, quæ semper crescere, aut minui possunt; vel si lubet, in quibus fit processus in infinitum sine termino. Ut quando agebamus continuum esse divisibile in infinitum. Vocatur autem infinitum duntaxat *secundum quid*, & *syncategorematicum*, quia de se est tantum quid finitum, nec habet rationem infiniti, nisi quatenus semper est in potentiâ ad aliud; unde & appellari solet *infinitum potentiâ*. Quamobrem

Not. 4. Istud infiniti genus medium tenere locum inter finitum simpliciter ac simpliciter infinitum; & habere utriusque participationem quandam: Nam quæ in eo sunt actu, aut determinata, semper finita sunt, non tamen sine potentiâ ad aliud in infinitum. Quamobrem solemus dicere in eo esse *finita in infinitum*; seu non

*tot quin plura.* Item, infinitum illud dicitur esse essentialiter indeterminatum; quod semper involvat potentiam ad aliud indeterminatè, & sine termino. Quare ut de naturâ infiniti in communi statuamus:

**Dico I.** Contra nonnullos recentiores, infinitum claudi terminis non potest. Ita Arist. 8. *phys.* dum negat fore primum movens, aut primam causam, si datur processus in infinitum quoad causas subordinatas & actu existentes. Nam in infinito, ut inquit, non potest reperiri terminus. Tum *lib. de sensu & sensibili c. 6.* quorum sunt ultima, seu extrema, ea necessariò finita sunt. Alioquin unde opponeretur infinitum finito? cur perinde aliquod finitum dici non posset infinitum, si infinitudini non obstat *finis* aut *terminus*? Et verò etiam inde sequeretur quantitatem, v. g. pedalem esse actu infinitam. Quod ostendo, *suppositâ figurâ 12. Tabula ad finem libri appositâ*, in quâ supra pedalem basim *b. c.* fingantur esse producta latera infinita hæc duo, nempe latus *b. a.* perpendiculare, tum latus *c. a.* cum ipso concurrens tandem in puncto *a.* siquidem, ut volunt, potest infinitum sic terminari. Quâ factâ hypothesi, designentur in latere *a. c.* partes semipedales infinitæ non enim repugnat designari partes ejusmodi infinitas in longitudine quæ supponitur esse infinita. Deinde ex singulis illis partibus semipedalibus ducantur lineæ parallelæ lateri *a. b.* quæ proinde cadant perpendiculariter in basim *b. c.* Ex his erit consequens ut in basi *b. c.* designentur partes infinitæ alicui determinatæ parti æquales; tum quantitatem hanc pedalem *b. c.* esse actu infinitam, quod implicat; ergo implicat & antecedens unde istud infertur, nimirum posse

dari infinitum clausum terminis. Atque inde consequenter

*Dico I I.* Infinitum pertransiri non potest. *Prob.* Quia finis illius attingi non posset; siquidem careret fine. Item, magnitudo infinita nullam haberet proportionem, saltem mathematicam, cum finitâ: hæc enim in infinitum replicata, ipsam adæquare nunquam posset; quia ipsam pertransire totam nequiret. Item, à quantitate infinitâ possent in infinitum novæ & novæ magnitudines, uni etiam certæ æquales & majores accipi; nec tamen exhauriretur unquam. Quia ex hypothese finem non haberet.

*Dico I I I.* Non potest etiam id quod est actu infinitum, ab alio superari, seu esse illo minus. *Prob.* Quia quatenus ab eo superaretur, seu quatenus post ipsum relinqueretur, ut ajunt, tum intelligeretur esse finitum: ergo simul esset finitum & infinitum. Item, superaretur excessu vel finito vel infinito; si infinito solùm; inde sequeretur rem etiam superantem non esse infinitam, quia finitum non superaret nisi finitâ magnitudine, quæ consequenter pertransiri posset. Sin excessus ille est infinitus, sequitur rem superatam non esse infinitam, in quâ scilicet desideraretur perfectio infinita. *Respondent* adversarii: Quomodo ex duobus v. g. numeris hominum finitis, posset alter crescere in infinitum materialiter, additis nimirum novis & novis hominibus qui sunt subiectum seu materia illius numeri, nec tamen ille numerus desineret esse formaliter finitus. Ita, inquiunt, potest unum infinitum esse alio majus secundum materiale, cum tamen in ratione formali infiniti non fiat magis & minus, nec unum ab alio superetur. Sed *negatur paritas.* Quia excessus finiti



finiti supra finitum, in eo non destruit rationem finiti: quia finem, seu aliquam semper ultimam unitatem servat. At multitudo v. g. hominum quæ ab aliâ superatur pertransiturque, ex eo præcisè quodd pertransitur, intelligitur habere finem, seu terminum. Neque enim quidquam ab alio pertransitur, nisi quia ultra illius finem tendit. Ergo in eo supponit finem. Item, quæ multitudo ab aliâ superatur, potest ulterius crescere per additionem illarum unitatum quibus superatur: ergo habet ultimam unitatem: non enim in numero fit additio, nisi ad ultimam ejus unitatem. Quod autem habet ultimum, habet & finem, nec proinde potest esse infinitum. *Conf.* Quia unitates in illâ multitudine non sunt quid distinctum ab ipsis hominibus: ergo ubi sunt plures homines, ibi sunt & formaliter plures unitates, ac proinde numerus formaliter major: ergo sic daretur numerus formaliter infinitus major alio numero infinito. Nec proinde posset non esse finitus ille numerus qui foret minor: ergo esset finitus simul & infinitus.

**C A P. II.** *Alia Infiniti attributa essentialia.*

**D**ico præterea I. Infinito simpliciter nihil addi potest in eo genere in quo est infinitum. *Prob.* Quia per additionem illam fieret majus: ergo antea non erat infinitum, cum esset isto minus; quod est contra hypothesim. Quare

*Dico II.* Infinitum simpliciter in aliquo genere, puta infinitum Angelorum, continet quicquid in eo genere est possibile. *Prob.* Quia posset aliquid addi illi infinito: ergo non esset infinitum. Item

*Dico III.* Ad rationem infiniti absolute sumpti

sumpti non sufficit præcisè ut superet omne possibile in aliquo genere. Sic enim homo idcirco non est infinitæ perfectionis, quòd superet in naturæ perfectione omnes animalium species possibles infra se positas; siquidem nulum animal brutum potest attingere ad perfectionem rationalitatis. Ita etiam figura circularis aut sphaerica, licet omnium figurarum sit perfectissima, non ideo perfecta est infinite. *Prob.* Quia de facto ista sunt ex genere suo finita, & ab alio genere entium superantur in perfectione naturæ. Ergo ad rationem infiniti requiritur præterea ut superet quodcunque sine termino; id est, ut à nullo alio superari possit. Quineriam opus est, ut rerum possibilium perfectiones quas superat, contineat in sese aliquo modo. Sic enim musca v. g. non ideo diceretur esse altitudinis, aut molis infinitæ, quanvis ipsa resideret supra molem infinitam, quia molis ipsius dimensiones in se non contineret. Ita nec Deus diceretur esse ens infinite perfectum, nisi in eo forent, saltem eminenter, rerum omnium possibilium perfectiones.

*Objic.* Quod superat infinitum, si daretur, illud à fortiori est infinitum. Quo pacto aliquid superans calidum ut 100, si daretur, illud à fortiori esset calidum ut 100. C. Atqui homo in perfectione naturæ superat omnes aliorum animalium possibilium perfectiones, quæ de facto forent infinitæ, si actu existerent. Non enim essent tantum finitæ actu. R. Forent simul, & non forent infinitæ. Vt postea explicabitur.

*Inst.* 1. Quæ natura habet facultates infinitæ perfectionis, illa est infinitæ perfectionis. C. Atqui talis est natura humana. Nam habet intellectum infinitæ perfectionis. *Prob.* Quia quæ  
causa

causa potest effectus perfectiores, & perfectiores in infinitum sine termino, illa est infinitæ perfectionis; neque aliam ob causam potentia Divina est perfectionis infinitæ. Atqui intellectus humanus potest elicere perfectiores specie cognitiones in infinitum. R. Non potest solis viribus propriis elicere supernaturales: ergo sic haberet terminum suæ perfectionis.

*Inst. 2.* Saltem elevarus lumine gloriæ poterit perfectiores in infinitum, etiam supernaturales. R. Non poterit, nisi simul in infinitum augeatur gloriæ lumen, aut detur perfectior in infinitum concursus Divinus.

*Inst. 3.* Voluntas rationalis est infinitæ capacitatis, nec potest repleri nisi bono infinito. Ergo sic habet perfectionem infinitam. R. Secundum entitatem, & secundum intrinseca est finitæ perfectionis; etsi ratione boni extrinseci ad quod terminatur, possit dici infinita. Quanquam & huic bono infinito adhærere non potest, nisi finito modo.

*Dico I V.* Si daretur corpus infinitum, repleret spatium omne possibile; alioquin si posset comprehendi aliquo spatio, jam ex eo intelligeretur esse finitum. Item, non posset esse ullius figuræ: quia figura est terminus corporis extensi: atqui infinitum caret termino. Item, moveri localiter nequireret; aut motu recto, quia non haberet spatium majus se in quo moveretur: aut motu circulari. *Prob. Attendenda ad figuram 13. quæ supponitur pro corpore infinito.* In eâ enim figurâ consequenter linea *a. b.* & linea *a. c.* tendentes in infinitum, relinquerent spatium infinitum inter *b* & *c* quod pertransiri nisi tempore infinito non posset; ergo nec pariter punctum *e* in locum puncti *d*, quanvis brevioris

vioris intervalli, nequiret unquam succedere; quia non moveretur nisi ad motum lineæ *a. b.* in quâ continuatur. Ergo ille motus perfici non posset unquam; quia non posset perfici nisi tempore infinito.

*Dico V.* Non possunt esse duo simpliciter infinita, saltem in eodem genere; puta in Angelis. *Prob.* Quia infinitum Angelorum continet omnes Angelos possibiles: ergo nulli sunt præterea possibiles Angeli ex quibus constituatur aliud infinitum. Deinde unum alteri adjunctum, ipsum redderet majus: quod repugnat.

*Dico VI.* Ens simpliciter infinitum debet esse indivisibile. Neque enim posset dividi in duo infinita, ut jam aiebam. Neque etiam divisibile esset in duo finita. Quia duo finita simul conjuncta non constituerent infinitum; siquidem utrumque pertransiri posset. Ergo finem haberet. Quare ex dictis.

*Sequitur 1.* Infinito simpliciter, non modò quidquam addi non posse, sed etiam nec detrahi. Si quid enim detraheretur, jam non contineret omne possibile in eo genere; ergo, ut ostendi, esset & non esset infinitum.

*Sequitur 2.* Infinitum simpliciter neque esse partem, nec totum ex partibus, aut divisibile in partes. Quo etiam loco observabis, hîc sumi totum & quantitatem, non tantum pro quantitate *molis*, sed etiam pro quantitate *virtutis*; perinde enim ens perfectionis infinitæ, constare non potest ex variis perfectionibus formaliter inter se distinctis, aut ex genere & differentiâ; nec potest esse nisi unica & simplicissima perfectio, quanvis multis æquivalens, aut virtualiter multiplex: uti quidem ostenditur de Deo in *Metaphysicâ*.

*Notan-*

*Notandumque* est, hîc sermonem esse tantum de infinito simpliciter, seu categorematico; nam syncategorematicum est quid indeterminatum & simpliciter divisibile in multa, semperque habet potentiam ad alia, &c.

*Sequitur* 3. Rationem infiniti simpliciter non posse convenire nisi Deo, tanquam proprium ipsius attributum, nec proinde creaturis esse efficienter communicabile. Quod etiam argumentis à posteriori sequenti capite est demonstrandum. Vbi tamen prius observaveris *finitum & infinitum* posse tantum esse proprias affectiones quantitatis, sive illius quæ dicitur *quantitas molis*, sive quæ est *quantitas virtutis, seu perfectionis*. Quamobrem *punctum* non dicitur esse *finitum*, aut *infinitum*, quoad extensionem, quia nullam habet.

CAP. III. *Impossibilitas entis creati simpliciter infiniti.*

**Q**uæritur hoc loco, num possit existere ens aliquod productum à Deo, quod sit simpliciter infinitum, sive in essentiâ seu naturâ, quæ dicatur infinitæ perfectionis; sive in numero & multitudine; sive in extensione & magnitudine, qualem haberet corpus infinitum; sive in intensione, ut si daretur calor infinite perfectus.

*Statuunt* quidem aliqui, ex eo repugnare infinitum simpliciter, quodd sequeretur inde exhauriri omnipotentiam Divinam, quæ proinde non foret infinita; quia plura non posset. Sed hoc argumentum nihil probat. Nam scientia Divina est infinita, quanvis plura nequeat cognoscere, quàm quæ cognoscit ætè. Item potentia generativa Patris æterni infinita est, licet dicatur

catum exhausta in generatione Filii, nec possit Filium alium producere, qui eam ob causam dicitur essentialiter *unigenitus*. Ut igitur aliâ ratione philosopher,

*Dico I.* Impossibile est infinitum actu in numero, seu multitudine. *Prob. 1.* Quia sequeretur inde partem aliquam esse æqualem cum toto; nec totum esse majus aliquâ sui parte; quod manifestam habet repugnantiam cum ipso lumine naturali. Rem autem sic ostendo. Quia sub infinitâ multitudine v.g. Angelorum non containerentur tantum finiti binarii, aut finiti centenarii; alioquin finitus ille centenariorum numerus pertransiri tandem posset; ac proinde non constitueret numerum, seu multitudinem infinitam. Supponendum ergo est, in illâ Angelorum infinitâ multitudine contineri infinitos centenarios, tum infinitos binarios. Quâ quidem in hypothese, infinitum binariorum foret æquale cum infinito centenariorum; ergo pars aliqua esset æqualis cum suo toto; nec totum foret majus aliquâ sui parte, qualis est binarius numerus respectu centenarii. Hoc autem manifestam habet repugnantiam ad lumen naturale. Item, ex illa multitudine possent duo vel tres annihilari: ergo detracto numero finito, desineret esse infinita; quia possibiles Angelos omnes in se non containeret: additis verdè illis duobus, vel tribus Angelis, redderetur infinita; quod etiam implicat, quia tres illi numerum terminarent. Item, in infinito numero hominum, qui singuli plures digitos & capillos haberent, Deus cognosceret majorem numerum digitorum, aut capillorum, quàm hominum. Ergo contra hypothesein, ille hominum numerus minor, non esset infinitus; essetque ad-

mit.

mittendus numerus major maximo, & consequenter major infinito. Quod repugnat, ex dictis. Item, creet Deus mundos infinitos cum singulis arenulis, illi consequenter replebunt omne spatium possibile: tum annihilent mundos ejusmodi, servatis tantum singulis arenulis, quæ quidem cum essent infinitæ, deberent pariter replere spatium omne possibile, quod implicat.

Dico II. Repugnat quoque creari molem infinitam, seu infinitæ magnitudinis. *Prob.* Quia ex *Affertione 9. cap. 2.* repugnat infinitum esse divisibile; cujusmodi foret corpus infinitum. Item, ut in eo capite explicui, nullo motu locali moveri posset. Item, si in eo designentur duæ lineæ sese intersecantes; ex illâ intersectione & concursu recedent infinitè ab invicem; & sic intra se continebunt spatium infinitum: ergo sic daretur infinitum clausum terminis. Item, non repugnaret creari hominem infinitæ magnitudinis; in quo consequenter forent oculi, digiti, aliæque partes infinitæ magnitudinis: alioqui si finitæ solum forent, singulæ mensurari possent: ergo & totum ex ipsis conflatum; ergo, contra hypothesim, non esset infinitum: ergo illæ partes deberent esse infinitæ; cum tamen oculi *v.g.* capite circumscriberentur; atque ita de aliis partibus, ergo essent infinitæ clausæ terminis. Item, supponamus creari à Deo filum infinitum secundum longitudinem, tum convolvatur in globum: sequetur inde globum fieri infinitum, & replere spatium omne possibile; cum tamen antea repletet tantummodo spatium secundum longitudinem; unde & sequeretur partem esse æqualem suo toti.

*Notandumque* est, similiter repugnare Angelum infinitè extensum virtualiter, seu im-

mensum. Quia tam posset creari à Deo corpus infinitum; atqui ostendimus repugnare istud. Ergo & illud.

*Dico III.* Nec potest creari qualitas infinitè perfecta, seu intensionis infinitæ. *Prob.* Quia eodem modo ac suprà liceret argumentari contra numerum illorum graduum qui infinitam intensionem constituerent. Item, pari per proportionem modo foret divisibilis, parique modo posset imminui; ergo perinde non foret infinita.

*Dico IV.* Nulla creaturâ potest esse infinitè perfecta secundum essentiam, seu naturam. *Prob.* Nam illa vel haberet perfectionem intra limites alicujus speciei comprehensam; vel certè contineret possibilem omnem entis creati perfectionem. Neutrum dici potest. Quod enim ad primum spectat; nullum est ens determinatæ alicujus speciei, quod non excludat à se perfectiones aliarum specierum quæ dividunt genus sub quo est. Item, cum habeat compositionem ex genere & differentiâ, includit potentialitatem: ergo & imperfectionem seu perfectibilitatem. Item, superari posset in perfectione ab aliâ specie præstantiori. Quibus ex singulis capitibus repugnat esse infinitæ perfectionis. Quod ad secundum attinet; repugnat etiam, non tantum quod haberet compositionem ex genere & differentiâ, quia est illud commune omni substantiæ creatæ; sed præterea sequeretur creaturam illam habere ex naturâ suâ gratiam sanctificantem, lumen gloriæ ad videndum Deum, adeoque esse naturaliter impeccabilem. Item, haberet vim agendi infinitam, possetq; producere quidlibet; hoc autem repugnat. Item, haberet saltem hanc sibi essentialem imperfectionem.



fectionem, quòd esset ab alio dependens; nempe à Deo, sicque esset defectibilis, mutabilis, annihilabilis, &c. Item, superari posset ab aliâ possibili creatura perfectiori. Ergo ex eo etiam capite non foret infinita.

*Dico V.* Nulla est assignabilis creatura tam perfectæ naturæ, quâ perfectior creari à Deo non possit. *Prob.* Quia non posset adæquare latitudinem omnipotentia Divinæ. Item illa semper esset infinitè distans in perfectione à Deo: ergo aliæ forent possibiles, à quibus magis & magis participaretur Deus. Nam in Deo sunt, ut ita loquar, infiniti modi & perfectiones secundum quas est participabilis, nec exauriri potest; siquidem ex infinito accipientibus semper est aliquid accipere. Aut certè, diceretur alioqui creatura adæquare perfectionem Divinam; sicque esset tam potens, tam sancta ac Deus, &c. Quæ admitti non debent.

*Atque ex dictis quidem sequitur 1.* Non posse dari creaturam omnium absolutè perfectissimam; etsi detur omnium imperfectissima in genere substantiæ, qualis esse potest materia prima. Item, nec possibilem esse numerum omnium maximum, etsi binarius dicitur de facto omnium minimus. Item, nec possibilem esse quantitatem molis omnium maximam; quomodo nec potest etiam dari omnium minima, quia est divisibilis in infinitum.

*Sequitur 2.* Collectionem creaturarum omnium possibilium, seu creaturas omnes collectivè sumptas esse impossibiles, nec esse nisi ens chymæricum, quanvis singulæ distributivè, seu determinatè & seorsim sumptæ, nullâ exceptâ, produci actu possint. Quare, quæ sunt distributivè possibilia, non ideo sunt collectivè possibilia;

nec valet consequentia à distributivo ad collectivum, quando prædicata important aliquod genus quantitatis: ut si dixeris *quilibet homo est hic unus*; ergo omnes simul sumpti sunt hic unus homo. Item, nulla est pagina istorum voluminum, quam dimidio quadrante non possim perlegere; ergo possum omnes collectivè dimidio quadrante perlegere. Valet autem illa consequentia, quando prædicata singulis secundum se conveniunt. Ut, *quilibet homo est animal*. Ergo omnis.

Sequitur 3. Totam multitudinem rerum possibilem quam cognoscit Deus, non debere dici infinitam simpliciter, sed tantum syncategorematicè; seu finitam in infinitum. *Prob.* Quia cognitio Dei; cum sit perfecta, res alio modo non attingit, quam in se sint, aut esse possint. Ergo quandoquidem impossibilis est rerum omnium possibilem collectio, unde nimirum sint tot determinatè & non plures, talem collectionem per se non cognoscit; sed tantum plura, & plura indeterminatè, & in infinitum, seu non tot quin plura sine termino. Quo pacto videns omnes annos, diesque & horas posibles per totam æternitatem; item & omnes futuras per totam æternitatem cogitationes Angelorum, non videt tot tantum & non plures, seu numerum earum determinatum; alioquin videret finem æternitatis; quod implicat; eamque ob causam dicitur tantum videre non tot quin plures. Ita per proportionem res se habet de creaturis possibilem; etsi enim omnes, nullâ exceptâ videat simul, *simultate cognitionis* & *simultate objecti*, seu *simultate esse objectivi*; non tamen eas videt simul *simultate esse realis*, aut *possibilis existentie*; nec eas sic videndo simul colligit, sed tantum videt eas esse non tot quin plures

res possibiles, ut dixi de partibus æternitatis; quod vulgò quoque ajunt de partibus continui possibilibus. Neque verò etiam necesse est, ut quæ sunt simul simultate objecti & cognitionis, possint esse simul secundum rem. Sic enim Divinæ cognitioni simul objiciuntur partes motus successivi, & anni totius, quæ tamen non possunt esse nisi aliæ post alias.

*Sequitur 4.* Omnipotentia Divinæ objectum esse duntaxat infinitum syncategorematicè; quatenus creaturas sese superantes essentialiter, seu species creaturarum, pro libito suo potest producere non tot quin plures in infinitum. In quo differt à causis creatis, quæ possunt quidem plures in infinitum effectus attingere, sed non sese essentialiter superantes versus maximum, ut loquuntur. Item, illa omnipotentia circa objectum suum, seu circa omnes creaturas possibiles versari adæquatè non potest, sed tantum inadæquatè. Item, non habet Deus omnipotentia suæ objectum, nisi de se indeterminatum. Quamobrem nullum effectum potest attingere, nisi ad illum ex liberâ electione sese determinando. Quo pacto etiam non potest applicare illam omnipotentiam ad divisionem partium omnium continui, sed tantum ex electione ad aliquas sese determinando. Item, cum ajunt objectum Divinæ potentia ad extra, esse omne possibile; tunc illud *omne* sumitur tantum *distributivè*, non autem *collectivè*. Negandumque est semper omne distributivè possibile, esse possibile collectivè.

*Notandumque* est, maximi momenti esse hanc doctrinam pro rebus Theologicis. Neque enim suppositâ possibilitate creati infiniti, valerent argumenta D. Thomæ ad demonstrandam Dei  
exi-

existentiam, contra processum in infinitum; aut ad demonstrandam Dei simplicitatem, aliasque ejus perfectiones; ut patet ex iis quæ diximus in *Metaphysicâ De Deo*.

#### CAP. IV. *Solvuntur Objectiones.*

**O***bjic. 1.* Extensio infinita non superat vim cogitationis humanæ. Ergo datur. Ita nuperus quidam scriptor. *Rz.* Non superare quidem vim cogitationis humanæ, sive veræ, sive falsæ: possetque eodem modo probari existentia chymaræ.

*Inst. 1.* Ex Arist. finitum & infinitum esse proprietates quantitatis. Ergo hæc cogitatio infiniti non est chymærica. *Rz.* Illud infinitum sumi tantum debet pro syncategorematico; sic enim de facto quantitas continet potentiâ partes finitas in infinitum. Cum è contrâ ipse Arist. expressè neget infinitum categ. creatum, eoque nomine scribat esse *ignotum*.

*Inst. 2.* Ex ejus doctrinâ de Mundo, & de rerum generationibus ab æterno; tum suppositâ etiam ejus doctrinâ de immortalitate nostræ animæ, sequitur jam existere animas rationales actu infinitas. *Rz.* Sequeretur illud quidem; sed mirum non est, quodd errorem suum de æternitate mundi non conciliarit cum suâ doctrinâ de infinito; nam verum cum falso coherere nequit. Quanquam alii scribunt Aristotelem admisisse metempsychosin, seu transmigrationem animarum ad alia ejusdem speciei corpora; neque hac in parte impugnasse Pythagoram, nisi quatenus docuit transire in alia etiam diversæ speciei corpora.

*Objic. 2.* Illa propositio *creatura est infinita*, non involvit ullam contradictionem; non enim  
in

in eâ est simul affirmatio & negatio de eodem.  
*Dist.* Non involvit *formaliter*. C. *Consequenter*.  
 N. Ex eâ enim sequuntur omnes contradictiones  
 suprà allatæ.

*Inst.* 1. Infinitum non pugnat cum creaturâ,  
 sive ex parte entis ut sic, cùm reperiatur in ente  
 Divino. C. Neque ex parte producti ab alio; si-  
 quidem hoc competit personæ Divinæ ab alia  
 productæ. C. Neque ex ratione infiniti, quia re-  
 peritur in Divinis. R. Repugnare ex parte infi-  
 niti conjuncti cum ente creato, seu producto ex  
 nihilo sui.

*Inst.* 2. Conceptus entis creati ut sic, abstra-  
 hit à finitudine aut infinitudine; aliudque nihil  
 dicit secundum essentiam, quàm esse ab alio ex  
 nihilo sui. Ergo finitudo non est ipsi essentia-  
 lis, nec de se cum eo pugnat infinitudo. R. Pu-  
 gnat *consequenter*. Nam & enti creato adjuncta  
 est essentialiter finitudo; non quidem ut princi-  
 pium essentiæ constitutivum, sed ut ratio essendi  
 propria.

*Inst.* 3. Etsi poneretur creatura infinitæ per-  
 fectionis, puta calor infinitè perfectus; non ideo  
 desineret esse creatura; non enim ideo intelligen-  
 retur esse Deus, aut æqualis Deo. Siquidem in-  
 telligeretur semper esse ens dependens à Deo;  
 esse accidens, &c. *Dist.* Intelligeretur esse talis,  
 & non talis, saltem *consequenter*. Ex eo enim  
 quòd haberet rationem essendi propriam Dei,  
 intelligeretur esse Deus; quavis aliunde nega-  
 retur esse Deus. Vuo verbo, ex hypothesi res  
 esset actu infinita; absolutè verò simul non esset  
 infinita. Quod implicat.

*Objic.* 3. Deus est infinitè bonus: ergo infi-  
 nitè sui communicativus, non tantum ad in-  
 tra, sed etiam ad extra; quomodo etiam infinito  
 modo

modo sese communicavit naturæ humanæ in Christo. *Dist.* Esto, sit infinitè sui communicativus *formaliter* per unionem hypostaticam. At nego sic esse sui communicativum *efficienter*, producendo effectum infinitum.

*Inst.* 1. Habet infinitam actu potentiam. C. Ergo quæ possit infinitum actu. N. *Conf.*

*Inst.* 2. Ut se habet potentia finita ad finitum effectum, ita infinita ad infinitum. N. *pari:atem*; quia infinitus effectus de se repugnat; neque ulla est potentia ad impossibile.

*Inst.* 3. Modus essendi in Deo est infinitus. Ergo & modus operandi; quia debet sequi modum essendi. *Dist.* Modus ille operandi est infinitus eo sensu, quod sit ad plura in infinitum se superantia in perfectione essentiali; non autem quod possit esse ad infinitum actu.

*Inst.* 4. Sic omnipotentia Divina tantum attingeret effectum actu finitum. C. Ergo nunquam habere posset sibi proportionatum; nam ut effectus causæ finitæ proportionatus, est finitus: ita potentia infinitæ respondere debet infinitus. *Dist.* Infinitus actu. N. Infinitus potentia. C. Nempe effectus nunquam terminans vim agendi Divinam, ita ut semper ultra possit.

*Inst.* 5. Quâ proportionem crescit potentia; ita & effectus ipsi respondens. C. Ergo si potentia crevit infinitè, effectus illi respondens debet esse infinitus. R. Si potentia creata sic crevit infinitè, debet illi respondere effectus infinitus. C. Quia ex hypothese illâ impossibili, potest admitti ejusmodi effectus ad illam consequens.

*Inst.* 6. Potest Deus id omne quod posset fieri à creaturâ infinitâ, aut à creaturis infinitis, si darentur. Atqui creaturæ illæ possent infinitum.

*Dist.* *Ant.* Possent ex illâ hypothese. *Conc.* At illa

illa hypothesis falsa est. Nec verum est absolute posse illud fieri à Deo, quod fieret à Chymarâ, si existeret : idem enim est ac si diceretur posse à Deo fieri impossibile, ex hypothesis quod possit fieri.

*Inst. 7.* Cùm Deus sit infinite virtualiter extensus, possitque operari ad extra ubicunque est; sequitur posse ab eo produci magnitudinem ipsi adæquatè coextensam : ergo infinitam. *Dist.* potest operari ad extra ubicunque est distributivè. C. Collectivè. N.

*Inst. 8.* Deus potest facere actu, quicquid potest facere actu : seu potest producere actu hoc instanti omnes creaturas possibiles, quas potest producere actu hoc instanti. Quæ propositio, cùm sit identica, vera est. Atqui creaturæ possibiles quas potest producere actu hoc instanti, non sunt tantùm finitæ, alioquin potentia Divina non diceretur infinita. Ergo sunt infinitæ actu. R. 1. Majorem non esse veram, aut identicam : quia subjectum sumitur in sensu distributivo, prædicatum autem in colectivo : ergo non habent eandem suppositionem. R. 2. Non potest Deus facere quidquam hoc instanti, nisi finitum. Non enim potest nisi id ad quod sese per electionem determinaverit. Ut suprâ monui.

*Inst. 9.* Potest producere hoc instanti creaturas omnes eas, quas diversis temporibus per totam æternitatem potest producere. Atqui illæ non sunt finitæ actu. *Dist. Ma.* potest eas producere, quæ diversis temporibus distributivè & determinatè sumptis sunt producibiles. C. Vel si lubet ; potest eas producere quæ sunt producibiles diversis per totam æternitatem temporibus distributivè & determinatè sumptis. C. Collectivè sumptis. N.

*Inst.*

*Inst.* 10. Nulla est ex creaturis possibilibus quam hoc instanti non possit producere; alioquin non esset possibilis ea quæ à Deo produci non posset. *Dist.* Nulla est quæ seorsum & distributivè hoc instanti produci non possit. *C.* Quæ collectivè. *N.*

*Inst.* 11. Entium permanentium existentia non impedit aliorum existentiam. Nam *v. g.* existentia Angeli cujuscunque, non habet nllum oppositionis genus cum existentia aliorum quorumcunque possibilium Angelorum. Ergo simul possunt existere. *Dist. Ma.* Existentia Angeli cujuscunque distributivè sumpti non impedit existentiam aliorum, si distributivè seu seorsim sumuntur. *Conc.* Si collectivè sumuntur. *N.* Deinde cum ajunt nullum hîc intervenire oppositionis genus. *R.* *Dist.* Nullum intervenit formaliter & directe. *Trans.* Nullum intervenit consequenter. *N.* Habent enim consequenter contradictoriam oppositionem.

*Inst.* 12. Potest Deus ea omnia jam producere, quæ potest velle producere. Nam, ut loquitur scriptura sacra, *omnia quacunque voluit fecit.* *Conc.* Atqui potest velle adæquatè & collectivè omnes creaturas possibles producere. *N. min.* Quia non potest velle nisi sapienter, ac proinde non potest velle nisi quod videt possibile, & ad quod sese determinare potest.

*Inst.* 13. Potest velle facere maximam creaturarum collectionem; aut creaturarum omnium perfectissimam quam potest. Atqui illa erit infinita: ergo potest facere infinitam. *R.* Iam negavi posse fieri maximam, & consequenter etiam ab eo talem cognosci; cum ultimum potentia suæ non cognoscat. Quo pacto per proportionem aiebam non cognosci ultimam



nam ex cogitationibus Angelorum futuris per totam æternitatem.

*Inst.* 14. Si Deus esset agens necessarium, faceret totum illud adæquatè quod potest, & maximum. Quòd autem sit agens liberum, nihil detrahit de ejus potentiâ. Ergo perinde maximum potest. *R.* Si esset agens necessarium, nihil posset: quia non haberet unde ad unum ex oppositis potiùs determinaretur. Et cætera de quibus in *Metaphysicâ De Deo. cap. 9.*

*Inst.* 15. Saltem potest collectionem creaturarum producere majorem datâ qualibet, & dabili. Ergo infinitam. *Dist. Ant.* Potest majorem datâ & dabili determinatè & distributivè. *C.* Dabili indeterminatè, seu etiam collectivè. *N.* Item sic responderi potest. Potest Deus quodlibet terminans ejus potentiam. *N.* Non determinans, & cùm processu in infinitum. *C.*

*Objic.* 4. Potest Deus facere collectivè, quicquid potest facere collectivè. At quicquid potest facere collectivè est simpliciter infinitum; alioqui potentia ipsius non esset infinita: ergo potest facere simpliciter infinitum. *Prob. ma.* Quia est propositio identica, ac proinde vera, cujus nimirum idem est prædicatum cum subjecto. Sed *Tr. Ma. Neg. min.* Nam illud *quicquid potest facere collectivè*, aliud nihil significat, quàm *quas rerum collectiones potest facere distributivè*.

*Inst.* Creaturæ omnes collectivè possibiles sunt collectivè possibiles. Ergo infinitum simpliciter est possibile. *Prob. Ant.* Quia est propositio identica. *Prob. Cons.* Quia infinitum simpliciter aliud nihil est quàm creaturæ omnes collectivè sumptæ. *C.* Atqui creaturæ omnes collectivè sumptæ sunt possibiles, ex præsup-

supposito antecedente : ergo infinitum simpliciter est possibile, seu produci à Deo potest. *R.* Non esse præsupponendum, aut concedendum antecedens; nec esse propositionem identicam, quia subjectum & prædicatum non servant eandem suppositionem. Nam subjectum sumitur tantum in sensu distributivo, prædicatum autem in colectivo. At omnes creaturarum collectiones distributive possibles, non sunt possibles collectivè. Et verò si antecedens esset propositio identica, idem significaret ac *omnis chymara possibilis est chymara possibilis*. Nec inde quidquam inferri posset.

C A P. V. *Solvuntur aliæ Objectiones.*

**O** *Bjic.* I. Deus potest producere quicquid cognoscit à se producibile. C. Sed cognoscit creaturas simpliciter infinitas à se producibiles; non enim illæ sunt tantum finitæ; alioquin non diceretur Deus esse potentia infinitæ. *R.* Creaturas illas possibles nec finitas esse, neque infinitas simpliciter, sed *finitas in infinitum*, seu *non tot quin plures sine termino*: diciturque illa scientia esse infinita, non tantum respectivè ad ipsam Dei essentiam infinitam; sed etiam & respectivè ad istiusmodi creaturas possibles.

*Inst.* 1. Creaturæ illæ possibles constituunt numerum aliquem; non finitum: ergo infinitum. *Dist.* Infinitum syncategorematicè. C. Categorematicè. N.

*Inst.* 2. Constituunt collectionem determinatam. Ergo numerum infinitum categ. siquidem infinitum categ. aliud nihil est, quam ejusmodi collectio. *Prob. Ant.* Quia creaturæ illæ possibles omnes quas cognoscit Deus, sunt tot & non plures. *Prob.* Quia præter creaturas possibles  
quas.

quas cognoscit, non sunt aliæ possibiles; siquidem cognoscit omnes possibiles. *Rz.* Si cognosceret omnes *collectivè*, præter omnes illas non forent aliæ possibiles. Sed hoc loco *Tò omnes* sumi debet semper *distributivè*, & *indeterminatè*. Atque hoc modo præter omnes *distributivè* sumptas, semper sunt aliæ plures & plures quas cognoscit.

*Inst. 3.* *Tò præter* est terminus colligens, seu denotans collectionem determinatam. Ergo si præter omnes possibiles quas cognoscit, non sunt aliæ possibiles; omnes illæ debent sumi tanquam aliqua possibilium collectio. *Dist.* Debent sumi tanquam aliqua collectio sine potentiâ ad alias similes collectiones. *N.* Cum potentiâ ad alias. *Tr.* Sic enim Deus in *omnibus* illis creaturis possibilibus distributivè atque indeterminatè sumptis, cognoscit plures & plures determinatè collectiones, præter quas aliæ plures & plures ab ipso cognoscuntur; sicque illud *præter* non colligit *omnes* creaturas, quæ non dicant *potentiam* ad alias, & alias in infinitum simul etiam à Deo cognitæ. Nec sunt *tot* numero determinato; sed potius *tot* & *tot* in infinitum, & numero indeterminato.

*Inst. 4.* Creaturæ possibiles simul omnes, nullâ exceptâ, sunt sub cognitione Divinâ. Ergo illas cognoscit omnes *collectivè*. *Prob. Ant.* Quia simul eodem actu cognitionis cognoscuntur à Deo, non autem aliæ post alias in infinitum; neque ulla est quæ sit in potentiâ respectivè ad cognitionem Divinam, quin potius actu quælibet simul cognoscitur cum aliis omnibus: Item, neque ulla est quæ sit in potentiâ ad esse possibilem, cum potius omnes simul sint in statu possibilitatis. Ergo omnes sunt *collectivè* sub actuali cognitione Divinâ, & tanquam infinitum.

tum categorematicum : nam ad rationem syn-  
categorematici deberent habere potentiam ad  
alias & alias in infinitum. R. Nego possibles  
creaturas omnes esse collectivè sub Divinâ co-  
gnitione. Item, ad probationem antecedentis.  
R. Inde sequi duntaxat quoddam simul sint & actu,  
simultate & actualitate tum cognitionis, tum  
objecti; non autem simultate rei, vel existentiae  
possibilis; quasi possint simul actu existere à par-  
te rei. Iamque insinuavi satis, quemadmodum  
aliqua simul esse possint simultate & actualitate  
tum cognitionis, tum objecti in Divino intelle-  
ctu; puta diversae anni partes, aut si lubet, futuri  
per totam aeternitatem dies; cum tamen haec  
simul à parte rei nequeant existere.

*Inst. 5.* Si creaturae illae possibles omnes quae  
cognoscuntur à Deo, existerent de facto, essent  
actu infinitae. Ergo sub cognitione Divinâ, &  
in statu possibilitatis sunt simpliciter infinitae.  
Sic enim idem est terminus Divinae cognitio-  
nis, qui foret productionis per quam à parte  
rei existerent. R. Si de facto à parte rei existe-  
rent, ex illâ hypothesis essent actu infinitae; si-  
mulque absolutè non essent. Cum ex naturâ in-  
finiti repugnet existere actu infinitas. Nec pro-  
inde possunt quoque esse infinitae simpliciter in  
Divino intellectu; quia Deus non potest res alio  
modo cognoscere, quam in se sint, aut esse pos-  
sint. Neque verò etiam consequenter idem &  
eodem modo foret terminus Divinae cognitio-  
nis, ac productionis per quam in rerum naturâ  
existerent.

*Inst. 6.* Si omnes creaturae possibles videren-  
tur per distinctas cognitiones, illae cognitiones  
forent infinitae simpliciter, & categorematicè.  
Ergo & cognitionum objecta illa diversa sunt in-

infinita simpliciter ; tot enim esse debent , quot ipsæ cognitiones. *Dist. Ant.* In illâ hypothesi quæ est impossibilis. C. At Deus pro perfectione infinitâ sibi essentiali , per unicum duntaxat cognitionis actum attingit quicquid est cognoscibile. Nec ab ullâ creaturâ possent singulæ possibiles creaturæ omnes cognosci per distinctos actus , ob eam ipsam quam in se involvit repugnantiam infinitum actu creatum.

*Inst. 7.* Perinde sunt infinitæ simpliciter creaturæ possibiles , ac earum negationes per quas denominantur *non existere* : atqui negationes illæ sunt infinitæ simpliciter ; ergo & creaturæ possibiles. *Prob. min.* Nam actu , suo videlicet modo negativo , jam existunt negationes rerum illarum omnium quæ sunt adhuc in statu possibilitatis , nec sunt numero finitæ : ergo sunt infinitæ actu. Tam enim sunt actu , quàm est actu in hac scholâ negatio leonis , aut equi , quem supponimus hinc abesse. Quo pacto etiam dicitur esse actu cæcitas in oculo , privatio formæ in materiâ , aut privatio gratiæ & gloriæ in damnatis , &c. Item , negationes illæ omnes sunt liberæ ; hoc nimirum sensu , quod pro libero Dei arbitrio tolli possunt ; quod est creaturas possibiles ipsis oppositas posse produci , & in rerum naturâ existere pro libero Dei arbitrio. Vnde sic argumentor. Negationes illæ actu existentes sunt simpliciter infinitæ & liberæ : ergo possunt produci à Deo creaturæ simpliciter infinitæ. Atque istud quidem nonnulli ex adversariis putant esse invictum , ac decretorium in hoc negotio argumentum. Sed R. Etsi admittantur negationes ejusmodi , non ideo esse liberæ , nisi distributivè , non autem collectivè.

*Notandumque est , unum quidem & multa non*  
*Phys. Univers.* L repe-

reperiri nisi in rebus positivis ; neque hæc attribui negationibus, nisi improprie. Immo, in isto casu dicendum esset potius, esse duntaxat veluti *unum* rerum *nihil*, seu *negationem unam*, non quidem modo indivisibili, sed quasi divisibili & virtualiter multiplici *existentem*, cum multiplici rationis respectu ad creaturas possibles quibus opponitur. Quare, cum ejusmodi *respectus rationis* non possint existere nemine cogitante; nec de facto existant nisi intellectu comparante creaturam possibilem cum sui negatione; hinc sequitur negationes illas, virtualiter saltem multiplices, non posse cognosci à Deo, aut distinguui, nisi pro more ipsarum possibilium creaturarum; nec proinde posse numerari aut cognosci nisi finitas in infinitum.

*Obje. 2.* Quæ ratio probat repugnare infinitum, ea est maxime, quod sequeretur dari infinitum unum alio minus; ac proinde quod simul esset & non esset infinitum. Atqui hæc non destruit infinitum quæ formaliter infinitum; quia excessus ille unius infiniti supra aliud infinitum non fieret nisi secundum materiale infiniti, non autem secundum ipsum infinitum quæ infinitum est. Quomodo à pari res se habet in numeris *v. g.* hominum finitis, qui crescere in infinitum possent secundum materiale, nempe ex additione novorum semper hominum; nec tamen illi desinerent esse finiti. *Rz.* Iam primo cap. supra explicatam esse illam disparitatem; tum quomodo infinitum categ. etiam secundum materiale superari ab alio non possit, quin omnis ratio infiniti destruat.

*Inst. 1.* Omnipotentia in Deo exceditur à scientiâ, quia scientia Divina extendit sese ad plura, quam omnipotentia; siquidem scientia illa

illa est *v. g.* de Deo, qui non potest esse obiectum omnipotentiae; hæc enim attingit solum res factibiles: nec tamen excessus ille impedit quominus omnipotentia Divina sit infinita.

*R.* Omnipotentia non exceditur à scientiâ quoad rationem proprii obiecti; quod solum ad rem attinet, nec alia sunt nisi per accidens ad istud negotium. Et verò, ut scientia Divina est ad omne scibile, ita & omnipotentia ad omne non involvens contradictionem.

*Inst. 2.* Excessus unius supra aliud reperitur in iis quæ sunt infinita syncategorematicè, nec tamen idcirco in ipsis destruitur ratio infiniti. Ita numerus hominum possibilium minor est numero animalium possibilium; vel si lubet, numerus hominum possibilium minor est numero vel oculorum, vel digitorum, vel capillorum; cum singulis plures digiti, & longè plures capilli respondeant. Ita etiam numerus partium in quas divisibilis est minor circulus, superatur à numero partium possibilium quæ continentur in majori circulo. Sicque unum infinitum syncat. superatur ab alio, neque idcirco negatur esse infinitum. Quod à pari per proportionem æstimandum est de infinito categ. *R.* *Neg. parit.* Quia majus, aut minus conveniunt tantum numero, vel magnitudini determinatæ. Ut enim *v. g.* numerus hominum possibilium judicetur minor numero animalium, oportet in eo contineri tot tantum, & non plures homines, cum tamen plura sint animalia: ergo sic numerus hominum omnium possibilium judicaretur esse aliqua collectio determinata, & aliquod vel infinitum, vel finitum actu. Ergo, contra hypothesis, non esset infinitum syncateg. Deinde non potest dici numerus animalium esse major

numero hominum omnium possibilium; quia non possunt tot numero assignari animalia possibilia, quin similis quoque numerus hominum assignetur, quandoquidem numerus hominum possibilium exhauriri non potest. Ita etiam non possunt tot assignari partes possibiles ex majori circulo, quin similis numerus assignetur ex minori; nec alter eorum dicitur major circulus, nisi quia plures continet partes determinatas, seu æquales uni certæ, puta plures pedes, aut palmos. Neque verò etiam in iis propriè reperitur æqualitas, cum propriè adæquari non possint. Quippe tantum iis rebus illud convenit, quæ determinatæ sunt, habentque extrema juxta quæ adæquantur.

*Inst. 3.* Creaturæ infinitè à Deo distant in perfectione naturæ, quo tamen in genere distantia infinitæ, imperfectiores magis distant quàm perfectiores. Ergo in illo genere infiniti est magis & minus: ergo magis & minus non destruit rationem infiniti. *Æ.* Distaptia illa infinita petitur ex parte Dei, qui seipso infinitè distat ab ordine entis creati cujuscunque: sicque ex parte Dei nec magis, nec minus distant ab ipsius perfectione infinitâ, quanvis sub ordine entis creati aliæ sint perfectioris naturæ, aliæ autem imperfectioris, unde magis aut minus quasi distent à superioribus generibus perfectionum ordinis creati. Quo sensu etiam dicitur Adamus minus distare ab æternitate Dei, quàm Antichristus, distinguendo inter durationem creatam, quæ essentialiter habet initium sui, tum inter increatam, quæ de se totâ æternitate præcedit creatam; quemadmodum postea declarabimus.



CAP. VI. *Objectiones petita ex Theologiâ.*

**V**T constet quàm omni ex parte vera sit hæc doctrina de infinito, satisfaciendum quoque est nonnullis difficultatibus, quas adversarii solent petere ex Theologiâ de Perfectionibus Divinis; de Gratiâ Christi Domini; de infinitate malitiæ quæ supponitur reperiri in peccato mortali, ac de aliis id genus. Ita tamen, ut quæ propria sunt Theologorum, non discutiantur à Philosophis. Sic igitur

*Obje. 1.* Tres personæ ac relationes Divinæ sunt distinctæ realiter perfectiones, & quidem infinitæ; quia nulla est finita perfectio in Deo. Ergo minùs rectè ajebamus infinitum, ne formaliter quidem posse esse multiplex, &c. Et verò, plus perfectionis esset in unaquaque personâ, quàm in essentiâ; siquidem persona, ultra infinitam perfectionem essentiæ, includeret etiam infinitam perfectionem relationis sibi propriæ, & sui constitutivæ. Item, plus quoque perfectionis esset in omnibus simul sumptis, quàm in unaquaque earum seorsim spectatâ. Ergo in illo infinito esset *plus & minus*. *R. 1.* Propterea negari à multis relationes in Deo præcisè & formaliter, seu ratione sui esse perfectiones, sed tantùm entitativè seu ratione essentiæ, cum quâ formaliter identificantur. Nec esse nisi veluti modos, quibus natura Divina quasi contrahatur ad personas. Quo pacto paternitas contrahit naturam atque intellectum Divinum ad primam personam, estque instar conditionis, ut in personâ illâ Patris sit principium Filii productivum, &c. Ita Scotus cum Boëtio & aliis antiquioribus: ita Becanus de S. Trin. c. 2. q. 6. cum D. Thomâ, ut scribit. Ita Molina, Bellarminus, &c.

Confirm. Quia alioquin verum illud non foret quod docet D. August. lib. 6. de Tr. c. 8. Vbi sic loquitur : *Tantus est vel solus Pater, vel solus Filius, vel solus Spiritus S. quantus est simul Pater, Filius & Spiritus S. Nec minor est Pater solus, aut Filius, quàm simul Pater & Filius.* Vt legitur c. 8. Conf. ratione. Quia si relationes illæ essent perfectiones, ac proinde infinitæ, cùm nulla sit perfectio in Deo nisi infinita; sequeretur eas includere in sese formaliter essentiam ipsam, & attributa communia, tum vicissim in iis includi essentiam. Quomodo habetur in Metaph. de Deo c. 3. attributa communia, ipsamque essentiam Divinam esse sibi mutudè de conceptu essentiali, hanc tantùm ob causam, quia sunt perfectionis infinitæ. Quod quidem etsi admittant alii percelebres Theologi, illi consequenter inferre deberent unicam in Deo formaliter esse infinitatem essentiæ; quæ essentia, in illâ sententiâ, sese habeat ad ea omnia quæ sunt formaliter in Deo, sicut se habet ens communissimè sumptum ad omnem gradum entis.

Item pz. 2. Tres personas, quanvis realiter iuter se distinctas cum relativis proprietatibus sui constitutivis, non inferre tamen nisi unicam duntaxat perfectionem Divinitatis quam continent, & in quâ sunt idem. Neque verdè etiam ulla est in aliquâ personâ propria perfectio, quæ non contineatur in aliâ saltem identicè, ratione ejusdem essentiæ quam singulæ personæ in se continent. Quo pacto persona una tota cum suâ personali proprietate dicitur quoque *immanere* intimè in aliis, quam vulgò appellant personarum *circuminseffionem*, Græcè *περιχώρησιν*. Item, cum singulæ proprietates & perfectiones personarum contineantur eminenter in essentiâ,  
eam

eam autem essentiam in se contineant personæ singulæ; necesse est consequenter ut una persona aliarum perfectiones in se contineat eminentiali modo; qui modus tam perfectus est, quàm si formaliter eas contineret: ergo eandem habent perfectionis infinitatem tum essentia, tum personæ.

*Obje. 2.* Sunt actu in Deo perfectiones eminentiales creaturarum ab ipsis creaturis participabiles non finitæ. Ergo infinitæ. Et quidem cum illæ sint actu in Deo, sunt infinitæ actu. Ergo sunt possibiles creaturæ infinitæ actu. Quia tot sunt possibiles, quot sunt perfectiones actu in Deo participabiles. *R.* Perfectiones illas creaturarum in Deo non esse actu formali, nec proinde faciunt numerum actu, sed tantum sunt actu virtuali. Nam in Deo, aut potius ipse Deus est unica, & simplicissima perfectio actu, virtute tamen multiplex, ut jam monui, ex metaphysicâ de Deo. Pari per proportionem modo solvitur id quod obijciunt de multitudine partium, quas supponunt in continuo. Non enim in eo sunt partes actu, nisi virtuali, &c.

*Obje. 3.* Multa sunt in sacro-sanctâ Christi Domini humanitate, quæ sunt infinitæ simpliciter perfectionis. Ergo præter ens increatum, dantur & alia infinita. *Prob. Ant.* Primò enim sacro-sancta illa humanitas habet cum Verbo Divino unionem hypostaticam perfectionis infinitæ, cum nulla perfectior esse queat. 2. Subsistit per substantiam infinitam, quæ Divina est. 3. Sancta est sanctitate infinitâ, habetque in animâ gratiam sanctificantem creatam infinitam, quippe quæ est terminus amoris infiniti quo Deus Christum ipsum diligit. 4. Actiones ejus, quas appellant *Theandricas*, fuere dignitatis ac

valoris infiniti, Deoque placebant infinitè, ob dignitatem infinitam personæ operantis; ne quid dicam de meriti infinitudine, quam ideo negant alii, quia præmium actu infinitum illi promissum non fuit: quanquam ad illam infinitudinem actualem sufficere alii contendunt, quod promissio illimitata sit, seu finiti in infinitum.

R. 1. Unionem hypostaticam, etsi supponatur esse quid distinctum ab extremis unitis, non dici infinitam ratione propriæ entitatis, sed tantum ratione termini; cujusmodi infinitudo attribuitur maternitati B. Virginis, quâ videlicet præstantior nulla esse possit. Quomodo nec esse potest in genere suo præstantior, quàm beatitudo sanctorum, ratione objecti, nempe Dei clarè visi, etsi beatifica illa visio perfectior in infinitum esse potest. Quod autem Christi Domini humanitas subsistat per subsistentiam infinitam, illa subsistentia increata est; neque hîc agitur nisi de ente creato; nec sancta est etiam infinitè, nisi per sanctitatem increatam ex unionem substantiali cum ipso Verbo Divino: Nam sanctitas creata, seu gratia habitualis in ejus animâ existens; etsi mirabilem in modum sanctitatem omnem aliam creatam superat, non est tamen infinitè intensa; uti nec scientia visionis beatificæ quâ Deum videt; aut quæcunque infusa alia: neque verò alius est primò & per se terminus amoris quo summè diligitur à Deo, quàm unio hypostatica, & sanctitas infinita ex illâ unionem ad verbum Divinum existens. Ac denique tandem, quod ajunt ejus actiones fuisse dignitatis infinitæ, tum meriti infiniti.

R. Illas esse perfectiones in genere morali; cum à nobis dispute-tur solùm de rebus secundum earum physicam entitatem.

*Obje. 4.* Peccati mortalis, quod in Deum admittitur, malitia est simpliciter infinita; cum tamen in eâ reperiatur *magis & minus*, neque ulla sit tanta, quæ ab aliâ superari non queat. Ergo *magis & minus* non pugnant cum naturâ infiniti. *R.* Vel eam ob causam non potest secundum se & formaliter esse infinita, sed tantum objectivè, seu ratione objecti quod est infinitæ dignitatis. Et verò etiam peccatum mort. v. g. furti, non continet possibilem cujusunque alterius, specie saltem distincti, malitiam: ergo in ratione peccati ut sic non est simpliciter infinitum.

*Inst. 1.* Quâ proportionem crescit personæ offensæ dignitas, eò gravior est malitia peccati quod in eam admittitur; ut patet inductione per universos hominum status. Atqui dignitas Dei offensi est simpliciter infinita: ergo & peccati malitia erit infinita. *R.* Idem probaretur de peccato veniali quo Deus etiam offenditur. *Distinguo igitur ma.* Eò gravior est malitia, magisque crescit secundum gradus malitiæ. N. Secundum genus & ordinem malitiæ. C. Inde enim sequitur tantum malitiam peccati esse generis seu ordinis superioris, quæ non possit æquari per malitiam ordinis inferioris, quantumcunque in infinitum multiplicetur.

*Inst. 2.* Malitia illa opposita est Dei bonitati infinitæ: ergo est infinita. *Dist. Ant.* Est opposita modo finito. C. Infinito. *Nego Ant.* Et verò malitia peccati venialis opposita est bonitati & sanctitati Divinæ, neque idcirco est infinita.

*Inst. 3.* Saltem habet malitiam proportionatam perfectioni formæ illius quam expellit à suo subjecto; neque enim aliunde petitur mensura mali, quam à bono quod destruit. Atqui

forma quam de se expellit peccatum mor. non est finitæ, aut determinatæ solùm perfectionis; ergo est infinitæ. *Prob. min.* Quia opponitur gratiæ sanctificanti omni possibili, & finitæ in infinitum; imò & infinitæ actu; posset enim destruere ipsam animæ Christi sanctitatem infinitam. R. Si peccati malitia opponeretur illi sanctitati secundum gradus intensiōis, vim haberet argumentum; sed opponitur illi tantum secundum essentiam indivisibiliter, ita ut peccatum m. vel sub minimo intensiōis gradu, ut ita loquar, meritorie destruat quamcunque sanctitatem. Illaque est natura earum rerum quæ ad invicem opponuntur secundum essentiam & indivisibiliter: quo pacto se habent scientia & dubium; amor & odium efficax respectu ejusdem; ita enim amor efficax ut unum, impossibilis est cum odio efficaci quocunque; & sic de aliis.

*Inst. 4.* Eam solam ob causam, nullis puræ creaturæ bonis operibus satisfieri Deo condignè potest pro peccato mort. quia ejus malitia est infinita; ideoque ajunt fuisse necessariam personæ Divinæ incarnationem. Alioqui reperitur sufficiens proportio inter opus meritorium justî ortum ex gratiâ, & inter gratiam quam peccatori promeretur. R. Rationem illius necessitatis aliunde peti, nempe ex defectu proportionis inter injuriam Deo factam, tum inter satisfactionem puræ creaturæ. Nam crescit quidem offensâ pro dignitate personæ offensæ; sed decrescit satisfactio pro vilitate personæ satisfaciētis. Quam ob causam Deus per contemptum legis suæ longè magis censetur inhonorari, quàm possit glorificari per quancunque satisfactionem oblatam à purâ creaturâ, puta ab homine qui simul non sit Deus.

# DISPUTATIO III.

## De Loco & Vacuo.

### CAP. I. *Natura Loci.*

**S**I latè sumitur vocis istius significatio, *locus* dicitur esse illud, ubi res est. Quamobrem ab Aristotele, *locus* etiam propriè dictus appellatur *Vbi*; tum & *ubicatio* dicitur, quæ est rei constitutio in loco.

*Notabis* autem *locum* sumi vel propriè, vel impropriè; nam impropriè anima dicitur esse in corpore, aut intellectus in animâ, tanquam in loco, cum in eo reperitur tantum ut in subiecto. Propriè igitur *locus*, est spatium quo res definitur: quamobrem Deus non est ullâ ratione in loco, siquidem ob suam immensitatem definiri ullo spatio non potest. At

*Not. 2.* Spatium omne vel esse formale & reale; vel duntaxat virtuale. Spatium formale & reale est corpus aliquod extensum in quo res aliæ contineri possint. Spatium virtuale est aliquid vel positivum, vel negativum formali spatio æquivalens, ob virtualement extensionem vel positivam, vel negativam. Atque ita primò quidem immensitas Divina, ex communi sententiâ, est spatium virtuale positivum increatum quo res universæ continentur; uti solent exponere in Metaphysicâ de Deo. Ita secundò, contra Thomistas, ratio spatii virtualis, sed negativi, attribui meritò potest *inani* & *vacuo*. Nam eo sensu æquivaleret spatio reali & formali, quodd in eo, tanquam in spatio quodam, aut Angelus, aut corpus possit existere & moveri localiter. Item, potest fundare distantiam inter duo dissita; ne-

que enim, si annihilaretur aër omnis inter cœlum & terram diffusus, ideo cœlum diceretur immediatè cum terrâ junctum: ergo vacuum in eo casu idem suo modo præstaret quod reale & formale spatium: ergo meritò spatium virtuale appellaretur. **Quare**

*Not. 3.* Perinde locum esse quidem alium realem ac formalem; alium autem solummodo virtualem quo res contineatur. Sed quia, ut monet Aristoteles, differre debet locus propriè dictus à vase, quo res etiam continetur; in eo utriusque disparitas solet constitui, quòd vas cum suo contento possit aliò transferri; locus autem ut sic de se est immutabilis. Et verò si locus esset mutabilis seu mobilis, frustra res naturales haberent facultatem sibi à naturâ insitam tendendi certum ad locum; siquidem locus tam posset moveri ad illas, nec potior foret ratio unius quàm alterius. Porro

*Not. 4.* In eo positam esse loci *immobilitatem*, quòd servet semper eandem distantiam ab aliquibus punctis mundi fixis; puta à centro ipsius mundi, tum à punctis orientis & occidentis, simul & ab utroque polo. Ita etiam cœlum ipsum circulariter motum, licet semper in eodem loco adæquato maneat, si tamen secundum partes distributivè sumptas consideretur, non servat easdem illas distantias; nam ea pars quæ modò propior fuerat orienti, modò ab eo recedit, magisque accedit ad occidentem, nec consequenter eundem retinet locum.

*Notabis verò 5.* Contra Thomistas; Perinde esse an puncta illa distantiae sint realia, an solùm fictitia & imaginaria. Nam saltem sunt virtualiter realia, quatenus idem per ea præstari potest, quod per realia formaliter. Atque hujusmodi  
qui.



quidem assignari possunt in iis spatiis, quæ per imaginationem finguntur à nobis existerẽ supra cœlos. *Prob.* Quia mundus universus potest Divinitus moveri sursum, aut deorsum motu recto; quo in casu mutaret locum, & consequenter mutaret etiam aliquas id genus distantias. *Confir.* Quia sic bene explicatur loci immobilitas; nec potest alio modo commodius explicari. *Nec dicas*, in eâ sententiâ posset res aliqua immota, locum nihilominus mutare. Ut si Deus universum mundum moveret sursum motu recto, terra v.g. consequenter moveretur; & tamen immota perseveraret; quia servaret semper easdem distantias à diversis cœli punctis. *R.* Sic terra per accidens tantum, id est, ad motum totius in quo continetur, mota, servaret quidem easdem habitudines cum aliis totius sui partibus; non autem si moveretur per se. Sic aliquis in navj quietus, ipsius nihilominus motu navis dicitur moveri per accidens, & ratione tantum totius mutare distantias. Atque his præsuppositis.

*Dico I.* Contra aliquos recentiores. Nulla res est creata quæ alicubi non existat. *Prob.* Quia sicut non potest existere, quin saltem coexistat alicui parti virtuali æternitatis Divinæ; ita etiam à pari per proportionem, quin & coexistat Divinæ immensitati secundum aliquam ejus partem virtuales; quod est alicubi existere. Nam si per impossibile daretur Angelus infinitæ extensionis virtualis, qui consequenter adæquatè foret præsens Divinæ immensitati, meritò diceretur esse ubique; ergo inadæquatè solum illi immensitati respondens, debet dici existens alicubi. Nec verò, quod respondent adversarii, præterea opus est ut aliquo reali spatio

concludatur. Nam primò, in doctrina Aristotelis 4. *phys. c. 1.* cùm res omnis sit alicubi, illud consequenter attribuit cœlo : quod tamen non existit nisi in spatio virtuali, siquidem supra ultimam sphaeram nihil existit. Item, quemadmodum nihil potest esse productum à Deo, de quo vera non sit hæc propositio ; nempe, *vel est, vel fuit aliquando* ; ita & vera hæc est, *vel hic existit, vel alibi* ; ergo alicubi, id est, aliquo in loco vel reali, vel saltem virtuali.

*Objic.* Esse in loco est quid accidentale rei locatæ. *C.* Ergo ab eâ separabile : nam substantia locata potest Divinitus conservari sine omnibus accidentibus. *Dist.* De accidentibus absolute. *Tr.* De accidentibus connotativis, & iis maximè quæ propriam entitatem non habent. *N.* At istæ sunt de genere earum formalitatum quæ necessariò tribuunt subjecto suo effectum & denominationem formalem, cùm ipsarum connotatum existat necessariò, nempe hæc, aut illa pars virtualis Divinæ immensitatis ; vel hoc aut indeterminatè spatium, saltem virtuale, cui res locata coexistat.

*Notabis* autem locum propriè & physicè sumptum, esse spatium quoddam corporeum naturalium corporum proprium, & ipsorum etiam, quantum est de se, conservativum. Quamobrem solis corporibus convenit sic esse in loco propriè & physicè sumpto. Quippe res spiritualis, ut Angelus, est independens à loco corporeo, nec ab illo potest perfici, &c. At

*Not. 2.* Locum hujusmodi alium esse remotum, seu communem ; alium verò proximum. Locus communis est qui multa continet à se etiam invicem distantia. Sic aves sunt in aère, pisces in mari, nos in Europa, in Gallia, in hac  
civi-

civitate, in hoc cubiculo. Locus autem proximus est unicuique rei proprius, seu quem illa res sola occupat. Ac de isto quidem hic sermo est duntaxat. Porro

*Dico I I. Locum* hoc modo sumptum, ex variis Aristotelis locis, sic definiri: Est corporis continentis terminus, seu superficies concava immobilis. Quod enim attinet ad ultimam hanc particulam, constat ex doctrinâ superiori, quemadmodum immobilitas sit essentialis loco, unde à vase differat. Vt autem de priori definitionis parte agam; corpus ambiens rem locatam, putà aër, non dicitur propriè locus, nisi ratione superficiei concavæ, secundùm quam de facto rei locatæ commensuratur, & ad ipsam terminatur.

*Notandumque* est; superficiem illam sumi duobus modis. Primò prout est quædam extensio in longum & latum, sicque ad quantitatem pertinet. 2. Vt est terminus extrinsecus rei locatæ, quo pacto vocatur *locus*; nam corpus eatenus dicitur *locatum*, quia illâ superficiei ambitur, seu continetur; illique coëxistit, coëxtenditur, commensuratur. Et quanvis illa superficies ambiens sit extrinseca rei locatæ, ab eâ tamen petitur denominatio locati. Nec dicas, corpus intrinsecè denominatur locatum. Ergo illud oriri debet à formâ illi intrinsecâ. R. Denominari *locatum* per coëxistentiam ad locum extrinsecum: quo pacto assignatur quidem rei coëxistentia, tanquam aliquid intrinsecum, non tamen sine extrinsecò.

*Not. 2.* Superficiem illam ambientem non sumi materialiter, quatenus est hæc determinatè, aut hujus corporis determinati superficies; sed potius formaliter, quatenus est indeterminatè

tè hæc aut illa ; hujus aut illius corporis indeterminatè superficies. Atque ita lignum v. g. in aquâ defixum, dicitur remanere in eodem loco, licet aquâ præterfluente, non eadem consequenter hac numero aquæ superficie ambiatur ; quia satis est quodd eandem semper distantiam à punctis mundi fixis conservet sub hac aut illâ superficie continente, sive reali, sive virtuali.

*Dico I I I.* Ex proprietatibus loci prima est, continere locatum. 2. Esse æqualem locato. Nam sumitur non pro corpore ipso ambiente, sed tantum pro illius superficie, rei locatæ immediatâ ; quæ quidem licet sit extra rem locatam, ipsamque contineat, non dicitur tamen major re locatâ ; quia continens illud sumitur tantum formaliter pro superficie sine profunditate, quamobrem nihil addit supra magnitudinem rei contentæ ; siquidem superficies, ut pote indivisibilis, superaddita alicui extenso, non reddit illud magis extensum. Tertia loci proprietas est, conservare locatum, ubi maxime agitur de loco naturali. Sic aves conservantur in aëre, quæ in aquâ interirent : sic pisces in ipsâ aquâ ; sic mundus elementaris intra cœli ambitum, cujus influxu continetur conservaturque : & sic de aliis.

*Dico I V.* Ex Aristotele, variæ illæ sunt loci differentiæ per respectum ad animal ; nempe esse sursum, deorsum, ante, retrò, dextrorsum, sinistrorsum.

#### C A P. I I. *Forma constitutiva rei in loco.*

**Q**uia res creata de se indeterminata est ac indifferens, ut in uno potius loco existat quam in alio ; ideo plerique ex recentioribus existimant esse necessarium, ut forma aliqua seu

seu modus realiter distinctus rei locatæ aut locabili adveniat, per quem formaliter determinetur & constituatur in tali loco; formamque istam seu modum realiter distinctum appellant vel *ubi*, vel *locum internum*; ad differentiam superficiæ corporis ambientis, de quâ superiori capite agebam, quam vel *ubi externum*, vel *locum externum* omnes nominant. At

*Dico I.* Rejici debet illud *ubi internum* realiter distinctum. *Prob.* Tum quia fundamentum non habet in doctrinâ Aristotelis, ut monui in *Logicâ, cap. De Denominativis*. Tum quia repugnat rationi. Nam frustra est: sicque istud vulgò demonstrant; nempe, ut ait Arist. quemadmodum veste inductâ corpori, hoc ipso censetur vestitum, sublatâ etiâ omni entitate modali aliâ; ita per proportionem, hoc ipso præcisè quod res alicui loco seu spatio ambienti coexistat, eo, inquam, ipso censeri debet locata. Et verò, quemadmodum etiam inutilis est durationis modus realiter distinctus, ad hoc ut res existat in tempore; ut postea demonstrabo; ita inutilis quoque est ad hoc ut existat in loco. Item, sublatâ illâ entitate ubicativâ, fieri non potest quin res loco isto contenta, non dicatur in ipso existere. *Respondent* alii cum Mæratio, tunc rem fore nullibi. Quod per se videtur absurdum. Illudque superiori capite refutavimus. Certè, in illa hypothesi, non desinit esse in eodem loco, siquidem non est translata ad alium. Respondent ergo alii, non esse admittendam hypothèsim, nec posse rem ullam creatam destitui modo ubicationis ejusmodi realiter distincto. Sed *contrà est*. Nam Divinitus saltem substantia omnis creata potest existere absque omni accidente entitativo & realiter distincto. Et

Et verò accidens ejusmodi tam de se est libere dependens à concursu Dei conservativo, quàm substantia. Idemque dici potest contra alios, qui putant illud *ubi* internum idem esse cum extensione locali, quam statuunt de novo advenire ad mutationem loci. Præterea etiam refutari potest forma id genus de novo realiter adveniens, quia non posset rectè assignari causa naturalis productiva ipsius. Quòd enim respondent emanare ab ipsâ re locatâ; *Contrà est*. Nam saltem illa res de se non haberet potiore rationem ad emanandam ubicationem tali in loco constitutivam, quàm in alio; ergo ad id opus haberet aliâ formâ sui determinativâ: quæ per se absurda sunt, &c.

*Dico* igitur I I. Rem in loco formaliter non constitui, nisi per ipsius coëxistentiam ad talem locum. Item, determinari effectivè ad coëxistendum tali loco, vel per ipsius rei creationem aut generationem in tali loco, vel per motum localem, aliudvè genus positionis in eo loco. Hoc enim sufficit. Siquidem non posset consequenter non esse tali in loco.

*Objic.* I. Productio rei abstrahit de se à loco, estque indifferens vi productionis suæ, ut sit tali, vel tali in loco, putà cùm Deus hominem creat. C. Ergo debet illi aliquid superaddi, unde ad talem locum determinetur. R. Ad id determinari formaliter per sui coëxistentiam ad talem locum: effectivè autem per actionem ipsius rei productivam, quæ non potest exerceri nisi in aliquo determinato loco, vel quem eligat Deus, aut causa alia libera; vel quem exigit causæ ipsius præsentia; & sic vi productionis suæ res ponitur efficienter in aliquo determinato loco.

*Objic.*

*Objic. 2.* Petrus de novo denominatur locus seu existens in tali loco, cum antea in illo non existeret; sicque fit transitus de contradictorio in contradictorium. *C.* Ergo debet in eo casu admitti in rebus aliqua mutatio realis. *C.* Atqui nulla esse potest, nisi supponatur advenire nova ejusmodi *ubicatio* distincta realiter. *N. min.* Sufficit enim ut Petrus mutetur secundum extrinsecum locum, ad hoc ut recipiat novam hanc denominationem realem locati: quæ denominatio partim est intrinseca, petita nimirum à coexistentiâ Petri in loco, unde & recipit novam relationem ad locum; partim est extrinseca, nempe à loco extrinseco.

*Inst. 1.* Nihil fieret de novo realiter in rerum naturâ. Ergo non esset nova mutatio realis. *Dist. Ant.* Nihil fieret secundum novam realitatem. *Tr.* Nihil fieret de novo realiter secundum novam formalitatem. *N.* Estque in memoriam revocandum, quod monui in Logicâ, ubi de denominativis.

*Inst. 2.* Petrus de novo existens in loco, nihil plus diceret quàm Petrum & locum. Ergo nihil esset factum de novo in rerum naturâ. *Dist. Ant.* Nihil plus diceret entitativè & realiter. *C.* Sed plus diceret formaliter & respectivè. Nam præter locum & Petrum, est existentia Petri ipsius in loco.

*Inst. 3.* Petrus & locus possunt esse nemine cogitante sine coexistentiâ ipsius Petri ad talem locum. Ergo illa coexistentiâ, seu ubicatio, non est idem nemine cogitante cum Petro & loco: ergo est aliqua entitas ab utroque illo termino distincta realiter. *Dist. Ant.* Possunt esse sine illâ coexistentiâ, defectu alicujus realitatis. *N.* Sed tantum defectu alicujus formalitatis & con-

connotati. Quare etsi non sunt idem quoad formalitates connotativas seu relativas; sunt tamen idem quoad absoluta, & quoad realem entitatem. Quinetiam, ut mutantur denominationes ejusmodi relativæ in Petro, quod jam dixi, sufficit in eo mutatio realis secundum extrinsecum locum, quanvis non mutetur intrinsecè, seu secundum intrinsecum.

*Notandumque* est, dici nihilominus mutationem realem, saltem virtuales, secundum extrinsecum locum, etsi locus ille de novo per motum localem acquisitus, non sit realis, sed tantum virtualis; ut contingeret in vacuo.

*Inst.* 4. Actio realis est ad terminum realem, qui de novo ponatur in rerum naturâ. Atqui motus localis est actio quædam realis: ergo debet habere terminum aliquem realem de novo in rerum naturâ: qui alius esse non potest, quàm ubi internum. *Dist. Maj.* De actione ad locum purè adductivâ. *N.* De alio genere actionis. *Tr.* Vel saltem. *Rz.* sufficere novum terminum realem secundum novam formalitatem, ut aliàs jam monuimus.

*Dico* III. Variis modis res esse in loco potest. Primum, *circumscriptivè*, quando scilicet res ita spatio continetur, ut illi divisibiliter coexistat, commensureturque; id est, cum tota est in toto, & pars in parte: quod solum rei localiter extensæ convenit. At esse in loco *definitivè* tunc dicitur, quando res ita est tota in toto, ut etiam tota sit in qualibet ejus parte. Quod est existere in loco indivisibiliter, & incommensurabiliter. Ut contingit Angelo, vel corpori non extenso localiter. Quem statum habet corpus Christi Domini positum sub speciebus V. Eucharistiæ.



**C A P. III. De Existentiâ plurium simul corporum in eodem loco per penetrationem. Tum de existentiâ ejusdem in pluribus simul locis.**

**D**ico I. Penetratio, seu coëxistentia plurium corporum in eodem simul loco est naturaliter impossibilis : ut patet experienciâ. Istudque postulat bonum universi atque ordo, ne simul omnia corpora uno in loco possint confundi. Neque verò, quod ajunt, ignis in ferro candenti simul est penetrativè cum ipso ferro, sed intra ferri poros. Item, cùm in scyphum cineribus plenum aqua infunditur, ideo scyphus aquam illam simul capit cum cineribus, quia magis comprimuntur, evolantque partes tenuiores. Item, simul capit aquam cum aliquibus nummis aureis, quòd ipsi aquam suâ gravitate comprimendo addensent, &c.

*Notandumque est*, ex superiori Disput. hanc impenetrabilitatem oriri à quantitate; quæ non modò impediatur ne partes ejusdem corporis sint simul loco, sed etiam ut corpus aliud ab eodem loco similiter expellat per formalem impossibilitatem. At

*Dico II.* Contra Durandum; Possibilis est supernaturaliter multorum corporum penetratio. Hæcque est communis doctrina Ecclesiæ. Sic enim habemus ex sacris literis, Christum Dominum coenaculum fuisse ingressum januis clausis; sic prodiisse virginali ex utero, & clauso ex sepulchro. Item, in eo positum est donum subtilitatis, quo prædita sunt Beatorum corpora.

*Notabis* autem corpus extensum localiter non expellere aliud corpus ab eodem loco per aliquod efficientiæ genus, siquidem quantitas non est hoc modo effectiva ad extra. Quin potius  
hio

hic est aliquis formalis effectus quantitaris, per quem sit de se naturaliter eodem in loco formaliter impossibilis cum aliâ. Quare non potest explicari illa penetratio corporum per denegationem concursus Divini ad effectivam huiusmodi expulsionem alterius corporis ab eodem loco. Vnde videtur superesse ut dicamus, tum communicari à Deo supernaturaliter *extensioni locali talem essendi modum*, sub quo non tribuat quantitati actualem impenetrabilitatem; ac proinde fiat hac ratione corpus *subtile*, ut ajunt; id est, cum aliis penetrabile. Estque iterum revocanda in memoriam doctrina de *modo essendi*, quam tradidimus in Metaphysicâ, *Tract. 1. Disp. 3. c. 4.* Iam verò

**Dico III.** Vnum corpus uni loco sic naturaliter respondet, ut naturaliter in pluribus simul locis esse non possit. Quod satis ipsa demonstrat experientia. Quinetiam certum est de Fide; unum & idem corpus sic uno in loco supernaturaliter posse existere circumscriptivè, seu extensè & connaturali modo, ut in aliis simul locis possit constitui saltem inextensè. Quod fieri credimus in V. Eucharistiâ. Controversia est, an poni simul in diversis locis possit extensè, seu circumscriptivè; quod negant Thomistæ.

**Dico IV.** Ex communiori doctrinâ contra Thomistas, potest idem corpus simul diversis in locis existere etiam extensè, seu circumscriptivè. *Prob.* Quia non magis repugnat duo corpora extensa esse in eodem simul loco, quàm idem in duobus simul. Non enim majori necessitate unum corpus exigit de se unum duntaxat locum, quàm duo corpora exigant duo loca: nec magis unitas corporis dicit *indivisionem*

*nem* quoad locum, quàm *divisionem* ab alio, etiam quoad locum. Ergo si possunt duo corpora esse simul in loco, etiam extensè, ut assert. 2. modo ostendimus; potest & idem esse in duobus simul locis, etiam extensè.

*Confir. 1.* Quia non magis repugnat corpus idem in multis simul locis poni extensè, quàm inextensè: immò plus est miraculi poni inextensè, quàm extensè & connaturali modo. Ergo cum doceat Fides de V. Eucharistiâ, corpus Christi Domini simul esse in multis locis inextensè; potest à fortiori multis simul in locis existere & extensè, seu circumscriptivè.

*Conf. 2.* Etiam absolutè contra hæreticos. Quia istud nullam involvit contradictionem; siquidem ex eo non sequitur *idem simul esse & non esse*; sed tantum idem multoties existere, multisque simul locis comprehendi. Huc accedit, quòd de factò Christus Dominus in cœlo existens, apparuit nihilominus B. Paulo Damasum proficiscenti, ut legitur *Act. 9.* Ergo tunc simul erat duobus in locis.

*Conf. 3.* Ex iis quæ de reproductione tradidimus, *Primâ parte hujus Physica. Tract. 2. Disp. 6. cap. 3.* Rein nimirum eandem, etiam existentem actu, posse iterum produci, seu replicari, & multoties simul existere. Inde enim sequitur eandem tam secundum substantiam, quàm secundum ejus quantitatem extensam localiter perinde replicatam, posse multis simul in locis existere. Et verò, ut confirmetur nostra doctrina de reproductione, præsuppositâ mysterii Eucharistici veritate; certum est primò, in eo corpus Christi Domini non esse præsens nisi per veram aliquam actionem realem; cum nova ista præsentia sit aliquis novus realiter effectus.

**Cer-**

Certum est autem secundò ex Fide, actionem hanc esse conversionem substantialem, seu *transubstantiationem*, in quâ desinat panis quoad substantiam, tanquam *terminus à quo*, cujus in locum succedat corpus Christi Domini, tanquam *terminus ad quem*. At in omni conversione substantiali verè producitur *terminus ad quem*: unde consequens est, ut in hoc mysterio corpus Christi Domini jam verè existens, iterum producat, seu replicetur. Quo sensu ajunt Sancti Patres Sacerdotem conficere corpus Christi Domini, &c. Quare

*Not. 1.* Actionem hanc non esse merè adductivam corporis Christi Domini, nec fieri præsens in Eucharistiâ, per productionem, ut ajunt, novi *ubi*. Nam istud *ubi* est accidens quoddam, nec proinde hîc fieret *transubstantiatio*, seu mutatio ad substantiam, sed tantum ad accidens. Item, cum ille *ubicationis* modus, quem supponunt adversarii, aliud nihil sit quàm determinatio quædam & unio locati ad locum; si hac solum ratione, id est, per solam ubicationis productionem corpus Christi Domini in cœlo existens constitueretur verè & realiter præsens in Eucharistiâ; posset perinde anima in cœlo existens uniri corpori in terris per solam productionem modi alicujus unitivi in animâ; neque ad istud prærequireretur præsentia intima extremorum ad invicem uniendorum. Item, sequeretur existere creaturam aliquam à parte rei, non tamen productam; si nempe corpus ut in cœlo existens destrueretur, idem autem conservaretur ut existens in Eucharistiâ, in quâ supponunt non fuisse reproductum.

*Notandumque* est consequenter 2. Corpus sic replicatum, esse virtualiter seu æquivalenter

ter multiplex, etsi formaliter sit unum & idem. Nam hoc pacto idem præstat ac si esset formaliter multiplex. Siquidem v. g. posset fieri exercitus ex uno homine multoties replicato, posset moveri contrariis motibus, idemque sibi ipsi tum ex oriente, tum ex occidente occurrere: posset uno in loco quiescere, in alio moveri; aliaque id genus quæ in eodem non replicato haberent quidem contrarietatem, non autem in replicato. Item

*Not. 3.* Corpus replicatum posse considerari duobus modis; primò secundum se & absolute, seu secundum prædicata absoluta, id est, quæ abstrahunt à loco, putà esse compositum ex materiâ & formâ; habere in se tales qualitates, &c. Secundò verò spectari potest respectivè ad locum, seu secundum prædicata localia; id est, quæ sequuntur locum, seu rem prout est in loco. Quo posito,

*Not. 4.* Attributa seu prædicata absoluta esse ubique eadem, & cum ipso corpore replicato semper conjuncta per sui replicationem seu reproductionem, saltem connaturaliter ad statum ipsius reproductionis. Atque ita corpus in duobus locis positum habet eandem animam, eodem artus, eundem calorem similiter reproductum, &c. Quanquam absolute corpus idem reproduci posset sine aliquâ ex iis rebus; nam posset reproduci, animâ non reproductâ; quamobrem etsi, loquendo simpliciter, non diceretur corpus mortuum, prout tamen foret tali in loco, diceretur inanime, & sic de aliis. At

*Not. 5.* Res illas quæ dependent in fieri ab agente extrinseco, non multiplicari necessariò ad corporis replicationem in multis locis, quatenus sunt in fieri. Quavis in facto esse, connaturaliter

turaliter ad statum reproductionis, illi conveniant. Sic Petrus tum hîc, tum Romæ simul existens, dum Romæ ad focum affidet, calefit solum ab igne illo prout est Romæ; quanvis nihilominus per supernaturalem reproductionem quæ illi statui est connaturalis, eodem simul tempore, ille idem calor in Petro, prout est hîc, ponatur. Item, quando ut Romæ existens comedit; non sequitur ut hîc quoque prout est hîc dicatur comedere, quanvis utrobique nutriatur æqualiter. Item, sic Romæ potest existere mediis in ignibus; hîc autem simul mediis in aquis. Quo in casu pateretur connaturaliter eodem modo, ac si glacies & ignis eodem in loco in ipsum agerent. Quanquam absolutè potest corpus, ut Romæ existens, absumi, idemque servari prout hîc est. Item, percussus Romæ, dolorem quidem sentiret prout est hîc, quanvis prout est hîc non percuteretur. Item, si ut Romæ est existens ferret pondus gravissimum, potentiam ejus exæquans, nihil posset ampliùs ferre ut hîc existens, nisi à Deo virtutem intensiorem reciperet. Item, peccans uno in loco, denominaretur & peccator in alio, quia istæ sunt denominationes absolutæ à loco.

#### C A P. I V. *Solvuntur Objectiones.*

**O**bjiciunt Thomistæ. Quod circumscribitur loco uno, ipso comprehenditur: ergo nihil istius corporis est extra hunc locum. Ergo vi comprehensionis hujusmodi non est in alio. R. 1. Nimis probat istud argumentum; quia destrueret præsentiam realem corporis Christi Domini in V. Eucharistiâ. R. 2. Corpus non replicatum, quando uno comprehenditur loco, non esse extra illum. At replicatum potest simul diver-

diversis locis iterum atque iterum comprehendi. Item, ut ajunt, sic finitur, terminaturque isto loco, ut præterea ratione replicationis, seu iteratæ productionis, alio, & alio loco iterum terminetur, finiaturve.

*Inst.* 1. Corpus non est extensè seu circumscriptivè in loco, nisi per quantitatem localiter extensam. *Tr.* Ergo corpus non potest esse nisi uno in loco circumscriptivè. Quia corpus non est capax nisi unius quantitatis; nec quantitas illa potest conferre nisi unum ejusmodi effectum formalem essendi in loco circumscriptivè. *R.* Nego corpus esse tantum subjectum capax unius quantitatis, ut habetur 1. *parte hujus phys. Tract. 1. Disput. 3. c. 2.* Sed *Transcat.* Dico per eandem quantitatem replicatam, seu reproductam cum ipso corpore pariter reproducto, posse illud constituere multoties in loco circumscriptivè: quanvis istud præstare nequeat non replicata.

*Inst.* 2. Sic locus multiplex esset major quàm res locata. *Dist.* Non replicata. *C.* Replicata. *N.* Neque res etiam locata sic foret major seipsâ secundum entitatem & absolutè, sed tantum ratione illius replicationis.

*Objic.* 2. Corpus replicatum tum Romæ, tum in hac civitate, esset divisum à seipso, & à seipso distans: ergo non esset unum & idem. *Dist. Ant.* Esset divisum à seipso secundum locum. *C.* Secundum entitatem & substantiam. *N.* Vel si lubet, potest quidem hic admitti rei ejusdem à seipsâ, & secundum substantiam, divisio virtualis, negando formalem.

*Inst.* 1. Existens Romæ conservari posset, destructo ipso quatenus in hac civitate existeret. *C.* Atqui illa distinguuntur secundum enti-

tatem seu realiter, quorum unum remanet realiter, altero non remanente. *Dist.* De altero replicato, aut non replicato. Quæ distinctio ut supra monui, solvit etiam difficultates omnes petitas ex variis contrarietatum generibus, uti sub finem superioris capitis exposui.

*Inst.* 2. Sequeretur duas formas substantiales naturaliter posse educi ex eâdem materiâ. Atqui falsum *Conf.* Ergo & Antec. *Prob. sequela majoris.* Quia frustum panis replicatum posset idem manducari tum ab homine & in ejus substantiam converti, ac proinde informari ab animâ rationali: tum aliunde comedi etiam posset à cane; & sic informari ab animâ caninâ. Hæc autem fierent per operationem naturalem facultatis vegetativæ. &c. Formas illas non repugnare ob reproductionem materiæ, quæ hoc pacto redditur virtualiter duplex: Item &c. Actionem hanc facultatis vegetativæ non exerceri absolute sine miraculo, sed potius ex hypothesi miraculi; ac proinde non esse naturalem nisi ex hypothesi reproductionis supernaturalis.

*Obje.* 3. Idem non potest simul esse in diversis temporibus. C. Ergo neque in diversis locis. N. parit. Quia diversa tempora simul existere nequeunt in rerum naturâ. Notandumque est quod illæ adversariorum objectiones perinde probarent contra præsentiam realem Christi Domini in V. Eucharistiâ.

#### C A P. V. De VACUO.

**V** *Acuum* & *inane* propriè dictum in eo differunt, quodd *vacuum* sit spatium quoddam terminatum aliquo corpore, in se carens omni corpore. *Inane* autem propriè dictum, est quidem carentia omnis corporis, sed non termina-

ta,



ra, seu non conclusa aliquo corpore ; cujusmodi est spatium illud quod imaginamur esse extra cœlos omnes. Atque his suppositis ,

*Dico I.* Natura vacuum non patitur. *Prob.* Quia vacuum destrueret naturalem dispositionem universi, foretque bono ipsius contrarium. Nam inferiora non possent à superioribus recipere influxum quo conservantur, perficiunturque ad agendum : siquidem posito vacuo, cœlestia corpora suos influxus per illud trajicere deberent, aut agere in distans sine medio: atqui neutrum fieri potest, ut suis locis demonstravimus. Hæcque est mens Aristotelis 3. *Meteor. c. 9.* cùm ait hunc mundum inferiorem superioribus *lationibus*, id est, cœlis debere esse contiguum, ut ab iis regi & conservari possit. Confirmaturque ista doctrina quotidianis diversæ rationis experimentis. Sic enim latera follium diduci non possunt, nisi aditus pateat aëri, qui subingredi debeat metui vacui. Sic in cucurbitulis attrahitur plus sanguinis, appposito ad ea frigido, ob condensationem aëris antea per accensas intus candelas rarefacti. Sic franguntur tormenta bellica, si dum ignis & globus ex iis prorumpit, aër pari celeritate in ejus locum subire nequeat; nempe si foramen per quod ignis immissus est obstruitur. Sic ad impediendum vacuum levia deorsum, gravia moventur sursum; quomodo per fistulam attracto aëre videmus aquam ascendere. Item, sic ipsam aquam videmus retineri in vasis irrigatoriiis, quandiu superius epistomium digito clausum fuerit; quod contemplari licet in tabulâ ad finem hujus libri appositâ, *figurâ 7. inferioris laterculi.* Hincque oriuntur effectus tam admirabiles in hydraulicis, quod aqua sursum veluti

cogatur tendere contra propriam & particularem inclinationem, unde & fontes tam varii generis construi solent. Sic uno ex dolio aqua & vinum prorsus exhauriri potest, & in aliud transfundi, ope illius instrumenti quod describitur *figura 5.* Sic pariter *ut in 4. fig.* potest aqua ex radice montis in oppositam illius partem traduci per ipsius cacumen beneficio tubi alicujus, hoc nimirum pacto, *uti videre est in figura 4.* Primum, occludantur extrema ipsius orificia; tum ex superiori parte tubus totus repleatur aquâ per foramen diligenter postea obturandum: ac deinde altero orificio in fontem demerso, utrumque recludatur; tunc aqua ex fonte, meru vacui ascendens, defluet semper in partem alteram, inodò ejus orificium sit aliquantisper depressius eo quod fonti immergitur: & sic de aliis.

*Objic.* Impleatur hydrargyro tubus vitreus pedum plusquam trium ad libitum; hujusque alterum extremum sigillo hermetico sit obsertum. Deinde quâ parte est apertus, appposito digito immergatur in aliud hydrargyrum, quod subiecto in vasculo contineatur, erigaturque perpendiculariter, *ut in fig. 6.* Tum subtracto digito, hydrargyrum ex tubo descendet, nec in eo retinebitur nisi ad altitudinem duorum pedum cum tribus pollicibus, relictâ superiori parte vacuâ; cum assignari nihil possit quod subeat in ejus locum. Ergo sic natura vacuum patitur. Idem per proportionem continget de aquâ: sed quia minoris est gravitatis quàm hydrargyrum, retinebitur in tubo ad altitudinem plusquam 40. pedum, antequam supra se vacuum relinquat. &c. Superiorem illam tubi partem non esse omni corpore vacuum. Manifestumque

stumque est, quia experimur per eam trajici lumen & qualitatem magneticam, tum inde exaudiri sonum, si quod parvulum tintinnabulum incluseris. Illæ autem qualitates debent per ejusmodi medium diffundi quod reale sit. Item, si in eâ tubi parte fuerit inclusa carpionis vesicula, tunc mirum in modum intumescet. Ac denique si parti illi apponatur aqua calidior, hydrargyrum descendet tantisper, quod signum est rarefactionis alicujus factæ intra illud spatium; cum è contrâ fiat condensatio ascendente hydrargyro, si affundatur aqua frigidior. Quæ quidem postremæ duæ experientiæ satis manifestè indicant contineri illo spatio aërem, cujus aliqua particula semper cum hydrargyro sese insinuet, tum metu vacui in hunc modum rarefiat ad descensum hydrargyri.

*Obje. 2.* Aliquis in vacuo existens posset naturaliter movere v. g. brachium ad locum alium; ergo sic posset naturaliter facere vacuum deferendo locum ubi erat prius. R2. Hic agi de vacuo per separationem corporis alicujus à quolibet alio: quod non reperitur in hac hypothesi.

*Not. autem 1.* Naturam impedire vacuum diversis modis. Sic enim vel levia descendunt, vel ascendunt gravia, vel rarefiunt quæ sunt densiora, aut si res alio modo fieri nequeat, perfringuntur corpora. Natura enim illo in casu mediis utitur semper iis quæ minùs violenta sunt, si ad finem assequendum sunt idonea.

*Not. 2.* Ascensum gravi corpori, aut descensum levi ad impediendum vacuum, esse naturalem; quatenus illa fiunt ex instituto naturæ ad conservationem universi. Nam singula ejusmodi corpora duobus modis considerari debent. Primò, ut sunt entia quædam particularia; &

sic habent inclinationem quandam ad bonum sibi proprium : quâ ex inclinatione propriâ & particulari , lapis v. g. tendit ad centrum mundi. At præterea 2. considerantur ut partes universi , quæ consequenter habeant quoque naturalem inclinationem & appetitum ad bonum totius conservandum. Sic igitur motus sursum in lapide ad impediendum vacuum dicitur ipsi naturalis , quatenus est pars universi ; & in eo casu fertur ad bonum universi contra propriam inclinationem particularem ; quomodo res omnes ferri debent ad bonum commune tuendum, etiam cum jacturâ propriâ , quia bonum commune est majus , quàm particulare singulorum. Quinetiam bonum commune est etiam bonum particularium ; quia destructo bono communi, partes destruuntur. Quam ob causam & ipsa manus ex naturali instinctu opponit sese ictui per quem offenderetur caput. Quæ cum ita sint ,

*Dico II.* Probabilius est inesse qualitatem aliquam per universa corpora naturalia diffusam , quæ sit principium intrinsecum & naturale motus ejusmodi ad impediendum vacuum ; cum tamen corpora illa singula relinquat suæ propriæ inclinationi , ubi ordo universi , ad impediendum vacuum , contrarium non postulat.

*Notandumque* est , qualitatem ejusmodi aliam non esse quàm influxum, aut motionem illam universis corporibus sublunaribus impressam à cælo , per quam ad agendum perficiuntur, ut primâ parte hujus Physicæ ostendebam, agens de subordinatione causarum sublunarium ad cœlestes. Item , illa est qualitas per quam hæc inferiora dicuntur contineri & regi à cælo.

10. Neque enim alioquin explicari posset tam commodè, quemadmodum hæc inferiora contineantur, & regantur à superioribus, juxta commune dictum, quod vulgò petitur ab Aristotele. At

*Not. 2.* Illam qualitatem esse indifferentem de se ad quemlibet motum, vel sursum, vel deorsum, vel in transversum; cùm solummodo nitatur contra vacuum, prout rei necessitas exigit.

*Objic.* Res unaquæque per qualitates sibi proprias tendit ad bonum uniuersi. Ergo frustra habet communem illam & cœlestem virtutem.

*Dist. Ant.* Sic *per se* tendit ad bonum uniuersi. N. Sed tantum *per accidens*, quatenus tendit ad bonum proprium quod est ordinatum ad bonum uniuersi.

*Inst.* Hæc qualitas posset mouere corpus cuiuscunque tandem gravitatis & molis. C. Ergo esset infinita. N. *Conf.* Quomodo à pari non opus est gravitate infinitâ ad movendum corpus quodcunque grave deorsum. Item R. Qualitatem hanc esse ordinis superioris ad particulares, unde positâ conditione necessariâ, id est, posito vacui periculo, mouet contra proprias subjecti sui inclinationes.

C A P. VI. *Quâ virtute possit fieri vacuum, & qua in eo fieri possent.*

**N**ihil repugnat fieri à Deo vacuum, putâ conservare cœlum & terram annihilatis corporibus intermediis. Neque etiam repugnat ab homine, aut ab Angelo per vim supernaturalem fieri aliquod vacuum. At

*Dico I.* Homo nullâ virtute naturali, etiam adhibitis machinis per quas tollere, aut separare

ab invicem queat moles vel maximas, potest *vacuum* efficere in naturâ. Patet experientiâ. Nam quocunque remoto corpore naturali, semper aliud in ejus locum subsequitur. Item

*Dico* II. Nequidem virtute Angelicâ naturali præstari illud potest. Sic D. Th. & vulgò alii. Prob. Quia, saltem ex hypothese decreti Divini de conservando ordine universi, non habet Angelus potentiam ullam naturalem nisi subordinatam bono universi. Quare connaturaliter non exigit concursum Dei simultaneum ad aliquid præstandum, nisi quod fuerit subordinatum bono universi, non autem ipsi contrarium. Et verò, quod est contrarium bono universi, non potest fieri nisi per miraculum; id est, per virtutem quæ superet vires naturæ universalis. Ergo naturaliter fieri ab Angelo non potest. Sic igitur Angelus ex tubo aliquo non potest vel tantillum liquoris detrahare, impediendo ne quid in ejus locum subeat; quia est effectus superioris ordinis ad vires ejus naturales, nec consequenter ad id connaturaliter paratum habet Dei concursum simultaneum. Item, nec eandem ob causam potest duo plana immediate conjuncta, simul tota ab invicem separare: quia inde sequeretur fieri *vacuum*, siquidem in eo casu spatium interjectum repleti non potest nisi per aëris motum instantaneum, quem supponimus esse impossibilem.

*Objic.* Parvum ejusmodi vacuum non esset contrarium bono universi: neque enim impediret quominus inferiora cœlorum influxum reciperent. R2. Transeat, per accidens parvum illud vacuum non obstat bono universi: per se tamen esset illi bono universi contrarium. Si enim posset fieri parvum ejusmodi vacuum, posset,

posset, adhibitâ virtute majori, fieri & majus.

*Inst.* 1. Potest Angelus Terram universam movere, saltem adhibito aliorum auxilio. *Tr.* Ergo à fortiori potest efficere aliquod vacuum, saltem parvulum: nam hoc minùs repugnaret bono universi. *N. seq.* Nam terræ ille motus repugnaret tantùm particulari terræ inclinationi; at vacuum repugnat cum inclinatione naturæ universæ.

*Inst.* 2. Angelus cœlorum motor, pro libertate suâ posset motum illum sustinere, quanvis illud foret contrarium bono universi. *R.* In eo casu nihil ageret positivè, neque ad id opus est ullâ potentiâ. At hoc loco sermo est de virtute alicujus rei positivè efficiendæ.

*Inst.* 3. Posset arcam supra cœlos in inani fabricatam, ac penitus vacuum deferre intra mundum; & sic vacuum inducere in naturam. *R.* Sic partes mundi ab invicem non dissociaret per se, sed tantùm per accidens, ratione vacui in arcâ illâ inclusi.

*Obje.* 2. Effectus istiusmodi est tantùm finitus. *C.* Ergo posset existere à virtute solùm finitâ. *N. Conf.* Quando illa virtus est inferioris ordinis; aut effectus est bono universi contrarius. Et verò ipsa penetratio corporum est effectus duntaxat finitus; ideòque tamen potest esse ab Angelo?

*Inst.* Angelus est supra ordinem rei omnis corporeæ. *Tr.* Ergo est supra vim omnem ipsius naturalem. *N. Conf.* Vt patet vel ex instantiâ modò allatâ.

*Dico* II. Si daretur vacuum, in eo nec vivere quis posset; quia defectu aëris non posset respirare; Neque ibi videretur, aut audiretur quidquam; nam defectu subjecti species propa-

gari in eo nequirent; quam etiam ob causam fax accensa nullum ex se lumen diffunderet. Item, quia, ut dixi, corpus ab omni alio separari non potest, non posset consequenter fieri lapidis projectio ex pleno intra vacuum, etiam per virtutem naturalem Angeli. Quinetiam quanvis tormenta bellica exploderentur adversus illud vacuum, ipsum tamen emissi globi pervaderent nunquam; consisterentque ad extremas partes pleni, &c. At

*Dico III.* Motus aliquis vectionis fieri in vacuo naturaliter potest. Nihil enim impedit quominus ab Angelo lapis per vacuum, vel per inane deferatur.

*Objic.* Vacuum est non ens: ergo quâ ratione fieri non potest motus ullus in chymarâ, quia est non ens; ita nec in vacuo, aut inani. *N. parit.* Quia vacuum, aut inane est spatium aliquod saltem virtualiter reale.

*Inst.* Posset sine ullâ resistantiâ Angelus per illud vacuum, aut per inane deferre corpus cujuscunque gravitatis, etiam infinitæ, cum tamen non habeat potentiam movendi nisi finitam. *Prob.* Quia nulla fieret resistantia Angelo, neque ex parte medii, quod supponitur nullum esse; neque ex parte gravitatis, quam ex communi sententiâ supponimus nullam exercere gravitationem, nisi quando est supra levius se, nitendo contra illud. *Conc. totum.* Ergo etiam à pari Angelus, immò & musca virtutis tenuissimæ, posset movere omnem in partem totam ipsam mundi molem; quippe quæ non est nisi in inani. *N. parit.* Nam ultima mundi sphaera habet aliquam sibi innatam immobilitatem, seu qualitatem, per quam reddatur immota in tali Divinæ immensitatis parte virtuali, &c.

*Dico*



*Dico* IV. Posset etiam fieri ab Angelo motus aliquis projectionis in vacuo, vel in inani. Quid enim impediret? Et verò, lapis *v. g.* projectus ab Angelo, sic ab ipso determinaretur in unam potius quàm in aliam partem. Nec fieret ille motus in infinitum; quia qualitas impressa, à quâ motus istiusmodi procederet, sensim tandem ac successivè desineret.

Supèrest difficultas, an scilicet motus naturalis gravium aut levium fieret in vacuo; putà an lapis in eo naturaliter moveretur, seu descenderet. Negant Thomistæ, quia, ut inquirunt, motus ille fieret in instanti, cùm autem motus instantaneus sit impossibilis, sequitur ut ejusmodi naturalis motus gravium aut levium in vacuo esse non possit. Sed contrà

*Dico* V. Si fieret, non tamen foret instantaneus. *Prob.* Quia determinatio motus non petitur solùm à resistantiâ medii, ut volunt Thomistæ; sed præterea primò, quodd sit à tali & determinatâ virtute motivâ, quæ cæteris paribus talem duntaxat efficiat motum. Item, petitur ex distantia terminorum à quo & ad quem, siquidem repugnat de se, ut lapis per motum in eodem instanti simul sit *v. g.* in cælo, tum simul in terrâ & in medio interjacente.

*Objic.* Arist. eam ob causam negat motum naturalem in vacuo, quia fieret in instanti, &c. Illum argumentari ad hominem, & contra antiquos, qui docebant totam motûs ejusmodi naturalis determinationem in velocitate aut tarditate, peti à resistantiâ medii: ex quorum principiis, contra ipsos infert, motum naturalem gravium aut levium, si fieret in vacuo, fore instantaneum.

*-Inst.* Fieret sine proportionem cum eo motu

qui fieret in pleno : ergo fieret in instanti. *Dist. Ant.* fieret sine proportionem ex parte medii. *Tr.* Non autem ex parte potentiae motricis , aut distantiae quae reperitur inter terminos à quo & ad quem. Sed his praetermissis ,

*Dico V I.* Gravia aut levia naturaliter moveri in vacuo non possent. Quod sic probo. Non possent naturaliter moveri in inani : ergo neque in vacuo. *Prob. Ant.* Primum, quia, ut suppono, corpus grave naturaliter non movetur nisi quando est supra levius se , illud premendo ; quod non contingit in inani. 2. Quae maxime est efficax ratio ; gravia aut levia in inani divinitus posita, non habent unde potius tendant in unam , quam in aliam partem : ibi enim neque est sursum aut deorsum ; nec centrum aut circumferentia : ergo ratione illius indeterminatæ moveri non possent. Item , motu semel inchoato , nunquam possent quiescere naturaliter ; quia nullus assignari posset locus quietis : ergo sic moverentur in infinitum ; quod absurdum est. Probatum verò hinc sequi nec motum ejusmodi reperiri posse in vacuo. Quia de se vacuum perinde se habet ac inane ipsum , nisi quoddam terminatur corpore aliquo includente ; sed hoc non impedit quo minus desinat esse pars universi. *Confirm.* Quia si solum destruat corpus illud includens, tunc dicitur *inane*, absque ullâ mutatione sibi intrinsecâ ; ergo in se perinde se habet ac *inane* ; nec magis in eo fieri potest motus naturalis gravium , aut levium quam in inani.

## DISPUTATIO IV.

## DE MOTU.

CAP. I. *Natura Motus in communi.*

**S**I latè sumitur *motus*, vulgò dicitur esse *mutatio*, seu transitus ab uno ad aliud. Quamobrem in omni motu hæc observari debent. Primò, terminus à quo, tum terminus ad quem fit transitus. Item 2. debet hîc observari causa effectiva motus, quæ dicitur *potentia movens*: ac denique subjectum ipsius motus; quod appellari solet *mobile*, aut etiam ens potentiale, seu ens in potentiâ, & receptivum motus; motusque ille consequenter dicitur esse actus ipsius subjecti inobilis, seu mutabilis. At

*Notandum* est, *motum* ita latè sumptum, & Tò moveri, varias sub se quasi species continere. Primò enim est motus ad *esse*, sive substantiale, sive accidentale. Quo potissimum sensu agebat Aristoteles, *quicquid movetur, ab alio movetur*: id est, quicquid producitur, ab alio producitur; cùm idem à seipso accipere *esse* nequeat. Sicque infert Aristoteles existere in rebus aliquod primum *movens*, quatenus ita res una fit ab aliâ, ut tandem deveniatur ad primam causam: quod in Metaphysicâ prosecutus sum. 2. *Moveri* ac *mutari* idem est ac recipere in se novam aliquam perfectionem, sive substantialem, ut quando materia prima recipit in se novam formam substantialem, sive accidentalem; quo pacto aër dum illuminatur, dicitur *mutari* & *moveri*; sic visio in oculo, intellectio in intellectu, est motio quædam, unde illæ facultates dicuntur formaliter *moveri*. Item, motus & mutatio alia est instantanea;

nea; quando scilicet res fit tota simul, simulque est fieri & factum esse: quâ ratione forma substantialis generatur tota simul: sic etiam lumen dicitur totum simul produci in aëre, non autem successivè per partes alias post alias: ità ex Aristotele simul video & vidi, simul intelligo & intellexi. At præterea *motus* alius est *successivus*, quando transitus ab uno ad aliud fit successivè, cum aliquo veluti fluxu per partes alias post alias; putà cum successivè acquiritur perfectior qualitas, aut localis extensio minor; vel quando sic tenditur ad alium distantem locum. Quia verò hîc maximè disputatio est de nomine,

*Dico I.* Motus propriè & strictè, juxta Aristotelem, est *successivus*. Sic enim ex 3. *Phys.* solet confici definitio motus propriè dicti: *Est actus entis in potentiâ, prout in potentiâ*. Nempe, est actualitas subjecti, vel realiter, vel solùm formaliter distincta, quæ sic in eo recipitur, ut quatenus in eo recipitur, actu nihilominus fiat tendentia ad aliud; putà vel ad perfectiorem ejusdem qualitatis gradum acquirendum, vel ad majorem extensionem localem, vel ad alium locum. Nec rectè potest afferri alia explicatio allatæ definitionis, sicque accipitur vulgò ab omnibus Peripateticis.

Præterea verò ex illâ definitione Aristotelis colligimus motum propriè dictum non modò esse *successivum*; sed etiam esse & *continuum*. Alioquin non rectè diceretur actus entis in potentiâ, *prout in potentiâ*, si fieret tantùm per instantia discreta, seu quemadmodum vocant, interpolata, cum aliquâ intermediâ quiete; nam mobile non tenderet actu ad aliud, quatenus illius motus partem aliquam reciperet. Item, sic diceretur motus constare ex indivisibilibus, quod

quod postea refutabitur. *Confirm.* Ab ipso Aristotele variis in locis, ubi docet motum esse de genere continuorum. Quare dum Arist. illam affert definitionem motus, perinde est ac si diceret, motum esse *acquisitionem rei successivam, & continuum; fluxum successivum ac continuum: viam, seu tendentiam successivam & continuam ad terminum acquirendum, &c.*

Notandumque est consequenter, motum posse dividi in partes alias & alias, easque priores & posteriores, quæ continuationem inter se habeant sine actuali inter se distinctione, ut sequenti disputatione commodius exponetur. Item

*Dico* I I. Motus propriè sumptus differt essentialiter à mutatione instantaneâ, in quâ res ita moveri dicitur, ut simul dicatur & mora: Quare illi accommodari nequit allata ex Aristotele motus propriè dicti definitio. Nec in instantaneis *Tò fieri* est prius quàm *factum esse*, nisi prioritatem rationis & naturæ.

*Objic.* Ex 5. Phys. omnes dealbationes, & à pari, omnes calefactiones sunt ejusdem speciei, sive sint instantaneæ, sive successivæ. Sunt enim ad eosdem specie terminos. *Dist.* Sunt ejusdem speciei sub ratione qualitatis acquisitæ. C. Sub ratione tendentiæ ad illas qualitates. N. Nam tendentia successiva differt essentialiter ab instantaneâ. Nec calor *v g.* sub ratione termini successivè, aut in instanti acquirendi, est ejusdem rationis; quanvis sub ratione qualitatis sit idem.

*Inst.* Ad rationem motus propriè dicti, non est necesse ut sit actualis tendentia ad ulteriorem terminum: ergo non dicit essentialiter successionem, estque illi tantum per accidens. *Prob. Ant.* Quia motus ipse successivus secundum se totum

totum sumptus non dicit tendentiam ad ulteriorem terminum ; quia de facto per illum totum non tenditur ulterius. R. Sufficere, si secundum omnes sui partes distributivè sumptas , sit tendentia ad ulteriorem terminum.

C A P. II. *Varia motus propriè dicti species & proprietates.*

**Q***Vandoquidem* motus aliud nihil est quàm tendentia ad terminum ; sequitur aliunde quàm à termino *ad quem* non posse specificari ; nempe talem dici , seu talis generis aut speciei , quia est ad talem vel genere , vel specie terminum. Quare

*Dico* I. Illi omnes motus dicuntur esse generis ejusdem , qui sunt ad eisdem genere terminos. Quà ratione illi omnes motus dicuntur locales, qui sunt ad locum : motus alterationis, qui sunt ad qualitatem alterativam : motus accretionis , aut etiam decretionis , qui sunt ad quantitatem aut majorem , aut minorem. Sic etiam dicuntur esse ejusdem speciei motus , qui sunt ad eisdem specie terminos ; ut omnes cataphactiones, dealbationes, &c. Atque ista quidem sufficiunt ad unitatem vel genericam, vel specificam motus. Sed

*Notabis* hæc tria requiri ad unitatem ipsius numericam, unde fiat idem numero motus. 1. Debet esse ad eundem numero terminum. 2. Requiritur unitas numerica mobilis; nam idem numero motus non est diversorum numero mobilium. Quo loco nihilominus observandum est, quodd si homo v. g. ex turri decidens , medio in descensu moriatur , in eo fore motum eundem, quanvis non sit idem corpus naturale secundum eandem formam substantialem ; quia saltem re-

manet

manet idem in ratione corporis continui. 3. Denique requiritur ut sit temporis continuatio & unitas. Nam idem numero motus non fit diversis temporibus. Atque his suppositis,

*Dico* II. Triplex tantum per se est genus motus propriè sumpti. Nempe motus ad *qualitatem*, tum ad *quantitatem* & ad *locum*; sicque ut ajunt, motus est tantum per se ad tria illa prædicamenta. *Prob.* Quia illis rebus duntaxat per se convenit posse acquiri successivè & continuè, inodo jam suprâ explicato. Neque enim per se est motus ad substantiam, cum de se producat in instanti. Ut alibi exponitur. Item, neque ad res aliorum prædicamentorum per se est motus, cum propriam entitatem non habeant, propriamve producibilitatem: sunt enim tantum formalitates, quæ posito aliquo extrinseco connotato, suam denominationem subjecto tribuunt; ex communi quidem sententiâ. Item, neque ad motum datur motus, inquit Arist. quia & ad hunc motum deberet esse motus; sicque admitteretur processus in infinitum.

*Notandumque* est motum localem inter alios motus dici primum, saltem dignitate. Nam ut docet D. Th. ed perfectior est motus, quod mobile per ipsum minùs immutatur; atqui talis est motus localis, per quem scilicet mobile non immutatur realiter secundum intrinsecum; siquidem nihil reale de novo inducit in subjectum, nec mutatur nisi secundum extrinsecum locum. Item

*Not. 2.* Reperiri oppositionem & contrarietatem inter motus; quando scilicet illi sunt ad terminos inter se oppositos & contrarios; ut inter calefactionem & frigefactionem; inter motus locales sursum & deorsum. Quanquam nihilominus

*Not.*

*Not. 3.* Motus contrariè oppositos posse interdum simul reperiri in eodem subjecto, quando non est oppositio nisi secundùm quid; ut inter calefactionem & frigefactionem sub gradibus remissis. Alioquin subjectum idem secundùm eandem qualitatem non recipit motus oppositos: non enim potest idem calor v. g. simul intendi & remitti; nec eadem quantitas simul crescere & decrescere. Nec simul potest res eadem per se quiescere & moveri localiter; aut per se moveri oppositas mundi in partes. Quod tamen potest contingere per accidens. Nam qui vehitur navi ad orientem, potest in eâ simul quiescere, aut etiam proprio motu in eâ simul deambulare versùs occidentem.

**C A P. I I I.** *Motus indistinctio sive à subjecto mobili, sive à termino.*

**M**otus, inquit Arist. 3. *phys.* nihil est præter res. Ergo motus entitativè non distinguitur ab alio: nec fit in rebus secundùm novam entitatem, sed tantùm secundùm novam formalitatem. Ratio hujus indistinctionis est, quia frustra foret. Quod enim spectat ad singula motuum genera;

*Dico I.* Motus localis à suo subjecto non distinguitur realiter; nihilque est aliud quàm applicatio, seu coëxistentia successiva mobilis ipsius ad spatium; siquidem hac solâ positâ, sufficienter intelligitur motus; quemadmodum positâ permanente rei coëxistentiâ ad locum, sufficienter intelligitur in loco consistere, sine aliâ formâ intrinsecâ ubicationis realiter superadditâ. Ita D. Th. 1. p. q. 10. a. 3. passimque alibi, docet eo in casu non fieri ullam mutationem, nisi secundùm extrinsecum, Neque verò etiam, quod



quod volunt recentiores modistæ, per motum ejusmodi localem producitur aliqua ubicatio fluens realiter distincta. Iam enim ostendi supra, esse illam supervacaneam; nec commodè assignari posse causam illius productivam.

*Obje. 1.* Ens successivum, de se nimirum habentantùm partes alias post alias, non potest esse idem cum permanente, putà cum lapide; cùm habeat partes suas totas simul: ergo motus localis non potest esse idem cum subjecto suo, putà cum lapide moto. R. Satis est quod non sit idem cum ipso secundùm propriam formalitatem; quanvis dicatur esse idem realiter seu entitativè. Et verò etiam motui sic competit esse vel *tardum*, vel *velocem*, quod etiam rei mobili non convenit, nisi secundùm aliam formalitatem.

*Inst. 1.* Sequeretur motum esse pariter idem cum quiete; nam quies pariter non distinguitur ab ipsâ re quietâ; siquidem aliud nihil est quàm ipsius rei permanentia in termino per motum acquisito. Hæc autem permanentia non est quid distinctum ab ipsâ re. Ergo simul etiam idem foret cum ipso motu. R. Esse quidem cum ipso idem quoad entitatem, non autem quoad formalitatem.

*Inst. 2.* Motus & quies sunt contrariè opposita. Ergo non possunt esse idem. *Dist.* Sunt contrariè opposita secundùm diversas realitates. *Nego.* Sed tantùm secundùm diversas formalitates & ratione connominatorum. Nam & quies præter ipsius rei positivam permanentiam in suo termino, simul dicit privationem, seu defitionem motus.

*Inst. 3.* Ille motus est novus effectus realis, à potentiâ reali, realiter operante. Ergo est aliqua  
enti-

entitas de novo producta. R. Sufficit quoddam sit novus effectus realis secundum novam formalitatem; non autem secundum novam realitatem. Ut alias dictum est de figurâ, & de resistentiâ, quæ est etiam effectus potentiæ resistitivæ realis realiter agentis.

*Inst. 4.* Motus naturalis qui à gravitate in lapide producitur, debet esse quid ab eâ gravitate distinctum nemine cogitante, tanquam effectus à causâ. *Transseat.* Motus enim iste recipitur in lapide; ac proinde realiter distinguitur à gravitate, quæ supponitur habere distinctionem realem ab ipso lapide. Quanquam inde non sequitur esse novum effectum secundum novam realitatem; satisque est in illâ hypothesi, quoddam nemine cogitante distinguatur formaliter; nec ideo requiritur ut distinguatur realiter.

*Inst. 5.* Potentia in viventibus, cum sit vitalis, attingit motum secundum novam entitatem; quia potentiæ vitali maximè convenit ut eliciat actum à se realiter distinctum. R. *Transseat* de potentiâ quæ per se est vitalis. At potentia motrix in viventibus non dicitur vitalis nisi per accidens, quatenus subordinatur appetitui, aliisve potentiis vitalibus, per quas applicatur ad motum faciendum.

*Obje. 2.* Si planum alteri plano immoto superpositum moveatur; vel sphaera minor inclusa majori, quæ quiescat, minori solum motâ; non erit potior ratio cur una dicatur mota, alterâ immotâ, quia de utraq; dici poterit, quod alterius partibus successivè respondeat, coexistarve. Ergo ut huic occurratur incommodo, debet admitti motus realiter distinctus in eo subjecto quod dicitur de facto moveri. R. Planum alterum, aut sphaera duntaxat altera ex eo sufficienter

ter dicetur moveri, quòd secundùm sui partes saltem distributivè sumptas, mutet distantiam à punctis mundi fixis, quanvis secundùm se totam maneat in eodem semper loco.

Dico pariter II. Motus ad *qualitatem*, aut ad *quantitatem*, ut vocant, non distinguitur realiter à suo termino *ad quem*. Sic enim v. g. sufficienter intelligitur motus calefactionis, quatenus intelligitur ipse calor fieri successivè & continuè perfectior. Quà etiam ratione fieri & factum esse in eodem non habent prioritatem & posterioritatem nisi secundùm rationem; nec distinguuntur inter se nisi secundùm diversas formalitates.

*Obije.* Via Thebis Athenas distinguitur realiter ab utroque suo illo termino. *Tr.* Ergo & motus, seu tendentia ad calorem; cùm sit quædam ad ipsum via. *N. parit.* Neque enim illa caloris tendentia dicitur via propriè, sed tantùm metaphoricè.

#### C A P. IV. *Motus localis natura in particulari.*

**Q***Via* Deus essentialiter est immensus, spatiumque omne possibile supercomprehendit, non potest consequenter transire à loco ad locum in quo priùs non existeret. Nec motus localis in rebus à naturâ est institutus, nisi ut earum indigentia & imperfectioni subveniatur. Ex eo enim res creata deficit, quòd omni loco præsens adesse nequeat, unde vel bonum sibi conveniens obtineat, vel alteri proficiat. Sic igitur tum Angelus, tum corpus naturale habet motum localem. Si autem daretur Mathematicum indivisibile actu separatum, naturalem motum non haberet, inquit Arist. quia locum naturalem haberet nullum, ad quem viribus à naturâ

naturâ sibi insitis tenderet ; etsi aliunde moveri posset, vel per accidens, ad motum illius corporis cui inexistere, vel motu vectionis.

*Supponendumque* est contra Zenonem , de facto esse admittendum in rebus motum localem; quod satis vel ipsâ manus agitatione , aut unicâ deambulatione revinci potest.

*Objic.* Si res aliqua moveretur, vel moveretur in loco ubi est, vel in loco ubi non est; neutrum autem dici potest. *Rz.* Non moveri quidem in loco ubi est *permanentè* , sed tantùm in quo est *successivè* : quæ autem sic moventur , dicuntur etiam esse *successivè* in loco majori se.

*Inst. 1.* Motus ille non posset habere aut initium aut finem. Ergo non posset existere. *Prob. Ant.* Quia in eo non posset assignari pars prima, aut ultima, nisi dicatur constare ex indivisibilibus. *Rz.* Huic difficultati satisfiet sequenti disputatione.

*Inst. 2.* Achilles distantem testudinem nunquam posset attingere. Quia testudo semper aliquid spatii novi absolveret , antequam perveniat Achilles ad locum in quo prius existerat testudo lentigrada. *Rz.* Achillem plures spatii illius partes sub æquali tempore percurrere, unde faciliè attingat & prætereat testudinem. Neque verò etiam fit ille cursus nisi per partes determinatas, & eas quidem majores , quæ per majores passus designentur ab Achille , ubi minores duntaxat peragantur à testudine. Atque his suppositis, ut natura motus localis in particulari exponatur:

*Dico I.* Motus ille , quo res transeat à loco ad locum distantem, fieri non potest in instanti. *Prob.* Quodd alioquin res illa simul deberet existere adæquatè in duabus partibus oppositis ; id est , in termino à quo & ad quem , tum simul in  
toto

toto spatio interjecto : ut si granum mihi diceretur moveri in instanti à cœlo in terram, simul esset in cœlo & in terrâ , simulque in toto illo spatio quod cœlo terræque comprehenditur. Repugnaret enim cum instanti indivisibili ut prius existeret in uno termino , quàm in alio ; quia instans indivisibile non habet prius aut posterius. Sic etiam in motu circulari instantaneo v. g. firmamenti , singulæ illius partes simul essent in toto illo ambitu , siquidem eo in casu nulla foret successio. Notabis porro me loqui de motu rei ad locum distantem ; ne questionem illam metaphysicam hîc attingam , num scilicet Angelus moveatur in instanti ad locum sibi contiguum ; ut volunt Thomistæ.

*Obje. 1.* Ex SS. Patribus, Angeli & corpora gloriosa per donum agilitatis moventur in instanti. R. Tunc sumi instans pro tempore brevissimo.

*Obje. 2.* Potentiæ infinitæ respondere debet possibilis effectus ipsi proportionatus. Ergo potentiæ motrici infinitæ , qualis est Divina , debet respondere motus infinitè velox : ergo instantaneus. R. Potentiam ejusmodi esse tantum ad effectum velociorem & velociorem in infinitum , prout sese Deus ad illum determinare voluerit.

*Inst. 1.* Ex Arist. 8. *phys.* si daretur virtus naturalis motiva infinita, faceret motum in instanti : ergo illud attribuendum est virtuti Divinæ quæ de facto est infinita. R. Hypothesim allatam ab Arist. esse impossibilem, ex quâ nihil sequitur quod absolutè sit possibile : ut aliàs jam monui in Disput. de Infinito.

*Inst. 2.* Potest egredi à sole illuminatio quæ simul & eodem instanti fiat in singulis mundi

partibus, etiam remotissimis: ergo à pari poterit à Deo fieri motus *v. g.* projectionis, quo feratur lapis in instanti ad spatium aliquod ingens. *Ex.* Exitum luminis à sole, quo totus orbis simul tempore collustretur, non fieri per motum localem, ita ut quod lumen profunditur ad partes remotiores, prius extiterit in propinquieribus; cum accidens hoc pacto nequeat transire à subjecto in subjectum. Res igitur ita se habet, nempe quod simul tempore sol producat lumen in iis omnibus mundi partibus, sic tamen ut prius solùm naturâ producat in propinquieribus quàm in remotis; cum in remotis illud non attingat, nisi ptopinquis median-  
tibus.

*Notabis* tamen rem eandem, putà Angelum, per virtutem Divinam simul instanti reperiri posse in duabus mundi partibus oppositis per re-  
productionem, sed non per motum localem.

*Dico* igitur II. Contra Zenonem: sic motus localis fit successivè de loco ad locum determinatum, ut per se loquendo perficiatur finito tempore; ut quidem patet ipsà experienciâ.  
Quamquam nihilominus,

*Dico* III. Per accidens fieri potest motus localis continuus intra spatium aliquod finitum, puta supra lineam pedalem, qui tamen nunquam absolvatur. Quod facilè comprehendi potest attendendo ad figuram 7. primi laterculi. Si enim filum *g. h.* traducatur in infinitum successivè per longitudinem parallelæ *a. b.* novas semper designabit partes, & continuè descendet per lineam pedalem *e. f.* nec tamen unquam ad finem ipsius pervenietur; quia parallela superior illa nunquam potest concurrere cum inferiori; ut jam monui in Disp. de Quantitate. Quod  
per-

perinde per proportionem obſervandum eſt in fig. 8. ejuſdem laterculi. Sic etiam fieri poteſt ut umbra ſolis à gnomone projecta, quanvis continuè veluti moveatur, non decurrat tamen breviffimum aliquod ſpatium, niſi poſt longiſſimos annos, ſi maximum circulum curſu lentiffimo Sol ipſe obeat, &c.

C A P. V. *Motus localis ſpecies varia.*

**I**Nter motus locales alii ſunt *per ſe*, alii autem *per accidens*. Motus *per ſe* eſt quando res proprio movetur motu. *Per accidens* verò eſt, quando movetur ſolummodo ad motum alterius: quâ ratione partes dicuntur moveri ad motum totius. Ita etiam quis in navi *per ſe* quieſcens, movetur tamen *per accidens* ad motum ipſius navis: item & dicitur moveri *per accidens* ad orientem motu navis, cùm ipſe *per ſe* in eâ navi deambulat verſus occidentem.

Prætereà verò ex motibus alii ſunt recti, quando mobile fertur per lineam rectam; alii obliqui, quando per lineam obliquam ſeu tranſverſam: alii circulares, quando circa aliquod centrum. At ex motibus circularibus alii dicuntur concentrici, quando ſervant ſemper æqualem diſtantiã ab eodem centro; alioquin dicerentur excentrici.

Denique tandem motus iſti vel ſunt naturales, vel præternaturales, vel violenti, vel mixti ex naturali & violento.

*Dico* autem I. Naturalis motus ille eſt qui oritur à principio intrinſeco innato & non renitente paſſo. Qualis eſt motus deorſum in lapide, ortus à gravitate ipſi naturaliſter inſitã. Sicque alius eſt motus naturalis gravium & levium; alius verò proprius viventium, quem in

animantibus vocant progressivum; unde vel incedendo, vel natando, vel volando, vel rependo alium in locum sese movent.

*Notandumque* est, motum hunc progressivum fieri partim pulsione, partim attractione, ut docet Arist. Nam ex partibus animalis progredientis aliæ moventur trahendo, aliis quiescentibus & resistentibus, quibus innitantur trahentes. Quamobrem videmus in ipsis quadrupedibus, quemadmodum insistant pedibus duobus, dum aliis duobus fit tractio, unde corpus totum in locum alium transferatur; habentque bipedes ipsæ animantes æquivalentiam cum quadrupedibus, idemque præstant, ubi modò calcibus, modò extremis pedum articulis vicissim insistant. Nec ille motus caret missione violenti, ob illam tractionem & pulsionem, nam inde etiam oritur in membris defatigatio; quæ tamen est minor, ubi planum seu solum in quo progredimur, resistit firmitus, ut patet experientia. Hucque attinet quoddam membra in animalibus sic aptantur inter se, ut motum ejusmodi exercere possint. At

*Not. 2.* Principium illius motus esse appetitum, per quem applicantur ceteræ facultates & organa ipsi deservientia. Eumque in finem comparantur præcipuè muscoli, tendones, nervi, ac spiritus animales, qui per ipsos nervos & musculos statim à cerebro diffunduntur, ut fiat motus. Alioquin in somno, in paralyti, aliisque id genus affectibus, non potest fieri motus ille; quia spirituum transmissio impeditur à pituitâ densâ & viscosâ nervos obstruente. Quinetiam inde nascitur defatigatio, cum illi spiritus exhauriantur.

*Dico* I I. Motus præternaturalis, ut vulgò  
ap.



appellant, est quidem à principio extrinseco, sed passo indifferenter se habente, non autem renitente, aut illum exigente. Qualem æstimamus esse motum cœlorum, qui totus est à motricibus Intelligentiis, ut suo loco demonstratur.

*Dico III.* Motus violentus ille est, qui oritur à principio solùm extrinseco, renitente passo: ut motus sursum in lapide. Multiplexque est motus violenti genus: puta qui fiat vel pulsione, vel tractione, aut vectione, aut volutatione, aut projectione in partes quæ inclinationi mobilis sint contrariæ. Neque hoc loco parùm laborant Philosophi, ut explicent quonam ex principio immediatè prodeat motus rei projectæ; siquidem nos oritur à projiciente, postquam ex illius manu excussa est: nihil enim ampliùs influit v. g. in lapidem projectum; neque illi per aliquam intermediam virtutem applicatur.

#### C A P. V I. *Causa immediata motus in projectis.*

**N**onnulli causam hujus motus ajunt esse aërem ad projectum confluentem motu vacui, quod alioqui deberet fieri necessariò, dum à projecto unus locus deferitur tendendo ad alium. Sed refellitur, quia ille accessus aëris supponit motum projecti: ergo illum non causat. Deinde quando mobile facto impetu, movetur circulariter, ut rota vel trochus, nullus huic doctrinæ esse locus potest.

Communis ergo sententia est Thomistarum, qui totum istud negotium rejiciunt in aëris condensationem, subitamque ejusdem aëris rarefactionem adversùs ipsum projectum, unde ulterius deferatur. Sed ostendo non esse hanc saltem adæquatam causam motus istiusmodi. Primò, quia in eo casu aër magis solet conden-

fari ad anteriores partes projecti, quàm ad posteriores, aut ad laterales, unde potius deberet retardari motus projecti. Et verò, sagitta missa per aërem, in anteriore sui parte accenditur, propter condensationem aëris cui alliditur cum impetu ipsum dividendo; cum tamen posteriori in parte ne incalescat quidem. Ergo aër plus agit adversus anteriorem ipsius partem, quàm in posteriorem: ergo ille impulsus sagittæ non fit vi aëris condensati, sese rarefacientis ad posteriores illius partes. *Conf. 1.* Si sagitta emittatur per chartam bene tensam, feretur longè ultra chartam, & quidem magno cum impetu; cum tamen eo in casu vix quidquam aëris ad posteriorem ipsius partem sese rarefaciat. *Conf. 2.* libretur hasta longa 20-pedes, cujus etiam pars posterior sit acuminata; feretur certè magno impetu; cum tamen aër ad ipsius partes postremas sic minimè possit affundi, ut per eum magis impellatur; immò potius aër ad acumen illud, quod supponimus, potius divideretur.

Item, hoc secundo argumento refellitur allata sententia. Si rota, vel trochus circulariter contorqueatur, volvaturque etiam maximà cum celeritate, ubi tamen prope adjecerimus manum, vix ullam percipiemus aëris commotionem. Immò si filum vel levissimum applicueris, vix movebitur: ergo illa agitatio rotæ, vel trochi non efficitur ab aëre concitato. Item, si quis aërem rotæ, vel trocho circumfusus in contrariam partem flabello removeat, non desinet idcirco rota, vel trochus pari celeritate convolvi. Item, dum puer trochum manu excipit, defertque in alium locum; ille tamen eodem modo agitur. Ergo ille motus trochi ab aëris circumfusi agitatione non oritur.

Huc

Huc accedunt varia id genus argumenta alia, quibus omnino evincitur falsitas illius sententiae. Putà, quòd flante vento contrario, quo àër in adversas partes repellatur, ultrò nihilominus feratur sagitta, &c. Quare his præsuppositis,

*Dico I.* Necesse est motum rei projectæ oriri ab aliquo genere qualitatis ipsi à projiciente impressæ. *Prob.* Quia non potest assignari aliud principium illius motus immediatum. Neque hanc qualitatem negavit Arist. etsi de illâ tacuit, qui de omnibus dicere tam disertè non potuit. Ab aliis autem vocatur *impetus*; qui etiam malleo, vel cuneo impressus, efficit ut fortiùs agat.

*Dico autem II.* Non ideo negandum esse, quin interdum ad motum istiusmodi simul cum qualitate impressâ concurrat etiam àëris condensati subita rarefactio. Hinc enim aliqui rationem petunt, cur motus naturalis gravium celerior sit in fine, quàm in initio. Item, os bombardæ thoraci ferreæ nimis propè applicatum, illam propterea non perfodit; quòd tamen præstaret omnino ex inajori distantia; quia scilicet rarefactio àëris condensati, ad impulsum globuli emissi non parùm confert. Et sic de aliis.

Quæres, cur pila emissa reticulo, fortiùs evibratur, quàm ubi impellitur tabellâ; siquidem tabella plus habet àëris condensati se rarefacientis. R. Quia nervi reticuli per ictum pilæ adducti in partem posteriorem, dum statim vi magnâ sese ad pristinum statum reducunt, pilam cum impetu repellunt, eo per proportionem modo, quo sagitta emittitur per chordam arcus, dum sese reducit.

*Notandumque est*, impetum illum, quanvis in rebus corporeis sit materialis, posse nihilominus

produci ab Angelo; nam Angelus est productivus ad extra non tantum motus localis, sed præterea etiam & earum qualitatum quæ ad illud genus spectant. Vt explicui in Metaphysicâ de Angelis, cap. 2.

### C A P. VII. *Solvuntur Objectiones.*

**O**bjec. 1. Non posset explicari quomodo, & quando produceretur illa qualitas in projecto. R. Tunc produci qualitatem illam impressam, quandiu mobile conjunctum est cum projiciente, à quo & ipsum mobile per motum disponitur ad projectionem.

Inst. 1. Si lapis projiciendus tunc habet in se jam productam ejusmodi qualitatem, quandiu manu projicientis, aut fundâ continetur, deberet efficere motum, & vi eripi ex manu, aut ex fundâ. R. Tunc illam qualitatem non posse motum efficere, quia nondum determinata est ad motum certam in partem seu lineam efficiendum, cum de se sit indifferens ad motum quamcunque in partem producendum, nec habeat potior rationem unius, quam alterius.

Inst. 2. Non posset explicari quomodo aut quando ad illum motum certam in partem determinaretur. R. Tunc determinari quando laxatur, exitque à projiciente versùs hanc partem, non aliam. Potestque etiam alias in partes determinari, vel obice occurrente, vel ab alio projecto concurrente.

Inst. 3. Nec in motu, nec per motum illa qualitas producitur, aut determinari potest ad certum motum. Prob. Quia motus de se non est activus, nec consequenter concurrat ad productionem illius qualitatis, aut ad illius determinationem. R. Motum esse saltem conditionem con-

connaturaliter requisitam ad hoc ut producat  
à projiciente illa qualitas, conserveturque. Nam  
inde illud fit manifestum, quod interposita quie-  
te vel minimâ, desinat omnis impetus; quemad-  
modum patet experienciâ. Vt ergo illa qualitas  
non producit nisi aut per motum, aut cum  
motu; ita nec potest conservari sine motu.

*Inst. 4.* Saltem potest illa qualitas à Deo pro-  
dusi sine motu; quid enim implicat? C. Quô-  
tamen in casu faceret motum; cum de se sit ef-  
fectiva motus. Ergo de se non exigit motum  
vel prævium, vel concomitantem, unde ad mo-  
tum efficiendum determinetur. R. Eo in statu  
nullum efficeret motum, dum per motum cer-  
tam aliquam in partem determinaretur, siqui-  
dem de se est indifferens ad quemlibet.

*Inst. 5.* Non posset explicari quomodo cor-  
rumperetur illa qualitas, siquidem contrariè  
oppositam aliam non habet. R. Seipsâ corrup-  
pitur sensim, desinente Deo illam conservare  
juxta exigentiam ipsius naturalem. Quomodo  
per proportionem vulgò omnes admittunt de  
sono, qui est qualitas per medium diffusa. Item,  
ad interitum illius qualitatis impressæ non pa-  
rùm confert gravitas naturalis v. g. lapidis pro-  
jecti, quatenus resistit motui violento sibi con-  
trario.

*Objic. 2.* Lapis sursum projectus non dicere-  
tur habere motum violentum, quia esset à prin-  
cipio intrinseco, nempe ab illâ qualitate impres-  
sâ. R. Sic non foret à principio intrinseco in-  
nato seu connaturali, & consequenter non resi-  
stente passo: ergo nihilominus sic foret motus  
violentus.

*Inst. 1.* Si lapis deorsum cum impetu projici-  
tur, motus ille non erit violentus, etsi foret ab

impresso impetu ; quia non fieret renitente passo. C. Diceretur enim tantum præternaturalis, quia fieret præter exigentiam subjecti.

*Inst. 2.* Illa qualitas non esset connaturalis ulli subjecto naturali : ergo non posset dici naturalis ; cum tamen omnis qualitas non supernaturalis, debeat saltem dici naturalis : R. Dici naturalem, quia producitur à causâ naturali, & per actionem naturalem.

*Inst. 3.* In evibratâ longiori hastâ produceretur qualitas illa sub minori intensione in partibus remotis, quàm in propinquiorebus : sic enim, ut vulgò ajunt, causa omnis naturalis agit uniformiter difformiter : ergo fieri deberet motus tardior in parte remotiori, quàm in propinquâ ; quia qualitas minùs intensa, producit effectum minùs perfectum. Quod tamen repugnat ; siquidem de facto æqualiter secundum totam suam longitudinem movetur hasta projecta. R. Iam primâ parte hujus physicæ, *Tract. 2. Disp. 4. cap. 4.* ajebam ex probabiliori sententiâ, quemadmodum agens naturale ad certam distantiam profundat semper qualitatem suam cum æquali intensiōis gradu. Quo pacto sonus æquè perfectè auditur, & lumen æquè perfectè percipitur intra certam distantiam. Sed præterea, R. Servari motum æqualem secundum totam hastæ longitudinem ; quodd illud exigit partium ejusmodi continuitas ; motumque elici à partibus qualitatē quæ sunt majoris intensiōis ; nec consequenter in illâ circumstantiâ sunt effectum produciunt partes aliæ. Vbi enim vis est major, non potest retardari à debiliore. Hæc autem afferri possunt ad confirmationem nostræ doctrinæ de actione uniformiter difformi, & illi loco adjici.

CAP. VIII. *De motu directo & reflexo.*

**A**D superiores accedit ista divisio motus localis in *directum & reflexum*.

Directus ille est per quem mobile primò & per se tendit ad aliquem terminum. Huicque opponitur *reflexus*, per quem ex occurſu corporis alicujus, vel alio tandem modo, mobile illud fertur vel directè ad easdem partes unde processit primò; vel obliquè in alias distantes, juxta quantitatem anguli incidentiæ quem designat in corpore reflectente, quando motus reflexus fit ex occurſu corporis reflectentis. Quæstio verò agitari hoc loco solet, utrum necessariò, & quomodo intercedat quies inter utrumq; illum motum.

*Dico I.* Quando uterque motus ille est à principio intrinseco, semper intercedit quies aliqua. Ut in motu cordis, quo naturaliter dilatatur & constringitur. Quo maxime sensu accipiendus est Arist. cum scribit inter motum directum & reflexum intercedere quietem. Item, & in motu locali, quanvis uterque non sit à principio intrinseco, nihilominus aliunde fit plerumque, ut quietem intermediam habeant directus & reflexus. Puta cum lapis sursum projicitur, non relabitur deorsum, quin paululùm quieverit; tum propter reliquias impetus adhuc tantisper perseverantis, tum maximè ob resistantiam aëris condensati & rarefacientis sese versùs lapidem illum. Dubium enim non est, quin aër condensatus, ubi maximè est in motu, sustinere aliquod corpus grave possit. Ita si pileus filo, vel acu suspensus rotetur velociter, lapis intra ipsius concavitatem conjectus non decideret. Neque verò etiam in illo motu perpetuo, tam facilè dividi ipse aër potest.

**Dico I I.** Contra Thomistas, non est illud absolute necessarium, sed accidentale duntaxat ad motum directum & reflexum, ut quietem aliquam intermediam habeant; siquidem possunt de facto nullam habere. *Prob.* Si enim lapis sursum projectus offenderit molem ingentis ponderis aliquam descendantem, unde revocetur deorsum, quis dicat lapidem hunc nihilominus quiescere tantisper saltem, priusquam descendat? sic enim sequeretur ab ipso lapide per aliquod tempus sisti, & immotam contineri in aëre tam ingentis ponderis molem descendantem. Quod per se videtur incredibile; unde enim vim ad id sufficientem haberet?

*Objic.* Si per quietem aliquam intermediam non discontinuarentur, sequeretur eos non fore nisi eundem continuum motum; Atqui falsum consequens; quia singuli habent proprios sibi terminos à quo & ad quem. Ergo sunt duo realiter distincti motus. *Rz.* 1. Sic nihilominus posse dici eundem continuum motum, virtualiter duplicem, ob multiplices illos terminos. *Rz.* 2. Et si dicantur esse duo motus realiter distincti, non sequeretur idcirco fuisse intermediam quietem: possunt enim duo motus realiter distincti, sic esse ad invicem conjuncti immediate; quomodo per proportionem duo plana immediate conjungi possunt ad invicem. Quare in ista hypothefi, immediate post terminationem motus directi, consequetur motus reflexus.

*Inst.* 1. Mobile dum attingit corpus reflectens, necesse est ut cum eo coëxistat, vel per aliquod tempus: ac proinde sic quiescet: vel per aliquod duntaxat instans indivisibile; cujusmodi nullum esse postea ostenderetur. *Rz.* 1. Cum illo corpore reflectente coëxistere quidem, sed  
tan-



tantum successivè, non autem permanenter. *Rz. 2.* Coëxistentiam illam esse quidem per partem temporis divisibilem; sed indivisibiliter tantum, non autem divisibiliter. Vel si lubet, cum eo coëxistit per indivisibile quidem temporis, sed virtuale tantum, non autem reale. Quo pacto per proportionem cum duæ regulæ rectæ simul junguntur ad aliquod centrum, moveturque una, immotâ alterâ; tunc in illo motu successivo, per instans aliquod virtuale fit unius ad alteram tum perpendicularitas, tum parallelismus, quæ non suscipiunt magis & minùs, unde necesse est ut hæc fieri non possint nisi in aliquo instanti, saltem virtuali.

*Inst. 2.* Mobile in illo instanti est sine motu; siquidem in instanti non est motus: ergo sic saltem quiescit. *N. Conf.* Quia non est quies in instanti. *Rz. 2. Dist. Ant.* In illo instanti est sine motu realiter. *N.* Etsi conceditur tunc esse virtualiter sine motu, quatenus in eo casu præstatur illud, quod fieret per instans aliquod reale, si daretur de facto.

*Inst. 3.* Quando pila reflectitur à pariete, in eo prius quiescit, etsi per aëris intercepti subitam rarefactionem in occursu repellatur. *Prob. Ant.* Quia pila in pariete producit non modò albedinem, sed etiam calorem, & quidem intensum; quod fieri non potest nisi in tempore. *Rz.* Etsi dicatur quiescere, nihil contra nos, qui non negamus posse admitti quietem intermediam. At *Rz. 2.* Quanvis non quiesceret, calor ille non producit nisi ex adhæsiōe aëris qui per pilam ad parietem atteritur. Albescit autem paries ex particulis cretæ quas relinquit pila. Cur autem globulus plumbeus à bombardâ in parietem explosus, non reflectatur sæpe; ratio est,

quia plumbum magnâ ex parte sic liquefactum & emollitum impedit sufficientem aëris elisi rarefactionem, unde repellatur; qualis v. g. est aëris rarefactio, dum malleus ex incude resilit, &c.

### C A P. I X. *Motûs localis proprietates.*

**D**ico I. Velocitas & tarditas sunt motus proprietates. Hæc porrò in motu locali explicantur per coëxistentiam successivam mobilis ad plures, aut pauciores partes spatii, per longius, aut brevius tempus. Quare motus ille dicitur *velox*; quòd plures partes spatii brevi tempore; *tardus* autem, quòd pauciores longiori decurruntur. *Prob.* Quia hæc sufficiunt ad velocitatem, aut tarditatem istiusmodi explicandam.

*Objic.* Duo motus in spatio æquali habent partes æquales, quanvis fiant tempore inæquali, quia plures non habent partes quàm spatium decursum. *Transf.* Ergo sic forent æquales seu æqualis velocitatis. *N. Conf.* Quia velocitas aut tarditas non peritur præcisè & absolute ex eo quòd motus tot vel tot partes habeat, sed potiùs quòd tot habeat respectivè ad tale tempus. Nihilque est entitativè & secundum intrinsecum in unò motu, unde velocior dicatur, aut tardior; sed tantùm est aliquid relativè & secundum extrinsecum; nempe secundum tempus quòd connotatur.

*Notandumque* est 1. Motum naturalem gravium esse velociorem ad finem, quàm initio: non tantum quia, ut alii volunt, plus aëris per suam rarefactionem impellentis, semper affluit ad partes posteriores mobilis; sed maximè quòd aër celeritis moveatur versùs eam partem ad quam tendit mobile. Et verò, si mobile faciliùs defertur per medium quiescens, quàm si opposi-

tas in partes agigaretur; illud à fortiori contingit in medio versùs easdem partes commoto. Quo pacto cymba flumine secundo longè facilius navigat, quàm aduerso, aut etiam quiescente.

*Not. 2.* Motum projectorum velociorem esse aliquantò post initium, quàm initio; ut habet *Arist. 2. De Cælo*. Patetque experientiâ. Quamobrem tormenta bellica proximè admota, minus vehementer imperunt, quàm certâ ex distantia maiori. Ratio est, quia plus aëris ac magis ordinatè postea confluit ad globum emissum. Et quanvis minor sit impulsus in aëre, quàm in projecto, potest nihilominus augere impetum projecti: quia plures virtutes conjunctæ per modum unius agentis totalis fortius agunt; quanvis aliæ ex istis sint minores. Item, res in motu, etiam à virtute minori facilius moveri potest, quàm immota: quia motus videtur quasi ligare gravitatem corporum. Quâ ratione videmus campanas majores, primò quidem difficilius incitari, ubi autem sunt in motu, longè facilius, & ab aëre commoto, vel ab aliâ minori potentiâ agitari.

*Not. 3.* Motus progressivus animalium solet esse velocior in mediò, quàm ad initium, aut ad finem. Quia initio major copia spirituum illorum qui motui necessarii sunt, confluit ad musculos; at exhauriuntur tandem in fine.

*Dico II.* Inter motus locales perfectissimus est circularis, ob admirabiles ipsius proprietates. Primò enim hoc habet sibi proprium, quòd eodem in loco adæquato fiat, nec mobile exigit majus seipso spatium. 2. Ex propria dispositione, & de se, perpetuus esse potest. Quod motui recto non competit; siquidem omne spatium existens, per eum tandem decurri potest. 3. Illud maximè

maximè in circulari motu est mirabile, quòd partes majorem & majorem habeant velocitatem, eâ proportionem, quâ recedunt ab axe, seu à centro, unde & aprior est ad multa præstanda opera mechanica, ut trademus suo loco.

*Notandum* præterea est, *ex figura 8. secundi laterculi*; duas rotas inæqualis magnitudinis, si tamen eodem in axe defiguntur, æqualem in plano describere lineam, & æquale iter eodem temporis spatio; quanvis minorem lineam describat minor circulus, si separatus fuerit. Cujus quidem rei ratio aliunde peti non potest, quàm ex mixtione motus recti & circularis in eodem ejusmodi circulo. Sic enim ubi volvitur, simul trahitur in transversum per lineam rectam, ut cuilibet consideranti satis patet.

## DISPUTATIO V. DE DURATIONE.

### CAP. I. *Natura Durationis in communi.*

**D***Vratio*\* alio nomine apud Aristotelem vocatur *Quando*, constituitque speciale prædicamentum. Nam substantiæ novam infert denominationem, per quam scilicet denominatur *durans*. Formam autem hujusmodi unde res creata denominatur *durans*, volunt multi ex modistis cum D. Bonaventurâ, esse modalem aliquam entitatem successivam realiter distinctam à re durante, eo per proportionem modo, quo statuunt existere aliquod *ubi* internum fluens realiter distinctum ab eâ re quæ movetur localiter. Verùm ex communiori sententiâ juxta Arist. cum D. Th. & omnibus Peripateticis,

*Dico*

**Dico I.** Duratio aliud nihil est, quàm permanentia ipsius rei in suo *esse*. Quodd enim res existat, plusquam per instans, hoc ipso intelligitur durare; nec præterea opus est aliquâ modali entitate superadditâ. *Conf.* Quia nihil repugnat rem conservari à Deo sine illo accidente superaddito; quemadmodum per proportionem agebamus de *ubi interno* realiter distincto, quod supponunt adversarii. Quo in casu potuisset res aliqua conservari à Deo jam inde ab ipsâ mundi creatione usque ad extremum judicii diem, nec tamen diceretur *durasse*: quod per se videtur absurdum.

**Dico autem II.** Duratio vel sumitur *absolute*: quo pacto definitur permanentia rei in suo *esse*. Vel 2. sumitur *connotative*, seu *respectivè*: tunc verò definitur, rei coexistentia cum tempore, vel reali, vel virtuali; aut cum tali æternitatis parte virtuali.

*Notabis* enim nos hîc loqui per proportionem ad ea quæ de loco reali aut virtuali, tum de virtuali Divinæ immensitatis parte exposuimus suprà, *Disput.* 3. Sic enim aliud est tempus *reale*, seu duratio motus realiter existentis: aliud autem est tempus duntaxat *virtuale*; quod quidem etsi non existat actu & realiter, æquivalet tamen durationi temporis realis & actu existentis.

Porro, contra id quod asserimus durationem non esse modalem aliquam entitatem creaturæ duranti superadditam,

*Objic.* 1. Quod advenit rei existenti, ab eâ distinguitur nemine cogitante & realiter. Atqui talis est *duratio*. Nam præsupponit rei existentiam; siquidem nulla res dicitur durare, seu permanere in *esse*, nisi in eâ præsupponatur *esse*.  
*Dist.*

*Dist. Ma.* Quod rei existenti advenit intrinsecè & entitativè, seu secundum aliquam realitatem, ab eâ distinguitur realiter. *C.* Quod advenit tantum denominativè, & ratione connotati extrinseci. *N.* Sic autem res non denominatur durans, nisi connotando sui præexistentiam, seu coexistentiam ad tempus.

*Inst. 1.* Homo *v. g.* in instanti suæ productionis, seu pro priori in quo incipit existere, nondum habet durationem : ergo illi postea advenit. *Dist. Ant.* Nondum habet durationem *entitativè*, aut defectu intrinseci. *N.* Sed tantum illam nondum habet *denominativè*, defectu connotati extrinseci, seu defectu præexistentiæ. Quo pacto conservatio præsupponit primum esse rei, quod habetur per creationem; non tamen idcirco distinguitur realiter ab ipsâ creatione : ut aliàs monui.

*Inst. 2.* Si tantum res existeret per instans, esset realiter sine duratione : ergo duratio ab eâ distinguitur realiter. *Dist. Ant.* Esset sine duratione tantum denominativè, defectu extrinseci. Deinde *R. 2.* Nulla res potest existere per solum reale instans indivisibile : ut dicam postea.

*Objic. 2.* Talis rei existentia non dicit connexionem aliquam necessariam cum tali tempore, aut cum tali parte virtuali æternitatis Divinæ; habetque de se indifferentiam ut illi vel coexistat, vel non coexistat. Tam enim Adamus *v. g.* potuit modò existere, quàm initio mundi *C.* Ergo præterea debet illi aliquid superaddi realiter, unde ad hoc potius, quàm ad aliud tempus determinetur; & unde potius dicatur existens in isto tempore, quàm in alio. *R. 1.* Ad istud non requiri necessariò ut addatur aliquid realiter secundum novam realitatem; satis enim est ut addatur

datur secundum novam formalitatem relativam ad hoc tempus, vel hanc virtuales æternitatis partem; diciturque ista determinatio formalis. At R. 2. Determinari efficienter per actionem ipsius rei productivam in hoc tempore, non autem in alio. Nec fieri potest ut res ita producta in hoc tempore, non coëxistat huic tempori, sublatâ omni aliâ formâ realiter superadditâ.

*Inst.* Actio hujus rei creativa, de se indifferens est ad hoc, vel ad aliud tempus: ergo aliquid debet rei superaddi, ut determinetur ad hoc vel ad illud tempus. R. Volitionem per quam Deus se determinat ad creandum aliquid hoc tempore, non potest non esse productiva rei pro hoc tempore. Sicque res producta, est consequenter determinata ad existendum pro hoc tempore: nec potest hoc modo res producta, non esse ad hoc tempus determinata. Vnde etiam inferre licet, quàm frustra sit *durationis* modus realiter superadditus.

*Objic.* 3. Duratio est extensio existentiae ad multas partes temporis. Ergo est distincta realiter ab illa existentia, saltem in rebus permanentibus, puta in Angelo, lapide, &c. Siquidem ejusmodi existentia habet totum indivisibiliter suum esse simul, non autem per partes alias post alias, quales habet duratio, ut inquit D. Bonav. R. Nego durationem esse propriè extensionem, sed impropriè tantum, quatenus res eadem tota simul & indivisibiliter existens, coëxistit tamen pluribus temporis partibus. Quomodo per proportionem idem aliquod lignum in aquâ immobiliter defixum, successivè nihilominus respondet & coëxistit pluribus aquæ præterfluentis partibus. Neque verò etiam quoddam res dicatur

tur aut priùs, aut longiùs durasse, hoc habet tantum ratione intrinseci, sed potiùs ratione connotati extrinseci, nempe quòd vel prioribus, vel pluribus temporis partibus coëxtiterit.

*Obiic. 4.* Duratio motus distinguitur realiter ab ipso motu: ergo & ab aliâ re qualibet. *Prob. Ant.* Quia motus iisdem ex partibus constans, qui nimirum sit per idem spatium, potest nihilominus esse diversæ durationis: nam ex duobus ejusmodi motibus alter erit velocior, tardior verò alter. Ergo *duratio* non est idem realiter cum motu: alioquin ubi sunt æquales partes motus, ibi forent & partes æquales durationis. *Dist.* Vbi sunt æquales partes motus cum æquali morâ, seu perseverantiâ in *esse*; id est, cum æquali coëxistentiâ, seu ordine eodem ad tempus quod supponitur esse mensura communis illarum durationum; tunc sunt æquales durationes. *C.* Sin mora fuerit brevior, id est, si æquales illæ partes motus coëxtiterunt paucioribus partibus temporis, ob majorem earum veluti compressionem, ex majori applicatione virtutis motivæ; tunc dicetur motus inæqualis durationis, & velocior. Nihil enim aliud est duratio motus, quàm mora & permanentia ipsius esse, seu coëxistentia ad tale tempus, quod supponitur esse regula & mensura communis aliarum durationum; quemadmodum postea explicaturus sum.

*Inst.* Potest idem numero motus reproduci, non autem idem numero tempus: ergo distinguuntur inter se realiter. Ita plerique ex adversariis. At *Rz.* Neque hunc motum, nec tempus habere propriam producibilitatem, cum propriam non habeant entitatem, & distinctam ab entitate subjecti. Verùm, quocunque modo se se  
ista



ista habeant. *R.* 2. Nec motum, nec tempus numero idem posse reproduci; siquidem unitas motus ab unitate numericâ temporis, unitas autem numerica temporis petitur ab unitate numericâ talis temporis imaginarii, aut à tali virtuali æternitatis parte quæ suo modo ita præterit, ut reditus ad illam nullus esse possit. Quo sensu vulgò ajunt *ad præteritum nullam esse potentiam*. Et verò, si posset Deus reproducere diem hesternum, posset conservare & hodiernum, ita ut nunquam præteriret; ac proinde possem æque diu vivere ac Mathusalem, nec tamen plures haberem annos, quàm nunc habeo, &c.

*Objic.* 4. Nisi duratio esset modus aliquis à re durante realiter distinctus, isque successivus, non posset Angelus *v. g.* absolutè saltem, & sublato omni motu externo, cognoscere suam durationem, seu quantum durasset. Ergo in eo debet admitti modus aliquis durationis successivus, cujus quidem cum partes vel tantas, vel tantas effluxisse videat, judicat se tandiu, vel tandiu exitisse. *Conf.* Quia neque alioqui suam durationem posset mensurare per tempus externum; illud enim quod est successivum, non potest mensurare ens indivisibiliter permanens: siquidem mensura & mensurabile debent esse homogenea, seu generis ejusdem: quomodo pondus non mensuratur nisi pondere; nec longitudo nisi longitudine: ergo à pari, nec potest mensurari à quantitate successivâ nisi successivum. *R.* Solveretur hæc difficultas capite sequenti, *Affert.* 4.

**C A P. II.** *Durationis species diversa, tum præcipuè de Tempore.*

**C**um duratio aliud nihil sit quàm permanentia rei in suo esse, sive permanenti, sive suc-

successivo; nec ab ipso esse rei distinguatur; vulgò durationem dividunt in eam quæ est entis permanentis, & in eam quæ est entis successivi. Ipsam verò entis permanentis durationem docent esse tum *æternitatem* simpliciter dictam, tum *ævum*, seu *æternitatem*: Quæ autem est continua & successiva motus duratio, propriè appellatur *Tempus*.

Porro, ut ne sit quæstio solùm de nomine, paucis in hunc modum complector omne durationis genus. Ac primò quidem alia est initio & fine carens, quæ dicitur simpliciter *æternitas*: alia est habens initium sui, sed fine caret, ut duratio Angeli, animæ rationalis, rerumque aliarum ejusmodi ex naturâ suâ incorruptibilium; vocaturque *ævum*, seu *æternitas* secundum quid: quo sensu beatitudo sanctorum, ac reproborum damnatio dicitur *æterna*. Duratio motus, ut jam monui, ea est quæ propriè appellatur *Tempus*. Quanquam & illa etiam vulgò dicuntur habere durationem *temporaneam*, quæ habent tum initium sui, tum finem, quodd illa duratio soleat tempore mensurari: qualis est duratio rerum earum quæ quotidie in hoc sublunari mundo generantur ac intereunt. Atque ut hoc loco maxime agamus de Tempore: Quàm sit difficile naturam illius explicare, satis insinuabat D. Ang. in Confess. ubi sic legimus: *Quarenti à me quid sit Tempus, scio; si autem quarenti explicare velim, nescio*. Hoc tamen ut præstem:

Dico I. Tempus propriè & in se; aliud nihil est, ut jam monui, quàm ipsa motus duratio continua & successiva. Quamobrem tam certum est Tempus actu & realiter existere, quàm constat motum esse quid reale actu. Et verò cum *Apoç. i.* legimus jurasse Angelum non amplius futurum esse

esse tempus , supponebat fuisse priùs actū. Ita *Gen. 1.* dicuntur fuisse facta cœli luminaria , *ut essent in tempora, & dies, & annos.*

Præterea verò tempus ab Arist. sic definitur 4. *Phys. c. 11.* *Est numerus motus secundum prius & posterius.* Id est , numerus seu extensio partium priorum & posteriorum quæ sunt in motu. Nam in motu aliæ sunt partes quæ dicuntur subjectivæ, prout nimirum simul recipiuntur in diversis subjecti partibus , puta in lapide , cujus partes omnes simul moventur. At ille motus non intelligitur durare , nisi quatenus habet multas ejusmodi subjectivas partes alias post alias; seu priores & posteriores. Quam ob causam *duratio* in motu idem est ac partium illarum continua successio , & quatenus in suo illo esse continuo & successivo perseverat. Sicque

*Not. 1.* Tempus esse quantitatem quandam successivam , cujus partes non existant nisi in fluxu continuo, nec uniantur inter se nisi unione fluenti, non autem unione permanenti, uti accidit in partibus continui permanentis. Neque verò in allatâ definitione Aristoteles sumebat *numerum* pro quantitate discretâ, sed eo nomine est usus ad designandam multitudinem partium successivarum per quas motus existit , & in suo esse perdurat. At

*Not. 2.* Illas easdem partes dividi præterea in præteritas, præsentis & futuras. Quæ tamen denominatio præteriti & futuri non est absoluta , sed potius relativa; quia nihil est præteritum aut futurum, nisi comparativè ad præsens. Item

*Not. 3.* Tò *Numerum* , in definitione Aristotelicâ , sumi etiam pro *mensurâ* , sive *passivâ* , per quam res aliqua intelligitur esse mensurabilis , sive pro *activâ* , per quam res aliæ mensurantur.

rantur. Potest enim duratio mensurari, ut scia-  
tur quanta fuerit; tum etiam potest assumi ad  
alias durationes mensurandas. Sed

*Notabis* tempus non esse mensuram motus il-  
lius, cuius est duratio: quia nulla res est mensura  
sui ipsius; tum quia mensura sumitur ut me-  
diū ad cognoscendum id quod mensuratur;  
nos autem, ut loquitur Suarez, non cognosci-  
mus quantum duret actio per propriam & in-  
trinsecam ejus durationem, sed comparando il-  
lam cum aliā distinctā duratione cuius quanti-  
tas nobis notior est. Quare hoc loco distinguen-  
dum erit inter tempus *internum*, & tempus *ex-  
ternum*. Tempus internum, seu duratio interna  
motus, est id quo motus mensuratur secundum  
partes priores & posteriores. At Tempus exter-  
num est duratio motus rei distinctæ, per quam  
aliæ id genus durationes mensurantur. Atque ita  
ex communi consuetudine, duratio motus cœ-  
lestis, ac præcipuè solaris, dicitur Tempus quo  
utimur tanquam mensurā quādam ad mensuran-  
das, ac designandas alias durationes. Quanquam

*Not. 5.* Motus illius solaris duratio prius à  
nobis per intellectum distinguenda est varias in  
partes certis comprehensas limitibus, puta in  
dies & in horas, tum in menses, annos, &c. Post-  
eā verò per operationem intellectus compara-  
tivam, debent illæ partes applicari aliarum  
rerum durationibus quas dimetiri volumus.  
Eamque ob causam Arist. *lib. 4. Phys.* scribit,  
sublato intellectu non foret tempus ullum, non  
quidem in ratione absolutā temporis, sed in  
ratione mensuræ activæ ad metiendas rerum  
aliarum durationes. Vnde brutis animantibus,  
tum iis qui sunt prorsus mente capti, ac dor-  
mientibus nihil durat, seu potius nihil videretur

tur durare, quia scilicet rebus illis non intendunt: estque hujus rei exemplum illustre in septem dormientibus. Item, hinc petitur etiam ratio cur iis non durent dies, qui re aliquâ vehementiùs delectantur: contra autem cur iis mora videatur longior, qui boni alicujus desiderio tenentur, aut aliquâ animi ægritudine laborant. Atque his positis;

*Dico II.* Tempora quidem particularia esse varia pro diversitate ac multiplicitate motuum particularium; qui singuli propriam habent suam durationem, seu *Tempus*. At præterea

*Dico III.* Aliud esse tempus externum, quod dicitur *unum commune & universale*, quo omnes uti solent, veluti mensurâ quadam extrinsecâ ad alias durationes metiendas. Illud autem est duratio motus cœlestis, ac præcipuè solaris. Primò, quia, ut ex Arist. loquitur D. Thomas, *est Tempus ubique existens, idemque apud omnes, & omnia ambiens*. Ideoque faciliè ab omnibus cognoscitur. 2. Quia faciliè à nobis dividitur in annos, menses, dies, & horas. 3. Quia est maximè æquabilis & uniformis, &c. Quare quotiescunque de alicujus actionis, aut alicujus particularis motus duratione judicare volumus, illam comparamus cum motu cœli. Et verò etiam motu horologii, aliisque id genus instrumentis, tanquam extrinsecis aliarum durationum mensuris non utimur, nisi ut priùs per motum cœli mensuratis, aut veluti signis illius. *Quamquam*

*Notabis*, quòd, quemadmodum cum spatio reali, supponitur aliud spatium imaginarium virtualiter reale de se absolutè necessarium; aut virtualis pars aliqua Divinæ immensitatis cui coexistit: ita per proportionem, præter illud

universale tempus externum reale, supponitur & tempus imaginarium quoddam virtualiter reale, quasi ab æternitate necessario fluens; nec non etiam Divinæ ipsius æternitatis partes virtuales supponuntur, quibus coëxistit: Quamobrem ratione illius temporis imaginarii virtualiter realis, vulgò ajunt mundum creari potuisse multis ante annis quàm de facto sit creatus: Item, cœlo immoto, diceremus nihilominus ex rebus istis sublunaribus alias eodem, alias diversis existeret temporibus. Sic enim ajebat D. Aug. in Confess. lib. II. c. 23. *Cùm Sol sterisset voto Iosué, ut victor prælium perageret; Sol stabat, sed tempus ibat: per suum quippe spatium temporis quod ei sufficeret, pugna illa gesta est.*

Dico IV. Possunt per ejusmodi externum tempus mensurari durationes etiam entium permanentium. Sic enim homo v. g. aut Angelus dicitur jam durasse tot annos, quia tanto tempori coexistit. Neque verò etiam duratio Angelica v. g. potest absolutè ex se, aut in se cognosci; sed tantùm cum habitudine quadam coexistentiæ ad durationem successivam, saltem imaginariam, non tanquam per mensuram ejus, sed ut per terminum coexistentiæ, ratione cujus concipitur instar *quanti* cujusdam: Quemadmodum scribit Suarez.

Nec dicas; Tempus non est mensura homogenea cum duratione indivisibiliter permanente, qualis est Angelica. C. Ergo illi mensurandæ non est idonea; ut in fine superioris capitis objiciebatur. N. Conf. Distinguo enim inter mensuram, quæ per simplicem applicationem mensurat: quo in casu, mensura & mensuratum debent esse homogenea. Hoc autem non est necesse ubi applicatur cum ratiocinio saltem virtuali:

tuali : ut quando judico me tot annos vixisse ,  
quia tot cœli revolutionibus coextiti.

**C A P. I I I. De existentia, & continuatione  
partium in tempore.**

**S**uppono motum & tempus esse quædam genera quantitatis continuæ successivæ , cum habeant aliquam extensionem & divisibilitatem in partes, easque priores & posteriores, seu præteritas, præsentēs & futuras. Nec tamen aut motus localis à mobili; aut tempus ab ipso motu distinguitur enitativè. At quomodocunque ista res sese habeat :

**Dico I.** Tempus non constat ex instantibus indivisibilibus. *Prob.* Quia non potest magis constare ex indivisibilibus , quàm motus ; cum aliud nihil sit quàm duratio ipsius motus , seu permanentia in *esse* , quam habet motus : Atqui motus non constat ex indivisibilibus. *Prob.* Quia motus non magis constat ex indivisibilibus , quàm magnitudo , seu latitudo spatii à quâ habet extensionem : nam *esse* localis motus aliud nihil est , quàm continua & successiva coexistentia ad partes spatii quod decurritur : atqui supponimus spatium non posse constare ex indivisibilibus.

Item , quemadmodum in continuo permanente , inextensum additum inextenso non potest facere extensum ; ita neque in continuo successivo instans indivisibile additum alteri instanti indivisibili. *Negant paritatem.* Quia in continuo permanente partes ipsius constitutivæ sunt simul : at in successivo unum succedit alteri ; atque ita ambo faciunt magis extensum , unde dicatur longum tempus. *Contrà autem est.* Quia perinde uniri inter se debent in continuo

successivo, atque hoc modo facere extensum continuum; ergo sic indivisibile uniretur indivisibili faciendo extensum; quod repugnat; uti jam ostendimus in hoc Tract. Disp. 1. c. 3. Nec potest explicari quemadmodum *instans* additum tempori, efficiat tempus illud longius: cum *instans* nullius sit longitudinis.

Item, si diceretur tempus constare ex indivisibilibus, sequeretur inde motum velocem esse cum tardo æqualem. Quod quidem ut probem; suppono motum perinde constare debere ex indivisibilibus, siquidem, ut volunt adversarii, hoc postulat natura continui successivi. Et verò, pars divisibilis seu continua motus non potest tota coëxistere alicui solùm instanti temporis; sic enim superiori Disput. c. 4. ostendimus non posse fieri motum in instanti, quòd mobile simul existeret in duabus oppositis partibus, tum in medio interjecto: quod repugnat. His ergo suppositis, sic argumentor. Quo instanti primum indivisibile sui motus perficeret Achilles, suum etiam compleret testudo lentigrada: non enim Achilles tunc posset aut plura indivisibilia spatii, per plura indivisibilia sui motus percurrere; quia faceret motum à loco ad locum in instanti; nec testudo lentigrada posset eo instanti temporis partem solùm aliquam sui indivisibilis illius absolvere; quia indivisibile partes non habet; idemque de aliis partibus motus esset sentiendum. Ergo par esset motus velox Achillis, cum tardo testudinis proprio; quod repugnat. Sic enim perinde posset adæquari breve tempus cum longo, seu pars cum suo toto, &c.

Dico igitur I I. Motum & tempus non constare nisi ex partibus continuis, & in infinitum divi-



divisibilibus, quemadmodum per proportionem ostendimus de quantitate permanente. Neque verò etiam perinde motus & tempus habent ulla indivisibilia sive continuantia, sive terminantia, nisi virtualia. At

*Not. 1.* Hoc esse essentiale partibus continui successivi, ut simul esse non possint ullæ, sed tantum aliæ post alias. Quâ ratione annus *v. g.* aut mensis non constat nisi ex partibus *fluenter*, seu *successivè*, non autem *permanenter* existentibus. Item, nec continuantur, seu ununtur inter se unione permanenti, sed tantum fluenti & successivâ. Neque verò etiam in ejusmodi continuo, perinde ac in permanenti, partes inter se distinguuntur actu, sed tantum potentiâ. Item,

*Not. 2.* Eam esse naturam entis successivi, ut dicantur partes in eo existere, etsi ratione sui præcisè aut amplius non sint, ut partes præteritæ; aut nondum sint, ut partes futuræ. Ita annus *v. g.* cum sit totum quoddam successivum conflatum ex mensibus, ex diebus, ex horis & momentis, tanquam ex partibus integrantibus & sui constitutivis; nec ab iis collectivè sumptis distinguatur ullo modo; inde consequens est non posse absque illis existere: & tamen nullas habet simul, sed tantum alias post alias; nec ratione sui præcisè existunt præteritæ, aut futuræ, dum existit præsens, cui suo modo, id est, successivè, contiguntur: ergo necesse est ut partes eo in casu existant saltem ratione totius, tum ratione partis præseueris, cum quâ unum continuum constituunt. Item ex dictis

*Not. 3.* Esse in tempore *præsens* quod solet exprimi per particulam *nunc*. Sic enim dicimur nunc vivere, loqui, &c. cum ista sint non præteri-

ti, aut futuri temporis, sed præsentis. Et verò si nullum diceretur esse præsens; non esset consequenter aut præteritum, aut futurum: siquidem præteritum aliud nihil est, nisi quod fuit aliquando præsens, & esse desiit; &c. At

*Not. 4.* Nullum debere admitti *præsens*, seu *Tò nunc*, quod sit realiter ac formaliter indivisibile: quandoquidem tempus non constat ex instantibus indivisibilibus: ac proinde nullum esse *nunc*, nisi *nunc temporis* extensum & divisibile in partes alias post alias; cujusmodi est nunc temporis vel horarii, vel menstrui, vel annui. Sic enim solet dici vel minutum, vel hora, vel mensis, vel annus præsens; aut etiam præsens tempus humanæ mortalitatis, ab Adamo usque ad extremum judicii diem.

C A P. IV. *Solvuntur objectiones. Vbi de in-ceptione & desitione rei tum permanen-tis, tum successive.*

**O** Bjic. 1. Ex D. August. In Confess. præsens in tempore nullo spatio tenditur. Quem etiam loquendi modum videtur sequi Aristot. Ergo sic datur instans temporis reale & formale. R. Ab iis sumi instans, non physicè, sed moraliter, seu ex communi hominum æstimatione, pro brevissimo temporis spatio.

*Inst. 1.* Multa sunt quæ fiunt in instanti. Ergo datur instans reale & formale temporis, cui rerum illarum productio respondeat. *Prob. Ant.* Sic enim Angelus v. g. creatur in instanti indivisibili: siquidem non creatur per partes, aut successive, cum partes sui non habeat hoc modo producibiles. Ergo sic dabitur instans reale creationis Angelicæ: ne quid dicam de intellectionis actu, de instantaneâ luminis productione,

ne, aliisque id genus. R. Creationem Angeli, seu primum ipsius *esse*, fieri quidem in instanti; sic tamen ut consequenter aliquandiu conserve-  
tur; neque ex hypothese illius creationis, non possit non conservari. Alioquin ex successione immediatâ indivisibilium ejusmodi, posset constitui duratio temporis continuo & successivo commensurabilis: hoc autem repugnat; nam ex doctrinâ capitis superioris, tempus est divisibile in infinitum, & nunquam usque ad indivisibile: ergo ejus duratio non potest constari ex indivisibilibus, aut ipsi commensurari successio aliqua indivisibilium realium, seu realiter & entitati-  
vè distinctorum. Necesse est igitur ut quæ res secundum aliquam entitatem producit, aliquandiu saltem in suo *esse* conserve-  
tur, sicque participet Divinam æternitatem, quomodo pro suâ qualicunque extensione participat Divinam ipsam immensitatem, &c.

*Inst. 2.* Intellectionis actus v.g. non est nisi quando fit; quia non habet esse suum nisi in fieri. C. Atqui fit tantum in instanti: ergo est tantum in instanti. *Dist. min.* Fit tantum in instanti, & præterea non conservatur, sicut dixi de Angelo. N. Fit & conservatur. C.

*Inst. 3.* Deus potest rem omnem creatam pro eo omni tempore in quo existit annihilare. Non enim conservatur à Deo nisi liberè; siquidem, pro eâ omni parte temporis in quâ existit, est sub libero Dei dominio. Ergo sic potest res creata existere solum per instans, cui succedat immediatè aliud, & aliud simile instans reale, &c. R. Rem creatam posse à Deo annihilari pro eâ omni parte distributivè sumptâ, non autem pro omni collectivè sumptâ. Neque illa necessitas conservandæ creaturæ ad aliquod

tempus pugnat cum libero Dei Dominio, quia est tantum consequens ad liberum ipsius decretum de condenda illa creatura.

*Inst. 4.* Multa sunt instantanea in fieri, quæ in suo esse non conservantur: ergo necesse est illa existere per solum instans. *Prob. Ant.* Descripta jam superiori in Disput. hypothese, de regula recta quæ moveatur circulariter circa alteram immotam. Nam eo in motu fit modò parallela, modò perpendicularis rectæ illi alteri: neque per hunc motum istiusmodi parallelismus aut perpendicularitas potest existere nisi per instans: quia perpendicularitas & parallelismus non suscipiunt magis & minus. Ergo sic datur *instans rei* sine ipsius conservatione. &c. Istud non esse *instans rei* secundum aliquam entitatem quæ per solum aliquod instans existat; quia nec motus, nec tempus est ens aliquod propriâ entitate; sed tantum est instans virtuale quoddam, & virtuales duntaxat habens distinctionem; nec tempori coexistit nisi *incommensurabiliter*. Quemadmodum prima Angeli creatio, seu inceptio non est nisi in instanti virtuali, nec distinguitur nisi virtualiter ab ipsius Angeli conservatione. Ita in quantitate permanenti, ex communi sententiâ, superficies non est nisi virtuale indivisibile, cum solâ virtuali distinctione. Quod etiam diximus de lineâ, & de puncto, ubi sermo erat de contactu globi.

*Objic. 1.* Quicquid existit temporis, illud nunc est, seu præsens est: neque enim existit aut præteritum, cum amplius non sit, aut futurum, cum nondum sit. At quicquid ex tempore præsens est, illud est indivisibile instans. Ergo quicquid existit temporis, illud est indivisibile instans;

stans ; ac proinde tempus non existit nisi per instantia indivisibilia, quæ sint partes illius constitutivæ. *Prob. min.* Quia quicquid existit temporis debet esse aliquid totum simul : ergo est instans indivisibile. Quia pars successiva non potest esse tota simul , siquidem illa non est divisibilis nisi in partes priores & posteriores. *R.* Nunc temporis quod existit , esse illius temporis partem successivam, puta aut horam, aut diem, aut annum successive & fluenter existentem ; nec tempus existere nisi per ejusmodi partes successive & fluenter existentes.

*Inst.* Nunc illud *divisibile* non habet nisi partes priores & posteriores , seu præteritas & futuras : ergo jam diceretur existere tum præteritum , tum præsens , tum futurum. *R.* Nunc illud hujus aut anni, aut diei, aut horæ, &c. non continere quidem nisi partes priores & posteriores : at partes istæ non idcirco habent rationem præteriti aut futuri comparative ad hunc vel annum, vel diem, &c. Nam v. g. mensis December anni hujus vertentis , non dicitur mensis futurus respectivè ad hunc annum , sed tantum respectivè ad priores istos menses. Ita præsens dies continet plures horas comparative ad invicem aut præteritas , aut futuras, non autem comparative ad hunc diem , in quo potius dicuntur successive præsentis Vt enim dies præsens idem est ac partes ipsius collectivè sumptæ ; ita partes illæ debent æstimari perinde ipsi præsentis successive.

*Obic. 3.* Quæ simul non existunt, ea non possunt uniri inter se , aut habere indistinctionem ab invicem : atqui partes temporis simul non existunt. Ergo non possunt uniri inter se , &c. Ergo nec faciunt aliquod continuum per sui partes

tes continuas existens, &c. *Prob. maj.* Quia unio simul conjungit extrema : ergo supponit extrema illa esse simul. *R.* Verum esse illud de unione permanenti, non autem de successivâ.

*Inst. 1.* *Non ens* non potest continuari cum ente, seu esse idem continuativè cum ipso : sed præteritum, quia esse desit ; & futurum, quia nondum est, sunt non ens : ergo non possunt continuari cum præsentis. *Dist. Ma.* Quod est non ens, tam ratione totius, quàm ratione sui, non potest etiam successivè continuari cum ente præsentis. *C.* Negatur verò, si quod est non ens ratione sui, illud saltem fuerit ens ratione totius quod constituit, &c.

*Inst. 2.* *Nunc existens* non potest continuari cum eo quod non est *nunc existens* ; quia opponuntur ut *ens*, & *non ens*, quæ non possunt uniri inter se, aut unum aliquod ens reale constituere : atqui sic se habent præteritum & præsens, &c. *Dist. Ma.* Quod non est nunc existens nec ratione sui, nec ratione totius. *C.* Quod saltem est existens ratione totius quod constituit, & ratione præsentis, cui successivè continuum est. Item præterea *Dist. Ma.* Non potest cum præsentis continuari permanenti, seu cum ipso uniri unione permanenti. *C.* Unione successivâ. *N.*

*Inst. 3.* Deberet præteritum, aut futurum esse ens, & actu existens etiam ratione sui, ut diceretur continuari actu cum præsentis. Ergo nulla solutio. *Prob. Ant.* Quia propositiones de tertio adjacente non sunt veræ, nisi præsuppositâ veritate propositionis de secundo adjacente. Quomodo vera non est ista propositio, *Petrus est albus*, nisi præsupponatur vera esse ista, *Petrus est*. Ergo à pari verè dici non poterit *præteritum unitur cum præsentis*, nisi vera sit ista propositio,

fitio, *præteritum est*, seu *existit actu*. R. Satis est quod existat ratione totius, & ratione præsentis successivè existentis, cui successivè fit continuum. Hæcque est natura entis successivi, in quo discrepat ab ente permanenti.

*Inst.* 4. Quod non est nunc, nullo modo est actu; neque enim habet ullum *esse* existens in rerum naturâ: ergo non potest continuari cum eo quod est actu. *Dist. Ant.* Quod non est nunc neque ratione sui, neque ratione totius quod constituit, aut ratione præsentis cui successivè unitur. C. Secus. N.

*Inst.* 5. Partes præteritæ in tempore non magis continuantur cum præsentî, quàm si jam stillante aqua, & existente posteriore guttâ, priores annihilentur; quæ consequenter non dicerentur facere unam aquam continuam cum illâ guttâ existente. *Dist.* Non facerent quidem unam aquam *permanenter* continuam; sed tantùm successivè continuam. Quâ ratione dicimus aquas Tyberis jam fluentes, eundem per continuationem esse fluvium cum eo qui olim exstitit, tum eundem perseverare semper, etsi priores aquæ fuissent prorsus annihilatæ.

*Obje.* 4. Si tempus, aut motus constet ex partibus in infinitum divisibilibus; non posset in eo assignari aut prima, aut ultima; nec proinde posset incipere aut finiri. Atqui falsum conf. ergo & antec. R. Ex communi loquendi modo, res illas incipere, & desinere extrinsecè, seu per negationes: quas vulgò ita explicant: ac primò quidem, ut inquirunt, motus, aut tempus incipit per ultimum sui non esse, quatenus verum est dicere, *nunc ultimò non est aut motus, aut tempus, sed immediatè postea erit*. Desinit verò per primum sui non esse, quatenus vera est

quoque illa propositio, *nunc primò non est aut motus, aut tempus, immediatè antea erat.*

*Notabis* enim, per illud genus inceptionis & desitionis extrinsecæ; seu per illum loquendi modum, non designari ullam aut primam, aut ultimam partem ulterius non divisibilem; Ideoque propriè accommodatur continuo ejusmodi: cum etiam permanentis continui terminatio explicetur per negationem ulterioris extensionis: quanquam & dicitur quoque terminari positivè, per superficiem saltem virtualem. At

*Not. 2.* Aliâ methodo, & quidem contrariâ explicari *inceptionem & desitionem* entium permanentium; id est, quæ habent suum esse totum simul. Nempe ajunt illa incipere & desinere intrinsecè, per primum & ultimum sui esse; ita ut verè dixeris, *nunc primò res est, immediatè ante non erat. Aut ultimò res est, immediatè post non erit.*

Atque illi quidem loquendi modi vulgò admittuntur à Philosophis; quia sufficienter explicant id quod intendimus. Quanquam

*Not. 3.* Dici etiam posse, quòd res permanens desinat extrinsecè. Istudque tunc maximè usurpatur, cum una mutatio instantanea succedit alteri immediatè. Quomodo in generatione substantiali vulgò dicimus, *primum non esse formæ unius; vel primum non esse privationis, est primum esse formæ genitæ.* Alioquin, ex modo loquendi nostro, intelligerentur duæ formæ simul existere in materiâ; aut etiam simul esse privatio cum formâ: quod repugnat. Item,

*Not. 4.* Propriè loquendo, rem nullam sive permanentem, sive successivam incipere nisi intrinsecè. *Prob.* Quia quod incipit esse, debet necessariò habere aliquid saltem sui esse: quod  
enim



enim nullo modo habet *esse*, non potest dici incipere *esse*. Et verò motus aut tempus non magis de facto existit in instanti extrinseco, quàm existeret centum antè annis : ergo in illo instanti extrinseco non magis incipit, quàm incipiebat centum antè annis. Item

*Not. 5.* Inceptionem & desitionem illam intrinsecam in rebus successivis posse explicari per partem aliquam divisibilem aut primam, aut ultimam, quam determinaveris. Sic enim dies *v. g.* rectè dicitur incipere per primam horam, aut per primum sui minutum : quo pacto & finiri diceretur per ultimam sui horam, aut ultimum minutum, &c. Et si enim illa hora prima aut ultima sit divisibilis in alias & alias partes priores & posteriores ipsi horæ communicantes & intrinsecas ; non est tamen divisibilis in alias horas ; solâque hæc est aut prima, aut ultima. Quâ ratione, per proportionem, & in continuo permanenti assignatur prima aut ultima pars determinata, putà pes aut primus, aut ultimus, &c.

C A P. V. *Nulla res creata potuit durare  
ab aeterno.*

**F**uit quidem liberum Deo creare mundum prius & prius in infinitum, ac proinde prioribus & prioribus in infinitum partibus virtutibus æternitatis Divinæ, respondere potuit mundus, ita ut jam centum mille, & plures annos perdurasset. Nihil enim implicat. Sed

*Dico I.* Nulla res creata potuit existere ab æterno. *Prob. 1.* Autoritate SS. PP. ubi contra Arianos, Verbum æterni Patris esse Deum ostendunt ex eo quòd sacræ literæ doceant ipsum esse æternum. Quæ ratio non foret efficax ; si quid

præter Deum posset esse æternum. Neque verò, ut scribit D. Aug. *lib. 1. contra Maximinum*, Ariani negabant creaturam posse ab æterno existere, sed negabant tantum ex eo sequi Verbum esse Deum. Ita S. Ioan. Damasc. *lib. 1. De Fide Orth. c. 8.* aliisque in locis, docet creationem Deo co-æternam esse non posse; seu quod de non esse deducitur ad esse, *suapte naturâ illi non coexistere, quod sine principio existit.* Suppono enim, id quod de se est essentialiter ex nihilo sui, transire de non esse, ad esse sui, ut fiat existens: talemque esse creaturam ut sic, cum non sit ens à se. Quâ factâ hypothesi, in hunc modum argumentor. Quod transit de non esse sui ad esse sui, non est æternum. Atqui talis est creatura ut sic. Ergo non est æterna. *Prob. ma.* quod supponit prius non esse sui, non est æternum: quia quod habet aliquid se prius, inde habet initium suæ durationis, seu inde incipit; cum tamen id quod est æternum non incipiat. Atqui creatura transiens de non esse sui ad esse sui, supponeret prius non esse sui. Ergo non esset æterna. *Respondent;* Sufficere quoddam sit ex nihilo sui; seu non ex præexistente subjecto, ut dicatur creari; non autem ut prius fuerit sub nihilo sui. *Contrâ* sic urgeo. Etiam id quod fit ex nihilo sui, debet prius fuisse sub nihilo sui, tanquam sub termino à quo transit ad esse sui: ergo nulla solutio. *Prob. Ant.* Cum enim creatura de se & essentialiter sit non ens, non potest transire ad esse sui, nisi præsupponatur fuisse sub non esse sui: quomodo nihil transit à termino à quo, ad terminum ad quem, nisi supponatur fuisse in, vel sub termino à quo; ut patet inductione. Et verò, sicut se habet privatio ad formam quæ generatur in materiâ; ita per proportionem negatio ad ens illud quod creatur: perinde

inde enim fit ex *non esse* sui, tanquam ex termino à quo : ergo quomodo privatio est aliquid prius formâ genitâ ; nec simul esse potest cum formâ ; ita per proportionem dicendum est de ente quod creatur, & de illius negatione. Ergo cùm ens creatum sit posterius naturâ ad sui *non esse* , incepit esse : ergo non est æternum.

*Confir.* Quicquid est extra Deum, est terminus creationis ; ergo habet primum *esse* sui ; ac proinde non est æternum. *Prob. Conf.* Quia creatio est prima rei productio : nec differt creatio à conservatione, nisi quia creatio includit novitatem essendi , conservatio autem supponit primam rei productionem. Ergo etiam quicquid conservatur à Deo , supponitur ab ipso primò productum , ac proinde cum novitate essendi. Item , tam creatio supponit antecedens sui *non esse*, quàm annihilatio præsupponit ipsum *esse* rei : atqui nihil annihilatur, nisi quod prius esset ens ; ergo nihil creatur quod prius non fuerit non ens ; & consequenter quod non includat novitatem essendi, seu quod de novo non existat, cùm antea per totam æternitatem fuisset sub nihilo. Atque ut istud confirmetur , tam de *esse* permanenti , contra D. Thomam, quàm de ente successivo, contra alios ,

*Dico præterea* I I. Ens permanens ab æterno esse non potest. *Prob.* Quia ab æterno connaturaliter operari non posset ; cùm enim operari sequatur ad *esse*, nec magis implicet rem connaturaliter operari non posse, quàm non posse existere ; si ab æterno connaturaliter operari non potest, sequitur nec posse existere ab æterno. Probatur verò, quòd ab æterno juxta naturam suam operari non posset. Nam ignis creatus ab æterno , & applicatus ad stupam comburendam ,  
ipsam

ipsam tamen non combureret, nisi finitâ æternitate, etsi illa stupra sit finitæ solùm resistantiæ, ac proinde finito solùm tempore debeat absumi. Item, lapis ingens ab æterno creatus medio in aëre cum omnibus ad descensum requisitis, non posset spatium quantumvis finitum, finito tempore decurrere, sed tantùm infinito. Item, Angelus ab æterno creatus, tumque simul exercens aliquam operationem vel intellectus, vel liberæ voluntatis, ab eâ cessare non posset, nisi finitâ æternitate. Mulier prægnans partum edere in lucem nequiret, nisi post æternitatem. Item, si quis crearetur ab æterno pronuncians syllabam *ba*, cessare non posset, nisi completâ æternitate, &c. *Prob.* Quia si hæc finito solùm tempore perficerentur, jam inde initium durationis suæ designarent; cum tamen sit essenziale durationi æternæ, ut initium sui non habeat; nec proinde possit ad illius initium perveniri, etiam procedendo in infinitum: at perveniretur tandem ad initium durationis finitæ; uti quidem per se manifestum est.

Neque verò etiam illud est omittendum, quodd Deus creaturam ab æterno conditam non posset annihilare, nisi elapsâ æternitate: non enim posset illud dici æternum, quod finito solùm tempore extitisset. Atqui repugnat creaturam pro eo omni tempore quo existit, non posse etiam absolutè annihilari à Deo; sic enim Deus non diceretur habere supremum dominium in illam creaturam. *Respondent.* Creaturam in eo casu debere quidem necessariò conservari per totam æternitatem; sed necessitatem illam non repugnare cum Dominio & libertate Dei; quia est tantùm consequens, & ex hypothese quodd Deus liberè illam voluerit producere ab æterno.

*Con-*

*Contrà verò est.* Quauvis enim ex hypothefi quòd Deus decreverit creaturam aliquam conseruare per totam æternitatem, non possit consequenter, ratione suæ immutabilitatis, illam per totam æternitatem non conseruare: pertinet tamen ad ipsius libertatem & supremum dominium, ut ita statuens de creaturâ, potuerit contrarium statuere. Quod secùs eveniret in hypothefi creaturæ ab æterno: siquidem non posset habere aliud decretum, quàm de illâ per totam æternitatem conseruandâ.

*Dico III.* Multò minùs ab æterno potuissent existere entia successiva, ut motus, & tempus. *Prob.* Quia ens successivum dicit essentialiter *prius & posterius*. Atqui non potest esse ab æterno *prius & posterius*. Pars enim motus aut temporis *posterior*, præsupponeret *priorem*, cujus ex desitione traheret initium sui. Quinetiam pars illa *prior* non haberet finitam solùm durationem; ergo posterior non inciperet nisi elapsâ æternitate: ergo non existeret ab æterno; quia quod supponit aliud prius se ab æterno existens, æternum esse nequit. Adde quod pars ejusmodi *prior* ab æterno existens sine *posteriore*, non posset dici pars entis successivi, quia non haberet esse in fluxu continuo partium priorum & posteriorum, &c.

Item, sol *v. g.* creatus ab æterno cum suo motu, fuisset productus in aliquâ cœli parte determinatâ, putà in oriente, vel in occidente; indèque potuisset assignari à Deo initium motus solaris: ergo ille motus qui ex hypothefi foret æternus, simul non esset æternus, quia non caret initio sui.

Item, inde sequeretur ab æterno fluxisse annos actu infinitos, diesque & horas pariter actu in-

infinitas ; cuiusmodi infinitudo contradictionem in se involvit : nam infinitus numerus annorum superaretur à numero infinito dierum , aut horarum, &c. Item, sic potuissent ab æterno existere generationes hominum aliæ post alias ; aut etiam ad singulas æternitatis horas , & dies creari novi, & novi Angeli ; ac proinde sic existeret actu infinita multitudo Angelorum , animarum rationalium, &c. Item, in iis generationibus aut hominum , aut aliorum animalium quæ extitissent ab æterno , reperiretur tum primus *v. g.* homo ; ille nimirum qui immediate prodiiisset à Deo ; tum ultimus qui hodie nascitur : ergo sic fieret infinitum clausum duobus terminis. Item, sic duratio quæ supponitur infinita, sive entis permanentis, sive successivi, non esset impertransibilis : ergo simul non esset infinita. *Prob. Ant.* Quia de facto Angelus creatus ab æterno jam pertransiisset æternam durationem ; possetque regrediendo mente & cogitatione ab ipso pertransiri , singulos in eâ veluti annos designando ; Quia non est major distantia ab hoc instanti usque in æternum, quàm ab æterno usque ad hoc instans. Nec dicas, valeret istud argumentum etiam contra Dei æternitatem. *N. parit.* Quia suppono ex Metaphysicâ de Deo , Divinam Æternitatem esse totam simul, & veluti instans permanens, nihilque ipsius præterire.

*Notabis autem Æternitatem esse quoddam genus infiniti , ac proinde pari modo esse attributum creaturis incommunicabile. Quibus quidem in quæstionibus inferri solet, quoddam sub sensu tum absoluto, tum hypothetico, res simul esset & non esset talis. Quemadmodum suis exponitur locis. Nec dicas ; Cùm ajunt res simul esset & non esset, quidni ex illâ propositione inferatur rei*

rei *possibilitas*, perinde ac *impossibilitas*? Siquidem tam asseritur *quod esset*, quàm *quod non esset*.  
*R.* Quia talis natura est *partis negativa*, ut omne affirmativum destruat; quamobrem solet dici *malignantis esse natura*.

C A P. V I. *Solvuntur Objectiones.*

**O** *Bjic.* 1. De se non repugnat aliquid produci ab æterno; nam in Divinis Filius & Spiritus S. producuntur ab æterno. Ergo falsum est quod diximus. *R.* Dictum est tantum, nihil posse produci ab æterno ex nihilo. Creaturæ autem duntaxat proprium est produci ex nihilo; nec repugnat creatura æterna, aut ratione creaturæ ut sic; aut ratione productionis æternæ ut sic; sed tantum ratione æternitatis conjunctæ cum creaturâ.

*Inst.* 1. In eâ propositione *creatura est æterna*, prædicatum non destruit subjectum; ergo non implicat contradictionem. *Nego Ant.* Nam æternitas destruit proprietatem essentialem creaturæ; nempe quod transierit à *non esse* sui ad *esse* sui.

*Inst.* 2. Esset effectus realis; & esset à Deo ex nihilo sui. Ergo haberet rationem creaturæ. *Dist. Ant.* Esset ex hypothesi, & simul absolute non esset; quia non intelligeretur transiisse à nihilo sui, ad *esse* sui.

*Inst.* 3. Nihil repugnat eam esse æternam à parte *post.* C. Ergo neque à parte *antè.* N. *parit.* Quia in isto solum casu supponeretur non transiisse à *non esse* sui, ad *esse* sui.

*Inst.* 4. Est possibilis ab æterno; nam ejus possibilitas est æterna; cum inceperit nunquam; ergo potuit esse ab æterno. *Dist. Ant.* Est possibilis ab æterno pro tempore; nec incepit unquam

quam ejus possibilitas pro tempore. C. Est possibilis pro æterno. N.

*Inst. 5.* Datur aliqua veritas entis creati, etiam pro æterno. Ergo & entitas : quia, juxta Metaphysicos, idem sunt *ens & verum*. *Prob. Ant.* Nam ab æterno & pro æterno vera est illa propositio, *Homo est animal*. Vel *quinque & quatuor faciunt novem*. Ideoque dicuntur propositiones sempiternæ veritatis. *R.* Sic tantum sunt veræ per conformitatem ad objectum in se, abstrahendo ab ejus existentia. Ut habetur in *Logicâ Disp. 3. c. 6.* vide & *Metaph. Tract. 1. Disp. 3. c. 3.*

*Inst. 6.* Potuit esse ante quodlibet prius, seu ante quodlibet tempus. Ergo ab æterno. *Dist. Ant.* Potuit esse ante quodlibet tempus, & ante prius determinatum, aut determinabile. C. Indeterminatum. N. Notandum enim est æternitatis partes virtuales de se esse quid indeterminatum; item singulas distributive esse à Deo determinabiles, non autem singulas collectivè; cum earum collectio sit impossibilis.

*Obje. 2.* Ab æterno Deus habet omnipotentiam liberam, seu requisita omnia ad producendum mundum : ergo potest illum producere ab æterno. *Dist. Ant.* Habet ad producendum pro tempore. C. Pro æterno. N. Quia nulla est potentia ad impossibile. Nec consequenter Deus potest agere ad extra, nisi absolutâ æternitate.

*Inst. 1.* Sequeretur Deum esse perfectiorem in agendo post æternitatem quàm ante ; quod implicat : quia Deus nullam unquam potest acquirere perfectionem. *R.* Deum eandem perfectionem ad agendum pro tempore habere semper, sive ab æterno, sive in tempore; ab eâ tamen prodire nihil potest nisi in tempore.

*Inst. 2.* Ergo mundi productio æterna superaret



raret vires omnipotentia Divinae. Atqui hoc implicat. R. Perinde est ac effectio chymerae; quæ quidem non est aut *juxta* vires omnipotentia Divinae; aut *supra*, quatenus dicatur tantum producibilis à potentia superiori; sed est tantum *præter*.

*Inst.* 3. Sequeretur Deum pro totâ æternitate non habere dominium in suos effectus. R. Habere totâ æternitate dominium in suos effectus, non tamen pro totâ æternitate, sed pro tempore.

*Objic.* 3. Potentia temporali respondet effectus temporalis. C. Ergo æternæ æternus; ergo cum detur potentia æterna, poterit ab eâ esse æternus effectus. Alioqui nihil haberet supra temporalem. R. Habere hoc quod possit effectum suum producere prius & prius in infinitum; non autem quod possit æternum; quia de se implicat, seu quia de se res creata habet incapacitatem ad hoc ut sit æterna: quatenus debet transire à *non esse* sui, ad *esse* sui.

*Inst.* 1. Si sol esset ab æterno, inquit D. August. ab eo lumen æternum effectivè procederet. *Prob.* Quia effectus potest simul esse cum suâ causâ. Ergo, inquit D. Th. Suarez & alii, cum Deus sit ab æterno, potest esse cum eo effectus aliquis æternus. R. Effectus potest simul esse cum causâ creatâ, quia in eo casu potest servari transitus à *non esse* sui, ad *esse* sui: at è contrâ, non potest simul esse cum causâ increatâ.

*Dist. autem primum Ant.* Sol ex hypothese impossibili suæ æternitatis produceret lumen æternum. *Transf.* Perinde enim est ac ubi ajunt, si chymera esset animal, esset vivens, sentiens, &c. quæ in sensu absoluto falsa sunt; unde illa simul essent in sensu hypothetico, & simul non essent, in sensu videlicet absoluto.

*Inst.*

*Inst. 2.* Deus potest id omne quod potest Sol, si esset æternus. Atqui Sol posset effectum æternum. Ergo & Deus. *Dist. Ma.* Potest in sensu hypothetico, id est ex hypothesi quod esset possibile. *C.* Potest in sensu absoluto. *N.* Nam illud absolutè secundum se est impossibile, nec datur potentia ad impossibile.

*Inst. 3.* Si Sol foret æternus, produceret lumen æternum. Ergo ratio propter quam sol non producat lumen æternum, est defectus æternitatis. Atqui hæc conditio non deest in Deo: ergo potuit producere effectum æternum. *Dist. Ant.* Sol æternus lumen æternum produceret in sensu hypothetico. *C.* Quia ex hypothesi quod daretur Sol æternus, sequeretur creaturam ab æterno existentem non esse impossibilem. At negandum illud est in sensu absoluto. Nec ratio, cur Sol produceret lumen æternum, petitur ab æternitate illâ Solis, nisi in sensu hypothetico, quem modò explicui. Alioquin, absolutè loquendo, creatura habet de se absolutè, quod nequeat produci ab æterno.

*Inst. 4.* Si Deus esset agens necessarium, produceret creaturas ab æterno; *juxta philosophiam Aristotelis.* Atqui nihil de illâ virtute detrahit, quod sit agens liberum: ergo pariter sic posset producere creaturas ab æterno. *R.* si esset agens necessarium, minùs posset; imò quemadmodum haberetur in *Metaphys. de Deo. cap. 9.* nihil posset actu efficere.

*Inst. 5.* Negatio mundi ab æterno est libera Deo; id est, eam ab æterno potuit pro suâ libertate tollere. *Dist.* Tollere pro æterno. *N.* Pro tempore. *C.*

*Inst. 6.* Non potest assignari in æternitate quando primùm duntaxat potuerit Deus aliquid pro-

producere. C. Ergo semper potuit. *Dist.* Semper potuit pro eo tempore quod voluerit eligere. C. Pro æterno. N. Item, R. Potuit quidem prius & prius sine termino indeterminatè; sed non est primum determinatum in totâ æternitate, in quo solùm potuerit mundus produci à Deo.






*Colliges* verò ex dictis. 1. In causâ efficiente creatâ sufficere prioritatem naturæ ad effectum; at in increatâ necessariam esse prioritatem æternitatis, pro quâ non sit possibilis effectus ullus. Nec dicas, quando ergo potuit creari mundus? Quando Deus voluit: siquidem illud solùm pendet à libero ejus nutu.

*Collig.* 2. In æternis non reperiri *prius & posterius*. Illud de prioritate aut posterioritate temporis probavi cap. superiori. Resque eodem modo se habet de prioritate naturæ. Cùm enim ajunt, statum indifferentiæ necessarium ad libertatem, priorem fuisse ad statum liberæ determinationis; negandum illud est. Quia Deus non dicitur antecederet indifferentem ad productionem effectuum, per aliquam prioritatem positivam, sed tantùm per negativam; eo nimirum sensu, quòd nihil habuerit antecedens, unde voluntas ejus ad agendum determinaretur. Eamque ob causam mundi productio dicitur libera, quia sic ab æterno Deus voluit mundum producere, ut etiam ab æterno potuerit non velle illud producere.

*Collig.* 3. Æternitatem simpliciter dictam esse attributum Dei proprium, & *infiniti* genus quoddam creaturis incommunicabile: quare obrem Deus ita solus de facto est æternus, ut solus esse æternus possit. Atque hujus quidem æternitatis naturam exposuimus in *Metaphysicâ* de Deo. cap. 5.

*Ad majorem Dei gloriam.*

# PRO PHYSICA UNIVERS:



I N D E X  
T R A C T A T V V M,  
D I S P U T A T I O N V M  
E T  
C A P I T V M  
P H Y S I C Æ U N I V E R S A L I S.

*Praefatio de naturâ Physicâ.*

P A R S P R I M A.

De naturâ & principiis corporis naturalis.

T R A C T A T V S I.

De principiis intrinsecis, & de naturâ seu  
essentiâ corporis naturalis.

D I S P U T A T I O I.

De principiis intrinsecis corporis naturalis.

CAP. I. **N**otiones quædam principii, & corpo-  
ris naturalis. 7

II. Quot sint principia intrinseca corporis natu-  
ralis, tam compositionis, quàm generatio-  
nis. 13

III. Solvuntur objectiones. 16

# I N D E X.

## DISPUTATIO II.

### De Materiâ primâ.

CAP. I.	<b>N</b>	Atura materia prima.	17
II.	<b>M</b>	Materia prima incorruptibilitas, & dependentia à formis substantialibus.	23
III.	<b>M</b>	Materia prima unitas specifica, cum propria Quantitate.	28

## DISPUTATIO III.

### De forma substantiali.

CAP. I.	<b>N</b>	Atura, divisio, & productio forma substantialis.	32
II.	<b>D</b>	De varietate, aut multiplicitate formarum substantialium in eadem materiâ primâ.	34
III.	<b>D</b>	De formis partialibus.	40

## DISPUTATIO IV.

### De Toto, seu composito naturali.

CAP. I.	<b>N</b>	Atura seu essentia compositi naturalis.	46
II.	<b>M</b>	Modus quo uniuntur partes in toto, seu composito naturali.	49
III.	<b>S</b>	Solvuntur objectiones.	53
IV.	<b>T</b>	Totius à partibus unitis, & collectivè sumptis indistinctio.	55
V.	<b>D</b>	De existentia compositi naturalis.	59

# I N D E X

## T R A C T A T V S II.

De principiis, seu causis extrinsecis corporis naturalis.

*Praefatio de naturâ & divisionibus causæ in communi.* 63

### D I S P U T A T I O I.

De naturâ & divisionibus, seu multiplicitate causæ efficientis.

CAP. I.	<b>N</b> atura causæ efficientis.	66
II.	<b>C</b> ausæ efficientis variæ divisiones.	67
III.	<i>Aliæ divisiones causæ efficientis.</i>	74

### D I S P U T A T I O II.

Causæ efficientis causalitas, seu actio.

CAP. I.	<b>A</b> ctionis natura, & divisiones.	80
II.	<i>Actiois indistinctio.</i>	84

### D I S P U T A T I O III.

Dependentia causæ creatæ ab increatâ.

CAP. I.	<b>D</b> E Creatione.	87
II.	<b>D</b> e conservatione.	91
III.	<i>De concursu Dei simultaneo ad agendum, rebus creatis necessario.</i>	92
IV.	<i>Solvuntur objectiones.</i>	94
V.	<i>Determinatio causæ creatæ ad effectum in individuo, per concursum Dei simultaneum.</i>	98
VI.	<i>De subordinatione causæ secundæ, tum de præmotione &amp; concursu Dei prævio, causæ illi secundæ ad agendum necessario.</i>	101
VII.	<i>Solvuntur objectiones.</i>	108

# I N D E X.

## DISPUTATIO IV.

De virtute activâ causarum naturalium.

- CAP. I.** **V**is emanativa, & activitas accidentium. 112
- II.** Solvuntur objectiones. 116
- III.** Activitas substantie creata mediis accidentalibus potentiis. 118
- IV.** De sphaerâ activitatis agentium naturalium; & de eorum actione directâ, reflexâ, & refractâ. 122

## DISPUTATIO V.

De conditionibus ad agendum.

- CAP. I.** **D**istinctio agentis & passi; tum de actione per antiperistasis. 128
- II.** Dissimilitudo agentis & passi. 130
- III.** Agentis & passi indistantia; tum de concursu mediû, &c. 132
- IV.** De vario genere qualitatum, per quas explicari potest actio in distans. 135
- V.** Varii modi explicanda actionis in distans. 138
- VI.** De excessu virtutis activæ, requisito ad superandam passi resistantiam. 143
- VII.** De Reactione. 145

## DISPUTATIO VI.

De producibilitate rerum.

- CAP. I.** **A**ffectus idem sit producibilis totaliter ab agentibus diversis ejusdem ordinis. 149
- II.** Solvuntur objectiones. 153
- III.** De



# I N D E X.

III.	De Reproductione.	156
IV.	An ab eadem causa possint esse contrarii effectus.	160

## DISPUTATIO VII.

De causâ finali.

CAP. I.	Natura causa finalis.	161
II.	Quomodo finis moveat ad agendum.	163

## PHYSICÆ VNIVERSALIS PARS SECVNDA.

### TRACTATVS VNICVS.

De proprietatibus corporis naturalis.

<u>Prefatio.</u>		<u>168</u>
------------------	--	------------

## DISPUTATIO I.

De Quantitate propriâ corporis naturalis.

CAP. I.	Distinctio & subjectum hujus quantitatis.	171
II.	Natura & formalis effectus quantitatis.	173
III.	Quantitatis, aut continui compositio.	179
IV.	Solviuntur objectiones.	186
V.	Partes in continuo distinctionem actu realem non habent.	189
VI.	De unionem partium in continuo,	196
VII.	Corporis quanti, seu continui terminatio; tum de illius contactu.	199
VIII.	Corporis quanti rarefactio, & condensatio.	206

APPENDIX.	De intensiōe qualitatum.	209
-----------	--------------------------	-----

# I N D E X.

## DISPUTATIO II.

### De Infinito.

CAP. I.	<b>N</b> atura Infiniti.	217
II.	Alia infiniti attributa essentialia.	221
III.	Impossibilitas entis creati simpliciter infiniti.	225
IV.	Solvuntur objectiones.	232
V.	Solvuntur alia objectiones.	238
VI.	Objectiones petita ex Theologia.	245

## DISPUTATIO III.

### De loco & vacuo.

CAP. I.	<b>N</b> atura loci.	251
II.	Forma constitutiva rei in loco.	256
III.	De existentia plurium simul corporum in eodem loco per penetrationem. Tum de existentia ejusdem in pluribus simul locis.	261
IV.	Solvuntur objectiones.	266
V.	De vacuo.	268
VI.	Qua virtute possit fieri vacuum; & qua in eo fieri possent.	273

## DISPUTATIO IV.

### De Motu.

CAP. I.	<b>N</b> atura motus in communi.	279
II.	Varia motus proprie dicti species & proprietates.	282
III.	Motus indistinctio sive a subjecto mobili, sive a termino.	284
IV.	Motus localis natura in particulari.	287
V.	Motus localis species varia.	291
VI.	Causa immediata motus in projectis.	293
VII.	Solvuntur objectiones.	296

**VIII. De**

# I N D E X.

VIII. De motu directo & reflexo.	299
IX. Motus localis proprietates.	302

## DISPUTATIO V.

### De duratione.

CAP. I. <b>N</b> atura durationis in communi.	304
---	-----

II. Durationis species diversa, tum præcipuè de Tempore.	309
--	-----

III. De existentiâ & continuatione partium in tempore.	315
--	-----

IV. Solvuntur objectiones. Vbi de inceptiione & defixiione rei tum permanentis, tum successivæ.	318
---	-----


V. Nulla res creata potuit durare ab æterno.	325
--	-----

VI. Solvuntur objectiones.	331
----------------------------	-----

# F I N I S.




A51 1454418













A 56.

BF